

**NINTH MIZORAM LEGISLATIVE ASSEMBLY
(SECOND SESSION CUM BUDGET SESSION)**

LIST OF BUSINESS

FOR ELEVENTH SITTING ON WEDNESDAY, THE 6th MARCH, 2024
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

FINANCIAL BUSINESS

DISCUSSION AND VOTING ON DEMANDS

2. **PU VANLALHLANA**, Minister to submit to the vote of the House various Demands under his charge.

<i>Demand No.</i>	<i>Purpose</i>	<i>Amount (in ₹)</i>	<i>Demand for Grants Page No.</i>
12	Parliamentary Affairs	1,03,70,000.00	76-78
42	Transport	44,73,93,000.00	443-451
45	Public Works	7,32,71,22,000.00	459-484
TOTAL		7,78,48,85,000.00	

3. **PU F. RODINGLIANA**, Minister to submit to the vote of the House various Demands under his charge.

<i>Demand No.</i>	<i>Purpose</i>	<i>Amount (in ₹)</i>	<i>Demand for Grants Page No.</i>
18	Printing & Stationery	13,19,72,000.00	174-177
39	Power & Electricity	9,43,51,96,000.00	411-421
40	Commerce & Industries	60,44,11,000.00	422-437
TOTAL		10,17,15,79,000.00	

4. **PROF. LALNILAWMA**, Minister to submit to the vote of the House various Demands under his charge.

<i>Demand No.</i>	<i>Purpose</i>	<i>Amount (in ₹)</i>	<i>Demand for Grants Page No.</i>
25	Public Health Engineering	2,87,60,16,000.00	271-280
32	Horticulture	1,22,83,85,000.00	355-361
38	Rural Development	4,56,51,65,000.00	400-410
TOTAL		8,66,95,66,000.00	

VANLALTHANTLINGI
Commissioner & Secretary

HON. SPEAKER : *I hna te chu Lalpa kawltir rawh; Tichuan, i thil ruahman te chu tih nghehin a awm ang.*

-Thufingte 16: 3

Vawiinah member zahawm takte - Pu Lalthansanga leh Pu Lalchhuanthanga te damlohna avangin kan zingah an awm thei lo tih House ka hriattir e. Ngenna pakhat ka han siam duh a, member ten thu an sawi lai khan official gallery lam atangin thawm a awm deuh hlek nia sawi a awm a; khawngaih takin kan official lamte in lo insum deuh dawn nia.

Ka hmaah khan thil hlai tak kha a awm thin a, kan senior Pu Nguna te tlar khan an complain deuh a, 'i hma ami kha a lian lutuk a ni ang' an ti a. Chuvangin, tih dan kan han tidanglam a, a aia te zawkin kan han thlak a ni.

QUESTIONS & ANSWERS:

Zawhna & Chhanna-ah kan kal nghal ang a, Starred Question No. 161 hi Pu Lalchhuanthanga zawhna a ni a. Amaherawhchu, sawi tak ang khan dam lohna avangin a lo kal thei lo a. Tichuan, a aia zawhna zawt turin Pu VL Zaithanzama, Aizawl West-III Bialtu mawhphurhna a hlan a. Chuvangin, Pu VL Zaithanzama, Starred Question No. 161 zawt turin ilo sawm ang.

Starred Question No. 161 - Hydrel Project siam chungchang.

PU VL. ZAITHANZAMA: Pu Speaker, ka lawm e. Power & Electricity Department changtu Minister chhan atan, Starred Question No. 161 zawhnate chu -

- a) Kan sorkar hian hydrel project siam turin hmalak tumna a nei tawh em?
- b) Hmalak tumna awm se, khawi hmunahte nge hma lak tum a nih?
- c) Khawi hmunah nge hmalak a tumna hmasa ber?

HON. SPEAKER : Chhang turin Power & Electricity Department changtu Minister, Pu F. Rodingliana ilo sawm ang.

PU F. RODINGLIANA, HON. MINISTER: Pu Speaker, ka lawm e. Kan member-pui Pu Lalchhuanthanga zawhna chhanna chu -

- a) Nei tawh e.
- b) Tunah hian Tuivai, HEP (150 mW, Ngopa bul); Tlawng, HEP (120 mW, Lungleng khaw bul) leh Tuirini, HEP (24 mW, Sesawng bul) te hi thawh a nih theih nan hmalak mek a ni.
- c) Hmalak tumna hmasa ber hi sawi mai theih a ni lova, hydrel project siam tura thil tul pawimawh hrang hrangte leh a thawhna tur sum leh paite hmuh hmasak apiang thawh nghal zel a ni ang.

Ka lawm e.

HON. SPEAKER : *Zawhbelhna* - A zawhna neitu, Aizawl West-III bialtu, Pu VL. Zaithanzama ilo sawm ang.

PU VL. ZAITHANZAMA: Pu Speaker, ka lawm e. Kan sorkar hmasate khan tui khuap tura company-te agreement an siampui khan, kum engzat tan nge an lo siampui?.

HON. SPEAKER : *Zawhbelhna* - Lawngtlai West Bialtu, Pu C. Ngunlianchunga ilo sawm ang.

PU C. NGUNLIANCHUNGA: Pu Speaker, ka lawm e. Power & Electricity Department changtu Minister zahawm takin min chhan atana ka zawhbelhna chu –

i) Engvangin nge Lunglei atanga chhim lampang zawng saw khua a chhiat apianga kan thim ziah; power kan hmuh loh ziah? Hei hi a chhan min hrilh thei em? Tin, a chhan min hrilh theih chuan ka lawm ang a.

ii) Hei hi siamthat tumna a awm em? Khua a dur leh eng emaw deuh tawh hi chuan chhim lam sawn eng kan hmu lo reng mai zel a. Hei hi, a hrui a hlui tawh vang nge nia, eng vang nge?

HON. SPEAKER : *Zawhbelhna* zawt turin Palak bialtu member zahawm tak Pu K. Hrahmo.

PU K. HRAHMO : Pu Speaker, ka lawm e. Ka zawhbelhna chu- Chhimtuipui lui khilai Kawlchaw a khuah tur khi mithiamte chuan kum 4/5 an zir hnuah Megawatt 460 a pe chhuak thei e an ti a. Chuvangin, khi khi khuah belh tumna a awm em? Nimin lama kan Minister zahawm tak sawi danin Mizorama electric kan mamawh hi zankhatah Megawatt 160 vel a ni a ti a. Chhimtuipui lui khi a taka kan khuap theih chuan 460 MW pe chhuak thei a ni a. 200 MW pawh Mizoram in hman ta ila, a tam zawk 260 vel chu kan hralh chhuak thei ta a ni. A hlawk dawn em em a. Chuvangin, Chhimtuipui lui khi khuah tumna a awm em? Engvanga chawl ta nge a nih tih kha ka han zawt belh e.

HON. SPEAKER : A lawmawm e. Vawiinah hian Financial Business kan ti dawn a. Minister pathumte Demand kan sawi dawn a ni. Chuvangin, kan kal deuh zung zung ang a. Tin, zawhna zawttute khan a bik takin supplementary question kan zawhna kha zawt mai ila, a point-ah in zawt deuh zung zung ila a tha awm e.

A theih ang ang chhang turin Pu F. Rodingliana, Power & Electricity Minister ilo sawm ang.

PU F. RODINGLIANA, HON. MINISTER: Ka lawm e. Kan Member Pu Zaia zawhna kha – Kan sorkar hmasate khan agreement an lo ziahpui tawh company eng emaw zat a awm a. Chunga an MoU te kan han zir chuan a time limit hi a awm lutuk

lova; a thenah chuan kum 99 te a ni a, kha kha a tha kan ti vak lova. Eng emaw zat chu tunah hian hmalak tawh lo tura cancel te an ni a.

A pahnihna - Pu Ngunlianchunga rawn zawh kha - khaw chhiat apianga thim chu a buaithlak viau maithei a. Tunah hian 133 line hi Hnahtial atang leh hmun hnih dang atanga hmalak tum mek a ni a. Rokhawlhna neuh neuh a awm avangin sum awmsa pawh hman theih a ni lova. Chuvang chuan, theihtawp chhuah a hmala turin department lamt e pawhin ngaihtuahna an hmang e tih kha ka chhanna ni ta se.

Palak Bialtu Pu Hrahmo zawhna kha, Chhimtuipui saw NEEPCO nena agreement ziah tawh a ni a. Amaherawhchu, tum anga thil a kal loh avangin agreement hi a tawp tawh a, cancel an ni a. Tunah hian kha ai te zawk, a samkhai zawka hmalak dan tur ngaihtuah mek a ni e. Pu Speaker, ka lawm e.

HON. SPEAKER : Starred Question No. 162 hi hmannah khan kan senior Member Pu C. Ngunlianchunga, Lawngtlai West Bialtu zahawm tak khan Supplementary question-ah khan a zawt tawh a. A changtu Minister hian chhang se kan lungawi thei mai ang em? Zawt ve reng reng ang maw? Awle, zawt turin ilo sawm ang Pu C. Ngunlianchunga.

Starred Question No. 162 - Autonomous District Council chhunga sorkar-hnathawk aikal lak chungchang.

PU C. NGUNLIANCHUNGA: Pu Speaker, ka lawm e. Ka zawhna Starred Question No. 162, District Council & Minority Affairs Department changtu Minister zahawm tak chhan atan-

- a) Autonomous District Council-te hnenah sorkar hnathawk aikal an chhawr leh chhawr loh DC&MA hian District Council pathumte heng - Lai, Mara leh Chakma-ah zawhna a zawt em?
- b) Zawh ni ta se, Autonomous District Council thuneihna palzutin aikal chungchangah hian a inrawlh dawn tihna a ni em?

HON. SPEAKER : Chhang turin District Council & Minority Affairs Department changtu Minister, Pu C. Lalsawivunga ilo sawm ang.

PU LALSAWIVUNGA, HON. MINISTER: Pu Speaker, ka lawm e. Lawngtlai West Bialtu zahawm tak Pu C. Ngunlianchunga zawhna, chhanna chu hetiang hi a ni.

- a) District Council & Minority Affairs Department in Autonomous Council pathum, heng - Lai, Mara leh Chakma te hnenah sorkar hnathawk aikal an chhawr leh chhawr loh a zawt e.
- b) Aikal chungchangah hian DC&MA Department a inrawlh dawn lo.

HON. SPEAKER : Kan sawi nual tawh a, kan duhtawkw dawn em ni? Aw le, zawhbelhna zawt turin a zawhna nei tu Pu C. Ngunlianbunga ilo sawm ang.

PU C. NGUNLIANCHUNGA: Pu Speaker, a lawmawm khawp mai. ka zawhna kha, kan Minister in dik takin min hrilh a a lawmawm ka ti a. Chutih rual chuan, zawhna em em pawh ni chuang lovin, District Council te chanchin hi kan hriatchian ve hi a thain ka hria a. Demand ah te pawh kan la sawi ang a, mahse demand ah hian hun a tlem deuh avangin Question hours ah hian tlem han sawi ila.

Council din a nih dan saw 6th Schedule para pahnihnaah te, pathumna ah te, paruknaah te thuneihna pek an ni a. Hei hi lehlamah chuan, Dist. Council chanchin hre lo (kan Minister-in a hre lo tihna lam nilovin) thangthar 1980 hnua piangte, rambuai hnua piang tan phei chuan an hre lo viauin a lang thin a. Lushai Hills District Council kha 1952 ah pek a ni a, Pawi-Lakher Regional Council kha 23. 04. 1953 a pek an ni ve a ni. Tichuan, Mizo District Council kha 1972 ah UT ah hlankai a ni a. Regional Council-te kha 1972, Ni 29 leh thla 4 ah Autonomous Council pek ve an ni a. Tichuan, thuneihna lian te pek belh ve zelin, inrelbawlna hran Funds Rules te, Constituion and Conduct Business Rules te, Pay Rules te leh Recruitment Rules te inrelbawlna hran hlauha ding an ni ve a. Chuvang chuan, he lai House kaltlang pawh hian, Zoram mipuite hian, ‘Autonomous District Council-te hi mahnia India Danpui hnuaia ding ve an ni’ tih kan hriat a tha in ka hria. Thenkhat hian chi bing ang deuh zawnga lak te a awm thin a. Lushai Hills District Council hnuaiah khan, Pawi leh Lakher te kha Lushai an nih ve loh avanga pek an ni tih laia hi kan hriat ka duh khawp mai. Tunah Assam ah Autonomous District Council ten thuneihna lian tak tak an nei a, chung te chu District Council, vawiina Mizoram a mite pawh hian beiseiin an buaipui ve mek reng a, Delhi tlangah vawi tam tak an kal a. Assam-a Autonomous Council te phei chuan School Education-ah elementary atanga college thlengin Autonomous te kutah a awm a ni. Tin, Meghalaya ah te phei chuan Dan insiam theihna an nei a. Death sentence (inkhai hlum theihna) hial thuneihna District Council ten an nei a ni.

Nimin lama kan zawhna, zu zawrh chungchangah pawh khan an mahni product kha a duh chuan District Council khan a zuar thei a ni. Helai Mizoram-a zu zawrhna dan kan neih lai pawh khan Autonomous Council te chu a huam lo a ni. Pu Speaker, zawhna em em pawh ni lovin House information atan ka han sawi a ni e. Ka lawm e.

HON. SPEAKER : *Zawhbelhna* - Hrangturzo Bialtu, Member zahawm tak Pu Lalmuanpuia Punte ilo sawm ang.

PU LALMUANPUIA PUNTE: Pu Speaker, Ka lawm e. “Autonomous District Council pathumte hlauh leh allowance tihpun tumna a awm em?” tih ka zawh belh e.

HON. SPEAKER : A theih ang anga chhang turin Pu C. Lalsawivunga DC&MA Minister ilo sawm ang.

PU C. LALSAWIVUNGA, HON. MINISTER: Pu Speaker, ka lawm e. Lawngtlai West bialtu Pu C. Ngunlianchunga khan Autonomous District Council pathumte dinhmun a rawn sawi a, a lawmawmin, a bengvar thlak a. Ani hian thahnem hi a ngai a, a fakawm khawp mai a, kan tangho zel ang a, tha tak a sawihona hian thiltha a hring chhuak zelin a lang a. Chuvang chuan, kan hriat turte leh kan hriat tawk lohte pawh thil awm thei a ni a; kan tihtur kan lo tih loh te, kan tih loh zawk tur ka lo tih te pawh thil awmthei a ni a. Kan la sawiho zel ang a, a lawmawm khawp mai a.

Tuntum a zawhna bikah hi chuan, sorkar tharin ni 100 chhunga tihhlawhtlin tur a ruahmante zing ami a ni a, aikal chungchang hi rampum huap a ni a. Chuvang chuan, sorkar hmalaknaah hian kan ADC te pawh hi an tel ve vek a ni tih min hriatpui a thain ka hria a. Chuvang chuan, aikal chungchanga an dinhmun ADC te kan va zawh hian an thuneihna tihbuai tumna emaw, va inrawlh tumna a ni lo hrim hrim a ni tih kha min hriatpui ka duh a.

Tin, ADC te an salary chungchang kha tihfel a ni tawh a, Mara pawh, Lai pawh, Chakma te pawh an Salary Bill kha notified tawh a ni a. Lai kha 14.2.2024 ah tihchhuah a ni a; 12.2.2024 ah Mara Autonomous Salary/Allowance kha notification tihchhuah a ni a, 15.2.2024 ah CADC Salary/Allowance kha tih chhuah a ni e.

HON. SPEAKER : A lawmawm e. Starred Question No. 163 - Zawt turin Siaha Bialtu, Member zahawm tak Dr. K. Beichhua.

Starred Question No. 163 - Bamboo Link Road chungchang.

DR. K. BEICHHUA : Pu Speaker, ka lawm e. Horticulture Minister zahawm tak changtu hnena ka zawhna chu -

“Tun dinhmunah Bamboo Link Road engzat nge kan neih? khawi hmunahte nge? Cheng engzata siam nge an nih?” tihte a ani e.

HON. SPEAKER : Chhang turin Horticulture changtu Minister ilo sawm ang.

PROF. LALNILAWMA, HON. MINISTER: Pu Speaker, ka lawm e. Zawhna neitu, Siaha Bialtu Dr. K. Beichhua nen hian kan intawng thei riau mai a. A zawhna chhanna chu hetiang hi a ni e. -

Horticulture Department hnuaiah Bamboo Link Road te hi Mau chinna khua, Hmunpui ramchhung bakah Saiphah Zau leh Hmunpui khaw bulah te laih a ni. Bamboo Link Road laih nan hian pawisa ₹1,05,00,000/- (cheng nuai za panga) hman ral a ni.

HON. SPEAKER : *Zawhbelhna* - Zawhna neitu Dr. K. Beichhua.

DR. K. BEICHHUA : Pu Speaker, Mau hi sorkar hmasa khan a ngai pawimawh khawp mai a, Bamboo Link Road pawh chuti tho chu a ni a. Ka zawhbelhna chu –

- i) Tun dinhmunah hian hman tangkai mek kan nei em?
- ii) Kan local mau tuna kan neih mekte hi sorkar hian tangkai taka hman tumna a nei em? Nei ta se, engtianga hmalak nge a tum?
- iii) Mau atanga ethanol siam tumna a awm em?
- iv) State dangah Mizoram atanga mau thawmchhuah hi la kalpui a ni em? Nge, khap a ni?

HON. SPEAKER : *Zawhbelhna* - Lunglei North Bialtu, Pu V. Malsawmtluanga.

PU V. MALSAWMTLUANGA: Pu Speaker, ka lawm e. Horticulture Department changtu Minister zahawm tak Prof. Lalnilawma min chhan atana ka zawhbelhna chu –

- i) National Bamboo Mission - mau chi engzat nge an supply?
- ii) Sum engzat nge kan sorkar hian a sen tawh?
- iii) Chung mau chite chu an nung tha em?

Ka lawm e.

HON. SPEAKER : *Zawhbelhna* - Hachhek Bialtu, member zahawm tak Pu Robert Romawia Royte ilo sawm ang.

PU ROBERT ROMAWIA ROYTE: Pu Speaker, ka lawm e.

Horticulture Department Minister zahawm tak khan Pu Speaker, Bamboo link road pahnih nuai za leh tiha siam a nih kha a rawn sawi a. Bamboo link road hi Horticulture Department kher lo hian an siam em aw tih kha rilruah a rawn lang nghal a. PM-DeVINE atangin crore ₹100 (kum 2021 nge 2022 aw) Union Budget a dah lan a awm khan ka hria a, ka Chiang Chiah lo nachungin. Khang hmangte khan bamboo link road hi siam a ni dawn lo nge, Horticulture Department hian he zawhna an dawn hian a line department dang zawt zau lovin, anmahni siam chin hi an rawn chhang mai em ni?

HON. SPEAKER : A theih ang ang chhang turin Horticulture Department changtu, Minister Prof. Lalnilawma ilo sawm ang.

PROF. LALNILAWMA, HON. MINISTER: Pu Speaker, ka lawm e. Zawhbelhna Dr. K. Beichhua zawhbelhna chhanna chu –

1. Awm e; furniture leh handicraft a tante hman tangkai mek a ni.
2. Tuna kan neih mekte hi a hman tangkai dan kan han zir chho mek a ni a, hmanni lawk khan Taiwan-ah kan han zin a, kan officer thenkhatte nen. Tichuan, a hman tangkai dan turte pawh project te siamin hma lak kan tum mek a. Mau chi thar ni lo kan mau tual to tuna kan neihsa ho hi hman tangkai dan zawn kan tum mek a ni.
3. Bio-ethanol proposal te pawh rawn siam an awm a, rawn invest duh an awm a.

Chumi piah lamah Pu Speaker, ka sawi belh duh chu - Bio-char, UK base company te pawh hian mau atanga siam chhuah duhin investment rawn tih an duh thu te an rawn sawi a, tunah chuan final a la ni lova; Sorkarin a ngaihtuah tura chhawp chhoh mek tur a ni a, Bio-ethanol leh Bio-char, bamboo charcoal atanga fiber siam te kha rilruah chuan a awm a. Amaherawh chu engtiang chiahin nge kan kalpui dawn tih kha chu sorkarin a la ngaihtuah turah ngai ila, khami hnuaiyah khan investment policy te kan nei tawh bawka. Tih theih te a nih chuan, hengte pawh hi rilruah chuan a awm a ni

Pu Speaker, kan mau resource hi mumal deuha kan enkawl loh chuan buai ve thei a ni a, kan inchuh buai thei a, a resource hi. Chutia kan inchuh buai theihnaah chuan policy, *Bamboo Resource Management Policy* mumal tak kan neih a ngai niin kan hria a, chumi tur pawh chuan bawhzui kan tum chho mek a. He policy hi kan neih chuan, khami company khan *Entirnan*: Bio-ethanol ten rawn invest dawn ta se, kha khan, ‘heti lam hi lo bawh bik ula; Bio-char kha Lunglei lamah te emaw khan a hmunte kan insemi, kum khatah heti lai bak hi chu zauh awih loh’ tihte emawin mumal taka policy kan siam a ngai dawn a, resource kan inchuh buai loh nan. Chutiang tur pawh chuan a policy duan kan tum mek a ni.

4. ‘Mau thawnchhuah khap’ tih lai tak hi Pu Speaker, Horticulture Department ang zawng chuan kan department khap tur chi nge, Forest lam chan zawk tih ka Chiang chiah lova; a zawttu hian a rawn zawt khirh angreng bawka si a. Engpawhnise, Pu Speaker, nakinah a chhanna mumal pe thei turah inngai ila a tha ang e.

Tichuan, Pu V. Malsawmtluanga zawhbelhna chhanna chu –

1. National Bamboo Mission hnuaiyah khan mau chi supply zat te, senso zat te leh a nung zat te, a dam khawchhuak engzat nge?” tih zawhna kha - Mau chi supply kha a zawhna a ni a. Amaherawh chu, a supply ang zawng khan record hi ka lo nei lova, amaherawh chu mau chi kan phun zat hi han sawi ta mai ila a tha ang e. Mau tiak 910725 kan phun a ni. Chuta puitling, kan mau phunte kha (a hmuniin a zir loh vangte pawh a ni maithei; khaw lum lutuk kha a lo ngeih lo te pawh a ni mai thei) hmun thenkhatah chuan an than duan lain, tuna kan phunna hmunpui ber Hmunpui leh a chheh velah chuan 70% vel dam khawchhuaka ngaih a ni.

2. Mau chi buaipui nan sorkar sum cheng nuai 648,16,750 sen ral a ni.
3. Bamboo link road chungchang kha Pu Speaker, Hmunpui leh Saiphal, Hmunpui ram thoah khan a ni a, pakhat nuai 50, nuai 55 te sen a ni a. Hei hi SASCI hnuaiah maw, scheme dang emaw ah chuan bamboo link road hi siam a awm ngei a. Amaherawh chu, a department-a zawh a ni lem lova, kan hriatpui rih loh avangin, tuna ka rawn chhanna hi department-in hma kan lakna chin a ni e. Pu Speaker, ka lawm e.

HON. SPEAKER : A lawmawm e. Starred Question No.164 - Zawt turin Aizawl South-III Bialtu, Member zahawm tak Pi Baryl Vanneihnsangi.

Starred Question No.164 : Tlawng - Hydro Project chungchang.

PI BARYL VANNEIHSANGI: Pu Speaker, ka lawm e. Power & Electricity Department changtu Minister ka zawhna te chu –

- a) Lungleng khaw bula Tlawng - Hydro Project 54 megawatts hi, megawatt sang zawk siamchhuak tura khuah theih a ni em?
- b) A theih chuan, megawatt engzat tur nge?
- c) Engtika khuah tan tur nge?

Ka lawm e.

HON. SPEAKER : A chhang turin Power & Electricity Department changtu Minister, Pu F. Rodingliana ilo sawm ang.

PU F. RODINGLIANA, MINISTER: Pu Speaker, ka lawm e. Kan Member, Pi Baryl Vanneihnsangi zawhna chhanna chu –

- a) Aw, theih e. Lungleng khaw bula Tlawng Hydro Project 55 megawatts hi, megawatt sang zawk siam chhuak tura khuah theih beisei a ni.
- b) 120 megawatts.
- c) Khuah tan hun tur hi sawi theih a la ni lova, tunah hian CWC-in Survey & Investigation hna an thawk mek a. Tun kum chhung hian DPR (Detailed Project Report) peih hman an tum a.

Hei hi kam hnih-khat lekin Pu Speaker, ka han belh lawk ang a. Kan ram hi lirngching kawng - Zone V anih avangin, a structure design hi tlema tihdanglam a ni a, chuvangin a lo muang hret a. An mahni sawi danin, tun kum chhung hian peih hman an inbeisei a ni. Pu Speaker, ka lawm e.

HON. SPEAKER : *Zawhbelhna* - Zawhna neitu Pi Baryl Vanneihnsangi.

PI BARYL VANNEIHSANGI: Pu Speaker, ka lawm e. Ka zawhna te tha takin chhan a ni a, a nghahhlelhawm em em bawka; kha chhanna avang khan a hmasain lawmthu ka sawi a ni. Ka zawhbelhna ah hian ka duh chik deuh a, min hrethiam sela –

‘Lungleng khaw bul’ kan ti leh mai thin a. Lungleng khua atanga a khawilai takah khuan nge? A ramin hming a nei em? A neih loh pawhin, km engzatah nge a awm min hrilh thei em?

HON. SPEAKER : *Zawhbelhna* - Mamit Bialtu, member zahawm tak Pu H. Lalzirliana.

PU H. LALZIRLIANA : Pu Speaker, Power & Electricity Department changtu Minister zahawm tak ka zawhbelhna chu - Bairabi to W. Phaileng, via Mamit 32 kV Line hi a history a lo hre nual tawhin ka ring a. Hei hi engnge tuna kan mutan chiah? Engtikah nge kan zawh fel theih ang; kan commission theih ang?

HON. SPEAKER : *Zawhbelhna* - Lunglei North Bialtu, Member zahawm tak Pu V. Malsawmtluanga.

PU V. MALSAWMTLUANGA: Pu Speaker, ka lawm e. Power & Electricity changtu Minister zahawm tak chhan atana ka zawhbelhna chu – “Electric la luh lohna khuaah eng pekluh tumna a awm em?” tih a ni e. Ka lawm e.

HON. SPEAKER : A theih ang anga chhang turin Power & Electricity Department changtu Minister zahawm tak, Pu F. Rodingliana ilo sawm ang.

PU F. RODINGLIANA, HON. MINISTER: Pu Speaker, ka lawm e. Kan Member zahawm tak Pi Baryl Vanneihsangi zawhna kha - Lungleng khaw bul, km sarikh velah CWC min hrilh danin hma laka thawh tum a ni.

Kan Member Pu H. Lalzirliana zawhna kha, Bairabi to W. Phaileng hi pawisa pawh neih a ni a. Mahse, Forest atangin harsatna kan tawka, hrui kan zam thei mai lova. Hei hi hma lak mek a ni a, sum chawi ngai thenkhat pawh chawi tawh a ni a. Tunah hian hma lak leh tura inpuahchah leh mek a ni a.

Member zahawm tak Pu Malsawmtluanga zawhna – ‘Electric la luh lohna khua-ah Electric pek tumna a awm em?’ tih kha, tunah hian Central Scheme RDSS hnuiah Mizoram khua zawng zawng in tinah electric pek vek tura hma lak mek a ni a. Chuta tan chuan tunah hian scheme pawh ruahman niin, DPR pawh siam tawh a ni a, Central-ah a la mu mek a. Hei hi a rawn chhuah theih chuan, Mizoram khaw tina in tinah eng pek vek tura ruahman mek a ni e. Pu Speaker, ka lawm e.

HON. SPEAKER : Awle, Starred Question No. 165 - Zawt turin Tuichang Bialtu, Member zahawm tak Pu W. Chhuanawma i sawm ang.

Starred Question No. 165 - Agriculture – Farm Mechanization chungchang.

PU W. CHHUANAWMA : Pu Speaker, Agriculture changtu Minister zahawm tak chhan atan ka zawhna chu –

“Eng ang takin nge Agriculture Department hian khawl tha chakna hmanga loneihna (Farm Mechanization) hi a kalpui?” tih a ni e.

HON. SPEAKER : Chhang turin Agriculture Department changtu, Minister zahawm tak Pu PC Vanlalruata ilo sawm ang.

PU PC. VANLALRUATA, HON. MINISTER: Pu Speaker, ka lawm e. Zawhna chhanna chu hei hi a ni. –

Hun eng emaw chen atang tawh khan Farm Mechanization hi scheme remchang apiangah phak ang tawk tawkin kalpui ve thin a ni a. Kum 2014-2015 atang khan Central Sorkar-a Ministry of Agriculture - *Mechanization & Technology Division* hnuaiah mission mode-in kalpui tan a ni a. Hemi atan hian Sorkar laipui chuan Sub-Mission on Agricultural Mechanization (SMAM) scheme siamin, chumi kaihhruaina (Guidelines) zulzui chuan Mizoram Sorkar-a Agriculture Department chuan kum tinin Annual Action Plan a siam thin a, SMAM atanga fund hmuh te hmang hian Mizorama loneitute hnenah lo neihna atana tangkai tur khawl leh hmanraw hrang hrangte (farm machinery & implements) lei nan subsidy pek thin a ni.

HON. SPEAKER : *Zawhbelhna* - Zawhna neitu Pu W. Chhuanawma.

PU W. CHHUANAWMA : Pu Speaker, ka zawhbelhna chu – Custom Hand Centres atan subsidy pek theih zat percent hi min hrilh thei em?

HON. SPEAKER : *Zawhbelhna* - Champhai North Bialtu, Member zahawm tak Pu H. Ginzalala.

PU H. GINZALALA : Pu Speaker, ka lawm e. Kut-hnathawktute kan retheih chhan chu – ‘Buh hi kan uar lutuk em aw’ tih ka ngaihtuahnaah a lut a. Chuvangin, buh leina tur hi ching ta zawk ila a tha ang em, buh lei lovin?

HON. SPEAKER : *Zawhbelhna* - Hachhek Bialtu, Member zahawm tak Pu Robert Romawia Royte.

PU ROBERT ROMAWIA ROYTE: Pu Speaker, ka lawm e. Agriculture Department changtu zahawm tak chhan atana ka zawh belh duh chu – Hei, mechanization chungchang zawhna a awm a, hma lak mek a nih dan te kan ngaithla a. Drone hi State tamtak ah leh khawvel hmun dangah agriculture atan an hmang tangkai hle tih kan hre vekin a rinawm a. Drone hmanga damdawi han kah te a niang chu; a scheme pawh a awmin ka hria a, Agriculture Ministry nge, khawi ministry tak nge ka hre chiah lova; 100% funding sum hmuh theih pawh niin an sawi a, thiante atanga ka hriat mai chu a ni nain, a tak tak anih pawh ka ring a. Heng hi kan Minister zahawm tak hian tunlaih drone chi hrang hrang a awm tawh a, bomb lian tak tak thlak thei thlengin a awm tawh a; Agriculture porpose atan hian (Mechanization kan sawi mek lai hian) drone hman tangkai tumna leh a scheme avail tumna kan nei em? Chutiang anih chuan, ‘Hachhek bial khu ngaihpawimawh a va tul em’, tih ka belh hret duh bawk a.

A chhan chu, agriculture leh horticulture potential area a ni a. Hachhek tlangdunga kuhva tam awm tan deuh te khu a hmuna kal zela, damdawi pek harsa anih pawhin, khatianga tihdan kha a awm thei em? Tin, leilet zawlah buh emaw, thlai a tlim hnur tawh hnua kea va kala damdawi va phul te a harsa a. Khatieng atan khan drone hi a tangkai ka ring ve ngawt a. Chutiang tih tumna chu a awm em? Ka lawm e.

HON. SPEAKER : A theih ang anga chhang turin Agriculture Department changtu, Minister Pu PC Vanlalruata ilo sawm ang.

PU P.C. VANLALRUATA, HON. MINISTER: Zawhna neitu zawhbelhna kha Pu Speaker, 95% hi subsidy a awm thei a, ₹9.5 lakhs kha a maximum a ni.

Champhai North bialtu zawhna – ‘Buh leina tur hi ching ta zawk ila a tha ang em?’ tih hi, Pu Nguna te khan an support deuhin ka hria a. Amaherawh chu, sorkarin a ngai pawimawh vek tho a, tunah hian Central pawhin mission hrang hrang - oil seeds-ah te kan nei a, hma lak chhoh mek a ni a. Buh pawh kan ching zel ang a, buh leina tur pawh kan ching zel tho ang chu. Sorkar chuan ngaihpawimawh loh bik a nei lova, buh pawh uar zawka chin tum mek a ni a. Chutih rual chuan, oil seed leh thil dang dang pawh kalpui mek a ni.

Pu Robert Romawia Royte, Member zahawm tak zawhna – ‘Drone hmanga Agriculture kalpui hi a theih em?’ tih kha, hei hi a advance khawp mai a, ram changkangah chuan an kalpui tawh a. Keini ram angah chuan thil theih loh bur chu a ni lo ang a, Central sorkarin Scheme a neih ang zelin State sorkar pawhin hma a la zel ang, tih kha ka chhanna a ni e.

HON. SPEAKER : *Starred Question No. 166* - Zawt turin Lawngtlai North Bialtu, Member zahawm tak Pu C. Ngunlianchnunga ilo sawm ang.

Starred Question No. 166 - Lawngtlai Residential Sports School chungchang.

PU C. NGUNLIANCHUNGA: Pu Speaker, Sports & Youth Services Department changtu Minister ka zawhna, Starred Question No. 166 chu hei hi a ni -

- a) Lawngtlai Residential Sports School hnathawh kha eng chen nge thawh a nih tawh?
- b) Engtikah nge zawh anih theih ang?
- c) Tunge Contractor; hming leh address kimchang?
- d) Physical achievement leh financial achievement min hrilh thei em?

HON. SPEAKER : Aw le; Sports & Youth Services Department changtu, Minister Pu Lalnghinglova Hmar ilo sawm ang.

PU LALNGHINGLOVA HMAR, HON. MINISTER: Pu Speaker, Lawntlai West Bialtu, Pu C. Ngunlianchunga zawhna chhanna chu hei hi a ni e -

- a) Residential School Lawngtlai hnathawh mek hi 85% zawh tawh a ni.
- b) Zawh hun tura ruahman chu 8.9.2024 a ni.
- c) He hnathawktu (Contractor) chu M/S DJ Consultancy Services, Mission Veng, Aizawl leh M/s Décor India, GS Road, Guwahati te an ni.
- d) Physical Achievement chu 85% a ni a, Financial Achievement chu ₹2,206.90 lakh a ni.

HON. SPEAKER : *Zawhbelhna - Zawhna neitu Pu C. Ngunlianchunga.*

PU C. NGUNLIANCHUNGA: Pu Speaker, ka zawhbelhna chu –

- i) Hei hi PMJVK Scheme hnuai hnathawh a ni a, second installment hmuh a ni tawh em?
- ii) A hna hi thawh zawh hunah hian engtia enkawl tur nge ni ang? Ministry hmasa khan a building lianpui pui an sa a, a phul-lem tak phei chu an la phah lova, a building te khi tunge luah ta ang? Hei hi ka bial chung a ni a, keipawhin ka ngai pawimawh khawp mai a. Sports Minister kal ta khan ‘Company ho luah chak tak tak an tam mai’ a ti a. Kha te kha sorkar thar hian a hre ve em?
- iii) Sikul enkawl tur hian hna recruit engnge; manpower lak tumna a awm em? PMJVK hi one-time grant (vawikhat chauh) a hnathawhna tur chauh; a viltute leh a hnathawktu turte lak chauh; sum awmlo kha a ni a. Hei hi Sports Department atangin kha a zawh hun tur kha Sep, 2024 ah a ni a, a building phei chu pali sak a ni a, pakhat phei chu hawn a ni tawh a, pathum a la hawng lova. Khangte kha lo zo ta se, tunge enkawltu tur awm ang? Enkawltu tur lak tumna a awm em?
- iv) Chawnhu Field, Mizoram State Sports Council hnuai hna thawh tir a ni em? Thawhtir ni ta se, a thawhna pawisa hi hna an zo tawh a, pek theih a ni tawh ang em? Eng tikah nge pek theih a ni ang?

HON. SPEAKER : *Zawhbelhna* - South Tuipui Bialtu, Pu Jeje Lalpekhlua.

PU JEJE LALPEKHLUA: Pu Speaker Sports & Youth Service Department changtu Minister ka zawhbelhna chu –

- i) Hmanniah khan football ground size kha sawilan a ni a. Kan ram chhungah hianin artificial turf phah ni si, a size a nih dan tur la tling lo engzat nge awm?
- ii) Thingtlang kilkhawr thleng pha coach kan neih hi a hun viau tawhin ka hria a. Pu Speaker, i remtihain han sawi zau lawk ka duh a.

Kan pate hun lai kha chuan Mizoram hmun hrang hrangah Sports Department hnuaia coach kan neihte hian coaching pein football a ni emaw, volleyball a ni emaw hmun hrang hrangah an kal kual thin a, kha kha hlawnasa nasa tak thingtlang naupang ten kan chan phah thin a. A bikin, kei hi inkhel-mi, football khel thin ka ni a, coaching mumal tak hi kum 17 ka niha hmu ka ni a. Inkhelin kan lo chhuak a, Aizawl-ah ka lo phei a; Hnahthial khua atangin helaiah Coach hnuaia khel hote nen kan han khel ho a, kan tan thil kha a hautak bik em em a ni. Chumi piah lamah India team-ah kan lut thla a, U-19 in India team-ah kan lut chho a. Chutah chuan India rama Football Academy tha - TATA Football Academy te, IFA Football Academy-a naupang zirho nen khan kan han inel leh a ni a. Thingtlang naupang kum 17 hnua coaching mumal dawng leh khulaia Kum 7-8 an niha naupang coaching hmu ho nen kan han inel kha chu, kan tan thil harsa leh hautak em em a ni a. Hemi kawngah hian a changtu Minister pawh kan zawh duh chu –

- i) Sports Department coach-te hi thingtlang kilkhawrah te Association-in request an siam a, hetiangah coaching pe turte hian a tih theih em?
- ii) Tuna Sport Department-a coach kan neihte hi an indaih tawh lo ni tein ka lo hria a; henge hi dah belh tumna te a awm em?

HON. SPEAKER : *Zawhbelhna* - Aizawl West-I Bialtu, Pu TBC Lalvenchhunga.

PU TBC LALVENCHHUNGA: Sports & Youth Department changtu Minister hnena ka zawhbelhna chu - Sorkar kal ta ah khan Sports-ah infrastructure tam tham tak din niin, sum sen pawh a tam tham hle mai a. Tun sorkarah hian kan Sports hi infrastructure lam hawi zawng bawkin nge kan kal dawna, capacity building (tuna zawhna awm sa) ang deuh khan sorkar thar hian eng tianga hmalakna kalpui nge a tum?

HON. SPEAKER : A theih ang angah chhang turin, Sports & Youth Department changtu Pu Lalnghinglova Hmar ilo sawm ang u.

PU LALNGHINGLOVA HMAR, HON. MINISTER: Pu Speaker, zawhna kha a thahnem ang reng a.

Pu C. Ngunlianchunga, Lawngtlai West Bialtu zawhna – “Lawngtlai Residential Sports School kha, tunge luah ta ang; tunge enkawl ang; enkawltu tur lak tum a ni em?” tih kha a ni a. Tin, ‘a luah chak tamtak an awm a’, han tih te pawh kha a awm a. Engpawh nise, chhan thiam a har a, tun dinhmuna kan chhan theih dan chu, infrastructure tha tak tak din a ni a, kan sorkar hmasaa kan Sports Minister hmasa te chungah pawh lawm thu ka sawi a. Chutih rual chuan, hengte enkawl zui hna hi a hautak dawn a. Tichuan, a harsat dawn avangin kan Chief Minister hi ka rawn tawh a, “engtingge kan tih ang? Residential Sports School te hi heti zat hi din a ni a, engtingge kan luh ang” tih zel ah hian, vairam leh hmundang a mi luah duh tur awm ta se, biak phalna min pe thei em?” ka ti a. “Lo be vat rawh; a nih loh chuan nakinah sorkar tan phurrit a chang leh palh ang tih a hlauhawm; lo dawr rawh” te min ti a. A thuphunga biak chu pahnih-pathum kan nei tawh a.

Tin, tunah hian presentation rawn pek duh te pawh an awm a. Chumi atan chuan nimin tlai khan file ah te pawh kan han ziak nghe nghe a. Amaherawh chu, an rawn en ang a, a hmun te hi tlemin a kilkhawr deuh a, Mizoram-ah pawh luah duh an awm ang em, hriat a lo ni chiah lova. Chutih rual chuan, rilrua awm ka thawhpuite Sports Department a awm, Sports Council a mite pawh ka lo sawipui tawh chu – Mizoram-a Private School liante hian an luah duh ang em aw, tih te; a luta chu mizo-naupangte tho anni dawn a, churang chuan, an nite hian enkawl ta se a tha mai ang em, tih te verbal-in kan sawi tawh a. Mizoram State Sports Council thut khawmnaah te pawh kan lo sawi ang a. Engtingge kan kalpui zel dawn tih chu beng sika ngaihtuah chu a ngai a ni. ‘Tunge enkawl ang’ tih pawh hi sorkar ang chuan thutlukna siam a la ni lova, ‘enkawltu tur lak tumna a awm em’ tih pawh hi chhan a har khawp mai a; tunah chuan kan la chhang theih rih lova. Kan enkawl tum danah pawh hian thumum kan la nei thei lova, rawn la hlawk duh, min enkawl sak thei hnam dang investor liante chu hmu ila chuan duhthusam a ni a. A chhan chu, a chhunga Sports school-a an enkawl tura te kha Mizo naupang tho an nih dawn avangin thil thatak a ni ang a. Chutih rual chuan, ‘chutiang mi chu kan hmu ngei ang em’ tih kha kan sawi Chiang thei lova. Engpawh nise, infrastructure tha tak din a ni a, tangkai taka hman hi chu duhthusam a ni. Sorkar sum erawh chu a beitham tih kan hria a, kan department chanah te, churang chuan pawnlamte nena tangkai zawka hman dan tur hi ngaihtuah zui mek a ni a. Chief Minister pawhin phalna verbal-in min pe tawh nghe nghe a ni.

Pu Speaker, Chawnhu chungchangah hian Mizoram State Sports Council hian kutthlakna kan nei lova, agreement a awm lo a ni. Tichuan, verbal-in sawipui an awm em kan hre lova, ziaikin sorkarah engmah tih a awm si lova. Churang chuan, tih theihdan tura hi sawithiam a har a. Nichina ‘PMJVK-ah 2nd Instalment an dawng tawh em’ tih kha chu, an la dawng lo a ni.

Chawnhuah khan han kir leh ta ila, Chawnhu bikah hian Pu Speaker, sorkar nen ziaka thuthlung engmah a awm lova. Chuvang chuan, hnathawktute an lo awm tawh a nih pawhin, ziaka awm si lova hna an thawk a nih si chuan(*interruption*)

PU C. NGUNLIANCHUNGA: Pu Speaker, *Point of clarification* - Khalai kha khatiang a nih chuan Chawnhu khua 60 ah khan Minister kal ta khan YLA te a thawh tir a, chu chu Sport Department-a AE pawh phone in keipawhin ka bia a; an thawh tir a, pawisa kha an pe ta lova, YLA hruaitute an mangang khawp mai a, an thawhna khawl an hmanna te khan an dil an dil mai a. Chuvangin, Sport Department anga engmah hriatpui a nih si loh chuan a va manganthlak dawn ve? An thawh tawhna ah khan kan Sport Minister-in an thawh tawhna te enin, engtin emaw kawng min dap sak thei ang em le?)

PU LALNGHINGLOVA HMAR, HON. MINISTER: Pu Speaker, hetiang hi a buaithlak thei khawp mai a. A ziaka awm lo, sorkar dan anga thuthlung pawh awm si lova hna an thawh hian, engtinngan kan kalpui zel dawn tih hi tun dinhmunah chuan ka sawi thei lova. YLA te an nih chuan an zahawm khawp mai a, tute nge thawk tih hi official a hriatna chiah kan nei lova. Engpawh nise, an lo thawh tawhna chu a zahawm hle mai, tunah erawh chuan he House-ah hian kan kalpui zui dan tur hi ka la sawi thei lo a ni. Engpawh nise, min lo hrethiam se, chu chu sorkar kan nih angin, sorkar dan anga kal loh chuan thil a buaithlak thin a, assurance ka pe thei rih lova. Lawngtlai West Bialtu khan khawngaihmin min lo hrethiam se.

Pu Speaker, zawhna kha a awm nual mai a. 'Football ground size a tling lo engzat nge awm' tih kha, hmanni khan kan han sawi thuak thuak a, chiang vak lo khan. 'A tling leh tling lo' tih lai hi sawi harsa ve deuh mai awma chu, a tling lo han tih dawn chuan, football ground size hi pawm theih a awm a, chu chu metre 45X90 a ni a, a zim hle a; mi pakua field kan tih pawh kha a tiat lo a ni. 45X90 chu minimum a ni a, hmanni khan ka sawi tawh a. Chutah chuan FIFA preferred size a awm a, 105X68 a ni a, chu chu FIFA duh dan a ni. Amaherawhchu, *International Standard*-a pawm theih chin a te ber kha a awm ve a, chu chu metre 100X64 a ni ve ta a ni. Tunah hian kan en thuak thuak a, hetilai a ka neihah hian (State Sport Council lam chu kan ni chiah lova) Pu Speaker, Smart City Project lam hi a ni mah mah a, hengah hianin a tling lo hi an nei nual a, Edenthar hi metre 90X45 in an lo siam a, a pawisa hi crore ₹8.8 a ni a; a thahnem hle mai a pawisa hi. Hei hi 'tihzauh theihdan a awm em' tiin UD&PA Minister-te pawh kan rawn tawh a.

Chite hi a hmunah ka zu en a, metre 100X52 a ni a, hei hi a tihzauh theihdan a awm thei tawh ngang lo a ni. A vangah hi chuan Chite Lui a thleng dawn a, a dungah erawh hi chu a zau thei a, hei pawh hi crore ₹8.9 a ni a; sum hi a thahnem thin khawp mai. Tuivamit ah hian metre 90X45 ani a, hei hi a zim thei ang bera siam a ni a; a zau thei ang bera ti turin rawnate kan zu siam a. Hlimen hi kan la en hman lova, metre 90X45

bawk a ni a, Pu Speaker, a pawisa zat hi crore ₹6.81 a ni a. Ka hriatsual loh chuan Keifang - artificial turf an phahah khian in crore ₹5.38 vel niin ka hria a, chu chuan Mizoram-a standard size field, artificial turf tho hi phah theih a ni a, metre 105X69 a ni a. Lengpui khu metre 105X68, FIFA duh ang thlap kha a ni a, khu khu crore ₹5 a phah zawh theih a ni. Chutih laia ‘a te lutuk a, Smart City hian a chheh velah thildang an bel tel duh pawh a ni mai thei a. Aherawhchu, Sport pawisa ni chiah lo mahse, Sport atana siam ni si, a ground tling loa hi chu Sports zu hmangaihna atang chuan a uiawm ka ti a. Football background chhe te kan neih ve avangin tawngkam mawi lo deuh hret te pawh kan cheh ve a, kan endik tum chuan, “TT Board phel in pe ngai em ni; badminton court tling lo in siam ngai em ni; engatinge football ground a nih tak a vanga te lutuk in siam ni aw; Pawisa hi hmuh let leh theih a ni mai si lova, tihzauh hram dan i zawng ang u; National Level competition pawh thleng thei lova 8 crore vel sen hi chu a lutuk deuh a ni; National Level-ina an pawm theih tur tal hian siam rem ang u” tih te kha kan au hla a ni a. Thawktute nen tha takin kan sawi a, Contractor te pawh an zahawm a. Amaherawh chu, kan han sawi kan han sawi chuan an pawm thei deuh ti tih a; tichuan, a zauh theih ang ang chuan kan zauh dawn a ni hlawm a ni.

Tichuan, Pu Speaker, thingtlang kilkhawra coaching pek chungchang Pu Jeje Lalpekhlu, South Tuipui Bialtu zawhna kha, ruahmanna tharah chuan April Ni 1 atang hian tan theih kan tum a, tunah hian kalpui mek a ni bawk a, chutiang chuan ruahmanna kan han nei chho dawn a ni. Chutah chuan coach te hi a tangkai thei ang bera hman kan duh a, an pual bikin meeting kan nei tawh a. Mizoram State Sport Council hnuaia mite leh Sport & Youth Services Department-a coach nen hian meeting kan nei a; an sawi dan tak pheih chuan (a dik em ka hre lova; ka bulah a mawiah an sawi a ni mai thei) “Minister hovin Sports bikah hian meeting kan la nei ngai lo” an ti a. “Sports kan luhchilh hian a tawpah medal dawng thei tura kan fate, kan naute kan chherchhuah a ngai a; chuvang chuan, nangni ho hi in pawimawh. Office a thu tur in ni lova, field-a kal tur in ni. Tuna in tih lai hi a tha em em; hei aia nasa zawka hmalak kan tum” te kan ti a, infuih tharna kan nei a.

Nichina a rawn zawh ang khan, thingtlang kilkhawra an thlen hi kan duh em em a, dil theih a ni. Amaherawhchu, coach kan indaih lova, an dila hi football coach anni tlangpui a. Thingtlang lamah hian Volleyball dil an awm ve bawk a, hengte hi an indaih lova. Amaherawh chu, an dil a, chutih laia kan coach-te hmundangah engage annih loha, an awl a nih chuan, kan kal tir zel ang. Chu chu an hna pawh a ni a, an mahni bulah pawh kan sawi tawh a. “Aizawlah office luahlum tur in ni lova, practical-a thawktu tur inni,” tiin infuihna te pawh kan nei a ni. Chuvang chuan, thingtlang naupangte tan pawha coaching tha an dawn theihna turin hma lak kan tum zel a ni.

Pu Speaker, ‘Coach dahbelh tumna a awm em’ tih kha, tunah rih hi chuan a awm lova, sorkar sum leh pai dinhmun thlir chungin kan lo ngaihtuah chhunzawm ang a; tunah erawh chuan kan la dah belh thei rih lo a ni.

Pu TBC Lalvenchunga, Aizawl West-I Bialtu zawhna - Sports infrastructure chungchang hi sum neih chuan a tha a, kan ti zel ang a. Sorkar hausa tak te ni ila, han tihbelh zel a chakawm a. Amaherawh chu, State sawrkarin a tum ve tur ang chiah hi chuan kan hotupain, “insum hret ang” a ti a. ‘*Year of Consolidation*’ kan puang a, chuvang chuan hmun dang atanga pawisa tum ngai lova kan tithei a nih chuan, infrastructure tha chu kan mamawh a; tih zel kan duh a. Amaherawhchu, thupui berah erawh chuan kan nei lo deuh dawn a, kan insum rih hret dawn a ni. A awmsa hman tangkai tum hian theihtawp kan lo chhuah ang e. Ka lawm e.

HON. SPEAKER : Starred Question No. 167 - Champhai North Bialtu, Member zahawm tak Pu H. Ginzalala ilo sawm ang.

Starred Question No. 167 - Power & Electricity hnuiaia Civil Wing staff-te chungchang.

PU H. GINZALALA : Pu Speaker ka lawm e. Hon. Minister Power & Electricity Department changtuin min chhan atana ka zawhna chu –
 “Power & Electricity hnuiaia Civil Wing staff leh officer-te hi an nihna tur anga chhawr leh hman tangkai an ni lo hle tih hi sorkarin a hria em?” tih hi a ni e.

HON. SPEAKER : Chhang turin, Power & Electricity Minister Pu F. Rodingliana ilo sawm ang.

PU F. RODINGLIANA, HON. MINISTER: Pu Speaker, ka lawm e. Power & Electricity Department hnuiaia Civil Wing-a officer leh staff dangte hi department-in civil works enkawl tur ang chi Head Office hnuiaia Civil Wing-ah te, Circle-ah te, Division-ah te, Hydel (Hydro-electric) project enkawltu leh a dangah te hman an ni.

Helaia ka sawi belh duh chu – chhawr lo anga lang hi tun sorkarah pheih chuan Pu Speaker, an buai khawp mai a....

HON. SPEAKER : Ngawi rawh aw. Hei, *Zawhna & Chhanna* hun a tawp a, kan Minister hian a chhang laklawh si a kan chhan zawh tir law law dawn em ni ang? (*House-in chhan zawh tir law law a remti a...*) .

PU F. RODINGLIANA, HON. MINISTER: ... a buai berte zinga mi an ni tawh a. Chuvang chuan, tun sorkar tharah hi chuan lui chan bik te kan insem tir a, chungah chuan report pek hun tur thla te, a kar te kan intuk a; ‘he civil wing hi chu kan hman tangkai khawp mai’ tih he House hi ka hriattir a ni e. Pu Speaker, ka lawm e.

HON. SPEAKER : Kha kan Minister khan a chhang ta a; zawhbelhna hun leh chhanna hun a zo a, zawhbelhna la tawh lo mai ang aw. Business dang a la awm nual a, a dang kan la tawh lo ang a.

FINANCIAL BUSINESS:

Aw le, tunah chuan *Financial Business*-ah kan kal ang a. Vawiin hian Minister zahawm tak tak pathum - Pu Vanlalhlana, Pu F. Rodinglana leh Prof. Lalnilawma te demand kan sawiho ang a, pass nghal kan tum dawn a ni. Hun kal ta a kan lo tih thin angin Minister pathumte demand hi a rualin kan la ang a, hetah hian Opposition Leader leh House Leader te sawm kher an ni ngai lova; an sawi duh anih erawh chuan, an sawi thei thova. Tunah Minister zahawm tak Pu Vanlalhlana sawm ila House dawhkanah heng a demand-te submit turin ilo sawm ang u –

<i>Demand No.</i>	<i>Purpose</i>	<i>Amount (in ₹)</i>
12	Parliamentary Affairs	1,03,70,000.00
42	Transport	44,73,93,000.00
45	Public Works	7,32,71,22,000.00
TOTAL		7,78,48,85,000.00

PU VANLALHLANA, HON. MINISTER: Pu Speaker, Governor recommendation leh i phalna in heng demand te hi kum 2024-2025 chhunga heng ka Department enkawlte chan leh inrelbawlana atan he House zahawm taka sawiho turin ka rawn move e –

<i>Demand No.</i>	<i>Purpose</i>	<i>Amount (in ₹)</i>
12	Parliamentary Affairs	1,03,70,000.00
42	Transport	44,73,93,000.00
45	Public Works	7,32,71,22,000.00
TOTAL		7,78,48,85,000.00

Ka lawm e.

HON. SPEAKER : A lawmawm e. Tunah Minister zahawm tak Pu F. Rodinglana sawm ila, House dawhkanah heng a demand-te te submit turin ilo sawm ang u –

<i>Demand No.</i>	<i>Purpose</i>	<i>Amount (in ₹)</i>
18	Printing & Stationery	13,19,72,000.00
39	Power & Electricity	9,43,51,96,000.00
40	Commerce & Industries	60,44,11,000.00
TOTAL		10,17,15,79,000.00

PU F. RODINGLIANA, HON. MINISTER: Pu Speaker, Governor of Mizoram recommendation leh i phalnain heng ka Demand-te hi kum 2024-2025 chhunga ka Department chante inrelbawl na atan he House zahawm taka sawiho turin ka rawn move e -

<i>Demand No.</i>	<i>Purpose</i>	<i>Amount (in ₹)</i>
18	Printing & Stationery	13,19,72,000.00
39	Power & Electricity	9,43,51,96,000.00
40	Commerce & Industries	60,44,11,000.00
TOTAL		10,17,15,79,000.00

Ka lawm e.

HON. SPEAKER : Tunah chuan Minister zahawm tak Prof. Lalnilawma House-ah heng a demand-te House ah submit turin ilo sawm ang u. –

<i>Demand No.</i>	<i>Purpose</i>	<i>Amount (in ₹)</i>
25	Public Health Engineering	2,87,60,16,000.00
32	Horticulture	1,22,83,85,000.00
38	Rural Development	4,56,51,65,000.00
TOTAL		8,66,95,66,000.00

PROF. LALNILAWMA, HON. MINISTER: Pu Speaker, Governor of Mizoram recommendation leh i phalna in heng Demand-te hi kum 2024-2025 chhunga heng ka Department chan te inrelbawl nan he House zahawm taka sawiho turin ka rawn move e -

<i>Demand No.</i>	<i>Purpose</i>	<i>Amount (in ₹)</i>
25	Public Health Engineering	2,87,60,16,000.00
32	Horticulture	1,22,83,85,000.00
38	Rural Development	4,56,51,65,000.00
TOTAL		8,66,95,66,000.00

Ka lawm e.

HON. SPEAKER : Aw le, kan Minister zahawm tak tak ten an Demand-te an rawn submit ta a, sawihona kan nei tan tawh ang. Member-te minute engzat nge kan inpek ang le? Minute 10 maw? Aw le, Member-te minute 10 kan inpe ang a. Tichuan, minute 9 ah warning bell ka rawn ti ang a, minute 10 ah khan inkhung len hram hram kan tum dawn nia. Tunge han sawi hmasa ang le? Aw le, East Tuipui Bialtu, Member zahawm tak Pu Ramthanmawia ilo sawm ang.

PU RAMTHANMAWIA : Pu Speaker, ka lawm e. Sawi hmasak hi a tha a nia; kan sawi tur min sawi khalh thin a.

Pu Speaker, hei vawiinah kan Minister zahawm tak tak pathumte demand kan han sawi ho dawn a, a lawmawm ka ti hle a. A hmasa berin kan Minister zahawm tak Pu Vanlalhlana chanah hian, pakhat bak hi kan sawi leng hman dawnin ka hre lova. Tin, chutiang bawkin Pu F. Rodingliana, kan Minister zahawm tak Demand No. 39 hi ka han sawi hmasa hlauh teh ang. Amah a awm loh chuan a dang kan pakai ang e.

Public Works Department hi kan sawi tawh thin a, kan hriat theuh angin an pawimawh em em a, Mizoram ah hi chuan an tel lo hian kan khawsa thei lo a ni a. Kawng tha kan mamawh a, lei tha kan mamawh a, building tha kan mamawh a; an kutah hian Mizoram hi a awm a ni ber a. Inkalpawhna kawngpui tha mipui zawng zawng - mi hausa leh rethei pawhin kan intawm tlan chu kawngpui tha te hi a ni a, chu chu PWD hian mawh an la deuh ber a. Vawiinah pawh hian Demand No. 45-ah khan ₹7,32,71,22,000.00 a lo lang a, duh ai chuan a beitham deuh mang e aw ka ti a. A chhan chu, kawngpui hi a tha lai reng pawh hi fur te a lo nih chuan a lo chhe leh mai thin a, Mizoram-ah ruahtui a tam a. Tin, phai angin kan lung te hi a chang tawk lova. Eng ang company thate pawhin siam mahse, ruah a sur ngat ngat a, motor lianin a han chil ngat ngat hi chuan, a lo khi a; an rap zel a, a lo khi a; a khi a lo zau zel a, kawng a lo khuar a, kawng chhia a lo ni thin.

Chuvang chuan, helai kan kalphung ka sawi tawh ang khan kawng kan siam dan; kan repair dan; kan maintain dan hi a chhiat tak tak hma, thlangra tia vel a nih lai atang hian siam ila; chu chu kan kawng that rei dan tur leh a tlo dan tur niin ka hria. Vawiinah pawh ka sawi lan leh chu - Sum awm hun nghaha, a lo chhiat viau tawh hnua sum tam tak sen ai chuan, a ba thlau pawhin a chhiat tirhah vil hneh ila, siam rang ila, sum tam tak seng lovin, hun leh tha seng tlemin kawng tha hi mipuia min hlui thei reng dawn niin ka hria a. Vawiinniah kan Minister hnenah pawh hian kan ngen leh duha chu - kan system hi a thlak hret theih lawm ni, kalphung tharah hian? Kalphung hlui erawh chu a kal tawh a, kan kal dan kha chu kan hria a; kawng a chhiat vek tawh hnua kan siam tha ta thin a, a hautakin siam that pawh a har; sum pawh a duh tam thin. Kan hun hmalamah hi chuan chung ang chuan kal tawh ila chuan kan kawng tlangpuite hi chu tha takin kan neih theih reng ka ring a ni.

Tin, kan bial lamah ka lut zawk ang a. PMGSY kawng kan nei ve nual a, khi khi enkawl a ngai tan tawh a. Thinghrangkawn - Bungzung te, Thinghrangkawn - Vangchhia te, Khawbung - Khuangthing te, khitiang khi tunah hian siam tan a hun chiah; a la chhe tam lova, a khuar tan tawh a ni. Tunah khian sum tam tak sen ngai lovin patch repair ang khan a siam theihin kan ring a. Chu chu kan Minister zahawm tak hian min lo chhinchhiah sak sela.

Tin, hun hmasa lama PMGSY-I hnuaiia kawng kan laih thar - Mualkawi – Hruaikawn leh Khuangthing – Thekpui te hi a laih chiah kan lai a, pavement kan chhonzawm tawh si lova; khi khi mipuite'n harsatna kan tawk nasa em em mai a, thal kawng a ni ta ringawt mai a. A tirah kha chuanin thalah kha chuan kan kal tha mai a; kan han laih that hianin a hma ai khan kal a harsa a, furah kal a harsa khawp mai a. MLA fund tein a repair-na te kan thawh thin a, lung te kan vawm khat a, a harsa khawp mai. Department lama kan han zawh lah hian, 'a chhuak ve mai ang' tih kha a ni mai a; amaherawh chu, mipuite an khawngaihthlak rei tawh a. Hei hi kan Minister zahawm tak hian PMGSY-I hnuaiia hna thawh hi min lo hriat sak sela.

Tin, Khuangleng - Leisenzo pawh hi PMGSY kawng tho a ni a. Contractor-te maintenance period hi a zo tawh a, department kut a ni tawhin ka ring a. Chungte chu, a repair hun lai tak, la chhe tam si lo a ni a. Tuna kan repair loh chuan sum tam tak senna tur a ni leh dawnin hria a ni.

Tichuan, Prof. Lalnilawma Demand No. 32 - Horticulture-ah hian, lut ila. Horticulture hi kan ram hnuk a ni a, kan thlai tharte, kan thlai rahte ram dangachte pawh kan thawn a, hun hmasa atang tawhin. Hmarcha te, tomato te tiang khawp khan hma lakna a lo kal tawh thin a; chu chu tun sorkar tharah pawh hian min chhonzawm sak thei dawnin ka hria a. Hei hi thingtlanga kuthnathawktute tana heng zikhlum te, samtawk te, khang ang chi kha kan thar chhuah theihna turin thahnemngai takin tan min lakpui sela.

Ka sawi duh taka chu - Kan bial Samthang ah te, Khankawn ah te leh hmun dang dangah te khian vaisamtawk leh zikhlum te hi kan tharchhuak ve nual a; khilailah khian a rate hi a tha thei lova. A chhan chu, a thar chhuah tamin a market a chhe thin a, chu chu a lo dahthatna tur cold storage hi kan mamawh a ni. Reiloteah a tawih zung zung mai si a, ruah tuite a lo tlak phei chuan zikhlum te phei chu a tawih zung zung mai si a. Chuvangin, khilai hmunah khian cold storage pakhat min siam sak turin kan ngen duh a. PMJVK-a *four years perspective plan* ah khan kan han thun a. Amaherawhchu, hei hi engtikah nge a lo chhuah ang tih kha kan sawi thei si lova. Helai hi kan mamawh hle a ni tih kha Pu Speaker, kan sawi belh ni sela.

Tin, Demand No. 38 - RD Department hi thingtlangah chuan kan inngahna a ni. Keini bialah te chu ramri hnaia awm kan nih avangin BADP, Central-ina a bik taka min rawn enkawlina kha kan nei thin a. Tunah hian Pu Speaker, BADP kha tawpin, a zuih titih tlat ta mai a, pawh kan ti khawp mai a; kan thla a bar a. BADP scheme lo kal hian border area-a mite chuan hmasawna nasa tak kan neih phah a ni. Field kan neih theih phah a, school building kan sa a, hall kan sa a Cchutiang chuan khi lai bial keimahni bial ramri hnaiha kuate chuan he scheme hmang hian hmasawna nasa tak kan neih phah a ni. Chuvang chuan, Pu Speaker, hemi aiawh tur eng emaw development fund hi kan neih loh chuan, bial hnufual leh bial rethei tan chuan beisei a bo hle a ni. Tunah te pawh hian laklawh deuh deuhin hall sak te pawh hi kan nei a ni; la zawh si loh. Khitiang te pawh

khi eng fund-in nge kan tih ang tih te kan ngaihtuah a, rilru a hah khawp mai a. MLA fund hi kan han hmachhuan a, mahse, a bial pum khian MLA fund hi kan mamawh vek mai si a; khilai bial zawng zawng, NGO nen lam khian kan insem hi a ni mai a. Chuvang chuan, hmasawna tur sum thingtlang bial tan chuan kan rilru a tibuai khawp mai.

Pu Speaker, kan Power Minister a lo thleng tawh bawk a, ka han sawi belh leh ang e. Demand No. 39 - Minister zahawm tak Pu F. Rodingliana chanah hian, power pawimawh zia chu sawi ngai lo a ni a. Pu Speaker, ka bial chhung Samthang, Vaphai, Chawngtui 'E', Saikhumphai te chawmtu 11 kV line South Khawbung - Samthang inkarah hian dish, insulator leh a hruite hmanlaia mi tawh; (kan hre phak lova, an lo thlun tanna hi) chutiang chu a nih avangin, ruah sur apiangin a thim zel mai a ni. Ruah sur hlekin light kha a tawp tawp mai a. Samthang a thim a, Vaphai a thim a, a hrehawm em em a. Hemii a siamna tur hi sorkar hmasaah khan ka thlen tawh a, tun thlengin kan la hlawhtling lova. Khalai a siam thatna tur kha thil hautak lo deuh mai niin department ten min hrilh a, estimate-te pawh an siam a. Chungte chu kan Minister zahawm tak leh chak tak hian min ngaihtuah saka, helai hruipui leh a thlak ngaite min thlak sak turin ka ngen duh bawk a.

Tin, Khawbung leh Farkawn control panel hi a chhiatna a rei tawh a, a hmui rum rum thin a, hlauhawm khawpin. Helai pawh hi kan rawn thlen tawh bawkin ka hria a; heng hi min lo chhin chhiah sak se la ka lawm khawp ang.

Tin, kan rama khaw hrang hrangte an lo thang zel a, in te a lo pung a, kan fate an lo indang zel a; tunhmaa kan mamawh loh electric ban extent ngai te kha a lo awm ta zel a, heng hi Pu Speaker, khaw hrang hranga LT line extension hi kan mamawh hlawm khawp mai a. Keini bial chauh pawh a ni lo ang a, bial dang pawh a ni ang; hengte hi kan Minister zahawm tak hian min lo hriat sak se la a lawmawm khawpin ka ring.

Pu Speaker, ka zo tep a khawngaihin. Heng - Vanzau, Zawngtetui, Leisenzo, Lianpui, Vangchhia, Buang, Thekpui, Thekte te hian transformer pakhat theuh an nei a, a chhiat chuan vai thim kha a ni mai a. Hei hi kan Minister zahawm tak hian transformer dang pakhat theuh min bun sak turin ka ngen duh bawk a ni.

Aw le, Pu Speaker, khangte kha ka sawi theih tawk ni se la. Heng Minister zahawm tak Pu Vanlalhlana te, Pu F. Rodingliana te leh Prof. Lalnilawma Demand te hi an vai hian pass turin kei pawhin ka rawn support a ni e. Ka lawm e.

HON. SPEAKER : Tunah Lunglei South Bialtu zahawm tak, Pu T. Lalhlimpua ilo sawm ang.

PU T. LALHLIMPUA : Pu Speaker, vawiinah hian Minister pathumte demand 9 kan sawi dawn a ni a. An demand-te hi ka inbuatsaih a, ka chhiar zung zung mai ang a; minute 10 chhunga zawh theihna turin.

Mizoramah politics-ah thil inthlak dawrh a awm a, chu chu kan hre theuh a, ZPM sorkar tir duhna kha a ni a. Chu chuan a entir chu - thil tha leh dik kan duh a, dan anga kal turin sorkar kan inbuatsaih lain, mipui lam pawh dan zawm tur leh dik taka kal turin kan inbuatsaih a tul ta tho tho a ni.

Kut-hnathawkte chawikan kan tum a, an thlan tla, a thlawna a tlak kan phal tawh lova, thawhrim rah seng ve se kan duh a. Sorkar-hnathawkte pawhin ram hmangaihna rilru nena hna kan thawha, Mizoram tan office a huna thlena, a huna hawa, Mizoram tan thawk zel tura inbuatsaih a tul zia vawiinah hian kan tarlang ve duh a.

Tin, Mizoram pumpuiin kan harsatna chu - staff indaih lohna a ni fai vek a. Nimahsela a post awm zawng zawng hi hnawhkhah theihna budget tumahin kan pharh thei si lova, 'engnge a damdawi ni ang' tih hi beng sika ngaihtuah a tul em em a ni. Thil reng reng thawhhonaah chuan inkhuang rual leh a hlawk zawk ang chi tura thawk te thei ber, *optimum combination* ni bawk si hi a awm a, department tin tea staff strength en hian chung chu te thei ang ber, a combination sang thei ber si kan ngaihtuah pawh hi a tul hlein ka hria a ni.

A hmasa in Demand No. 42 - Transport Department-a ka tarlan hmasak duh chu, enrollment staff-te hi an indaih lo hle a, Lunglei khaw chhunga Revenue Collector Department kha an ni a, sorkar revenue tam tak kan hloh thei a ni. Chuvang chuan, anni pawh hi chutiang anga en a tul hlein ka hria. Lunglei bikah hian Bus 1 chauh, Lunglei - Aizawl tlan a awm a, one-way chauh a ni a. Thawhtanah a rawn phei a, thawhlelah a phei leh a; chutiang chuan a kar tluan a, mipuiin an hlut hle mai a.

Tin, hei bakah hian Bus mumala service, town bus pawh a awm lova, chuvang chuan, kan daily conveyance hi two-wheeler, Auto-rickshaw leh rickshaw te a ni a, a man a sang em em a, hei hi mipui pumpui ngaihtuah hian, 'man tlawm zawk min ngaihtuah sak theih chuan' tiin vawiin ah hian Minister-te hnenah pawh kan ngen bawk a ni.

Tin, Lunglei ah hian license te, vehicle registration te, smart card printer te leh peripheral ang chi reng reng hi kan nei ve lova, mamawhna a sang hle. He thil hi centralized a ni a, Aizawl-ah thawn phei vek hi a ni zel a, chu chuan harsatna tam tak kan nei a. A then chu thingtlang mi an ni a, Tlabung kil tawp atang chuan Lunglei-ah smart card buaipuia, haw leh vang vanga, nghaha, chumi lo thleng tur ngaihtuah chu a ngai thin a. Chuvang chuan, hei hi kan mamawh em em a, kan Minister hian min ngaihtuah sak se. Tin, DTO hi MCS post-ah kan dah deuh tlangpui thin a, Lunglei-a MCS ho hian a bik takin pahnih pathum an kawp a, DC atang tein an kawp a, tiang

chuan ‘independent charge la thei department mite pawh hi a DTO-ah hian a dah theih tawh lawm ni’ tih te pawh a awm a. Tiang chuan file te pawh a kal chak zawk ang a tih te rilru ah a awm a, vawiin ah hian a hnenah kan thlen bawk a ni.

Tin, Demand No. 45 - PWD-ah hian sawi tur tam tak kan nei theuh a. Pakhatnaah chuan, ka bial chhungah thil lawmawm em em awm chu, PMGSY atangin Lunglei - Buarpui road, 2008 vela an siam tawh chu tun sorkar tharah hian tender a chhuak ta rup mai a, vawiin ah hian lawmawm ka ti hle mai a; full depth reclamation performance design hmanga siam tur a nih thu han hriat leh phe chu a lawmawm. He kawng hi hmalak thuai a nih theihna turin vawiinah hian kan Minister pawh ka ngen a, thawh zawh hun tura thawh zawh a nih theih ngei pawh kan beisei tlat a ni. He kawng hi Buarpui tlangdung ten thlai thar an phurh chhuah ve theihna hmun a ni a, an nghakhlel em em a. Inthlan dawn pawh khan, ‘he kawng min siam sak theitu tur hi kan thlan chhuah a ngai a ni’ ti hian khawtlangte pawh an inrawn khawm hlawm a, an inhawr khawm hlawm a ni; chu chu min hriatsak se kan duh hle a ni.

Tin, pahnihnaah chuan, Lunglei lam kan hotute’n Lunglei MLA-te hna chanpual buaipui tur bik min pe thliah thliah a, chutah chuan kawngpui bik hi chang turin min ti a, tunah hian theih tawp kan chhuah a. Kan sorkar tan tirh atangin kan Minister - *first day of office*-ah ka zuk tel a, ngenna te ka siam a. Tiang chuan, ani nen leh MLA dangte nen kan va en a. Lunglei kawng pawh a bik takin ATL road maintenance chungchangah hian sawi tur tam tak a awm a. A hnenah vawi tam tak kan sawi tawh a, tun tumah pawh hian ATL road inkar kawng hi contractor mi pahnihin an thawk a. Heti lai thawh hi issue a tam em em mai a, LMC inthlan dawnah te khan inbeih nan tak hman a ni a, a thenin, ‘kal pahin order ka rawn pe’ an ti a, a thenin ‘lir a nghing tluan’ an ti a; chutiang chu he kawng hi a ni. Chuvang chuan, he kawngah hian hmalak tur tam tak a awm a, tunah hian hma lak mek a ni a. Contractor pahnihte hian hna a chanve ai tam mah anmahni pawisa neih contract-a an sign crore ₹6.5 vel ve ve chu a zo ti tih a ni a, fur a ni dawn a.

He lai kawng hi maintain a nih loh chuan mualpho theihna tam tak a awm avangin, PWD hotute nen pawh tun Chapchar Kut hmanga kan haw khan inkawmhona kan nei a; “₹365,00,000 vel kan neih belh theih chuan he kawng hi chu mualpho lo turin kan maintain hram hram thei ang” an ti a. Vawiinah hian min lo chhinchhiah sak ta sela ka duh hle a ni.

Tin, Lunglei khaw chung kawng tihmam mek a ni a. Mahse veng tlafual - Venglai, Sazaikawn, Venghlun, College Veng te kum rei tak siam a ni tawh lova, two-wheeler tan phe chuah a chhuk chho em em mai a, chet sual hi a hlauhawm em em a. Chet sual chuan, pilh duai duaina tham khawpin a lung hi a lang tho tawh vek a ni. Kha kha he House-ah pawh hian ka han tarlang duh a ni.

Tin, Demand No. 18 - Printing & Stationery-ah hian, Lunglei Govt. Press hian maintain loh khawl hi kan nei rei tawh lutuk a, vawiinah hian han tarlan ve hrim hrim ka duh a. Heng te pawh hi min enpui a tul em em a ni.

Demand No. 39 - Power & Electricity-ah hian kan Minister ka ngen duh chu - Lunglei leh ka bial chhung electric eng chungchangah harsatna kan tawh nasa hle mai a. A tlangpuiin ka bial chhungah hian Sazaikawn Sub-Station atanga lo kalin, chumi atang chuan Serte, Lungdai, Thuampui, Vanhne, Hauruang, Sazaikawn, Rahsi Veng, Lower Venglai, Venghlun, College Veng, Bazar leh Upper Chanmari te, Lunglei East bial te a chawm a; Civil Hospital pawh hian electric engah harsatna a nei nasa hle. Thlasik lai phei chuan meilum kan ai nasa a, station hian mi zo tawh lova. Lunglei EE leh SDO te nen pawh kan sawi ho tawh a; Sazaikawn Sub-Station hi tih len emaw, Lunglei khawpui veng chhung line hi bifurcate emaw a nih loh chuan, kan harsatnate hi a sut kian ngaihna a awm tawh lova. Chu chu kan Minister pawh hian min hriatsak se ka duh a ni.

Tin, Demand No. 40 - Commerce & Industries Minister hnena ka ngen duh chu - thalai talent nei tha tak tak hi kan tam ta hle mai a; media a tha a. Youtube leh google tea 'how to' tih han chhut ringawt hian, 'how to' ringawt hian a par chhuai mai a. (Pu Speaker, ka zo tep.) Kut-themthiamna tur ang chi pawh, he mi skill hi mahniin an zir nasa em em mai a ni. A bik takin ka sawi duh chu - chem chher te, chemte chher te an ti nasa em em mai a. Chutah chuan small industries te ang hian hma lakpui tur hi an tam em em mai a, chu chu tun sorkarin kan ngaih pawimawh kha a ni a. Hmanniah pakhat phei chu ka zuk en a, 'Rambo chemte ai hian a tha zawk ang em aw' ka ti a, an chher chhuah kha. A chhan chu, a zai theih hi a pui em em mai a, thir pawh a zai chum hmawh hmawh thei a; chutiang khawp chuan an chher thiam tawh a ni. Vawiinah hian hengah te pawh hian kan thalaite ngaihsak tur hi bial chhung mai ni lo, Zoram ah hian an tam tawhin ka ring a. Vawiinah hian chungte chu kan Minister hian min lo hriatsak ta se la.

Tin, a tawp berah chuan (ti tawh mai ang) Demand No. 25 - PHE Department-ah hian, Lunglei chu hmanniah min lo tlawh tawh a, a chanchin pawh a hre tawh a. Tin, kan MLA dangte pawhin an sawi turah ngai ta ila, thil tam tak a awm a. Tuna ka sawi duh hram chu, Lunglei water connection hi PHE Department hian an pek belh ngam tawh lo; chutiang chu kan dinhmun a ni. Pek belh ngam tawh loh connection a nih chuan, kan dinhmun chu a hniam hle a ni tih hi vawiinah hian ka tarlang duh bawh a ni.

Tin, a tawp berah chuan, Demand No. 38 - Rural Development-ah hian material component an pekah te hian hmasawna tak tak neih hi a tul ta hle mai a. Intihlawmna ringawt ni lo deuha heng thil te pawh hi kan hma a ngaiin ka hre tawh a, rural amenities tak tak siam chhuah hi a tul tawh hle a ni. Hei hi Zoram pumpuiin kan mamawh a ni a; MLA fund atangin eng emaw chen chu a tih ve theih e. Khawi run emaw, khawi upa run emaw, chungte pawh chu a tih theih a. Nimahsela, amenities tak tak ni tur erawh

chuan, chungte chu a daih tawk lova. Vawiinah hian Rural Development-ah thil tam tak sawi tur awm mahse, chungte chu ka tarlang zawk duh a.

Pu Speaker, heng kan minister-te demand, Pu Vanlalhlana Demand Nos. 12, 42, leh 45 te; Pu F. Rodingliana Demand Nos. 18, 39 leh 40 te leh, Prof. Lalnilawma Demand Nos. 25, 32 leh 38 te hi he House hian pass ngei turin ka rawn thlawp e. Ka lawm e.

HON. SPEAKER : Tunah sawi turin Champhai South Bialtu, Member zahawm tak Lt. Col. Lalhmingthanga ilo sawm ang.

LT. COL. CLEMENT LALHMINGTHANGA: Pu Speaker, ka lawm e. Kan Minister zahawm tak tak pathumte demand-ah hian a vaia han sawichhuahna hun a awm dawn lova. Hemi hun chhunga ka sawi lan duh, ka ngaih pawimawh pakhat diat diatin, PWD - kawng lampang te, Power & Electricity te, PHE - tui lampang PHE, heng te hi a hun chhunga han sawi hman hram ka tum ang a.

A hmasa berin, PWD chungchangah hian, kan mamawh em em mai, hmasawna tur atana ram tin, ram chhunga inkalpawhna tha a awm hi kan mamawh hmasak a ni a. Chuvangin, kawng tha kan mamawh a. Chumi kawng tha nei tur chuan kawng kan han sial a. Helaiyah hian a hmasain, kawng tha nei tur hian sorkar tih tur leh authority emaw, department emaw mai piah lamah mipuite pawhin kan mawhphurhna a awm a ni. Hei hi he House kaltlang hian han sawi ka duh a.

Chu chu, kawng kan han siam a; kawng a tlo zawk theih nan leh a chhawrnahawm thei zawkna atan drainage a awm a, chung drainage-ah te chuan tuihawk chauh luang tura tih a ni a. Chutah kan khawsak danin a zir loh emaw, kan fimkhur tawk lohna avangin emaw bawlhhlawh leh leivung te emaw kan khawsak kan fimkhur lohna avangin drainage blockage a lo awm thin a. Chung avang chuan tuihawk te a luan lohna turah, kawng laiah a rawn luang a, chu chuan kawng a titlo lova, a nih dan tur ang a ni pha lo thin a ni. Chu chu he House zahawm tak kal tlang hian ka sawi chhuak duh a.

Pu Speaker, kawng kan sawi dawn chuan mahni bial lampang, ka bial Champhai South concern han sawichhuah ka duh a. Tunah hian NHIDCL ho kawngpui sial - *four lane* kan tih mai, NH-6 hi laih a ni mek a. Hemiah hian kawng pawimawhzia a rawn lang a. Tunah hian Champhai leh Aizawl inkar hi tun hma deuha darkar 6 chuang, darkar 7 te (khaw chhiat lai te phei chuan) an hmanna thinah khan, tunah hian darkar 4 leh tih chauh tea (khaw chhiat loh lai te phei chuan) tlan theih a ni. Chu chu kawngpui thain hmasawna a rawn ken, khawsak a ti awlsamin, eizawna kawngah te hmasawna tam tak, awlsawna min rawn thlen a ni.

Chutih rual chuan, Champhai South bial chhung kalkawngah khian Tuipui leh Chhungte khua te erawh chu he kawngpui hian a kan tak avang hian hnuchhawn ramah a chantir

ta a ni. A bik takin, Tuipui khuaah khian, anmahni pual ram an neih vak loh avangin, an eizawna te pawh mi ram hawhin thlaite an ching thin a ni. Chung an thlai thar chu khaw taima tak mai anih avangin tupui kam, anmahni kawtkaiyah khian tomato leh thlai dang an tharte an zuar thin a, chu chu khilalaia khualzin te'n kalpahin an dawr thin a, chu chu eizawna atan chhungkaw tam takin an lo hmang thin a ni. Tunah chuan a by-pass ta daih si a, mipui te'n an tlawh tawh lova, Champhai kawng hlui atanga zuk let leha zuk pawh te a ngai tawh a, chu chuan an eizawna te nasa takin a tihchhiat phah a. Chumai bakah an nitin khawsakna, damloh thu-hla ah te damdawiin panna a lo hlat phah ta em em a ni. Tin, kawngpui atanga pawh anih tawh loh avangin an khaw chhunga electric mumal lo ah pawh electric siam tha tur anmahniin a hranpaa Champhai khawchhunga mi-tlawmngai te an han phurh nal nal te a ngai thin a ni. Chutiang khawp chuan an khawsak a ti harsa tawh a.

Hetah hian PWD changtu kan minister zahawm takina min lo hriatsak tura ka duh chu, Tuipui atanga NH-6 pawh turin km 2-3 emaw lek laih a ngai a, chu chu sorkar hmasaah pawh khan estimate an lo siam tawh a, amaherawhchu, a karah khian lei dawh a ngai a, lui kawr a kan ngei ngei a ngaih avangin a tawi thei ang bera awngpui pawhna tur atana kawng sial turah khian lei dawh a ngaih tak avangin, a hmasaa estimate awmsa lakh ₹20 vel chauh kha a awm a. Khilalaia mite kan han zawha kan han hriat danah chuan, a amount hian a phu lo lutuk a, a tlem lutuk avang hian a daih thei dawn lova an hriat avangin, tun thlenga hna la thawh loh a ni a; chu chu Minister zahawm tak khan min lo hriat sak se ka duh bawk a.

Tin, khilai kuate atan an khuaah school te pawh a awm a, khing an khuaa school zirtirtute, a then Champhai atanga rawn kal nal nal tur tan pheh chuan a harsa lutuk a, khingho an zirna ah te, an khawsakna ah te leh chitin rengah khian harsatna an tawh a; he ka bial mipuite harsatna hi min lo hriat sak ka duh a.

Tichuan, a chhak leha Chhungte khua a awm a, anni chu a la ziaawm deuh a; km chanve deuh chauh kawngpui pawhna tur atan kawng sial a ngai a, khi khi sorkar tana sum sen tam lutuk ngai lovin, mipui tam takte'n an lo chhawr theihna tur atan leh, awlsam zawka an eizawna kawngte a lo sut kian theih zawkna turin hei hi ka ngen sak bawk a. (minute 10 chu a tlem lo hle mai a, Pu Speaker)

Tichuan, PHE demand pakhat - Tui hi khawvel rampumah hian kan mamawhna a pung zel a, mihring an pung zel a, tui hi a pung chuang si lova. Chuvangin, mithiam thenkhat ten an sawi danah pheh chuan, khawvelah hian World War-III pawh tui inchuh vanga lo chhuak thei hial tura sawi a ni. Chutiang chuan, he India ramah ngei pawh kan hria a, water-dispute tribunal panga zet mai a ding tawh bawk a, chungho zingah chuan Krishna-water dispute te, Mahadaya etc. khangho zawng zawng kha a awm ta a ni.

Tin, keima bial Champhai South bial chhung chang ni lo, Champhai District pum atana kan tui tlan, kan tui lakna atana PHE connection awm chu - Tuipui atanga tui lak khi a ni. Tunah hian Tuipui hi (NHIDCL ho kawng sial avang pawh a ni thei baw k ang a) furah chuan a nu em em mai thin a ni. Tin, tuna tui pawh khi nasa takin a effect a, Tuipui atanga tuilak khi an khawp kham tawh lo a ni. Source dang ngaihtuah a ngai a, tunah hian Tuipui atang ringawt ni lova khaw thenkhat ramngaw ah te tuihna a awm a. *Entirnan*: Ruantlang leh Zotlang te chawm thei tur khawp Sihzau leh Khelthliah ah te a awm a, solar pump hmanga tui lak tum mek a ni. He ruahmanna phei hi chu a lawmawm em em a ni. PHE Senior Engineer hote ka han zawhin, khita tang khian solar pump-in nikhatah litre nuai 5 pump thei tura ruahman a ni a, mihring sang sarhih vel a chawm theih tura ngaih a ni. Tichuan, Ruantlang-ah mihring 1700 -1800 bawr vel an lo cheng a, a bul Zotlang-ah 3000 vel; a piaah leh deuh New Champhai-ah 1500, heng khuate hi hnianghnar takin hei hian chawm thei tura ngaih a ni. Chuvangin, khimi ringawt pawh khian tuna PHE-a kan source - Tuipui atanga kan lak kan kham khawp lohna hi a chhawk thei dawn a, khi khi tihpuitlin thuai thuai kan nghakhlel em em a ni.

Tin, chutiang bawkin hmun hrang hrangah tui lak theihna tur gravity system, Mualkawiah te pawh khian tuihna an nei a, khingte khi tihpuitlina khaw hrang hranga mite phurrit chhawk tur hian hengah te hian hma min laksak turin ka han ngen duh baw k a.

Tin, Pu Speaker, power lampangah hian, Champhai District pumpuiah khian power 132 kV, Khawzawl atangin kan dawng a, sub-Station Keifang tlangah 132 kV bun a ni a. Khita tang khian Champhai Lower sub-station te, Hnahlan, Khuangleng, Khawbung leh Farkawn-ah te khian 33/11 kV-a pek chhuah leh vek a ni a. Tuna ka sawi sub-station ah te khan transformer single hliir a awm a, an transformer a lo chhiat hlauh chuan a repair chhung zawng kha an lo thim ngat ngat dawn a ni a. Chuvangin, khingah khian a spare transformer back-up te min dah sak turin ka ngen duh baw k a.

Tin, Champhai - Keifang tlang 132 kV-a an tranformer bun mek khi 2.5 mVA a ni a, khi khian a zo vak tawh lova. A chhan chu, thlasik lai, power hman tam lai chuan overload te pawh an tawng thin a ni. Chuvangin, a aia lian deuh zawk 6.3 mVA a min thlak sak turin he House kaltlang hian ka ngen duh baw k a. Tichuan, kan Minister zahawm tak pathumte Demand hi he House zahawm tak hian a pawm sak turi ka ngen nghal baw k a ni e. Ka lawm e.

HON. SPEAKER : Tunah chuan Tuichawng Bialtu zahawm tak Pu RM Chakma ilo sawm ang.

PU RASIK MOHAN CHAKMA: Pu Speaker, ka lawm e. Vawiinah kan Minister zahawm tak pathumte - Pu Vanlalhlana, Pu F. Rodinglana leh Prof. Lalnilawma te demand sawihonaah hian, a hmasa berah Demand No. 42, Transport Minister hriat atan leh min chhinchhiah sak tura ka duh chu - Aizawl leh khawiah emaw

traffic jam neihna hmunah chuan taxi permit leh Auto-ricksaw permit khuahkhirh te hi a awm a. Mahse, Chawngte te, Tlabung te hetiang traffic jam awm miah lohna ah hi chuan khuahkhirh lovin pe thei sela, Committee kaltlang kher lo pawh hian a tih theih mai lawm ni, sorkar tan tax hmuhna a ni bawk sia? Saw lamah miin motor a leiin traffic ah harsatna tur a awm lova, chutiingin taxi pawh. Tunah hian Chawngte-ah pawh two-wheeler taxi permit lova service an awm nual a, hei hi a tha lo a ni. Dan bawhchhiatna a ni a, sorkar tan heuna ni bawk a ni. Chuvangin, permit hi pek zung zung theih dan awm sela, hetiang taxi service te hi chu khawlian deuh ah hi chuan a permit pe zung zung thei ila tih hi ka ngen leh rawtna ni sela.

Tin, Demand No. 45 - Public Works, PWD ah hian minister fel tak kan nei a. Kan area ah chuan contractor ten contract an hmu a, June – July vela work order tih fel vek hnuah khan fru tlak dawnah hna tan a ngai thin a; kum tin deuh thaw a ni a, kum hnih khat mai a ni lo. Mizoram hi ruah tlak tamna a ni si a, working season kan nei tlem a, November atang April, vanneih kumah May thleng an thawk thei a; thenkhat phei chuan May thla ah te hna an tan a. Hei hi engenge a awmzi ni aw ka ti a; kan work culture, working season pelh hnu ah hna kan thawk thina hi. Chuvangin kawng project tam tak pawh hi tha taka a hun taka zawh lohina a awm thin a, hna pawhin a chhiat phah a ni. Kha kha tihtak zeta kan ngaihtuah a ngai ka ti a.

Tin, kan area a PMGSY kawng an laih dan hi a mak khawp mai a. Vaseitlang - Meinobaksara leh Vaseitlang - Lakisuri kawng a awm a. Tin, Kukurdulya - Ugurdesuri South a awm a. Chutih laiin Vaseitlang - Meinobaksara kawng hi hetah Longpuighat - Vaseikai lama tang khan a pawh lo reng reng a. Engtinngge miin kha kawng kha an hman theih ang? Longpuighat - Vaseitlang kawng hi take up loh a ni a, Vaseitlang atang khan Meinobaksara kawng a pawh lo miao a. RD atang te, Council atang tein kan lai thin a, chung chu kutcha road a ni a. Khami kawng hman dawn chuan miin helicopter-in Vaseitlang-ah kal phawt a ngai a, a hnu ah motorin Meinobaksara ah a kal a ngai leh thin a ni. A chhan chu, Longpuighat leh Vaseitlang connecting road a awm lova. Vaseitlang - Meinobaksara kawng contractor hi mifel tak a ni a, a hna a tha a, House kaltlangin a chungah lawmthu ka sawi a ni.

Chutih laiin contractor tam tak hna erawh duhthu an sam lova; fur a lo thleng ang a, mipuiin an hmang thei dawn lo; a chhan chu, Longpuighat - Vaseitlang inkar connecting road a awm lo. Tin, khatiang ang bawk khan Vaseitlang - Lakisuri pawh hi a hman theih lova, Longpuighat - Vaseitlang connecting road a awm lo ang khan. A hmasa leh zual chu, khami piah daih Vaseitlang - Meinobaksara hi km 2 lek a ni naa, engmah kawng awm lovin Kukurduleya - Ugurdesuri South an tihzawm ta daih a, hman ngaihna a awm lo reng reng. Khatiang connecting a awm loh khan engatinngge plan an siam theih aw ka ti a. Khangte kha min en saka, khang kawngte kha hmang tangkai tur chuan Longpuighat - Vaseitlang road hi a hma thei ang bera siam a ngai a ni. Chuti lo chuan mipuiin an utilize hma khan kawng kha a chhe daih thei a ni.

A dawt leh ah chuan Pu Speaker, Chawngte - Ajasora road hi PMGSY scheme an launch khan second phase ah khan take up a ni a, 2004 atang khan permanent works etc. kha an zo a, a hnu ah black-topping tih a ni ta lo reng reng a. A hnu daih kum 2019 ah khan black-topping tih a ni a, culvert te, retaining wall te a thar vekin siam a ngai ta a ni. Hetianga defective plan lutuk avang hian sorkar sum kha engmah lovah a luang ral thin a ni. Hei, black-topping chu an zo tawh a, PCC pavement tunah an ti a. Mahse, leihlawn panga lai a awm a, tun thlengin leihlawn siam tura hmalakna a awm lova. Engineer-in-Chief office a ka zawh pawhin, 'khawi atangin nge kan sak dawn kan la hre lo' tiin min chhang a ni.

A awmzia chu, kawng kan siam tawh a, kahng bridge pali - Aldajana, Jamelsuri, Urlusuri leh Mandiriasora te kha kan siam si loh chuan engmah awmzia a awm lova. Fur a zo a, engtin tin emaw council atang te, job card atang tein kan clear thin a, wooden bridge, thingtuaiin kan siam thin a. Mahse, thla 3-4 vel kan hmang hnu ah fur a lo thleng a, kha kawng kha chu hman theih loh in a awm leh thin a ni. Khang bridge pali kha hmanhmawh deuha sak a ngai a ni; chuti lo chuan kawng kan siam a, bridge a awmlah avangin mipuiin an chhawr tangkaina lova, a chhe leh vek mai dawn a ni. Khang te khan min hriatpui hram se.

Tin, Pu F. Rodingliana, hon. Minister Demand No. 39 - Power & Electricity ah khan sawi tur ka nei bawk a. Hei, Chawngte ah power harsatna a nasa em em mai a, mahse vanneihthlak takin 32 kV line tower te siam zawh deuhthaw tawh a ni a. Mahse, khami project, 'Augmentation of electricity line within Chawngte and Borapansury' tihah khan sum a awmin ka hria a, mahse khatiang augmentation tih reng reng kha ala awm lovin ka hria a. Tin, 11 kV line awm laia hruite kha a ni a, a hlui tawh a, tunah 32 kV line in an thlak tawh a, a chhe zing lutuk kha kan harsatna a ni ber e. Vanneihthlak takin JE fel deuh kan nei a, chhun leh zan zawmin, chawlhni pawh sawi lovin an thawk thin a, an fakawm em em a ni, tuna kan J.E awm lai ni mek hi. Tin, khawthlang leh kan NGO ten an pui thin a, khatiang khan a enkawlna hnuaiah current chu kan nei ve a ni.

Tin, tunah hei Chawngte town area chin tih mek a ni a, kawng kan tizau a, electric ban tam tak kawnglaiah te pawh a let remrum a ni. Chuvangin, augmentation tih dan leh a cover area te kha a rang lamin min tih sak se. Khaw khatah veng thenkhat current nei lova an awm hi chu, a hreawmzia chu a tuartute'n chauhin an hria ang a. Chuvangin, khangte kha min ngaihtuah sak se, khawngaihtakin. Tin, electricity uncovered area hi a la tam mai a. Jarulsury te, Ugurdasury te, khang khawthlang western bank ho kha chu a la cover lo reng reng a. Khangte kha a hma lamin hma min lak sak theih se.

Tin, thil mak em em pakhat chu, Pu Speaker, 32 kV line hi border fencing scheme atang khan Borapansury-ah a kal a, an commission tawh a. Mahse a khua amite hman an phal lo reng reng a, BSF thu thu a ni an ti a. Kha kha engnge a awmzia aw? Border outpost a awm a, 32 kV line awm si, a khua amite hman phal loh kha chu, ka ngai serious hle

a, hei hi min enpui thei se. BSF camp pakhat-pahnih chauh a awm a, khami IBB fencing road-ah khan khangte pawh kha tunah hman theihin a awm lova, an enkawl that loh avang khan. Khami camp ringawt tana 32 kV line pek kha chu. A khaw chhungah ram kan pe a, mahse he line hi kan hman an phal ve lo hi chu a dik lo a ni. Chu chu Home Ministry nena inbiaka, khatiang dan kha a awm reng em; anmahni ringawt hmang tur khan? Hei hi question lian tak a ni. Kha kha, power thuneihna an hmang sual em tih kha min ensak turin ka ngen a. **(Hon. Speaker:** Minute thumin a pel ta a; a sawi zo thei dawn tawh em?) Ka zo tep e, Pu Speaker.

Tin, Prof. Lalnilawma, Hon. Minister demand-ah hian, PAC-ah khan lawmthu sawi tur ka nei a. Chawngte-ah tunah hian thlahnih danah tui vawikhat kan dawng a. Mahse, NABARD atang khan *Greater Chawngte Water Supply Scheme* kalpui mek a ni a. Tunah hian water treatment plant tih a ni a. Chu chu, a officer-te ka zawh khan March thla ah chuan commission theih tur awmin an sawi a. Kha kha a hun takah commission theih ni se, kan hmanhmawh a ni, Pu Speaker. Han ngaihtuah la, Pu Speaker, Chawngte anga khawlumah thlahnih danah tui vawikhat kan hmu a; a rapthlak a ni. Chuvang chuan, hei hi min ngaihpawimawh sak turin ka ngen a ni e.

Tin, JJM hna hi kalpui mek a ni a, a tha a. Kha kha a hawn theih hunah kan Hon. Minister ngei hian min hawnsak turin amah ka sawm nghal bawk a ni. Tin, commission hun kha March thla chhung ngei ah ni thei bawk se, chu chu Pu Speaker, nangmah kaltlangin ngenna ka siam bawk a.

Tichuan, kan Minister pathumte demand kha ka thlawp a, a tha ka ti e. Ka lawm e.

HON. SPEAKER : A lawmawm e. Tunah chuan Champhai North Bialtu, Member zahawm tak Pu H. Ginzalala ilo sawm ang.

PU H. GINZALALA : Pu Speaker, Hon. Minister pathumte Demand a nos. te an rawn chhiarchhuak tawh a, ka chhiar tawh lo mai ang a. A hmasain PWD changtu Minister-in min lo hriatsak atana ka sawi duh chu - Khawchhak Champhai District-ah leh Khawzawl District-ah khian kawng chhe lutuk mai, hun rei tak maintain tawh loh a lo la awm tlat mai hi a paw ka ti a. A bik takin Khawzawl - Rabung inkar hi kan Hon. Minister hian min hriatsak sela a thain ka hria a.

A dawt lehah chuan, Champhai khawchhung kawng hi a chhe em em vek mai a ni; tha lai awm lo tluk a ni. Tunah hian Swadesh Darshan Tourism atangin crore ₹90 lai project kan nei dawn a ni a, mikhual an rawn thleng dawn a ni. Mizoram-ah chuan tourist destination ber tura ngaih a ni a. Chuvangin, Champhai khawpui chhung hi cheimawi a tul khawp mai a. Tin, kawng mai ni lo, sidedrain leh kawng sir beautification te pawh kan kalpui a ngai a ni, Pu Speaker. Chu chu department lam ten min hriat sak se.

A dawt leha ka sawi duh chu, Hnahlan khawchhung kawng hi a tha em em vek mai a, kawng a zau tha a. Amaherawhchu, kan hmabak chu black-topping a ni. Rawn zin ve ula ka duh khawp mai; rawn en teh u; entawn tlak a ni hei hi chu. Amaherawhchu, black-topping hian ti deuh zar mai ila chuan, *Mizoram-Smart Village* tling thei a ni. Chulai chu kan sorkarin min hriat sak se ka duh khawp mai.

Pu Speaker, he House-ah hian ka sawi tawh a, kan ram hian kawng ngil hi kan phu hian ka hria; PWD-te hian theihtawp han chhuah leh se a tha ka ti. Kawng tihngil theih, (a ngil thei lo ka sawi lo, a ngil thei ka sawi a) tihngil theih a tam lutuk; tun aia ngil thei ka sawi. Hmanah khan ka sawi tawh a, a sustainable lo tuna kan kal dan hi. Kawng a ngil khan a tawi a, maintenance tur pawh a tlem a ni. Tin, a ngil loha a kual khan, motor a tlan kual a, diesel hi kan ei hek. Motor tinah hian drop khat lek lek pawh lo sen belh pawh ni ila kawng kual tinah hian, motor engzat nge ni khata tlan; kum khatah engzat nge tlan; kum 100-ah engzat nge tlan; diesel kan ei hi a inthlau lutuk a ni. Chuvangin kan ram hian kawng ngil hi kan phuin kan mamawh a ni.

Tlema innovative deuh te hi ka han rawt ve mai mai chhin ang a. Aizawl leh Lunglei hi kan khawpui lian berte an ni a, hemi inkar hi chu model tling deuh hleka siam that tum ila, kan hotute pawhin an sawi tawhin ka hria. Tin, mipui pawh hi kan inhawn zau a ngai ka ti. He kawng hi a ngil ang a, a zau ang a, a tha bawk ang a, a mam ang a. A theih pheh chuan toll fee kan la ang a; lak kan tum chhin tur a ni ka ti. Motor pakhat 50/- kan la a nih pawhin, han chhut chhin teh u; a tam tham khawp mai a, thla khatah hian cheng nuai 15-te kan khawn chhuak thei dawn a ni. Kha kha a maintenance-ah kan hmang thei ang a, a daih lo a nih pawhin sorkar khan a belhchhahna tur kha a tum dawn ta a ni. Tin, kan thalai entrepreneur-te tan pawh khan eizawna thar a siam dawn a ni.

Chuvangin, kan Governor Speech-ah khan kan hriat reng ka ring a, damloin damdawi kha a ei a ngai a ni, dam tur chuan. Kan damdawi hi a kha ang; mahse kan damna tur a ni. Damdawi kha kan ei loh avangin kan dam thei lo a ni.

Hei, kan Member, East Tuipui Bialtu khan a rawn sawi kai zeuh a; kan kawng chhiat chhan chu 'schedule maintenance kan neih loh vang a ni' ti ang zawng khan a rawn sawi a. Pothole a awm a, pothole kha motor khan a rawn chil a, khatah chiah mai khan a chhe chak lutuk a ni. A chhan engvang nge kan tih chuan, tlema technical term deuh deuh a awmin ka hria, ka sawi sual loh chuan. Kha pothole kha motor kein a zuk dai khan 'impact load' an ti a, tuboh-a kan vaw chawrh chawrh ang chi kha 'impact load' a ni, a chhe chak bik lutuk. Pothole a awm tak tak hmaa kan han repair that kha chuan, rei tak a daih ang. Mahse pothole a awm tawh kha chuan, a chhiat dan kha a speed kha a rate kha a chak lutuk a ni. Chuvangin, schedule maintenance pawh hi kan kalpui a ngai a ni.

A dawt lehah chuan, Transport lam pawh hi kei chuan kan thalaite tan employment generation hi No.1 ah dah ila a thain ka hria. MST Bus-te pawh hi kan hlawk lo a nih chuan outsource mai a tha lawm ni, Pu Speaker? Kan thalaite'n eizawn nan lo hmang rawh se, an hlawk em em ang. A sorkar kha kan hlawk lo a nih pawhin, an hlawk khawp ang an ni chu. Chungte pawh chu ka rawt duh a.

Tin, electric vehicle hi kan ramah hian a tih theih a ni, hmun thenkhatah. A bik takin Aizawl leh Champhai inkar pawh hi kawng a tha tawh; grade a tha tawh. Hei hian employment a generate ang a, environment friendly a lo ni dawn bawk a ni.

A dawt lehah chuan, Power changtuin min lo hriatsak atana ka sawi duh chu, ka bial chhungah khian hmun zau deuh mai kan nei a ni. Solar power hi megawatt scale in kan siam thei a ni tih hi min lo hriatsak sela. Nichin khan zawhna ka sawifiah hman lova, a pawh khawp mai a, min lo hrethiam sela. Civil Wing - P&E Department-ah hian 'kan hmang tangkai lo deuh lo maw?' tia zawhna kha a ni. Hei hi ka thahnemngaihna ki a ni; Civil Wing hian thawh tur nei se ka duh luat vang zawk a ni a. Tunah hian kan sorkarin hydel project tih kan tum a ni a, hydel project tam thei ang berin siam ila khang Civil Wing-a kan Engineer-ten hnathawh tur nei se tih hi ka duh vang a ni a. Minister khan min chhan sak a, ka lawm hle mai.

A dawt lehah chuan, kan bial chhungah IIDC te kan nei a ni, Industry Deptt. hnuai ah hian. Hei hi a rang thei ang bera function turin kan Hon. Minister hian hma min lak sak sela a tha ka ti a. Tunah hian Law Deptt. lam hian an luahin ka hria a, hei hi a nih dan tur a ni lo. Tunah hian kan luah hawh tir mai a ni a, a tha reng mai a. Amaherawh chu, a nih dan tur dik taka kal vat hi thain ka hria a, Sorkar tan pawh mualphona a nih theih avangin.

Tin, a dawta ka sawi leh duh chu, "*The Mizoram State Purchase Rules*" hi enfel vat hi a van tha em! Hei hian kan thalaite tan scope a siam dawn a ni. State thenkhata an tih dan te kan hriat sak riari-ruai a, kan hre zik tluak lo mai thei a. Tender crore 2 nge, a hnuai lam chin hi chu local entrepreneur chauhin an chhan theih tur te pawhin an siam a ni. State pawn lam mi an rawn luh theih miah lohna tur Dan te pawh hi an siamin ka hria a ni. Khatiang te kha 'he rules hmang hian a tih theih ang em' tih lai te pawh ngaihtuahna kan siam a thain ka hria a. Khatia kan tih khan, state dang, pawnlam mite kha kan hnar thei dawn a ni; chutah chuan kan thalai te dinchhuahna tur kawng a inhawng dawnin ka hria.

A dawta ka sawi leh duh chu, kan Hon. Minister-in min lo hriat sak atan - Tualpui khuaah hian power supply 11 kV line kan nei a, hei hi a line a thui si a. A danah chuan 11 kV line hi chu distribution thui tak tak atana hman chi a ni lova, line load a sang em em mai a ni. Tin, a line hi ramhnuaiah an kal tir tawp mai a ni a, mau leh thingte khan

an tawk thin a, fur ah hian line fouls a tam thei em em a ni. Chu chu a break-a 33 kV line a min tih saka, kawng kama min sawn sak turin ka ngen baw k a ni.

Kan sawi leh duh chu, Pu Speaker, Industry Deptt. te leh Deptt. dang dang Transport te pawh a ni tho ang a; ka duh ber a chu, kan thalaite eizawna kan create sak hi thil dang zawng zawng aiin a pawimawh ka ti. He House kaltlang hian, kei chu kan thalaite tan ka au dawn a ni; ka la au dawn chauh. Chu chu ka sawi nawn duh a. Hei, hmunphiah te pawh Industry Deptt. in a take-up te pawh hi tha ka ti. Simple te a ni; mahse demand a tha a, hmunphiah chi hrang hrang design hran hranin kan siam ang; rawng chi hrang hrangte pawh in kan siam ang; nihliap kuang ang deuh te pawhin kan siam ang; innovative deuhin kan siam ang. Khatah khan tihdan awmin ka ring a, market lam te pawh kan ngaihven tur a ni.

A dawt lehah chuan, a changtu hon. Minister-in min lo hriatsak ka duh chu, nichina Champhai South Bialtu zahawm takin a rawn sawi tawh ang khan, Greater Water Supply scheme hi kalpui a hun tawh khawp mai a. Tuna existing infrastructure a hi a hlui tawh khawp mai tih hi min lo hriat sak sela. A dawt lehah chuan, Champhai Dist. hi elevation a sang a, a zo a ni. Amaherawh chu, thei lam Horticulture lam tan pawh development leh potential a sang a, hengte pawh hi minlo hriat sak sela. Tin BADP ah hian 'VVP' kan tiin ka hria a, VVP te pawh hi changtlung takin ka bial chhunga min implement sak turin ka sawm duh a ni. Tin, link road hrang hrangte pawh kan mamawh a, Horticulture link road te pawh kan mamawh baw k a ni.

Pu Speaker, thil dang deuh hlek, tunah hian Lunglei Water Scheme hi PHE in an take-up in ka hria a. Chutah chuan, tui stock-na tur an khuap a, feet 10 chuang aia sangin an khuapin ka hria a. Theih pheih chu nise PHE khan P&E Deptt. lam te nen convergence-a kalpuiin, hydro lam te hi kalpui theih a ni em, tih lai te kha ka rawt duh a.

Pu Speaker, kan hon. Minister-te demand hrang hrangte ka rawn sawi chhuak tawh a, an demand-te hi kei pawhin tha ka ti a, 'he House zahawm tak hian pass pui ngei ila' tih hi ka rawn rawtna a ni e. Ka lawm e.

HON. SPEAKER : A lawmawm e. Tunah chuan, Lunglei South Bialtu zahawm tak, Pu Lalramliana Papua ilo sawm ang.

PU LALRAMLIANA PAPUIA: Pu Speaker, ka lawm e. Vawiina demand kan sawitur pathumte hi ram mamawh thil, mipui mamawh tak tak Deptt. te anni hlawm a. PHE te, PWD te leh RD changtute demand kan sawi dawn a ni a, sawitur pawh a tam lo thei lo niin a lang a, hun khawhral lovin han sawi zung zung ta ila.

Ram chhunga hmasawna - kawngpui te, building te, asset pawimawh tak tak te siam turin PWD ten hma an la thin a, sum pawh a ngai tam a, mipui pawh hian kan mitmei

ruk deuh pawh hi niin ka hria a. Tin, kan rinhlelh ruk deuh pawh hi niin ka hria a, sum tamna a nih avang leh technical thil eng emaw kaihnawih te leh kan hriat thiam phak loh thil te a nih avangin. A hmasa lama kan sawilan duh kher chu, tun tumah hian election campaign lai pawha tum 40 dawn hlemhletna laka fihlim tura lo intiam tawh tuna kan Minister Pu Vanlalhlana'n PWD an chang hi ka ngaih a thain lawmawm ka ti em em mai a. PWD pawh hian mipui rinhlelhna an hlawh thin tam tak hi tun sorkarah hian a ti bo dawn nia hriatna te pawh ka nei a ni.

Tin, mahni hriat bel lam ram te kan fang kual lo thei lova, demand kan sawi hian. Mizoramah tlawh loh hmun tam tak ka nei a; keini bel vena lam chu, Chhimlam saw a ni lo thei lova. Chhim lamah sawn kawngpui laih thar tam tak awmin, tunhma Mizoram-a kawng chhia kan sawi apianga kan sawi lan thin 'Chawngte kawng' kan tih te khu, tunah chuan kawng zaupui maiin a lo tlang ta a, a lawmawm em em a. Amaherawhchu, a siam hun lai khan vil leh venthat a nih loh avangin, a nih dan tur ang a ni pha ta lova; an siam zawh kum fur khat atla a, culvert te a hnawl a, kawngpui te a khi chat a. Chutiang chuan, a lungrem te a tlabal rem rum mai a. Chutiang a nih avang chuan, an siam zawh hlimah pawh Lunglei nen an inkar pawh tlan mumal hleihthei lovin a han awm nghal kha a ni a. Loh theih loh in khulaila khualzin kal thinte pawhin Lawngtlai lam atangin an rawn helkual a, nilenga hun hman te a lo ngai thin a.

Thawk khat lai chu (engmah ka nih loh lai khan) khulai kawngsiamtute khu ka thahnemngaih luatah phone atang te khan kan vau ve ringawt a, min ngaipawimawh tham si lova. Khatiang te khan kawngpui tha nei tura kan lo beisei vea kha, kan vei ve em em a. Chutiang a nih avang chuan, khawthlang lam dinhmun hi, tun fur pawh hi kan huphurh em em mai a, culvert a hnawl te pawh siam that a la ni si lova, khatiang te kha hmachhawn leh ta ila, tunah hian a helna awm chhun chu Lawngtlai lama hel vak hi a ni mai a ni. Chuvang chuan, sawlai connectivity atana kan mamawh em em chu, Vaisam PMGSY road a tlang tawh a; Vaisam - Zehtet, via-Sailen saw sial tlang ila chuan, Tlabung lam atanga kual deuha Chawngte kan kal thin kha ni tawh lovin, a kawng zatve vel khan kan kal thei tawh dawn a.

Tin, khuti laia khaw te tak te te, kut-hnathawktute khu kawngpuiin a paltlang chuan, an tan economic road a lo ni ang a, Lunglei khawpuiah thlai thar fresh tak an phur lut thei ang a. Khu khu kan House Leader pawh Zehtet atangin ka han thlirpui ngial a, a ni pawh khan tha a ti khawp mai a. Kan House leader nen pawhin, 'hei hi chu thil titheia kan awm chuan umzui chi a ni' tiin kan sawi dun a, kan sorkar hnu hian PWD Minister te nen Theiri at tlang atangin a man-hla dan tur te sawiin kan han kawh leh ngial thin a. Khung te khu PWD lampang pawhin tawi te a ni tawh a, Sailen thlen nan km 10 pawh tling mang lo a ni a, Sailen atanga Zehtet pawh km 5 vel lek a ni. Chutiang a nih chuan, tun aia hun chanve vel lek sengin Chawngte a kal tlang theih dawn a. Kawng a chhiat pawha hel kual vak ngai lovin, tuna a kawng pangai zawh tawh lo hian a leh-lan zung zung theih dawn a. Khu Khu 'tun sorkarah hi chuan tlang se la chu aw'

tih hi sawi lan ka hmasak duh ber a ni. Kan kut-hnathawktute thlaithar chawkluhna tur remchang kawng pawimawh tak a nih avangin, ‘min hriatsak se’ tih hi ka duh ngawih ngawih a ni.

Tin, kawngpui maintain ngai kan ngah em em a, sawi tak ang khan kan hriat bel lam kan sawi lo thei lova. Lunglei khawpui chhungah pawh internal road tam tak thual that ngai kan nei a, tunah te hian tih mek ni mahsela, hmabak kan la ngah em em a ni. Tin, kan sawi tak ang khan ‘ATL Road’ kan tih Lunglei - Aizawl Road pawh hi thawkkhat lai phei kha chuan, “missionary kohna chhang thei zawn a ngai a nih hi; Engineer zingah tunge helai kawng hi ‘ka enkawl tha thei ang’ ti missionary tur hi ko teh u” ti tein ka rilruah ka ngen thin a ni. Official leh kan sorkar thuneitute ah pawh tunah erawh chuan beiseina sang tak kan nei ta a, lawmawm ka ti a, mipuiin min thlir thup a ni. Chuvang chuan, sawlai kawng saw, nichina kan ngaihthlak tak ang khan a model-ah kan siam chuan chhim lam chhawrtu zawng zawngte leh Aizawl lam atanga chhim lam kal turte tan pawh a lawmawm khawp ang. Chu chu ka sawi nawn ve leh duh hrim hrim bawk a ni.

Tin, kan demand sawi mek zinga department pakhat - Power & Electricity Department ah hian sawi lan duh ka neih chu, tun dinhmunah hian kan ramin kawlphehtha duh khawp a la tharchhuah loh avangin, kan neih chhunte renchem taka hman a ngai a. Hetiang tur hian (ka rilrua lo awm ve thin pakhat chu) hmalakna a awm em ka hre lova, sorkar laipui atang pawh khan ruahmanna chu a awm deuh em aw ka ti a, *Smart-meter*, prepaid hmanga electric bill kan pek hi a tul tawhin ka hria a. A zir chiantute thenkhat sawi dan chuan, khawpui area-ah hi chuan, ‘smart meter kan hman loh avang hian kan electric power consumption hi 15% vel kan loss a ni’ an ti a. Thingtlang lamah phei chuan chu aiin a la nasa leh zawk a, ‘25% te kan loss phah a ni’ an ti a. Khatiang a nih phei kha chuan, kan dinhmun thlirin ‘kan mamawh nasa hle mai’ tih hi ka rilruah a awm a. Smart meter hmang thei ila, mobile phone kan mamawh tawh kan han prepaid-a, kan hmanga, kan hman zawh dawna kan han recharge-a, kan han top-up leh thin ang hian ti thei ila chuan, ‘bill sual’ tih te leh kawng tam tak kan pumpelh theiin ka ring a. Keimahni ah pawh inrenchemna a keng lo thei dawn lova, ‘hei hi kan rampum huap hian kan hotute’n ngaihtuahnaah lo nei se, a tha mang e’ tih hi ka sawi nawn leh duh bawk a ni.

Ka bial chhung Mualthuam South ah sawn, (kan Minister te’n min hriatpui em, ka hre lova) tun dinhmunah hian chhungkaw 50 vel electric connection-te disconnect anni a. A chhan chu, department lam atanga kan hriat dan deuh chuan, an electric bill an pek theih loh vang nia sawi a awm a. Bill, bill sual avangin tam tak a lo haw chang a awm a, thingtlang mirethei tan chuan complain loh chuan pek ngam a ni lova; complain turin furah motor a tlang lova Mualthuam South-ah, harsa taka engtin emaw khawpui kal remchang te nghah a ngai a. Khatiang innghak khawl a nih avanga ‘bill in pe lo rei tawh’ tia disconnect sak chhungkaw 50 bawr vel an la awm a ni. Chuvangin, hengte hi

a theih chuan rilruah min lo hriatsak se la; kan Minister pawhin min lo chhinchhiah sak thei sela, Pu Speaker ka duh hle mai a. Hemi chungchangah pawh hian meter reader pangai te pawh hian a hmunah bill hi siam thin se a tha hle dawnin ka hria a; bill sual kawngah te pawh hian a veng deuhin ka ring a ni.

Tin, Tawipui tlangdung, Lawngtlai road ah sawn, khaw eng emaw zat viltu tur SDO emaw, JE emaw thutchilhtu tur an mamawhin ka hria. An problem chu ka sawi thui hman tawh lova; chutiang chu kan nih avangin, hei hi min hriat sak sela.

Tin, P&E ah tho hian ka sawi leh duh pakhat chu, tunah hian department-in solar plant bun turin an inruahman mek niin ka hria a. Mualcheng (ka bial chhunga mi) saw tlang chhipa awm a ni a, ni chhuak leh ni tla a dawng a, a tha em em mai a. VC ten hmun pawh an pe phal a, an in report niin ka hria a. Saw saw kan tih chuan kan ti fuh ngawt ang. Sawlai hmun saw thlan a tha khawpin ka hria a, solar plant bunna tura department in a ruahman mekah te pawh hian min lo chhinchhiah sak se, tih kha ka sawi lang duh bawk a ni.

Aw le, sawi lan loh theih loh Public Health Engineering Department ah tawite ka han tarlan ve duh chu, tun Session zawhnaah pawh khan kan sawilang a - JJM kan nghahhlelh em em kan chhawr dawn ta nia kan hriat lai hian, thingtlang khaw thenkhatah chuan a taka hlawhtling lo tur hi an awm a ni. Ka bial chhung ngeiah pawh tunah hian a hlawhtling thei ngang lova kan hriat avangin, Thangpui khua chuan khaw sawn dan tur kan ngaihtuah ringawt mai a ni. Tui harsa kumhlun tur anga inngaih kha an ngai ngam lova, kan inpuahchah mek a. Kan sawn thei ang em aw, khaw sawn lah chu a hautak si a; hei hi department lampang pawhin min lo hriatsak nawn leh se ka duh khawp mai a. A taka JJM hi chhawr theih tura hlawhtlin ve ngei theihna turin, tun thlenga la hlawhtling lote pawh hi min ennawn sak se thain ka hria a.

Tin, Greater Water Supply Scheme tih changtlunna tur atan SASCI atangin Lunglei lamahte pawh cheng tam tak min ruahman sak tih kan hria a, kan lawm em em a. Chutih rualin, Greater Water Supply Scheme-in connection thlen phak lohna town area ni si Hrangechalkawn te saw an buai em em a; khawpui chhung, LMC area ni siin. Khang te pawh kha department lam hian SASCI-a thun dan awm thei se, tiin project te pawh kan theh lut tawh a, LMC kaltlangin. Khang te kha telh ve hram dan awm thei se la. A nih loh chuan, Sethlun atanga a pump chhawanna tur khawl lian tha tawk dah a nih chuan tihdan dan pawh a awm mahna. Khawpui chhungah pawh tui connection la neilote an awm bawk avangin, ka bial chhung te pawh saw ngaihtuaha, ngaihven tha ka ti em em a ni, tih kha ka han sawi lang duh bawk a ni.

Pu Speaker, Rural Development hi tlemtein, tichuan ka duhtawt tawh ang e. RD hi thingtlang khaw bialtu nih chuan kan rilruah a lang lo thei lova. Tunah hian kan inngahna chu MGNREGS hi a ni deuh mai a. State atanga kan sum dah RD atang hian

thil tihtheih tak tak hi a awm ta lo em ni aw ka ti a. Ka ngaih pawimawh thil pakhat chauh ka han sawi duh chu, thingtlangin an mamawh em em, RD atanga tih theih ve thin pakhat chu - khawtlangin community hall hi an mamawh a ni; vantlangin puipunna hmun hi khaw te takte teah pawh hian tunah hian an nei ve deuh vek tawh a. Ka bial chhunga khaw lian leh khaw hlun tak pakhat Chawngte 'L' ah khuan Community Hall sawi tur an nei lova, an buai em em mai a ni. Khung te khu khaw hlun tak an nih avangin, tun tuma RD sum crore ₹456 kan dah atang te hi chuan a hma tel theih ve mai awm mang e, tih te ka rilruah ka ngaihtuah a; min lo chhinchhiah sak atan kha kha ka beisei ve leh bawk a ni.

Aw le, bawhpelh thui lutuk kha ka inthlahrung a. Vawiina kan sawiho minister pathumte demand pawimawh tak takte - Minister Pu Vanlalhlana Demand Nos.12, 42 leh 45 te, Minister Pu F. Rodingliana Demand Nos. 18, 39 leh 40 te bakah Minister Prof. Lalnilawma Demand Nos. 25, 32 leh 38 te hi he House zahawm takah hian pass-pui ngei tha ka ti a, keipawhin 'ka thlawp a ni' tih kha ka rawn sawi lang a ni e. Ka lawm e.

HON. SPEAKER : A lawmawm e. Member te minute 10 kan inpe a. Chawhma hunah dar 1 rik nan minute 2 kan la nei a, sawi duh tan pawh a nuam tawh chiah lo ang a. Kan chawl phawt ang a, dar 2:00 PM ah kan thukhawm leh dawn nia.

(Recess)

2:00 PM

HON. SPEAKER : Aw le, discussion kan chhonzawm ang a, member zahawm tak Pu Lalrinsanga Ralte ilo sawm ang.

PU LALRINSANGA RALTE: Pu Speaker, ka lawm e. Kan Minister pathumte demand kan sawi thei dawn a, a lawmawm takzet a. Hun a tlem avangin department tin ka sawi dawn lova, ka ngaihpawimawh zual thenkhat ka sawi ang a, a dang ka sawi lohte 'ka ngai pawimawh lo e' tihna lam ni lovin, sawi duh deuh ka nei a ni.

A hmasa berah chuan, Demand No. 45 - PWD hi sawi ka duh a. PWD hian building leh kawngte an khawih a. Amaherawh chu, tunhnai deuh hian PWD hi kawng lam khawih tu deuh lar hian an lar a. PWD hi an vanduai hle pawhin ka hria a, Mizoram chhungah hian kawng nei, BRO te, NHIDCL te leh State PWD kawng a awm a. Kan State PWD te hi chuan an theihtawpin an kawngte an thual tha a, a hun pangngaiyah theih tawpin hma an la thin a, a chhiat pawhin ngaihsak an hlawh thin a. BRO pawh chutiang chu ni ta se; NHIDCL hi tlema kan enpui nat deuh a tulin ka hria a. NHIDCL hnuai hian kan biala Bilkhawthlir leh Vairengte khu RATNA in an khawih a, NHIDCL hnuai an kawng siamah PWD hian thuneihna tak tak an va nei si lova, va enpui pawh hian

awmzia vak a awm thin lova. Hei vang hian NHIDCL te kawng siam hi hmun tinah hian a chhe khawp mai thin a. Chuvang chuan, helai hi ‘en nat deuh dan a awm em’ tih hi ka rilruah a awm a. Tin, Mizoram Project Monitoring Committee din a ni hi a lawmawm hlein ka hria a. Heng hian na leh zuala an endika, a tul anga an hmalakna te pawh an enpui theih ngei ka ring a, a lawmawm hlein ka hria a ni.

Tin, hetiang a nih rual hian, kan SDRP chapter 4 ah khan, ‘*Road Protection Squad* din’ tih kha a awm a, hei hi a la tul zel em; tuna project monitoring committee hi a ni mai dawn em, tih kha ka hre duh deuh a. Tin, kan PWD Minister in min react atana ka duh a awm a. “Kawng chhia a awma complain zung zungna tur mobile network siam a ni ang”, tih hi a pawimawh dawn hlein ka hria a. Hei hi engtikah nge kan siam thei ang?

Tin, sorkar hmasa khan sum awmlo chung chungin North Hlimen leh Builum inkar kawng hi min laih tlang sak a. He kawng hi a pawimawh em em a, Hmar tlangdunga khuate - Thingthelh, Hlimen, Saipum ten an District Capital Kolasib rawn tlawh tura Serkhan a rawn kual luha Kolasib pan thlak leh ngai a ni a. Chutiang a bona turin a vang tan zawngin North Hlimen atang hian Builum Lui thlengin kan lai tawh a. Chu chu sorkar hmasaah khan PWD enkawl turin dilna kan thlen a, department pawhin min en sak tawh a. Hei hi kan tih tlang theih chuan, hmar tlangdung te’n awlsam takin an district capital Kolasib an rawn dawr thei dawn a. Hei hi kan Minister-in min ngaih pawimawh sak hram se.

Tin, sorkar hmasa khan Vairengte - Phaisen inkar kawng ramri thleng kan lai tlang a. Hei hi ramri venhim nan leh Phaisen tan pawha pawimawh tak tur, Vairengte leh Phaisen inkalpawhna tur a ni a, min ngaih pawimawh sak thei deuh se. Tin, Rengtekawn Zero Point - Bawktlang Sub-Station inkar hi SASCI ah dah niin ka hria a. Hei hi election hma deuh pawh khan Kolasib PWD Division atangin bul an tan hman a. Department khawih tur niin, nuai 25 vel dah niin ka hria a. Hei hi engtikah nge an khawih zawh theih ang? Bul an lo tan nil-nial tawh a, department lamin chak leh zuala khawih ni ta se. Tin, Saipum – Hlimen kawng chhe zual hnawhkhahna tur leh siamna tur SASCI atang khan nuai 80 vel earmark niin ka hria a, department khawih tur khan. Heng te pawh hi hma min lak sak theih chuan a lawmawm hle ang.

Tin, Demand No. 39 - P&E Department hi han sawi a chakawm khawp mai a. Kan tak ren-run deuh a; khawvel pawn pawh be thei P&E Minister kan nei hi a lawmawm khawp mai a. Helai kan tharchhuah a tlem deuh pawhin, khawvel pawn a biak theihte atangin eng eng emaw kan lalut thei turah ngai ila.

Pu Speaker, ka sawi duha chu, ZPM inzawrhna – SBRP, ‘kan sorkar chuan kan ti ang’ an tihna bu-ah khan Mizoram chhunga lui khuah tur pathum a inziak a, chungte chu – Tlawng Hydro Project, 54 MW pechhuak thei te, Mat-Sekawi, 120 MW pechhuak thei (Rotlang khaw bul ami) te, Tuivai phase-I, 100 MW pechhuak tur (Ngopa khaw bul

ami) te a ni a, a lawmawm hlein ka hria a. Hei hi kan sorkarin power lama kan intodelh theihna tura tana hma in rawn lakna tur hi ropui ka ti a; kan lo en reng dawn a. Heng project lian tak tak pathumte kan tithei a nih chuan, kan ram kan intodelh phah theiin ka ring a, a lawmawm dawn hlein ka hria a. Chuvang chuan, lui pathum khuah kan tumate kha he kan sorkar chhung hian eng emaw zat hlawhtling hman turin kan lo beisei a ni.

Tin, P&E Minister ina min lo chhinchhiah sak atana ka duh chu, Mizoram current line upa ber, Assam atanga Mizoram rawn kaltlangin Vairengte leh Bawktlang inkar khu a rei tawh khawp mai a, siamthat lohin a awm a. Sorkar hmasaah khan project te kan han siam a, tower thlak tumin ruahman a ni a. Mahse, sum a tam deuh dawn avangin, ‘rawn siamtha leh teh u’ tih kha a awm a. Hei hi chak leh zuala min kalpui theih chuan, khulai tlangdung chauh ni lo, Mizoram pum ina kan hman tangkai line pawimawh a ni si a, hei hi siamthat theih dan a awm chuan a lawmawm ngawt ang.

Tin, Pu Speaker, Serlui tuikhuah khu 12 mW pechhuak thei a ni a, a vai khuan Mizoram sorkar ta a ni a. Khawl pathum bun a ni a, tunah khuan khawl pahnih *run* theihin a awm a, khawl pakhat khu siamthat tep a ni a. Tunah hian tui a tam vak loh avangin 2.88 mW - 3. something mW a pechhuak thei mek a. Hei pawh hi kan sorkar hian min ngaih pawimawh sak thei se; 12 mW pechhuak thei a ni a, a hmunhma te cheibawl that leh deuha, staff quarter leh office te leh a tuikhuah pawh tlema kan han chei leh theih chuan; tin, SASCI ah te pawisa dah theih a nih chuan 12 mW hi keimahni ram ta, kan sorkarin a vaia kan neih tur a nih avangin ngaih pawimawh ni thei se.

Tin, P&E Department hi an khawngaihthlak khawp mai a. Staff an indaih lova; sorkar hmasaah pawh khan ka sawi thin a, kan biala khaw 3-4 te hi linesmen pakhatin an enkawl a, an upa tawh hlawm si a, an khawngaihthlak thin khawp mai a. Chuvang chuan, kan line te a hlui tawh si a, a rampum P&E Department hnuaiia linesman tur leh a thawktu indaihlohna te pawh hi, a theih hram chuan pek belh ni se an lawmpuiawm ngawt ang a.

Tin, kan P&E Minister-in khawngaiha min lo chhinchhiah sak atan – Saiphai Sub-Station khu peih fel a ni ta a, khuti khuan function-in, a *run* ta a. Khulai tlangdungho ina electric bill an pekna Vairengte-ah kal zel a ngai mai hi a hautak a, a hla si a. Saiphai sub-Station ah khuan bill pekna min siam sak theih chuan tlangdung tan khuan a lawmawm dawn hlein ka hria a, chu chu thil har ni lo turah ka han ngai a. Kan Minister-in a wind-up hunah min react theih chuan ka lawm hle ang.

Tin, Demand No. 18 – Printing & Stationery hi tawitea han sawi ve ka duh a. He department hi sorkar revenue kan hmuh tamna leh kan hmuh theihna tur pawimawh tak niin ka hria a. Chuvang chuan, term hmasaah pawh ka sawi tawh thin a; department hrang hrangte hian an dawr that a ngai hlein ka hria a ni. Department te waviinniah hian

engtin nge kan kal dan chiah ka hre lova. Mizoram Calender te Printing & Stationery hian an chhu thei em? Zirlaibute hi an chhu thei em? Heng an tihtheih chi angah hi chuan Mizoram-a kan department neih zawng zawngte hian Printing & Stationery hi pan thei ila, dawr thei ila; an niin revenue an rawn thawhchhuah hi sorkar leh mipui tan a ni leh a. Chuvang chuan, ‘an pawimawh takzet ni’ tih kha ka sawi duh a. Tun Financial Year chho, tunkum chhoah te Department mamawhte Printing & Stationery hnuai va thlena, va dawrtute engzatnge awm tawh tih te pawh hi hriat a chakawmin ka hria a.

Tin, Demand No. 38 - Rural Development hi keini thingtlang bialtu tan chuan a bik takin thingtlang mipuite leh thingtlang khua zawng zawngte’n a kan department bik a ni a, an pawimawh takzet a. Tin, a changtu tur pawh Minister Prof. Nitea hi a chang awm ber pawh niin ka hria a, a fit dawnin ka hre tlat. Chuvang chuan RD Minister-ah pawh hian kan bial mipuite pawh kan innghat nasa hle a, kan lawm hle a ni. Tin, an department pawimawhzia hria hian kan Finance changtute pawhin thingtlang - rural area zawng zawng huap department a ni a, kan Finance lam changtute pawhin an theih ang ang sum te kan inpek belh theih chuan, a department-te tan chauh nilovin, Mizoram pumpuia thingtlang khuate tan a nih dawn avangin a lawmawm hle ang tih kan sawi duh a ni.

Tin, *Ni-100 inhlawhna* hi sorkar hmasa kan RD Minister hlui kha a fakawm hlein ka hria a, vawiinah ka han sawichhuak duh a. Theihtawpa hma a lakna leh a nawrna zarah Ni 100, term hmasa chhung khan kan inhlawh thei a ni. Chutiang tur chuan kan RD Minister thar pawh theihtawp chhuaha hma la turin kan beisei dawn a ni. Ni 100 ah Ni 100 kan lak thak thaka, a hun taka pawisa kan hmuh theihna turin kan hotute in tan a tul hlein ka hria a, Central lam pawh kan dawr vat vat a tulin ka hria a. Heng Ni 100 inhlawhna te hi thingtlangah mipuite’n kan lo nghahhlelh leh kan inngahna a nih avangin, theihtawp chhuaha hma inlak kan han beisei a ni.

Tin, sorkar hmasaah khan RD Department hi ramri khuaah te khan hma an la tha khawp mai a; a bik takin ka bial kha a lar a; sorkar hmasaah ramri buai kan nei a, silai te a puak a, harsatna namen-lo kan tawk a, chumi hun kan han tawn chhoh ah chuan ramria khua te ngaih pawimawh a tul zia kan hotute pawhin hria se. Vawiina ka sawi thar leh duh chu - ramri kan venhimna tha ber chu, ramri dep khuate tihmasawn hi a ni. Chuvang chuan, kan RD Minister kalchhuak ta khan kan mamawhte hriain a hun tamtakah Community Hall te min sak sak a, tin, ramri dep khuaah infiamna hmun - volleyball court te, futsal ground te leh thil hrang hrang min tih sak a ni. Chutiang chuan, vawiina kan Minister pawh hi kan sawipui tawh a, lehkha ka ziaak tawh bawk a; Saihapui-V ramri khawte reulte pawimawh tak si ah Community Hall hi kan la nei lova, kan mamawh khawp mai a. Chutah chuan convergence in ti ila; MLA fund nuai 10 ka thawh ang a, department in nuai 15 talin min do ula, ‘Community Hall hi saksak ve ang u,’ tiin ka’n ngen a. Kan RD Minister zahawm takin tha taka min dawngsawngin, min tihsak ngei theih ka ring a ni.

Tin, Pu Speaker, i dinglana kan MLA-te pawh hian kan fund te convergence-a hmana, kan bial, kan ram tana tangkaia kan hman hi a tulin ka hria a, chutiang tur pawh chuan kan RD Minister hi a tangkai hle dawn a ni. Kei hi a dil hmasa ber ka ni bawk a, convergence-a MLA fund hmang tangkaiin, model atan pawh hian min tih hlawhtlinsak ka ring a, a rawn windup hunah khan min tih hlawhtlinsak ngei tur thu kha ngaihthlak kan lo inbeisei dawn a ni.

Pu Speaker, tawite han sawibelh ka duh chu, Rurban hi sorkar hmasaah khan na takin kan zuk buaipui a, a changtu minister pawh ka zuk kalpui a, Pu Ruatkima nen khan; Rurban hi kan tan a pawimawh hlein ka hria a, keina ang State tan. Chu pawh chu hma la chho ila, kan minister ten theihtawp chhuahin Rurban cluster eng emaw zat kan dil belh kha kan neih theihna turin hma la ta ila, thingtlang tan hmasawna nasa leh zual a awm dawnin ka hria a ni.

Pu Speaker, hei, chawhnu lama thusawi hmasa ber ka ni a. Nichin khan ka sawi hman dawn emaw ka ti a, pakhat chiah hi khawngaihin i phalnain kan sawi leh ang a, Demand No. 25 - PHE hi.

Sorkar hmasa khan JJM kaltlangin khaw tinah ti mai ila kan bial chhung leh Mizoram khaw tam takah solar pumping te min siamsak a, a lawmawm tak zet a. Hei, Pu Laltea hian a hrechiangin ka ring a; solar pumping chu sawi thui lo mai ila. Chuvang chuan, heng kan solar pumping JJM hnuaia kan siamte thingtlang tana pawimawh tak tur hi chak leh zuala siam a niha, a hun taka zo thei tura min nawrsak hi khaw tin hian kan mamawh ka ring a, chu chu kan sawi duh ni ta se.

Tin, Pu Speaker, a tawp nana kan sawi duh chu, Vairengte hi khaw lian tak mai voters 7,000 chuang, mihring pawh 10,000 chuang fe awm kan ni tawh a. Kan tui tlan hi kan indaih tawh lo hle mai a. Vairengte ah hian CIJW - sipai training-na hmun lian tak a awm a, (Aw, Pu Speaker, a pawimawh em mai a, hei hi kan ram tan tawitein; a tawp nan) CIJW training school-a mi tam awmte hian Vairengte tui lak an tawm vek a. Tin, ramri issue kan neih khan ramri hrang hrangah kan police duty thahnem tak dah an ni a, tin, IR Company headquarters Vairengte-ah dah thar an ni bawk a. Chuvang chuan, kan tui lak hi kan zo tawh mang lova, tui lak tharna tur hi sorkar hmasa khan ruahmana min siamsak a, AMRUT atang khan eng emaw zat kan lak sa tihlenna tur kha kan han dah a. Chumi a nih rual chuan, Serlui tuikhuah hi pawh theih dan a awm lo maw, tih kha rilruah a awm a, chung project te pawh chu rawn thehluh a ni tawh bawk a. Khawngaih takin kan PHE Minister hian min han enchian sakin ruahmana te min siamsak theih chuan a lawmawm ngawt ang.

Vawiinnia kan Minister pathumte demand hi tha ka ti a, ka rawn thlawp a ni e. Ka lawm e.

HON. SPEAKER : A lawmawm e. Tunah chuan Mamit Bialtu zahawm tak Pu H. Lalzirliana ilo sawm ang.

PU H. LALZIRLIANA : Pu Speaker ka lawm e. Vawiin 9th Mizoram Legislative Assembly Budget Demand sawina hmasa berah hian, a hmasa bera chuan suggestion han siam ka duh a. He kan sorkar, Mizoram sorkar hian ‘corporate culture kan adopt a ngai a ni’ tih hi kan sawi lang hmasa ber duh a. *Entirnan*: P&E te, Transport te vawiinnia liabilities ang thawthanga kan ngaihte hi ‘revenue earner-ah kan chhuah thei a ni’ tih hi vawiin niah hian kan sawi bawl duh a ni. Chumi piah lamah chuan, PWD hnuaiia kan kawngte eng emaw zah hi BRO nen share ve theih ni sela, tuna an enkawl aia tam deuh hi outsource ta ila, ‘hei ai hian kan enkawl hneh zawk awm mang e aw’ tih ngaihtuahna te ka nei a ni.

Tunhma khan BRTF/BRO ho hi an thuanthu deuh a, amaherawh chu tunah hian an rawn *come-back* hle a, rintlak tak an ni. Chu chuan kan PWD workload tamtakte a chhawk zangkhai thei awm mang e, tih rilruah ka nei a. Chu mite pathum chu a hmasa berah suggestion atan kan rawn chhawpchuak a ni.

A tir berah chuan Demand No. 39 - P&E lam hi, heti laiah Question-ah pawh khan ka zawt a. Tin, nimina kan CM House Leader khan a windup naah khan, hetilai 132 kV Bairabi - West Phaileng via Mamit eng emaw chen khaih lak, eng eng emaw harsatna avanga vawiinni thlenga la commission theih loh thu kha a rawn sawi lang zuai a, beng sikin min ngaihtuahpui zel sela a thain ka hria a.

Kum 2015 khan Forest Department hian P&E Department ah NOC a pe a, amaherawh chu, kha kha a lo dik lo nge ni, 2018 ah an cancel leh a; tichuan, Forest clearance ti turin hmalak that leh a ni ta a. Chutah chuan lakh ₹208.22 an rawn demand ta a ni. Chu chu kan Chief Minister kal ta (kan Finance Minister ni baw) khan SEDP atangin hei hi min arrange sak a, kan han clear a. ‘Heti a nih chuan, kan tifel mai dawn em ni’ tia kan lo lungmuan viau lai khan, demand dang a rawn awm leh ta a. Lakh ₹189.72 - penal NPV a tan lakh 160; boundary demarcation a tan lakh 9.4; affected area thingkihnan lakh 19.83 (a zavaiin lakh 189) kha an rawn demand leh ta a ni. Chu chu vawiin niah hian kan mutan a ni ta a ni.

Vawiin nia kan sorkar thar te hian khawngaih takin a handle theih dan dan angin min clear sak sela, pek tur a hnenah chuan pek ni sela, pek loh wipe-off theih a nih chuan, chungte pawh chu a rang lamin hma min laksak thei sela; hei hi kan nghakhlel em em a ni, khulai Tlawng thlang mipuite, a bik takin Mamit District mipuite khuan. Tunah hian 90% vel chu zawh vek tawh a ni a, hrui thlun theih loh laia khu kan mutan laia chu a ni ta a ni. Heng zawng zawng demand hi clear a nih chuan, khu pawh khu tih theih mai tur a ni a, chu chu khawngaih takin min lo hriatsak sela kan duh a.

Tin, RDSS hnuaiah, kan bial chhungah khuan electric thlen lohna chiah chu a awm lova; amaherawhchu, a service hi a chhe em em a. A grid te a chhia a, ruah a sur pheih chuan nei lo deuh thup hi a ni. Hei vang hian kan district, kan bial chhungah te nasa zawkin he project hi kalpui sela kan duh hle a ni.

Trade & Commerce ah hian, hei Mamit bazar khu 1988 bawr vela sak tawh a ni a, a hlui tawh khawp a, kan leng lo nasa bawk a. Sorkar hmasaah pawh khan kan sawilang vuai vuai tawh a, hei PM-Gati Shakti hnuaiah khulai ah khuan cold storage kan sa a, a sak hrim hrima pheih chu kan zo tawh a, amaherawh chu, la commission loh a ni a. Heng te hi a rinchhan theih pah dawn bawk a, a market-a khu, district capital ve meuh a ni a, ‘sak that a hun tawh khawp mai’ tih kha kan Commerce Industries Minister hnenah ngenna kan siam ni sela.

PWD ah hian ka han lut ve pawp ang a. Ministry hmasaah khan vanneihthlak takin highway thar pakhat kan zuk su thlu ve a, kha kha kan Ministry laia kan highway neih awmchhun niin kan hre hial a ni. ‘Bairabi - Mamit 45 kms (spur of NH 6)’ tih a ni a, NH 145 leh NH 108 in connect tur highway thar a ni a. Hei hi Gazette Notification Ministry hian 5 July, 2022 khan min chhuahsak a ni. Khu khu a kal chak lo ang reng khawp mai a, DPR buaipui velah kan la tang niin kan hria a; hei, kum 2 chu a ral mai dawn a ni. Khawngaih takin Department lam hian Mizoram PWD handle tura Ministry-in a dah a ni a; chuvangin, hei aia chak zawk hian kalpui theih ni sela kan ti hle a ni.

Chutih lai mek chuan, khulai kawng Mamit - Bairabi Road khu kan economic door a ni a, rel station awmna, tin, khulai sumdawnge leh engkima tana khulai kan dawrna hmun a ni a; tunah khuan a kawng khu a chhe em em a ni. National Highway ah lo leh tawh a nih si avangin Mizoram sorkar atanga han maintain hi a harsa bawk si a. Amaherawh chu, tunah hian development a awm a, khumi maintain-na tur khu crore ₹4.33 tunah hian Mizoram sorkarin min dahsak niin kan hria a, hei pawh hi thawh mai theih tur dinhmunah an ding niin kan hria a. Tun fur hma ngei hian a zual zawpui hi chu min tihsak ngei turin kan Minister kan ngen lawm lawm a ni.

Kan bial chhungah hian kawng pawimawh tak tak, la tlang hleitheih si lo, hei tuna NH-44A 108 lo ni ta, kum 10 chuang kal tawh, vawinniah pawh la tlang hlei theih lo hi kan nei a. Sairang - Manu (Tripura), kan hriat angin re-tender te a han ngai a, a contractor hmasa te kha han terminate te an ngai a, vawin niah hian kan thlen hi a la thui lova. Re-tendered process chungchangah hian EPC Mode in Ministry in tih leh tur a tih a vangin DPR te an siam tha leh niin a lang a, hei pawh hi khawngaih takin hei aia speed-up theih ni sela ka duh a. Tuna fur lo thlang leh tur pawh hi kan huphurh khawp mai, keini khawthlanglam ho chuan. Chuvangin, kan Minister hian khawngaih takin a hmunah te pawh min enpui sela, a ho hian zuk tlawh ila kan duh khawp mai a.

Tin, Hmunpui - Phaizau Road kan lo sawi thin a, Ministry hmasaah te; hnai taka Aizawl rawn pan theihna tur kawng khat chauh khu kan nei a tTuna a pin leh chuan khulai bawr chu kan phun leh sup sup mai dawn a ni. Kan alternate route tur a ni a, hei hi min ngaihtuah pui tha sela kan ti khawp mai.

Tin, Nalzawl kawng khu PMGSY-I ah khan missed-out an ni hlauh mai a, khaw lian, mihring pawh tamna a ni a. Tunah hian kan han bei chho leh ngar ngar a, mahse a la rawn inhawng hleithei si lova, kan hotute leh department te pawhin min hriatpui tha viau a. Hei hi khawngaih takin kawng min zawnpui sela kan duh dan a ni. Rajiv Nagar - Kawnpui phase-I hi tih tawh a ni a, a phase-II sum la hmuh loh a ni a, hei hi kan ngaipawimawh a.

Pu Speaker, RD hi kan sawi lo thei lova; RD hi kan tan hian a pawimawh em em mai a. A hmasa ber atang hian kan sawi leh kauh kauh ang a.

Hei Mamit Constituency hi kan vanduai khawp mai a, Mamit bial chhung constituency khaw hrang hrangte khi RD Block panga-ah min thendarh a, Mamit Constituency chhungah hian RD Block pakhatmah a awm lo a ni. Lengpui hi Tlangnuam RD Block hnuaiah a awm a, Reiek RD Block hnuaiah khua eng emaw zah attached a ni bawk a, Phaileng RD Block hnuaiah eng emaw zah attached a ni leh a, Kawrtethawveng, Hachhek Constituency chhungah eng emaw zah attached a ni leh a. Tichuan, Zawlnuam RD Block ah khatiang khan kan bial chhungah hian RD Block pakhat mah awm lovin, RD Block panga-ah then hran kan ni a, co-ordination pawh hautak tak a, record kan break a ni. Constituency pakhat, RD Block panga hnuaiah attached hi Mizoram-ah a awm ka ring lo. Ministry hmasaah pawh ka au chamchi a, vawiinniah hian kan Minister zahawm tak hian min han pe thei sela chuan, ZPM ah pawh kan lut huk lovang tih pawh kan sawi thei lo; kan ngai pawimawh a ni. Khulai Phaizau te, Dampui te khuan RD Block kan nei tih pawh an lo hre mang lova, khutah Zawlnuam ah daih zuk kal a ngaih thin si avangin. Khatiang khan, khulai bawra khu kan baihvai ve viau a ni. (Minute khat chiah, Pu Speaker; midang ang em em chuan ka la tam lo ang)

Mamit tui harsatna hi hman, 1985 Central KTP Conference kan dawn atanga vawiin ni thlenga kan au hla a la ni a. 2006 MNF Ministry hmasaah khan *Mamit Greater Water Supply Scheme* a awm a, chu chu vawiinni thlenga kan la hman a ni a; mihring kan pung a, min daihlo nasa tawh a. Tin, a pump-na head a hi metre 840, sang em em a ni a, high pressure zone a khu; kum eng emaw zah chhung chu pipeline hlui kha a ring char char a, a puak reng a ni deuh tawp mai a ni. Tunah hian AMRUT-II, hemi km 2 high pressure zone han replace-na lai tura hi ruahmanna a awm a, a material-te pawh a thleng vek tawh a, mahse UD & PA hnuaiah a sum leh pai hi a la thleng bawk si lova, tunah hian la tan thei chiah lovin kan awm a. Hei hi khawngaih takin min ngaihtuah ran sak turin kan ngen a ni.

Pu Speaker, sawitur la tam viau mahse, kan duhtawk ang e. Vawiinnia demand hote hi 'demand a nih ang ngei hian pawm ila' tih hi ka rawn dinchhuah pui a ni e. Ka lawm e.

HON. SPEAKER : A lawmawm e. Hmabak a la nei tih chu a hriat hle mai a, amaherawhchu, time a ngaipawimawh a, a insum hram hram a ni tih a hriat e. Member-te in thahnemngaihna a lawmawm takzet zet e. Tunah Lawngtlai West Bialtu, Pu C. Ngunlianchnunga ilo sawm ang.

PU C. NGUNLIANCHUNGA: Pu Speaker, hnung deuhah ka sawi ang ka ti a, min han ko hmasa a; a lawmawm tho e.

Awle, hei vawiinah sorkar tharah Minister-te demand sawina huna ka tel ve thei hi lawmawm ka ti a. A hmasa bera ka sawi duh chu, Demand No. 18 - Printing & Stationery hi hi tunhma pawha ka lo enkawl ve tawh kha a ni a.

Hei, kan sorkar hi sum leh pai thawhchhuah lamah tan lak kan tum nasa a, hemi atan hian kan hman thiam chuan, 'hmanraw tangkai tak a ni dawn a ni' tih kha ka sawi hmasa duh a ni.

A pahnihaah chuan, Power & Electricity Department chungchangah hian, kha, chawhma lamah khan ka zawt tawh a. Keini chhim lam, Lunglei atanga chhim lama awmho sawn khua a han chiangkuan loh deuh tawh phawt hi chuan power kan nei lova; a ram buaiin kan buai a ni ringawt a. Kan Finance Minister speech ah khan powerline tihthat tumna leh hmalak tumna a awm thu te kan hmuh khan, lawmawm kan ti a. Chutihruah chuan, hei hi ngaihpawimawh hmasak ah min neih sak hram hram sela - chhim lamah sawn mi eng emaw zat kan awm ve a ni a; line te a lo hlui ve tawh a. Tichuan, Pu Speaker, pawimawh em em mai chu, thingtlang bialtu kan ni a, sorkar hmalaknain thingtlang khaw tin deuhthaw hi eng pek a ni. Chutihruah chuan, a thawktu, a line lo buaipuia lo enkawltu tura kha awm a ngai a, volunteer hian an thawk nasa em em mai a ni, kan bial angah te pawh. A then chu kum 10 lo thawk tawh te an ni a, sawng ho saw (engtinng e kan bialah chauh ni lo, hmun hrang hrangah anih ka ring a) PE anga kan la thei lo deuh a nih pawhin, eng emaw lawmman tlema zawng tal department lam hian ngaihtuah sak theih dan awm sela. Tunah hi chuan a thlawnin an thawk tawp mai a; line a lo chhiat leh jungle clearance lo tih ngai te, khaw chhunga line fel lo, connection fel lo deuh te a lo awm pawhin an thiam ang angin an han thawk ve a, a thlawnin an thawk ringawt mai a ni. Chuvang chuan, kan Minister zahawm tak khan min lo chhinchhiah sak se. Tichuan, kan mite, kan vaia kan mamawh min buaipuitute tan muster roll em an va thleng zo lo anih pawhin, honorarium ang chi tal pawh, a thlawntawl lova thawh theih dan awm thei se tih kha ka rawt duh a.

Tin, ka bialah hian la eng lo khua khaw thum-khaw li vel a la awm a, chu chu sorkar hmasa ah pawh khan Power Minister hnenah ziak pawhin ka thlen a, a ni pawhin department ah min thawn sak a; mahse, department lam kha sum bawkah a buai a.

Power & Electricity Department hi deposit work a nih hian a to thei em em mai hian ka hria a; an bungraw leina te hi a sang bik em maw ni; nge, sum a lo ngai tam zawk. Chuvangin, eng la neilo khaw thum - khaw li, a bikin Tuichawng tlangdung khuaahte khian a awm a, hengte pawh hi chawhma lama zawhna a awm ang khan, DPR te siamin sum hmuh an beisei thu te kan ngaithla tawh a; tunah pawh khan min hriat sak se.

Tin, Pu Speaker, Demand No. 42 – Transport hi sorkar hmasa ah pawh khan kan sawi nasa a, keimahni sorkar lai pawhin kan sawi a. Lawngtlai-ah MST office a awm ve thin a, mahse, a staff-te min sawn darh sak vek a, pakhatmah an awm tawh lo em maw ni. Kan bial bik western side ah khuan MST Bus pakhat te chu han tlan ve sela, keima bial chauh nilo, Pu Rashik Mohan-a bial te cover-in, Lawngtlai - Vaseikai te saw han tlan thei sela chuan, kan mite Sumo a an kal ngawt ai chuan fare te pawh a lo tlem deuh ang a. He sorkar thar hian Bus pakhat hi chu Lawngtlai ah sawn min dah sak ve thei sela; kan mamawh hle a ni.

Tin, keia bial leh Tuichawng bial intawm Longpuighat leh Vaseikai velah khuan khaw lian ve tak pakhat a awm a. Auto-rickshaw hi an tlan ve a, anmahniin an tlan tawp mai a ni; registration emaw, permit pawh emaw pawh a awm chuang lova. An sawi dan chuan police hote hian fee te pawh an khawn thin niawm tak a ni. Khatiang khan *self-style* kan ti dawn nge; kha kha ngaihven deuha, permit mumal deuha tlan tir a tha mang e aw ka ti. Tiang khan mi tam tak tan employment kan lo generate-na te pawh a lo ni a. Tin, mipui vantlang tan maxi cab (sumo) te, taxi te emaw hire-a han kal ngawt ai khan auto rickshaw a lo nih chuan, a fare pawh a lo tlem deuh a, mipui tan pawh a lo zangkhai a ni. Chawngte ah te pawh mumal takin auto rickshaw permit pek a ni lova, mahse a tlan nasa ve tho a ni; taxi te pawh a awm ve tho. Thenkhat phei chu registration pawh awm mumal lutuk lo khan a kal a, khang te pawh kha enchian deuha, a nihna (reality), he sorkar hian thil dik taka kalpui a tum ang hian Transport Department ah pawh hian kalpui ni se a tha ka ti a.

Tin, Congress sorkar kha two-wheeler taxi tichhuak tu a ni a, kan sorkar kha; a fimkhur khawp mai a; mipui mamawh dan leh mipui mil tawk deuh khan kal tir a ni a. Amaherawh chu, sorkar liam ta khan a thei sem ringawt mai a ni; khaw thenkhatah phei chuan *auto-rickshaw khawpui* emaw tih mai tur hian hemi kan khawpui deuh lai te pawh hi a intlar del dul deuh vek mai a. Bazar-a motor kenga han bazar tur pawhin a parking ah harsatna a awm thei dawn em le, tih theih turin a awm a. Hengah pawh hian tlema keimahni dinhmun nena inmila ruahmanna kan siam fo hi a tha ka ti khawp mai a.

Hmanni khan ka sawi a; helama ka thiante hian beng lo hup se ka ti a, an la hup chiah lo nge ni; auto-rickshaw permit te pawh sawlai kan bialah kan pe vak vak mai hi kei chu tha ka ti lo; kan mamawh dan ang hian kalpui hram hram ila. Sorkar kan ni a, he Mizoram hi a neitu kan ni; kan ta a ni; kan enkawl a ni. Chhungkuua pa-ber kan ni a, fate mamawh ni lo, an duhzawng ringawt pe tur kan ni lo. Pa chuan fate mamawh kan hria ang a, chutiang tur chuan kan enkawl tur a nih lain; sorkar liam ta kha Transport ah chuan a fail in ka hria; duh zawng leh duh loh zawngah khan politics khelh nan tak kan hmang a, a pawl ka ti a. Tun sorkarah hi chuan khatiang ni lovin, *need-base* in, kan mamawh dana zirin permit te pawh hi pek ni sela, Sumo permit te pawh. Tunah Sumo permit ‘a pek theih loh’ ti ang deuhthawa an awm thin te kha. Thenkhat tan, *Entirnan*: Ka bialah sawn buaithlak deuh mai chu, kan Minister-in min lo hriatsak se ka duh a; hemi permit chungchangah pawh hian i dinglam leh i veilam hi min thliar lo sela, kan mamawh dana zirin kan va sawi ve te hi chu min lo ngaihpaawimawh sak ve thin se ka duh khawp mai.

Ka biala khaw pakhat Chawntlangpui ah, an fapa hi lehkha a zir tawh lova, motor khalh hi a tui ve em em mai a, Eco-Van an lei a. Taxi permit ka dil sak thin a, an pe duh lo reng reng. Mahse, an khua atang khan Lawngtlai kha an bazarna ber a ni a, anmahni huan siam an ni a, balhla te ,theihai te an phur chho ve a, an kal tak na na na chuan mahni khuaa mite chuan ‘kan lo chuang ve ang e’ ti an awm thin a, an chuang ve thin a; kha kha enforcement hovin an lo man leh thin bawk si a, a buaithlak khawp mai a. Chuvang chuan, Pu Speaker, kan Transport Minister pawh hian helaiah hian a mamawh dana zirin he Zoram-ah hian ngaihtuahna min hman sak se ka duh khawp mai. (Minute 9 a kal der mai a; a va manganthlak ve.)

PWD ah, sorkar hmasa khan House ah session apiangin ka sawi a. Chawngte -Vaseikai PMGSY Road laih a ni a. Vaseikai atanga km 4 ah kha Chawngte PMGSY Road kha a tawp tawp ta tlat mai a ni. Vawi tam tak ka sawi a, Chief Minister liam ta kha PWD changtu a ni bawk a, ‘ziakin min pe rawh’ a ti a, vawithum-vawili ziakin ka pe a, a tawp kum nga chung khan tihhlawhtlin a awm lova; ‘In ti lo anih chuan, ka MLA fund-in ka lai tlang ang’ ka ti a, kan lai tlang ta nghe nghe a. Amaherawhchu, Damlui atanga thlanglam zawng kha PCC te siam a ni a, kha kawng kha Vaseikai - Damlui thleng khan km 5 chauh a ni. Kan Minister-in min chhinchhiah sak se, SASCI atangte pawhin tih dan awm se ka duh khawp mai a.

Tin, Zirtawpnia Private Members Resolution tur atan ka theh lut a, kan pawt fuh ang nge fuh lovang ka hre lova. Lungphei South - Phalhrang khi Lawngtlai East lam leh Lawngtlai lam inkalpawhna atan kawng hnai tak a ni a. Zero Point - Kawlchaw atanga va kala, Saiha lama kal kual ngai lovin Tuipui Ferry ah thal chung na na na chuan Meisatlah - Romibawk - Phalhrang ah, chuta tanga Lungpher chu hnaite a ni. Phalhrang thleng hian PCC tih vek a ni tawh a, Lungpher - Phalhrang kawng hi SASCI atangin

min dah sak theih dan awm se chuan, Lawngtlai atanga chhak lampang kan unaute nena kan inkalpawhna atan a tangkai hle dawn a ni.

Tin, ka biala Hmawngbu - Sabualtlang km 5 ah khian, Hmawngbu thleng PCC a ni tawh a. Khalai kar kha furah chuanin tihtak zeta in nam chhoh ngai thin a ni. Chung te pawh chu min hriatsak se. SASCI kha sorkar hmasain eng emaw zat a khawih a, kan bialah phei chuan a vanduaithlak a, SASCI an thawh dan kha, 'sum siamna a ni' tih zep thu a awm lova. Wawiinniah pawh ka sawi duh a. An hmalak dan kha hmasawna lam aiin, 'engtin nge sum kan hlep tam ang' tih lam kha an kalpui dan a ni. Kan kawng laih tawh saah hmai an phih a, chutianga hmai phih chuan pawisa tam tak tak dah a ni kha paw ka ti a. Khatianga pawisa kum 50 hnuarulh tur a ni emaw, ni lo emaw, development siamna tur a nih laia tute emaw ina kawn an lo laih tawh sa han thual that a, cheng tam tak tak han dah mai kha a vanduaithlak ka ti a. Kan Minister zahawm tak hian SASCI te pawh, PWD hnuaiyah sum a awm anih chuan mipui vantlang tana chhawr tangkai theih tur ngei min dah sak se ka duh tak zet a ni.

Tin, Power & Electricity Department, Demand No. 39 ah ka let leh lawk ang a. Chhimtuipui Kolodyne Hydrel Project khi kei pawh ka lo buaipui ve viau thin a, CEM ka nih lai te pawhin. Forest clearance chungchangah Delhi ah te pawh kalin kan buaipui a, Shillong-ah te. Khi khi zoram tan chuan power-a kan intodelhna tur mai ni lo, a chuangliam (surplus) kan neih theihna tur a ni a. Amaherawh chu kan sorkarin a ngaih pawimawh zingah khan a la tel lo deuh a, telh thei hram sela ka van duh em!

Tichuan PHE ah ka lut leh ang a, Pu Speaker; min hrethiam la. Demand No. 25 - Public Health Engineering ah hian, ka bialah sawn '*Combined Water Supply Scheme*' kan ti a, solar-in kan pump ve a - Rulkual, Vanhne, Phaithar, Saikah te, crore ₹1000 chuang velin. Chu chu kan tangkaipui viau lain, a thawktute'n survey-ah an lo fimkhur taw lo deuh nge ni, an zuk pump-na atanga metre 500 vel lekah khan tui duhthusam a awm a; han sawn hlek mai sela chuan kha khawl tan khan tha taka pump theih tur a ni a. Khangte pawh kha *Combined Water Supply* scheme - Rulkual, Vanhna, Phaithar leh Saikah te kha min hriatsak se ka duh khawp mai.

Tin, JJM hmalakna a lawmawm a; chutih rual chuan, house-connection pipe pawh a invuah fur a, a tui erawh chu lut tur a awm meuh lova. Hei, kan Minister hi a viak a tha a, sorkar thar a ni a, chak takin, a bikin keini thingtlang biala kawra tui chawi thin ho tan kan mamawh takzet a ni. Kan bialah phei chuan kan harsa tlang a, han dahkhawmna tur tak tak pawh kan nei lova, MLA fund-in sintex litre 500 te chauh hi kan sem a ni. Sintex litre 500 kha an neih len a ni a, 500 pawh an nei zo lo. Chutiang khawpa harsa leh dinhmun chhia chu kan ni a. Chuvangin, hengte hi chak takin hma min han lak sak se kan duh hle a ni.

Tichuan Demand No. 32 – Horticulture hi; he department hi a pawimawh tak zet a. Sorkar hmasa kan sawi lo thei lova; kan hotute vawiinniah an tel lo bawk a. Kha sawrkarah khan dragon fruits chin tur a ni a, a tirah kha chuan, a thu chuan a tha a ni. Department-in an survey a, ‘he mite hian huan an nei tha; tui an nei tha’ an ti a, an select a; ‘MNF an ni lo’ an ti a, an paih vek. Khatiang kha awmlo hram rawh se. A dikate hian dragon fruits a ni emaw, eng pawh ni se, ching mai rawh se; leilet nei thain leilet tanpuina hmu mai rawh se; sangha dil nei thain tanpuina hmu mai rawh se. Party-a kal lo tur mipui sorkar lo dingah hian a takin kalpui hram hram ni se.

Tin, cold storage building kan sa nual a, amaherawhchu, a in ringawt kan sa a ni; cold storage enkawl tur hian mithiam an ngai. Amaherawhchu, a boruak te leh a dah dan tur te pawh, khatia hun tawpa tha mai chi kha a ni lo. Cold storage kan sa a, mahse, a enkawltu tur mithiam kan nei leh chuang si lova; In lianpui kan sa a, a luahtu awmlo ang tlat a ni. Chuvang chuan, hemi chungchangah hi chuan kan Minister hi a minister chauh a, khawchhak lamah a tlan nghal rup kha a ni a; a ti thei turah ngai ila, ngaihtuahna hmang se. Term hmasain a lo sak tawh kha a taka hman theih tura kalpui hram hram tum se.

Tin, a tawp berah chuan, Pu Speaker, road development hi i hmang tangkai ang u. A chhan chu, job card hna kan han thawk a, terrace kan han lai a, hman tlak lem loh; sangha dil kan lai a, hman tlak lem loh. Chu ai chuan, PCC internal road te, khaw kar kawngte pawh hi PCC hian thawk ve mai sela. Hmannia district level meeting-ah ka tel thei lova, agenda ka va thawh a; a hlawhtling lo niin ka hria a, pawl ka ti a. Kan NREGS pawisa mipuite’n an thawh hi a nihna takah chuan a tak tak hian kan thawk tam lo, a cut-a cut deuh zel leh VC ten, ‘chuti zat chu’ tiin project an siam a, an kalpui mai thin ang hian, mipui tana hlawk tur ang zawng hian kalpui hram ila.

Tin, material component sorkar hmasaa lar em em mai, a tak ram kan hmuh chiah loh 5% tih vel kha awm tawh lo sela, ‘a tak rama thawh awm sela’ tih kha kan Minister zahawm tak pawh ka chah duh a ni.

Tin, BADP cover area kan ni a, keini hi. Guideline-ah khan, ‘Bialtu MLA te rawn ve tur a ni’ tih a nih laiin, proposal an siamsa approval pe tura rawn ve mai kan ni thin hi fuh lo ka ti a. Kan bial chu kan hria, kan lo bial rei ve tawh a; keini bial pheih chu kum 15 kan lo bial dawn tawh a. An lungte awmdan leh an thing tluk dan thlenga hre deuh thaw kan ni a, kan bial hi. Works siam dawnah khan inrawn tlang thin ila, tichuan, hma a sawn ang. A hna semate kha chu ruling lamin; Pu Sapa te’n, ‘kan sem ang e’ an tiha in va sem a nih pawhin, a hna tal khan he Zoram hi dengchhuak sela, hma sawn tlang ila. ‘*Border Area Development*’ a nih ang takin a area-a mite’n a hna pawh thawk ve rawh se. Hna chhe deuh deuhvin kan thawh sak a, Aizawl tlang atangin khuta Tuisentlang; khang te kha bo sela, kan Minister zahawm tak hian a area-a mite hmasawna an chan rualin, ‘tisa leh thlarauah’ tih ang deuhvin, ‘a works ringawt ni

lovin, a mihringa te pawh i chawikang tel ang u' tih kha ka chah duh a ni e. Pu Speaker, hun min pek belh a, ka lawm e.

HON. SPEAKER : Aw le, Thorang Bialtu, Member zahawm tak Pu R. Rohmingliana ilo sawm ang.

PU R. ROHMINGLIANA: Pu Speaker, ka lawm e. A hmasain - minute 10 hi a tlem em a; department pakua lai (Minister pathumte demand) kan sawi dawn a ni a. Ka lo pel hret anih pawhin, i mi ngaihthiamna ka dil hmasa ni sela.

A hmasa berah chuan, Pu Speaker, Demand No. 42 - Transport chungchang hi ka sawi duh a. Mizoramah lirthei a tam em em tawh a. Transport Department hian lirthei, motor kan tih ang chi chauh ni lo hi anmahni subject-ah hian a tel tawh niin ka hria a. Heng rope-way te, inland water way te, hetiang kawngah hian theih tawpin hma la chhunzawm se thain ka hria a. Inzirchianna hun pawh hi a rei viau tawhin ka hria a; chuvang chuan, transport hian helamah hian theih tawpin hma la chho se thain ka hria a.

Tin, Pu Speaker, vehicle tax chungchangah te pawh Transport Deptt. lam hian hma an sawn hle niin ka hria a, a lawmawm pawh ka ti a. Mizoram-in vehicle atanga tax a lakluh hi a kum telin an target aiin an sang zel ni te pawhin ka hria a, alawmawm ka ti a. Chumi rual erawh chuan, motor tax pe lo, road-off ni chiah bawk si lo, hetiang bo te zawn chhuah hna hi chak taka hma laka, Mizoram-in kha tax revenue kan earn theihna turin he department hian hma han la nasa leh deuh se a that ka ring a. Two-wheeler taxi emaw, taxi pangngai emaw 'ka recommend a, a chhuak lo' tih vel mai mai ang ni lo deuh khan, a awm leh awm lo chu thu dang ni se la. Chuvang chuan, a Mizoram pumpui huap deuha revenue kan earn theihna tur zawng khan kan rilru kan pek thain ka hria.

Tin, Pu Speaker, Demand No. 45 - Public Works-ah hian sawi tur ka ngah hle mai. Mizoram-a kan engineer neih te, PHE Department a ni emaw, department dangah pawh tun hmaa eng emaw sawi sep lo awm thin ang te; vawiinah chawhma lamah pawh sawi rik ka hria a, a pawi ka ti. Kan Mizoram engineer-te hi an smart ka ti, kei chuan; an tha ka ti; an thiamna pawh a sang. Amaherawhchu, a technical knowledge nei lo zawk, a chung lama mi ten kan control tlat a, an thiamna hmang thei lova kan tih hi a hlauhawm ka ti zawk a ni. Chuvang chuan, Mizoram Public Works Department-a kan engineer-te ka fak a. Chumi rual chuan, a thuneitu zawk ten an tih theih loh tura thil kan tihsak hi ka hlau em em a ni.

Vawiin chawhma lam khan recess room-ah inthiar turin ka chhuak a, kan House Leader zahawm tak a chhuah lai a lo ni bawk a; recess room-ah kan chawl hahdam a, kan titi a; ka bial chhung chungchang te pawh kan sawi a, rawn kal ngei a tum thu te pawh min hrilh a. 'Eng emaw programme lo siam la' a ti a, a lawmawm ka ti. Hon. Governor-in a

speech ah ‘*rualkhai taka hmasawwna*’ a tih lai te pawh kha, a hmasawn lo, a hnufual ho hi min en bik deuh a; a bik takin, PWD te pheih chuan min ensak a. Mizoram pumpui hmasawwna rualkhai taka a kal theihna tur chuan khai chhuah ngai te min khai chhuak u la ka duh hle a ni.

Pu Speaker, tun hnaiah pawh ka bial chhung bikah chuan hmasawwna tur tam tak, SASCI hnaa contractor-te pawh award a ni tawh; ‘*work to proceed*’ tih an ni. Mahse, PWD lamin a hna tur pawh an kawhhmuh duh lova, an kal duh miao si loh chuan, an thawk thei lova, contractor-te an mangang lutuk. Niminah a vawi 4-na atan kan House Leader zahawm takin he lai hmunah a sawi tawh, “thawk rawh u, thawk rawh u ka ti” a ti si a; engatinge PWD Division changtute ho hian vawiin thlenga an la kawhhmuh duh loh? Aizawl Millenium Centre hi ka bial chhungah khuan zuk hung lut i la eng atan mah kan ti loving; Bawng in atan te pawh a tha kan ti maithei. A hun leh a hmun azir zelin thil hi a tangkai a ni.

SASCI chhuak hmasa zawk te kha MUP building te, MHIP building te, Hall-ah te an hmang tangkai lutuk, vawiinah hian; an lawm lutuk. PCC pavement te hi Aizawl angah chuan a awm tawh lo; khutah chuan a tangkai lutuk ringawt. MLA Fund in PCC pavement hi ‘kan sikul kawng turin min rawn tih sak hram teh’ an rawn ti a ni. Chuvang chuan, MPWD te an kut hi phuar loh ni sela a thain ka hria a. Vawiinah hian Pu Speaker, kan engineer-te an smart-na hi, an kut hi phuar ni lo se, Mizoram hian hma kan sawn hi ka ring. PWD chauh ka sawi lo; kha kha PHE pawh ka sawi tel nghal ni se la.

Pu Speaker, SASCI sawi takah chuan, nikum lamah te agreement sign vek tawh a ni a, October thleng an sign a, an hna hi October thleng an thawk thei a ni. A bill-ah contractor te an buai ve a ngai lo; chu chu sorkarin a pe mai tur a ni. Kha lai kha contractor-te ngaihdan niin ka hria a. Vawiinah hian kan development hi a thuanawp ka hlauh avangin khalai kha ka sawi ni sela.

Tichuan, Pu Speaker, Demand No. 39 - Power & Electricity chungchangah hian, hmanni budget discussion-ah, “kan budget hi a va han tlem deuh ve aw; electric lamah hian” tih kha ka rawn sawi lang tawh a. Transformer thar lei ngai te bakah repair tur tam tak a awm a, LT line extension te pawh a ni ang, khatiang atan khan dah a ni a. Chumi ruala ka sawi duh chu, transformer te pawh hi a thar lei pawh ni ila, thingtlang hmunah te hian technician kan dah tam loh chuan kan transformer te kha a chhiat mai mai a hlauawm a. Technically in - positive leh negative, electric current-ah a in touch chuan, a khawl hmasa ber khan a tuar a, a chhe thin. Chuvang chuan, a technician lam hi kan ngaihthah ka hlau a. A technician lam zawng te pawhin kan Minister khan ngaihtuahna min sen zau sak se la a thain ka hria a.

Entirnan: ka bial chhungah technician an tlem khawp mai a, mipui tlawmngaiin an ti thin a ni. Tichuan, current a rawn kal a, ruah a sur a, ti khan thing a lo tlu a, a vaw chhia

a; YMA te an hnatlang thin a ni. Khang avang te pawh khan harsatna tam tak a awm thei a. Chuvang chuan, *technical person* lai kha kan mamawh nasa em em a. Khaw pakhat electric lam thawktu pakhat mah awm lohna a tam lutuk; ka bial chhungah te pawh a ni. Heng te pawh hi Pu Speaker, tun kan sorkara P&E changtu Minister te pawh hian min chhinchhiahsak se tha ka ti khawp mai.

Tin, ‘solar roof topping’ tih te pawh kha budget-ah a lo lang a, tha ka ti hle mai a. Hei hi power-a savings kan neih tamna tur a ni. Chhunah te hian power hi kan hmang nasa lutuk tawh, computer-ah te; zanah chauh a ni tawh lo. Tin, tun hmaa electric rawn awm tan tirha mobile kan hriat loh kha, vawiinah chuan mobile hian load a la hnem lutuk. Ka hriat sual loh chuan, kum 2000 vel khan Mizoram-ah chuan peak hour-ah 99 megawatt vel kan mamawh a; vawiinah P&E Minister in a sawi ang khan, 160 megawatt vel peak hour-ah kan mamawh ta tlat mai. Chuvang chuan, kan mobile te leh electronics kan hman tangkai avang hian power hi kan hmang nasa a. Chuvang chuan, sorkarin roof-top solar te hi in tinah subsidise vak vak thei se la, kan hman ban pawh kan la hralh chhuak thei zawk tihna kha a ni a. Chuvang chuan, hetiang lamah te hian kan Minister zahawm tak khan Pu Speaker, hma han la zau deuh se la ka ti hle mai a.

Tin, MNF sorkar liam ta khan Smart-Meter a lo buaipui hrep tawh a. Chu chu tunah hian chak taka chhunzawm ni se ka ti a. Hei hian power loss a veng dawn niin ka hria. Tunlaih phone-ah te pawh pre-paid kan tih ang khan pre-paid in kan ti ang a; smart meter hi han hmang chiah ila, peak hour-a kan power consumption watt hi a hniam dawrh ka ring a ni. Chuvang chuan, heater hmang duh pawhin an hmang ang a, pawisa an pe tam deuh dawn a ni mai. Chutiang chuan P&E-ah pawh hian, Pu Speaker, smart meter chungchangah te pawh hian hma han la nasa deuh sela a tha awm e.

Ka bialah ka lut leh lawk ang a. Electric current LT line thlen lohna khua a tam em em mai a, hengte hi vawiinah hian Pu Speaker, min note sak se la, theih ang tawka hma min laksak turin ka ngen duh bawk a. Tin, Pu Speaker, hemi ka sawi lai hian Mizoram kan buaithlakna leh kan mak deuhna chu, unauthorised village te a awm a; chutah chuan buhfai ration kan pe leh a, a thenin electric an pe a; a thenin tui an pe duh lova, a thenin tui an pe leh a; khua hi a inang lo em em a ni. Department pakhat chauh pawh sawi theih a ni lova, department hrang hrang kalkhawma thil tih ngai hi a tam lutuk.

Tin, khuti laiah Forest lamin kan bial chhunga khaw pakhat chu hnawhchhuah phet an tum a. Amaherawhchu, Election Commission of India chuan booth a dah leh tlat bawk si a. Khatiang kha kan ni deuh niai nuai a, ve thoa na. Chuvang chuan, sorkar lam pawh tan ruala, thil felfai taka rel hi a tha hlein ka hria.

Pu Speaker, tawitea ka sawi leh duh chu Demand No. 25 - PHE chungchangah, solar water pumping hi Mizoram-in kan lo thatpui hle mai a. Nichinah ka hmaa member zahawm takin a sawi ang khan, a dik tak chuan contractor thate hi kan mamawh a nia,

Mizoram hian. Contractor-te an that chuan, heng te pawh hi a kal tluang zel. Tute emaw initsikna leh party inchirhthehna avanga contractor ni lai insawi chhiat vak vak te pawh hi a tul ka ti lem lova. Chuvang chuan, a thei chuan ti se la; a thei ngei te kha department pawh hian thlang thin se la a thain ka hria a ni.

Tichuan, Pu Speaker, Demand No. 38 - RD chungchang hi, Mizoramah thingtlang kan tam a, hengah hian a pawimawh em em mai a. RD chan atangin mi harsa zawkte in sak tanpuina an tih ang chi PMAY, kan sorkar hmasa khan central lamah te a lo thlen fo tawh a, 1st instalment a lokal a, 'In in rel loh chuan 2nd an pe dawn lo che u' an ti a, thingzaiin an han rel a, rei tak tak a ding a; fur leh nisa a han tawrh meuh chuan a lo mawih leh tawh si a. 2nd instalment an dawn hmain hengte hi RD Minister zahawm tak hian, Pu Speaker nangmah kaltlangin central lamah te nasa takin, chak takin instalment an dawn zung zung theihna tur te pawhin ngen ni ta sela.

Pu Speaker, Demand No. 32 - Horticulture hi tawitein ka tarlang leh duh a. Horticulture ah hian Mizoram hi potential tha tak nei kan ni a, kan thil tih reng reng a tha a. Kuhva pawh a tha duh lutuk; balhla pawh a tha duh lutuk; rubber te pawh. Heng titu kut-hnathawk tak tak te tan hian Horticulture Department hi theihtawpin hmala se la, sorkar hmasa hmalakna lo awm tawhte pawh sorkar inthlak avanga intihloh sak awm lo sela, tha taka chhunzawm ni sela; hetiang hunah hian a technical-mi an awm vek; 'scientist' an tih te hmalakna chu a ministry lam pawh hian kan en thiam a pawimawh hlein ka hria. Chutiang a nih loh chuan, 'an ni aiin ka lal zawka lawm' tih vanga tute'n emaw thingtlang lama kan worker-te chung pressure kan pe fo hian department lam tan pawh a luhai thlak thin a. Chuvang chuan, 'tun tumah chuan unit ka nei lovang' tiho kha sorkar lamah an awm ta bawk a, tunah chuan pressure kha tam vak lo turah pawh ngai ta ila (**Hon. Speaker:** Minute 3 a pel ta e; i zo thei dawn tawh a em?)

Pu Speaker, a tawp berah chuan, Demand No. 45 - PWD kha, a tawp khar nana hman ka duha chu - Mizoram kawng hi a chhim leh hmar zawngin a tam em em a, a thlang leh chhak zawng hian kawng hi a awm mang lova. Pu Speaker, kawng thar kan laih dawn hian PWD Minister zahawm tak hian hria sela, chhak leh thlang zawng hian awm ve leh fur se la. Mizoram hi a lian lova, khatiing zawng khan ngaihtuahna min hman sak sela. Kawng awm sate hi a chhiat viau hnua thawm lovin, a la that lai hian thawm sela. Tute emaw hnathawh turah contractor-te initsik mai lova, a tha zawngin monitoring lam kha ti tlang ta ila, a that ka ring a.

Pu Speaker vawiin ah hian heng Demand Nos. -12, 42, 45, 18, 29, 40 te leh Demand Nos. - 25, 32, 38 te hi vawiinah hian pass ka rem ti e. Pu Speaker, ka lawm e.

HON. SPEAKER : A lawmawm e. Tunah chuan Aizawl West-III Bialtu, Member zahawm tak Pu VL Zaithanzama ilo sawm ang.

PU VL. ZAITHANZAMA : Pu Speaker, ka lawm e. Kan Minister zahawm tak tak pathumte demand kan sawiho a, a mal te tein sawi tawh lo mai ila; kan tui tlangin ka hria a, a lawmawm viau a, hun erawh chu kan hmang tam deuh hlek tlangpui a ni. Theihtawpin hun hman dik kan tum ang a, ka han fimkhur viau ang e.

A hmasa berin Pu Speaker, Demand No. 25 - PHE hi ka tui nge ni, ka'n sawi leh hram ang a. Aizawl-ah hian nitin tui kan mamawh hi MLD 66.42 niin min hrilh a. Chutih lai chuan tunah hian MLD 28.77 nitin tui kan pump chhuak a ni; kan mamawh zahve pawh pump chhuak lovin a thenin kan lei a, inren takin Aizawl khawpui hi kan nung hram hram a ni a. Tuna min chawmtu hi Phase-I leh II a ni a. Pu Speaker, tunah hian Phase I leh II hian kan mamawh zahve pawh min pump chhuah sak hlei thei lova, 24 hrs khawl an tlan tir a, electric khawl hi 23 hrs te a tlan a, a chhiat mai an hlauh avangin darkar khat te an chawl a. Chutih lai chuan, an khawl hi diesel hmang a ni a, chutiang chuan min nunpui hram hram a ni a. Chuvang chuan, kan khawl-te a khawi emaw ber a chhiat palh hlauh chuan kan chan hi a chau viau dawn a ni. Chumi chhawkna tur chuan Phase-III siam a ni a.

A hma pawhin ka sawi tawh a, Phase-III hi a nihna takah chuan, September 2020 kuma zawh tum kha vawiin thlengin a la nung lova. Ka hriat danin tunah hian a khawl lampang chu peih a ni a, hei hi a ranglama kan tlan tir loh chuan I leh II ah hian harsatna chhete pawh thleng se, kan chan hi a chau hle dawn a ni a. Chuvangin, Phase-III hi rang taka tihnun ka rawn rawt a ni. A nunna tur atan chuan, (ka zawh kual min hrilh danin) Division leh Sub-Division hawn hi a ni deuh tawh mai a, manpower an indaih loh vang a ni. Khawlin pump chhuak ringawt se, a semtu leh khawl enkawltute mihring indaih loh avangin *run* hleih theih a ni lova. A rang lamin kan Minister zahawm tak hian min bawhzui sak sela, khawpui ah buaina namen lo a thlen lohna turin.

Tui ah hian kan buai hle a, 2021 khan tui pump tur tlem avangin nasa takin kan buai tawh a; 2023-ah tlemin kan buai leh a, kumin hi engnge kan an dawn chu hriat a ni lova. Chumi bak ah chuan kan tui pump-na khawl tinung turin 132 kV Line hi lak thlak a ni a, hemi enkawl tur hian Sub-Division tihpuitlin vat a ngai a, kan la tipuitling hlei thei lova, hei hian harsatna min siam hle bawk a ni. Khami pahnih kha a ranglama kan tih loh chuan, vanduin thleng thut thei dinhmunah Aizawl khaw mipui hi kan ding a ni, tih kha uar takin ka sawi duh a ni.

Phase-III hi ngaihpawimawh zualna ka nei a, he House-ah hian term hmasa leh tun assembly kal ta ah pawh khan ka sawi tawh a. kan tui electric-a kan han pump chhoha, electric a tawp thuta tui rawn invaw letin shock a siam avangin Khatla leh Bungkawna a chhungkaw tam takin harsatna an tawh phah a. Shock nasa tak a thleng thin a, an zan mut te pawh chhungkaw tam tak chu a tui lo a ni. Chumi siam tha tur chuan valve lei a ngai a, chu chu tunah hian Department pawhin an lei vek tawh a, mahse khami siam tha tur khan ni 2-3 vel khaihlak a ngaih avangin an khaihlak ngam si lova, Phase- I leh II

leh ringawt hi kan rinpui a ni bawk si avangin Phase-III a tui pump hi kan nghakhlel tak meuh meuh a. PHE Minister khan min lo hriatsak sela, Phase-III hi rang taka *run* anih theihna turin Sub-Division phase-I, II leh III te hawn vat a pawimawh hle a ni.

A dawt lelah chuan, Demand No. 32 - Horticulture h,i sorkarin thlaithar thlan bikte buaipui a tumna kawngah society dina, an society kaltlanga lei a tum tih kan vaiin kan hria a, society lam lo tihchak lawk erawh chu a ngai hle a. Chumi a nih chuan Horticulture Department leh Cooperation Department te nen pawh kan thawhho a ngaihna chin awm turah ka ngai a. Nichin khan kan member-pui, zokhaw lam Bialtu ten an bialah thlai a thar that thu an sawi hlawm a. Thlai market hmun chu khawpui a ni si a, thlai thar hunlai hi fur a ni tlangpui bawk si a, kawng that loh vangin zokhaw lama kan unau'te'n thlai duh angin an hralh tha thei lo thin a. Chuvang chuan, commercial road kan mamawh ta takzet a. PWD, Co-operation leh Horticulture Department-te hi kan thawh ho a ngaih hmelin ka hria a ni.

Demand No. 45 - PWD hi a pawimawh hle mai a. Tuna horticulture kan sawi khan, kha tho kha kan sawi a; kawng a that loh chuan engkim hi a buai a, a tuartu chu mipui rethei ber atanga hausa ber thlengin kan ni. Kawng a that loh chuan motor-in a tuar a, transportation cost a sang a, sumdawng leh kut-hnathawkte pawhin kan tawrh theih a nih avangin, heng kawngpui hi kan mamawh a. Chutih lai chuan, kan budget han en hian crore 943 hi chuan, inrenchem kum te kan puang bawk si a, kawng thar te chu kan reh lutuk hmel lova. Amaherawh chu, kan kawngpui neih sate ho hi chu furah te pawh harsa lo takin, kal theih tura enkawl theih turah ngai ila.

Amaherawhchu, helaiah hian hriat thiam loh ka nei a. Ni 23.3.2023 Session-ah khan he House-a contractor bill ba chunchanga zawhna chhannaah khan crore ₹219 zet awma chhan a ni a. Kha kha kan Minister hian a chhawm anih chuan, a dinhmun hi a hahtlak dawn viauin a hriat a; kha kha nakinah mih hrilhfiah theih chuan ka lawm hle ang. Chumi rual chuan, sorkar hmasain DC Office sak that nan crore ₹49.71 estimate a siam kha bawhzui a ni ta em, tih ka han zawt bawk a ni.

Aw le, Pu Speaker, kan Minister hian hun reilote chhungin Kolasib District leh Lunglei lam te kalin kawngte a hmun ngeiah a en a, lawmawm ka ti hle mai a. Kolasib - Bairabi kawng te, Bairabi bul leh Tlawng kam ven himna te, Meidum - Hortoki te a zuk en a, tha takin hna a thawh ka ring a. Ka bial chhung han sawi ve zuai ka duh chu, Mizoram Youth Commission atanga Maubawk - Dam Veng inkalpawhna ho deuha siam theih meter sawmhnih leh tih vel lek saw a remchang hmasa bera min siam sak turin ka rawn dil ve bawk a.

Pu Speaker, Demand No. 39 - Power & Electricity hi, Mizoram sorkar enkawl Mini-Hydel Project chhe te te atanga kan tharchhuah hi megawatt 12 chauh te a ni thin a. Chutih lai chuan, kan Minister zahawm tak budget rawn pharhah khan solar lampang

kha arawn sawi mawi hle mai a, kha kha lawmawm ka ti a. Roof-top solar ah khan crore 7 lai a awmin ka hria a, hei hi a tha dawn hle mai a. NEEPCO hovin Mizoram, Meghalaya leh Tripura te hi an rawn khawih dawn niin ka hria a. Tin, Central Scheme a ni a, kilowatt khatah hian central lam hian ₹30,000/ lai an tum sak dawn ni awm tak a ni, ka hriat sual chuan; nakinah kan Minister khan min hrilhfiah se la.

Solar hi mini-hydel project chhe te te tihte ai chuan a tha hle mai a, Vantawng te, North Vanlaiphai leh Dilkawn rama Sumsuih te, Keifang leh Saitual ah te megawatt 45 lai hma an la te hi tha ka ti a. Solar hian eng emaw chen chu min pui dawn mai ni lovin, kan power hmuhna pawimawh tak ni chho dawn ni hian a lang a. Tin, transformer thar lei hian kan mamawh a phuhruk thei dawn ni hian ka hre lo; amaherawhchu, a pawimawh hlein ka hria a. Hemi ka han hmuh hian ka bial chhungah pawh ka zawt kual a, transformer thaa ram a lo awm tawh lova, min lo chawm zo lo deuh fur tawh a. Sawng Maubawk Tlang Veng te, Maubawk Dam Veng te, Vailuihnar te, Mission Vengthlang, Court zawla mite thlak ngai ngawih ngawih kan nei a. Chu chu, nakina transformer thar rawn thlen hunah hian nghakhlel takin kan lo thlir dawn a ni.

A tawp nan, Pu Speaker, Demand No. 40 - Commerce & Industries-ah hian, bazar sak that mek hi chak zawka kalpui a tha hle mai. Aizawl Bazar, New Market sak hi a muang ta lutuk a; Smart City Limited kutah a awm niin ka hria a. Sak zoh hun tiam chhung kha thla 36 (kum 3) a ni a; October 2018 – October 2021 a zawh tur kha, vawiinni thlengin zawh a la ni lova. Mipui an mangangin, khulai dawrkaite tunah hian an mangang takzet a ni. (**Hon. Speaker:** Minute 3 in a pel ta e; zawh theih a ni tawh em?) Hei hi chak taka kan Minister zahawm takin hma min lo lak sak turin ka ngen a ni e.

Pu Speaker, kan Minister zahawm tak tak pathumte demand kan sawiho hi, he House-ah hian lungual taka pass turin ka han a ngen a ni e. Ka lawm e.

HON. SPEAKER : Tunah chuan, Hrangturzo Bialtu, Member zahawm tak Pu Lalmuanpuia Punte ilo sawm ang.

PU LALMUANPUIA PUNTE: Pu Speaker, session hmasa lamah khan, “session apiangin traditional dress-in ka inthuum ang a, Zo-hnahthlak hnam hrang hrang thuumin ka inthuum chhawk dawn a ni” tih kha ka rawn sawi tawh a. Vawiina ka puan ven hi *Thado-puan* a ni a, ka diar khim hi, *Paihte-puan* a ni. Chu chu Pu Speaker, ka han sawi ve duh hrim hrim a ni.

Hei, Minister pathum te Demand kan sawi dawn a. Demand No. 45-naah hian, East Tuipui Bialtu rawn sawi ang khan a hun taka kawng chhia repair hi a pawimawh khawp mai. Ho te te anih lai hian repair nghal ila; a chhiat hnuah kan repair thin a, senso a tam zawk a ni. East Tuipui Bialtupa khan a duh lian mah mah ka ti a, ‘thlangra tiah vel a nih lai atangin repair tur’ a ti a, thlangra tiat vel anih tawh hi chuan kutphah chen vel hian

a thuk hman ziah tawh a ni. Khuhhriang tiat vel lek a nih lai atang hian repair nghal zel ni sela; khatiang a nih loh kha chuan motor-in a tuar a, kan han tlan hian a ri dawt dawt zel a. Chuvang chuan, East Tuipui Bialtu sawi kha ka thlawp a.

Tin, kawng sir quarry hi hei aia control deuh ni thei sela, kawng chhak lama quarry awm hi helai Aizawl hnaia awm hi chu an control thain ka hria a, hmundang, ka bial angah te pawh kawng chhak lam hnai te te ah quarry a awm a, hei hian kawng a tichhe nasa hle a, heng te khi hei aia uluk zawk, strict taka kalpui ni se.

Tin, Champhai North Bialturawn sawi, kawng siam ngil kha ka ngaimawh zawng tak a ni a. Kan Engineer-te kawng siam thiam dan hi a kawi thei khawp mai a, laymen pawhin, 'hei chu hrut mar phei mai ila a awlsam dawn hi maw le' kan tih tur hi kawi deuh hian an siam a, hengte hi chu siam mar mai se kawng pawh a tawi mai dawn a. Tin, Thorang Bialtu kha, amah kha engineer a ni a, a engineer-puite a tan deuh nge ni, 'Engineer-te kut phuar' tih lam deuha a sawi kha, hetiang kawng laih ki-kawi tihah hian politician-te an inrawlh ka ring vak lo.

New Capital pawh saw, Assam Rifles ram an tan bung a, in pakhatmah a awm loh laiin kawng an han lai a. MPSC bul kawng chhuk thla saw ti em ema chhuka an han lai thiam saw a mak a ni. A piah deuh kawi Sport Directorate velah sawnrawn chhuak se mar zat mai tur hi a ni a. Chuvang chuan, kan Engineer-te pawh hian kawng laih hi an duh uluk lo deuh hlek thinin ka hria a. Pu Speaker, kan Minister hian tlemin lo hrilh tha deuh hlek se a thain ka hria.

Tin, side-drain hi kan enkawl uluk lova, side-drain a that loh chuan kawngah tui a lo luang thuai a, side-drain kan maintain that loh chuan kawng hi a chhe duh em em mai a ni. Chuvang chuan, Thorang Bialtu-in a sawi ang khan, kawng hi tam sela. Tunah hian Biate leh Bungzung inkar khi MLA ka nih ve hma, Bialtu hnunung ber Pu Chama MLA fund-in an lai a. Khi khi Bungzung atangin Thinghrangkawn thlengin han chhuak chho sela, kawng tha deuhin, Champhai atanga Lunglei kal turte'n an zawh duh em em tur a ni a. Hengte hi ngaih pawimawh theih ni se ka duh khawp mai.

Tin, Manipur-a kan unaute nasa takin an buai a, Meitei nen an inkalpawh thei tawh lo a, Aizawl hi an kal-ka ber a ni. Tipaimukh road, New Vervek chhakah Tuivai lei hi 1997 tuilian sangin a la a, Bailey Bridge kha. Khatih lai khan BRTF road niin ka hria; tunah hian PWD-in an enkawl ta a. Khi khi tun thlengin dawh chhunzawm a ni ta lova. Pu Speaker, hei hi a rang thei ang ber, tun thal laia dawh theih ni sela, kan Manipur unaute'n nasa zawkin an chhawr ang tihna avangin, Minister hriatpuinain department-te nen pawh kan han sawi ho a. Tunah hian Bailey Bridge hlui thiaha dawhkai mai ni se kan ti a. Hei hi thal chung ngeia dawh kai hman ni sela a tha khawp ang; Mizoram chauh ni lo, kan unau Manipur-a mite'n an chhawr tangkai ngei ngei tur a ni tih kha ka han sawi duh a ni.

Tin, Demand No. 42 – Transport Deptt. ah hian, vehicle pollution test hi sawlai New Capital-ah thui deuh deuha intlar ngai lovin, outsource ni se, hmun hrang hrangah test theih mai ni sela a va tangkai dawn em ve aw ka ti a. Tin, Manipur an buai a, Mizoram chauh hi kal-ka an nei ta a, an Sumo service awmsa in a zo lova, private an tlan a. Sumo fare ₹1800/- a an tlan lain Eeco-Van kha ₹2500/- in an tlan a, Bolero-ah ₹3000/- te an chawi a. Chutiang chuan, control theih loh in a awm tawh a ni. Chuvang chuan, khilam tlan theihna turin hei pawh hi Pu Speaker, Minister hriatpuina bawkin department lam te nen pawh kan sawiho tawh a. Lamka service tur Maxi-cab permit tam zawk hi pek theih ni se kan unaute hian an chhawr ngei ka ring a ni.

Tin, Demand No. 39 - P&E hi a pawimawh ka ti a. Hydrel project chungchanga kan ngaihtuahna hi a thui tawk lo deuh hlek thin a, tunhma atangin. Agreement-ah hian fimkhur a ngai a. AR Kohli Governor a nih lai khan MZP te North India tour an neih tir a; chutih lai chuan tuna kan Leader of Opposition hi MZP President a nih lai a ni a, a ho hian an zin a. Himachal-ah chuan an Governor-in a lo kawm a, “Kan hydrel project neih chu Beas Lui a ni a, NHPC-in an khuap a, an khuah tirh atanga kum 25 chhung hi 12% an chang a; chuta tanga kum 25-ah state-in 50% an chang leh a; kum 50 hnuah chuan state-in total ownership an nei tawh a ni” a lo ti a ni. Chutiang agreement anga siam theih ni se, Tuirial te khu a duhawm khawp a. Khawvel awm chhungin 12% kan chan turin agreement kan siampui mai a, heng te hi a tha lo a ni. Chuvangin, hydrel project kan siam tumnaah hian fimkhur a ngai a ni.

Tuirial bik khu han sawi leh ta ila. MNF sorkar hmasaah khan compensation tam lutuk avangin an pamtul dawn a, an chawl ta reng mai a. NEEPCO hovin, “Hetiang kan tih zawh vek chuan kan power siam chhuah tur hi a sang dawn, unit ah 10/- aiin a sang daih dawn a, hralhna tur kan hre lo ang” an ti a, an chawlhsan a nih kha. A hnuah Congress an lo sorkar a, Congress khan MNF pamtul tih hlawhtlin hrim hrim tumin, Central lama UPA sorkar lai chakna hmangin an nawr a, mahse, NEEPCO lamin “hetiang a nih chuan kan power siam chhuah man a sang lutuk dawn a, hralhna tur kan hre lo ang” an ti khan, “kan lei mai ang” tiin an intiam a, an intiamna ang chuan an siam zo ta a. Tunah hian power hmun hrang hrang atanga kan lei - Kahalgaon @ ₹4.15, Talcher @ ₹2.65, Ranganadi @ ₹2.60, Khandong @ ₹1.75 te a ni a. Tuirial, kan ram chhunga mi ber hi an intiam dan a dik loh avangin @ ₹6.40 nge ₹6.75 a ni a; chutiang chuan, ₹6/- aiin a sang ta a ni. Chuvang chuan, a effect zel tur ngaihtuah lovin, hmingthat hrim hrim duhna ringawtin an siam a. Khu Tuirial hydrel project khu kan phurrit a ni ta a ni; lirnghing hian sah daih se ka ti khawp mai.

Chuvang chuan, hydrel project kan siam leh dawn anih pawhin, agreement-ah hian fimkhur a ngai khawp mai. Kan rama thil ropui tak, kan ta tur ni mang si lo; kan sitting room-ah mi pakhatin generator lianpui rawn dah se, a ropui viau; a chhit man kha kan chawi tho si chuan engnge a hlawkna? Chutiang ang deuh chu a ni. Thil ropui kan ta tur ni chuang lo hi chu fimkhur a ngai em em a ni. Tin, solar chungchang an rawn sawi a,

a lawmawm viau a. Amaherawhchu, hmanni Delhi-a kan kala IREDA official nena kan inkawm chuan, “Solar chu wasteland a siam hi a tha ber” a ti a. Vankal ram pharh thalai, lo neihna atana tha em em mai ah solar panel kan han dah khat vek te khi a uiawm a ni. Khampang, rama neih theih loh Durtlang khamah te khian chhim-chhawngin ti ila, Reiek khamah te ti ta mai ila, ram tha a aw hawn lo a ni. Chutiang te chuan tih theih ni se a lawmawm khawpin ka ring.

Pu Speaker, ka zo ve dawn tep e. North Vanlaiphai bulah khian Maicham Hydel Project a awm a, Phase-I chu 2 mW a ni a, tui tlem avangin tunah hian an *run* theih lova. Phase-II khi 3 mW a ni a, chu pawh chu tui tlem vangin *run* theih loh bawk a nih rualin, khawl pakhat a chhia a, khi khi fur hma ngeia siam zawh a tha ang a. Kan Minister hian min lo chhinchhiah sak sela; fur tui tam hunah pakhat zawk hi a chhiat reng chuan, a capacity angin kan *run* thei lo palh a hlauhawm khawp mai. Tin, prepaid hi hman ve tawh ni sela; a chhi tamin an chawi tam mai ang a. Hei hi a awlsamin a tha bawkin ka hria.

Tin, transformer phurhna hi, nikum kristmas dawn khan ka bial chhunga Chekawn-ah transformer a chhia a, krismas hma ngeia a en loh an hlau a, Minister hi ka pun a, Minister hmalaknain krismas hma ngei chuan an han dah thei a. Amaherawhchu, a phurh man kha VC an tum tir tlat mai a ni. Engatinge department transformer bunna tur chu VC in a phurh man an tum mauh mai le; hei hi kalphung a ni reng reng em? tih hi ka zawhna a ni tel bawk a. Chuvang chuan, hei hi kan Minister hian nakinah min chhinchhiah sak sela, hmun dangah transformer phurh man hi a khaw neitu ten an tum kher tur nge; hei hi department kalphung a ni em, tih pawh min hrilhfiyah se ka duh khawp mai.

Tin, Demand No. 25 – PHE ah hian, JJM hnuaiah tui pump Khawlailung te, Bungtlang te hian tun atanga a lan danah chuan an tui pump-na tur tui hna khi an kham dawn lo niin a lang a ni. Chu chu kan Minister hian khawngaih takin min chhinchhiah sak sela, tuihna tha zawk pump nghal turin hma min laksak se ka duh a. Tin, East Lungdar khi *Multi Village Water Supply Scheme* an ti a, Leng te, Sailulak te chawm thei turin an ti a. An zoh tep rualin tunah khian April thla tirah Zoram pum Pavalai khawmpui kan thleng dawn a, chumi hmain eng emaw tal chu kan Minister hian min tihsak sela ka duh a ni. Pavalai khawmpui chu a turu dawn a nia; han thawkchhuak tawp mai hi an ni a, vantlang fu her ang maiin an lam bial mup mup mai dawn a ni. Chuvangin, tui hi hnianghnar kan mamawh a, khawngaih takin min ngaih pawimawh sak se ka duh khawp mai.

Tin, Demand No. 40 - Industries-ah hian, Lunglei South Bialtu khan Mizo thir chher thiamzia kha a sawi a, keipawhin ka hria a, kan thenawm ah an awm reng tawh a. Heng mite hi thum that a tha khawp mai. India sipai regiment hrang hrang hian an lawm a, Rambo knife ang deuh deuh, Aizawl ringawtah hian thirchher mi 60 vel an awm a, chuta tang chuan hmeichhe pakhatin a lei khawm a, a zu supply thin a ni. An duh em em a,

heng an hmanruate hi han tih hmasawn saka, hei aia tha zawka an siam chhuah leh hi a duhawm khawp mai.

Pu Speaker, vawiina kan han sawi tak Demand Nos. - 12, 42, 45, 18, 39, 40, 25 leh 32, 38 te hi pass thei ngei ila ka duh hle a ni. Ka lawm e.

HON. SPEAKER : Tunah chuan Tuichang Bialtu, Member zahawm tak Pu W. Chhuanawma ilo sawm ang.

PU W. CHHUANAWMA : A hmasa ber atan han sawi ka duh chu, Demand 40 - Commerce & Industries hi a ni a. Handloom leh Handicraft chungchang hi, kan hriat theuh angin kum 1988 khan Industries Department hnuaiah, Jt Director of Industries hovin project manager te nen Handloom & Industries Wing hawn a ni a. Tichuan, he industry hi a technical em avangin service dangte nen a awm ho hi thil tih chi vak a ni lova, chuti chung chung chuan service dangte nena inchawpawlhin industry kan neihte zinga hlawhtling ber, he department timawitu hi a ni awm e. Pu Speaker, tun hma deuh politics a ka inhman ve hma kha chuan Mizoram chhung industry hi ka hre ve hle a, tunah erawh chuan ka hre lutuk tawh lova, chuvangin, a dinhmun dik tak, Thenzawl bik chauh hi han sawi lawk ka duh a.

Thenzawl dinhmun hi July - December 2023 kha han sawi lawk ka duh a. Puantaha eizawng chhungkaw 1225 an ni a; puantah khawl awm zat hi 2067 vel a ni. Chutiang khawpa ti nasa khaw mal chu a a ni a. An production hlut zawng pawh hi vaibelchhe ₹9,78,19,650/- a ni a, chungta tanga hlawkna an hmuh zat chu vaibelchhe ₹6,75,27,763/- vel a ni. Chutiang khawpa pawimawh leh thawkchhuak an ni a, Zoram pum angah phei chuan an thawk chhuak hle ang tih kha a rinawm a ni. Pu Speaker, Central sorkar hian handloom hi a ngaipawimawh em em a, kum tin hian handloom hmasawn nan scheme hrang hrang a siam thin a ni. Tunah hian technical mi tlemtein heng scheme hmang hian hma an la thin a. Tichuan, Pu Speaker, Mizoram ah chuan textile department kan neih loh avangin heng scheme te hi Sericulture Department leh Commerce & Industries hnuaia Handloom & Handicraft Wing te chuan a hrangin Ministry pakhat hnuaiah chung chu an thawk mek a ni.

Thil buaithlak deuh chu, Central ah project review meeting emaw, chutiang chu a awmin Secretary pahnih emaw, Director pahnihte emaw an kal a tul thin a ni. Vawiin hian Textiles Minister Conference-ah pawh Sericulture Minister leh Commerce & Industries Minister te an kal a ngai a, an kalna hmun chu hmun pakhat ni chung siin; chutiang te chu a nih avangin senso te a double-in, sum te pawh a double-a sen a ni thin a ni. Chuvangin, Pu Speaker, Handloom, Textile & Handicraft Wing hi thawktu tlemteina a enkawl ni mahsela, a changtlung em em a; nasa takin hma an lak bakah Handloom Department anga ram chhung leh ram pawna kan puantah te thawn chhuak tura hmalaka, ngaihtuahna sen hi a hun tak meuh tawh a ni. Chuvangin, Handloom &

Handicraft hi Sericulture Department nen hian thawh a lo inang tho bawk a, Sericulture hi Department nen hian amalgamate mai ila, tih rawtna ka siam duh a. Hetah hian engmah harsatna awm lova, financial implication pawh a awm chuang lo. Chuvangin, amalgamate mai hi a tha a ni.

Hei hi, ka ngaihtuahna thuk taka kalah chuan, Lammuala sual thupha chawina kan neih tuma kan House Leader zahawm tak, kan Chief Minister in a sawi kha, ka ngaihtuahna a kal thui em em a ni. A thupek te kan zawma, a kawngte kan zawh chuan, he State mai ni lo, he North East State zawng zawng hi handloom hian kan market ah a siam theih a ni. 2005 vel kum daih tawh kha niin ka hria, Handloom & Handicraft hi directorate hran neiin, department pakhat hnuaiyah changtlung tak lo ni tawh sela chuan, khung Arunachal te khu kan market nghet tak a ni reng tawhin ka ring a ni. Khatih lai kum 2005 vel kha niin ka hria a, han sawi mai mai kan duh a.

Vawikhat chu kan dawrah hian missionary, Arunachal-a mi pakhat hian Arunachal hnam pakhat puan hi a rawn keng a; ‘hetiang hi 50 vel in tah thei em?’ a rawn ti a, ‘thei e’ kan ti a. Tichuan, kan puan ban hi wawi khatah 50 ni lovin, puan 100 daih te hian kan bang thin a. Tichuan, 100 kan bang a, 50 kha an hnam puan ang chiahin kan tah a, a dang 50 kha, han en mai chuan a hnam puan nihna bo si lovin kan modify sak a ni. ‘Hei hi keng thla la, chuti zat chu kan hauh ang; i hralh chuan, chutiang chuan i ti dawn nia’ kan ti a. Tichuan, kha kan modify zawk kha a hralh zo hmasa daih mai a; chuta tang chuan zawi zawiin Mizoram handloom products te kha khulaiah khuan kan market a ni chho ta a ni.

Ka sawi ang khan Department changtlung tak chu lo awm tawh se chuan tun thleng pawh hian kan market hi a chhovin ka ring. Heng North East te hi, ‘a thupekte kan zawma a kawng kan zawh chuan, kan market-ah handloom hmang hian Pathian-in min pui em em ang’ tih ka ring a. Chuvangin, Sericulture Department leh Handloom & Handicraft te hi amalgamate ang u.

Awle, Pu Speaker, kan bial Tuichang khi; district thar kan nei a, mamawh kan ngah em em mai a. A hma khan mamawh kan lo ngah nasa awm ka ti a, opposition bial emaw tih mai tur hian district thar nimah ila; ka hmuh dan ber chuan dawr ruak nghak kan angin ka hria, khilai bialah khian. Chuvangin, bial chhung mamawh ka sawi vak dawn a, min lo hrethiam dawn nia.

A pahnihnaah chuan, Demand No. 39 chungga Sialhawk Sub-Station chungchang hi, panel/feeder khaw panga - Tlangmawi, Tlangpui, Sialhawk, Biate leh Tuipui te pump-na panel a hran theuhin an nei a. Khaw pahnih leh he Tuipui pump panel hi a chhia a, chuvangin, an zavaiin an intawm ta a; tunah khian a puah dur mai te a hlauhawm hle a ni. Hei hi a chiat rup hma khian min tlak sak vat ang em, tih kha he House hi ka zawt a. February thla tir khan kan han tlawh a. Side office a awm lova, mipakhat hian a lo nghak

a; a thawk ve reng emaw ka tih kha, aikal a lo ni a. 'Tu ai nge i kal' ka ti a, mipahnih ai a lo kal niin. Biate ami leh pakhat zawk chu sawiloh a tha zawk eem aw ka ti a. He rama thil tihah chuan a zahthlak berin ka ring a, pakhat zawk a kalna chu a hming ka hre lova, 'a thi tawh' a ti.

Aw le, a dawtah chuan, Pu Speaker Riangtlei kawng hi PMGSY hnuai ah 2017 khan laih tan niin, 2019-a laih zawh tawh a ni a, mahse, tun thleng khian thawh chhunzawm a la ni lova. Furah a kal theih loh avangin hei hi khawngaih taka min ngaihtuah sak turin ka ngen a ni.

Tichuan Demand No. 39 chhunga Khawzawl Water Supply Scheme chawmtu tui pump khawl awmna hmun panna kawng hi km 6 - 7 inkar vel a ni a. He kawng hi link road satliah mai a nih avangin, furah hian tihngaihna a awm lova, a manganthlak lutuk a. PCC emaw, black topping emawa min tih sak theih chuan ka lawm ngawt ang.

Pu Speaker, khawngaihin tlem te hun min pe leh lawk rawh. Khawhai - Ngentiang - Lungpho kawng khi U-shape a ni mai a, khi kawng khi kan tihtlang theih phawt chuan, Riangtlei, Vangtlang, New Chalrang, Lungtan, khawhai, Sialhawk te zawng zawng lo kalna tur a ni a, darkar 2:30 Aizawl thlen nan hian an save a ni. Thalah a theih; furah a theih loh. Ni khatah darkar 5 an save dawn; an inhnaih hleih lutuk.

Pu Speaker, nikum khan Tlangpui leihlawn pahnih dawhna tur nuai 100 (nuai 50 ve ve) an hmu a, mahse *Model Code of Conduct* khan a lo bar tak avang khan a kir leh a. An mamawhna a sang si a, an mahni khua khan Varva Lui lei chu tunah khian an dawh zo a ni tawh a, hetah hian nuai 40 leh tih vel an seng a ni, khawtlang tha nen. Pu Speaker, a pakhat zawk Lungva Lei dawhna tur min pek theih chuan kan lawm khawp ang. Tin, 2002-a lei dawh tan tawh tun thleng a la zawh loh a awm a. Pu Speaker, hei hi min ngaihpaawimawh a ngai hle mai a, nimin lam khan SE hova lo en tawh a ni awm e. Hei hi khawngaih takin min tih hma sak theih chuan kan lawm khawp ang. (**Hon. Speaker:** Minute 3 a pel ta a, i zo thei dawn tawh em?) Aw, ka zo a ni mai e.

Bungzung (Tualte emaw ni zawk) ah khian kawng a tlang vek tawh a, mahse, furah a tlang thei lova; a ngil lutuk a, pawh mar ang mai a ni. Chuvangin, khilai pawh khi min tihtlang sak thuai tur ka han ngen a ni.

Pu Speaker demand pathumte hi a vaiin tha ka ti a, pass ngei ila ka duh a ni. Ka lawm e.

HON. SPEAKER : Tunah chuan, Lunglei North Bialtu zahawm tak, Pu V. Malsawmtluanga ilo sawm ang.

PU V. MALSAMTLUANGA: Pu Speaker, ka lawm e. kan Minister duhawm tak takte pathumte Demand Nos. - 12, 42, 45; Demand Nos. 18, 39, 40 leh Demand Nos. 25, 32 leh 38 te sawina hun min pe hi i chungah lawmthu ka sawi hmasa a ni.

Demand No. 45 - PWD hi, kan hriat angin Lunglei lama ka MLA-puite pawhin an rawn sawi tawh a. Kan tlangaupui ber leh kan manganna pakhat chu - ATL Road chhe reng mai saw a ni a. Kan Minister hian sorkar tirh te khan hna hmasaah rawn neiin leh a hmun hma te tlawhin, hnathawkte a rawn vil a. Chu chang a ni lova, a chhia thawm reng ngai mai a saw a chhiatna dik tak te a rawn zir chiang a, a chungah Lunglei aiawhin lawmthu ka han sawi a. Lunglei khawpui chang a ni lova, MADC te LADC te CADC te kawng rin rawl ber a ni a, an ni aiawh pawhin lawmthu kan sawi bawk a ni.

A lan danah chuan, a bul atangin project thar hlaka kalpui a tul niin a lang a. Tunah inrenchem kan kalpui lai te chuan thil har pawh a ni thei a. Kan Minister-in a theih hun hunah hma min lak sak turin ka ngen a. Tuna kawng chhia ang ang thawm kawngah pawh tun aia a that lehzualna turin a viltu tur, PWD SDO office te pawh Haulawng tlangdungah te awm thei se tih ngaihtuahna te a awm a. Tin, ka bial chhung kanghmun South atang sawn kawng chhia hi a intan deuh a, khawngaih takin chhim lam mipuite tan ke rawn pen nawn zel turin ka ngen a ni.

Ka sawi leh duh chu, Pu Speaker, ka bial chhung khawpui hnaih deuh sia Hmuntlang khua saw a fur a thala kawng la luh theih loh a ni a, kawng tha tak chu laih tlang a ni tawh a. Kan Minister hian min lo hriatsak thei se; kan duhthusamah chuan a rang lamin min lo ngaihtuah sak thei se; km 5 chauh a ni a, PCC pawhin nuai 100 vel bawr bak a ngaih a rinawm loh a. Tin, Pu Speaker, Pangzawl - Lungmawi - Mat road hi a pawimawh hle mai a. Lungmawi saw historical place pakhat a ni a, a hmunhma a rem a, a leilung a tha a; thlai tharte pawh an ngah em em thin a ni. Chutih rual chuan, an hralhna ber Pangzawl lam kawng saw a tlang hlei thei lova, Mat Lei min dawh sak thei se, tih te kha ka han sawi lang duh a. Tin, kan Constituency saw buaithlak deuh mai a awm a; bial fang chhuak turin constituency pali chuang kaltlang a ngai a ni a. Saw lai lei saw min dawh sak theih chuan, awlsam tein bial te pawh kan fang chhuak thei ang a, a hnu leh zelah te pawh mipui chhawr theih thil tangkai a ni dawn a ni; meter 80 vel chauha thui niin a lang bawk a ni.

A dawt leha kan sawi duh chu, Lunglei khawpui chhung saw kawng pakhatin a tan tlang ruah a ni a, a bak motor lian han chet velna tur a awm lova, a lan dan ah chuan veng/khua 80% vel a saw chhiat tawh thilah pawh kang thelh motor a tlan tlang thei lo a ni. Kar hnih liam ta khan Electric Veng-ah in pakhat a kang a, a kang ral vek mai a, vanduai thlak takin an chhungkaw pa ber pawh a boral nghe nghe a ni; khatiang te kha a ni a. Chuvangin, ring road kan mamawh hle mai a, Lunglei khawpui sawn. Heng te pawh hi kan Minister duhawm tak hian min lo ngaih pawimawh sak se kan lawm hle ang a.

Tin, Haulawng saw, ka bial chhung khawpui pawnah chuan town area tluka khawpui lian a ni a, sawtah sawn PWD IB hi 1987 kuma sak tawh, kan Minister ngei pawhin hmanni khan min rawn tlawh sak tawh a, siam that/sak that ni thei se, ‘kan chhawr tangkai viau dawn a ni’ tih te ka sawi lang duh bawk a.

Tin, thalaite khaichhuahna kawngah hian department hrang hrang zingah ‘PWD ah hian hna a tam ber’ ti ila, kan sawi soal lo ang a. Hna tender koh dan chungchangah hian Pu Speaker, kan Minister hian min lo hriatsak thei se, hna lian deuh thawk turin credential-ah Mizo consultancy firm contractor tha tak tak, thalai rawn thang zel turte hma thlir thui tak, eng tak neite tan chhan theih loh tam tak a awm a ni. Hengah hian loh theih loh in state pawn lam company/firm te an rawn lut lo thei lova. Hemi kawngah hian helai local construction firm emaw, consultancy firm emaw, contractor te joint venture emaw an telna ngei ang chi te hi tender-ah te hian thailan theih ni se, ngaih pawimawh theih ni ta se; chung kaltlang te chuan credential tha tak takte an lo nei chho ve thei ang a; hna lian tak tak kan tih te pawh reiloteah an thawk ve thei dawn ni tein a lang a, khalai te pawh kha vawiinah hian ka han sawi lang ve duh hrim hrim a.

Tin, ka bial chhung thil ka han sawi leh duh chu, lawmthu sawina ve thung ni ta se. Steel Truss Bridge, Hnahthial – Haulawng via Zotui, meter 70 hi min dawh sak dawn niin kan hria a. Hei pawh hi khaw inkalpawhna, district inkalpawhna ang te pawhin sawi ta ila, pawimawh tak a ni a; kan Minister chungah pawh lawmthu kan han sawi duh bawk a ni.

Tin, Demand No. 42 chhungah hian, State Transport Authority hi Aizawl lamah office a awm a, Mizoram pum mai min tuam a, hemi kawngah pawh hian, a bik takin chhim lampang tan goods carrier - public transport tan hian harsatna kawng tam takin kan tawk a ni. Sorkar hun hmasa lamah te pawh khan *Chhim Bial Chhantu*-te pawhin heng kan harsatna te hi an lo thlen tawh a, hengte pawh hi kan Transport Minister hian min ngaih pawimawh sakin, min han hriat sak theih se kan lawm hle ang. Regional Transport Authority din ngei theih ni se kan duh a, chhim lam bik hian.

Demand No. 39 - Power & Electricity chhungah hian a minister-in min lo hriatsak atan ka duh chu, Lunglei khawpui saw feeder hrang hrangin a chawm a ni; chung zingah chuan pawimawh tak mai pakhat vawiina ka han sawi lan duh chu, Sazaikawn - Rahsi Veng chunglama feeder rawn kal saw a ni. Saw sawn Lunglei DC office a chawm a, Chanmari chunglam Lunglei main road phei saw a chawm vek a, Ramthar AOC -petrol pump thlengin a ni a. Hemi feeder hi a rit deuh nge ka hre lova, a chhe fo mai a, saw saw a chhiat chuan Lunglei khawpui chanve hi a thim rup a ni. Chutiang chu a ni a. Pu Speaker, hospital lian te, commercial area hmun lian te a awm a, sawng te pawh saw kan Minister-in min ngaih pawimawh sak theih chuan a lawmawm hle ang.

Tin, Demand No. 18 - Printing & Stationery ah hian, Lunglei lama kan Printing & Stationery Department neih te saw a tlabal em em a, furah phei chuan 'luah ngam loh' ti ila chu, ka sawi uar deuh ang a, chutiang chu a ni a. Khawlte pawh a hul that loh avangin a tuar em em a. Heng te pawh hi minrawn ngaih pawimawh sak ta se. Tin, copy printer thar emaw, store room tal emaw min han chei that sak thei se, tih te ka han sawi lang duh bawk a. Tin, Ka bial chhung tho Tlawng-ah sawn chhungkaw 100 velin ei an zawng a, sawlai hmunah te pawh electric a la lut lova. A bul lawkah Tlawng Lui a luang a, sawng te pawh saw min han ngaih pawimawh sak se; solar plant emaw electric min han pawh luh sak thei se chuan, tuna chhengkua 100 piah lam awmna saw farm village ang hial te pawhin an awm thei dawn a ni.

Tin, ka bial chhunga Khawiva - mini hydel project hi department 5 vel chhawr theih tur a ni a, tunah sawn a check dam a phui tawk lo deuh a; thawm that ni ta se tun aiin electric siam chhuah a tam ang a. Chirh dum tam tak a awm tawh a, tui a tling tam tawh lo a ni. A thlang lawkah Tlawng a fin a, thalah phei chuan PHE Department-in a chhawr em em a. Tin, tourist spot a tan te pawh thil tangkai tur a ni a, 'water-sports' kan tih sports lampang te, tracking te pawh tih theih tur a ni a. Chu chang nilovin, fisheries department thlang pawhina a hman tangkai theih tur a ni a, Pu Speaker, kha kha Minister-in min lo hriat sak thei hram se ka duh hle mai a.

Lunglei lamah sawn linesman indaihlohna a nasa em em mai a. Ka hriatsual loh chuan, tunah hian khawpui chhunga duty linesmen pariat chauh an awm a, ka bial chhungah phei chuan Ramlaitui duty hian Kanghmun, Chhipphir duty hian Bualpui V, Zotuitlang duty hian Chengpui, Haulawng duty hian Mausen, chutiang chuan an kar tawn zak zak a ni a. Lungmawi-ah ngat phei chuan tunah hian kan nei lova, hetiang te pawh hi kan Minister-in min lo ngaih pawimawh sak ta sela.

A tawp tak takah chuan, Demand No. 32 chungah hian, Pu Speaker, (ka hmaa mite pawh khan an pel hlek tho a) dragon fruits hi ka bial chhungah sawn an thar nual mai a; a bik takin Haulawng tlangdungah sawn kum khatah hian quintal sang chuang an thar a ni. Hei hi kan Minister duhawm tak hian cold storage te pawh, remchang a awm theih chuan min lo ngaihtuah sak ta se kan lawm hle ang.

Tin, Demand No. 25 chhungah hian, Lunglei-ina kan mamawh em em, PHE lama kan harsatna - Lunglei Greater Water Supply Scheme, phase-I renovate tur kha nimin lamah khan kan House Leader, kan Chief Minister duhawm tak khan a sawi tawh a; SASCI ah crore 55 chuang dah a lo ni tawh a, a chungah chuan lawmthu ka sawi a. PHE Minister pawhin minrawn tlawh sak tawh a, a hmunhma ah ngei; tunah khuah thatna tur nuai 477 chuang hman mek a ni. Hemi piah lamah, hei hi *nachhawkna* ang a ni a, kan dam tak takna, (dam hlenna) 'Mat pump' kan tih te pawh hi min lo ngaih pawimawh sak reng turin ka han sawi leh duh bawk a ni.

Pu Speaker, a tawpna tak takah chuan, Aizawl hi kan khawpui ber a ni a, population-ah pawh kan sang filawr lak a. Tlawng atangin man to takin tlang chhipah tui kan han pump chho a, kan han sem leh a; a semna kawngah hian harsatna tam tak a thawktute'n an tawk niin a lang a. Tui sem kawngah hian leak tam tak a awm a, 'a pump chhoh nge tam anga, a sem nge, a leak' tih tur deuhthaw te pawhin hmun thenkhatah te chuan a ni a. A hmawr kan bawkna kawngah hian kan PHE department te pawhin tun aia tan lo la deuh tur leh, uluk deuh zawk turin ka han chah tel bawk a ni.

Pu Speaker, heng demand, kan Minister duhawm tak tak te'n an rawn pharh hi, he House zahawm takah hian member zahawm tak tak ten lungrual takin pawmpui ila, tiin ka rawn thlawp a ni e. Ka lawm e.

HON. SPEAKER : A lawmawm e. Kan chawhnu hun hi dar 4 thleng a ni a; minute hnih vel a la awm a, member sawi turte kan la awm nual a; Minister demand-te pass tura rawn dil te a la ngai a. Tichuan, tunah hian kan chawl ang a, dar 5:00 PM-ah kan lutkhawm leh em ni ang?

PU LALCHHANDAMA RALTE, OPP. LEADER: Rawtna ka han siam teh ang. Kan House Leader ka han din khalh mai ang a. Demand sawi ni ah chuan (he lai kan danah hian) tlai dar 4 te pawh ni mahse, House-in rem a tih chuan dar 5:00 thleng te emaw han sawia, dar 5:00 dawnah te emaw chawlha, luh leha wind-up te a tha zawk em aw, ka ti a ni.

HON. SPEAKER : Kan House Leader kha eng nge a ngaih dan?

PU LALDUHOMA, HON. CHIEF MINISTER: Ngaih dan tha tak a ni; tuna chawlh chu a lai zo vek ang. Dar 5:00 emaw, 5:30 emaw te pawh thleng ila, chutah chuan kan Minister pathumte zinga a tu ber emaw hian ei tur min buatsaih sak anih hmel a. Tichuan, Dar 5:00 emaw, 5:30 emaw ah zanriah ei ila, darkar khat vel chawl ila. A bak chu zan dar sawm velah chuan kan bang thei turah ngai ila.

HON. SPEAKER : Aw le, a lawmawm e. House-in rem kan tih dan ni sela. Tunah chuan sawi leh turin South Tuipui Bialtu, member zahawm tak Pu Jeje Lalpekhlua ilo sawm ang.

PU JEJE LALPEKHLUA: Pu Speaker, ka lawm e. Vawiinah Minister pathumte demand a hmasa berah ka sawi duh chu, Demand No. 39 - Power & Electricity Deptt. hi a ni a.

Ka bial chhunga power lam harsatna sawi lan ve ka duh chu, Hnahtial hian fur lain power lamah harsatna kan tawk nasa thin hle a. Mahse, Hnahtial P&E lama thawktu SDO leh a staff-te an fakawm viauin ka hria a, he House zahawm tak kaltlang hian an

chungah lawmthu ka sawi a. An ni hian a sur, a sa hnuaiyah hah pawh dawn lovin, mipuite'n power tha tak kan neih theihna turin hna an thawk thin a. He House zahawm takah hian sawilan ve ka duh a, Mizoram pumpui hriatah mipuite pawhin kan lo auchhuah pui fo tawh a.

Power supply chungchangah hian, a bik takin fur lain mipuite'n harsatna kan tawh nasa em em a. 132 kV Sub station bun tura sorkarin a tih khan mipuite kan lawm em em a. Hnahthial mipuite'n harsatna kan tawh thin chu hun reilo te ah sut kianin a awm dawn a ni tih kan hriat khan kan phur a. Mahse, zo vat tura kan lo ngaih lain, engtikah nge zawh anih ang, tih pawh hriat theih a ni ta lova. Mipuite pawhin hrehawm kan tiin, he harsatna ang tho hi kan MLA zahawm tak khan a rawn sawi a; Mamit mipuite pawhin hun rei tak harsatna an lo tawh ve tawh niin ka lo hria a. Kan Minister zahawm tak, P&E leh Forest Department changtute'n theih tawp min chhuah pui bakah, hma min lak sak zel a, he 132 kV Sub-station hi, hemi atana hna thawh zawh thuai a nih theih nana hma min lakpui zel tur pawhin ka chah duh bawk a ni.

Pu Speaker, he harsatna kan tawh mek atang hian thil pakhat chauh ka sawi belh duh chu - Mizoram hmasawna hna thawh tur project pawimawhah hian forest clearance avanga harsatna kan tawh avanga hna thawh theih loh a niha, hun reitak project delay ngaite a awm zauh zauh ta a. Heng, mipuite tana hmasawna project thawh tur hi delay a nih hian, a tawpa tuartu chu, mipuite kan ni zel a ni. Hei hi a serious hlein ka hria. Chutih rualin, dan palzut leh mausam zawnga kal erawh thil tha a ni hauh lova. Tun hnuah hetiang harsatna hi a thlen nawn tawh loh nan, department project siam tur leh thawhna tura forest clearance mamawh turte chuan a tir atangin Forest Department nen inpawh tlang taka thawhhona enfel hmasak a nih chuan, harsatna lo thleng thei hi kawng tam takah kan pumpelh thei dawn a ni.

Pu Speaker, ka bial chhunga Denlung khaw daiah 10 mW siam theihna tur 20 hectares chu solar plant siamna tura pek a ni tawh a. A changtu Minister-in min lo hriat sak atana ka duh chu, sawlaia kan P&E thawktute pawhin a hmun leh a ram, a approach tur zawng zawng an enfiah tawh a, hma lakna tlak niin, a form pawh submit tawh a ni a. NH 54 kawngpui atangin km 3 leka hla a ni a, 33 kV Sub-Station leh 132 kV Sub-Station buatsaih tur atanga link awlsam tak a ni bawk a. Heng te pawh hi min hriat saka, helai hmuna solar plant kan neih ngei theihna tura hma min laksak turin a changtu Minister pawh ka chah duh bawk a ni.

Tin, Hnahthial Sub-Division hian Lawngtlai District-a Sangau Civil Sub-Division huamchhunga khaw 8 lai a huam tel a. Tin, kan district huam chhung – Thingsai leh Cherhlun tlangdunga khaw 6 hi North Vanlaiphai sub-Division lamah a awm leh daih bawk a. Hei vang hian civil administration lamah buaina nasa tak kan tawh phah a. Tlem laia Myanmar raltlan an rawn luh khan, an camp-ah eng pek luh a ngai a, Hnahthial Bawrhsap area a nih loh avangin N. Vanlaiphai SDO lam biak a ngai thin a, hei hi

siamthat dan awm thei se. Chutih rual vek chuan, sorkar kal ta khan Hnahthial P&E Sub-Division chu division-puitlinga dah tura a buaipui mek hi sorkar tharah pawh hian hma min lak chhunzawm sak se; Hnahthial-in division-puitling kan neih theihna tura theih tawpa hma min laksak turin a changtu Minister ka chah duh nghal bawk a ni.

Tin, Hnahthial Sub-Division hi Mizoram-a division upa ber pawl a ni a; MLA bial pathum min cover a, division-a hlankai hi kan phu ve tawh viauin ka hria a ni. A changtu Minister ngei pawhin phu min tih ve ka ring a, chu chu min hriatsak turin ka ngen duh bawk a ni.

Tin, Pu V. Malsawmtluanga, MLA zahawm tak khan a rawn sawi tawh a. Linesman chungchangah hian kan bial chhungah pawh indaih lohna a nasa em em a. Amaherawhchu, NGO te an tlawmngai a, theihtawp chhuahin a khaw mipuite tana hma lain an thawk thin a. Hemi kawngah hian kan indaih lohna te hriain, a rang lama hma min laksak turin ka chah duh bawk a ni.

Tin, Demand No. 45 - PWD ah hian, inkalpawhna kawng hi hmasawna atana thil pawimawh ber pakhat a ni a, kan mamawhna pawh a sang viau a. Ka sawi thin a; khawvel ram changkang tehna ber chu, inkalpawhna kawng hi a ni thin a. Heng te pawh hian PWD pawimawhna a tichiang hlein ka hria a. Nikum mai, Ni 23.6.2023 khan, khatih laia PWD Minister leh Chief Minister ni bawk khan Hnahthial PWD Division a hawng a. PWD office atan mikhual thlen nana kan lo hman thin, duat taka kan lo enkawl PWD IB chu hman a ni a. Amaherawhchu, tun dinhmunah hian Hnahthial Division hi function mumal lohin a awm a. Hei hi a nihna tur diktaka a function-a, sawlaia division-puitling kan neih theihna tura hma min laksak turin a changtu minister ka ngen nghal bawk a ni.

Tin, kan hriat angin NHIDCL hovin kawng an lai a, hma an la mup mup mai a. ‘NH-54’ kan tih thin, tunah chuan ‘NH-02’ tia an thlak tak kha, Keitum - Serchhip inkar kawng saw rin aiin an hna a chak mawh khawp mai a. Saw pawh saw, PWD Minister hi a hrechiang bertu a ni a, chak zawka hma an lak theihna’n theihtawp min chhuahpui turin ka chah nghal bawk a ni.

Pu Speaker, kan bial chhunga kawng pawimawh tak, BRTF chan ni si, Tuipui ‘D’ lei dawhna tur sum awm sa vek tawh a ni a; amaherawh chu, tun thlengin hna tan a la ni lova. Heng te pawh hi economic road pawimawh tak a ni a, keimahni bial chauh ni lo, Lawngtlai leh Siaha District tan pawh lei pawimawh tak a ni a. Tuna lei pangngai pawh nilo, PWD-in suspension bridge an siam kan la hmang ve a, lirthei te chi in a zawh a, a chang phei chuan, bungraw tam phurte phei chu sawlai ah kan unload a, tiang khan sum tam tak sawlaih pawh a kal a, kan hmang thin a ni. Hei hi chak zawka hma min laksak turin, a hrechiangtu Minister-in hemi kawngah hian BRTF lam te emaw, hemi kawnga hma latute ah hian chak zawka hma min lakpui turin ka ngen nghal bawk a.

Tin. Pu Speaker, kan bial chhung - Hnahthial atanga hnaite km 3 velah hian Denlung khua a awm a. Kan hriat dan tur chuan, ‘*Lalnu Ropuiliani* thlan awmna’ kan tih thinna kha a ni a, hemi khua hi Hnahthial atanga hnaite a ni a. Amaherawh chu, furah kal theih mumal lovin a kawng a diak em em a, a nal em em mai a, hengte pawh hi mikhual/tourist hipna atana hmun pawimawh tak ni tur a ni a. Hnahthial lo kal mikhual reng reng pawhin an tlawh chak leh an tlawh tawh te pawh a ni a, hengte pawh hi kawng tha zawk kan neih theih nan hma min laksak turin ka chah duh bawka a ni.

Tin, kan Tourism Minister-in a sawi hmun pakhat, tourist hmun atana a duh em em South Lungleng khua pawh khi, a panna kawng hi seasonal road mai a ni tih kan Minister khan min lo hriatsak turin ka chah nghal duh bawka a. Pu Speaker, Hnahthial – Thingsai kawng hi a pawimawh hle a, Hnahthial - Tuichang inkar kawng hi a tha lo khawp mai a. Bial kan fan lai khan sawlai changtu PWD lamin hna an lo thawk mek a, an kawng siamte kan enpui a, amah erawh chu duhthu a sam lo khawp mai a. Chungah pawh chuan, ‘engtingge, sum a tlem bawka si’ a ti a, hna theihtawpa thawh an han tum a. Amaherawh chu, sum lampang indaihlohna nen a theih chin chin hma an han la a. Heng atan hian sum te pawh, ‘tih belh dan a awm em’ tih kha min lo hriatsak turin kan ngen duh bawka a.

Tin, Tuichang lei hi a hmam motor lian zawk pawh a kal thin a, tun dinhmunah motor lian zawk kal theih lohina awm a. Helai kawng hi a pawimawh bawka si a, Tuichang ral - Thingsai te, Cherhluh te leh khilai tlangdung zawng zawngte’n kalna atana kan hman a ni a, hengte pawh hi a chhawrtu mipuite’n tangkai zawka kan chhawra kan hman theih nan, heng Lei te pawh hi thuan that/sak that a ngai viau a, hengte pawh hi Minister khan min lo hriatsak turin ka ngen leh duh a. Tin, Thingsai, Tiaubung khaw kai kawng hi kan district mai ni lo, Mizoram tan pawha kawng pawimawh tak tur a ni a, Myanmar nena insumdawn tawna kalpuina tur trade centre kawng te a nih piah lamah, Tiau Lui hausakna balu leh thil hrang hrang thiarna agriculture link road pawimawh tak a ni a. Kum 2019 khan NEDP sum hmanga laih zawng niin, tun thlengin black topping a la ni lova, estimate pawh siam vek tawh a ni a; black-topping na tur sum hi min ruahman sak turin kan ngen nghal bawka a.

Tin, Pu Speaker, i remtihnain, Demand No. 25 - PHE lam han sawi lan leh lawk ka duh a. Pu Speaker, kalphung-thar, mipui-sorkarin a ngaih pawimawh em em - *Six basic needs* zinga tel, mipui hnena tui thianghlim intur hnianghnar pek chungchang kan sawi thei hi a lawmawm takzetin ka hria a. Nimin piah lawkah ka bial chhung Bualpui ‘H’ atangin phone call ka dawng a, bial kan han fan te pawh khan an mangang a. Khilalaiah tui harsatna a nasa em em a, JJM hnuaia an tui pump hi a pump no. 1 thleng a kal a; no. 2 kal leh tur pump kha a chhe tlat mai a. Chu chu, khilai department te nen kan han inbia a, company nena an inkarah thil a lo awm avangin hna an tan thei lova; a changtu Minister Prof. Lalnilawma hnenah kan thlen a, a ni in hun reilo te chhungin hma min han laksak a. Department lam te be pawpin nimin khan Bualpui ‘H’ khuah JJM hnuaia

tui pump pawh, tui a haw ve huau huau tawh mai; a khaw mipui pawh an lawm hle a ni. Vawiih hian he House kaltlang hian Prof. Lalnilawma chungah khan lawmthu, Bualpui 'H' mipui aiawhin kan sawi duh bawk a ni.

Tin, ka bial chhunga New Kawnpui khi in 15 vel lek khua an ni a, tui dahkhawlna tur an nei tha lo khawp mai a; heng te pawh hi min lo hriatsak turin kan ngen nghal duh bawk a. Pu Speaker, heng bak pawh hi sawi tur tam tak a awm a, mahse sawi vek sen a ni dawn lova. Keini hi district thar kan nih avangin, kan minister hrang hrangte pawh hian min ngaihsak deuha, district ni rei tawhte kan umna kawngah duhsakna leh theih tawp chhuaha hma min lakpui zel tur pawhin ka ngen nghal duh bawk a.

Tin, a tawp berah chuan, Pu Speaker, point khat lek, i remtihain; Demand No. 38 RD kha a ni a. Pu Speaker, vawiih niah ka bial South Tuipui fang tein kan han kal kual a, Rural Development hnuaiyah hian hall hi khaw tinah hian kan nei deuh vek a, mahse hman tlak hi a awm bar lova; 'sorkar kaltawhte khan sum siam nan hian an hman ringawt em maw ni le aw' tih mai tur khawp hian hall hi hmun tinah kan nei a; amaherawhchu, function mumal loh deuh vek a ni a, heng kawngah pawh hian a changtu Minister hian min lo hriatsak turin kan chah duh a. Tin khilai kan district-a khaw lian ve tak Muallianpui-a hall phei chu, tukverh pawh awm tawh lo, tlabal lutuk, a chung te pawh a kul vek tawh a ni. Khing te pawh khi ngaihpawimawh hmasakah min dahsak turin ka ngen nghal duh bawk a.

A tawp berah chuan vawiihnia kan Minister pathumte demand hi a tha ka ti a, a tlang ngei theih nan ka thlawp e. Ka lawm e.

HON. SPEAKER : Aw le; tunah Tuirial Bialtu zahawm tak Pu K. Laldawngliana ilo sawm ang.

PU K. LALDAWNGLIANA: Pu Speaker, ka lawm e. Kan Minister zahawm tak Pu Vanlalhlana Demand No. 42 - Transport Department hi ka sawi hmasa ber duh a.

Motor tel lo hian kan khawsa thei tawh lova. He department hi tunhma atanga sawisel nasa tak lo tuar tawh a ni a, amaherawh chu vawiihnia chuan entawn tlak takin, thawh ho thatna avangin hmasawna tamtak kan hmu a. Hei, inrenchem kan kalpui bawk a, vehicle tax pawh an la lut tha tawh khawp mai a. Chuvang chuan, vehicle te pawh hi hei aia lakluh tam a nih theihna turin district hrang hrang, a tharah te pawh hian DDO Office hi neih belh theih ni sela; district ni lo keini bial Kawnpui te pawh a lian deuh a, hetah te pawh hian a pek theih dan min buatsaih sak theih chuan a lawmawm ngawt ang a.

Tin, Transport Department kan han sawiselna ber chu - Bus Service hi a in manage thin lo a ni; private-in an in manage thei bawk si a. Hei hi en uluk zual deuh hleka, a tul a

nih chuan privatise te mai te a tha zawk em, tih ka'n sawilang tel duh bawk a. Hei, kan mamawh tak mai, motor nei chuan a tlanna turin petrol pump khilai hmuna an nei te hi ka lawmpui hle mai. Heng te pawh hi uluk zuala enkawl a ngai a ni.

Pu Speaker, Demand 45 - PWD hi, ram changkang tehna chu – ‘kawng a tha em’ tih hi a ni deuh zel mai. Foreign leh hmun hrang hranga kalin an kawng hi a nuam em em zel an ti a. Chuvang chuan, kan ram changkan leh changkan loh chu, kan kawng hi tehfung a ni a. Vairengte kawng hi kan chakkhai zawng zawng lakna kawng a nih avang hian, Vairengte - Sairang kawng tur hi tunah en tawh a ni a, hei hi fur chhiat hmaa tih that tul hlein ka hria a, ka han ngai pawimawh deuh a ni. Hei hi uluk leh zuala kan hotute'n in enkawl a tul hlein ka hria a ni.

Sorkar hmasa atanga kan sawi tawh a, ka bial chhunga kawngpui (National Highway) Mualkhang chhohna kawng khu la siam loh a ni a, hei hi min lo chhinchhiah sak sela; department ah pawh dah a ni tawhin ka hria a. Tin, Kawnpui - Hortoki kawng pawh hnatlang te pawh kan han neih thin tawhna kha a ni a; helai pawh hi min lo ngaihtuah sak se ka duh bawk a ni. Tichuan, kan mamawh em em mai chu Thingdawl-ah EE hovin PWD Department a awm a, tunah hian building ruak pakhat Polytechnic building-ah kan hnawh tawp mai a. Chuvang chuan, ruahmanna lo awm tawh a ni bawk a, a building hmun tur te pawh a awm tho a. khu khu sak theih vat ni se.

Kan sawi fo a; kawng hi chu a siam huna siam maia, a enkawtu tur ten uluk taka tih mai hi a tha; rei tak nghah chhiat kher hian siam that leh hi a harsa mai mai a, a chhiat tirh atanga siam thata, vila enkawl that a ngai a ni. Hei hi a department te, Minister hote leh kan leader te leh mipui zawng zawngte'n kawng hi ngai pawimawha siam that a pawimawh hle a ni.

Minister zahawm tak Pu F. Rodingliana chan, Demand No. 18 - Printing & Stationery hi, he department hrim hrime hi, department dang head-te chu Director an ni deuh kher a ni. Chuvang chuan, Resource Mobilisation titu department a nihna hi. Minister zahawm tak hi a ropui ka ti hle mai a, a nachang a hria ka ti a. Hei, suspense ah hian revolving fund, department hrang hrangin an mamawh leina tur nuai 100 atanga nuai 200 (a let) dah pun a ni hi a ropui ka ti a. Hei hi hmanral mai mai tur ni lovin tangkai takin department hrang hrangte mamawh leina tur leh a hlawk zawk tura an siam hi a ropui ka ti a. Resource Mobilisation Committee te pawh hi he department nen te pawh hian tang khawm thei se a tha ngawtin ka ring a. A department thawktute an fel bawk a, an tha bawk a, an rintlak bawk a ni tih kha ka sawilang tel duh bawk a ni.

Demand No. 39 - Power & Electricity hi, ram mipui zawng zawngte hian tunah hi chuan sumdawngte pawh an ni a, a mimal te pawhin kan mamawh ber mai enkawltu Power & Electricity Department hi, a thawktute pawh an rintlak a. Kha, hmanni lawkah issue kan han nei a, kan bial chhung Sentlang ah wrong information, communication gap a awm

avangin harsatna kan han tawk a. Khami kawngah khan bial aiawh pawhin, ram mipuite chungah ngaihdam kan dil duh a. Amaherawh chu, kan zu kal vat a, Sunday ni chung khan kan Minister leh kan Home Minister te nena inbe chungin, tichuan reilote ah siamthat a ni a, Minister chungah lawmthu kan sawi bawk a ni.

Hei, RD Scheme atang hian Lungdai, Hortoki leh Kawnpui te electric line hi siamthat a ngai hle mai a, min lo chhinchhiah sak sela a thain ka hria a. 1974 vel atanga line-pui lo kal chhoa kha la thlak mumal loh a nih avang hian a chhe deuh reng mai a; hei hi min lo ngaihpaawimawh sak se. Tin, New Khamrang khu nikuma Central Minister lo kal khan ka zuk kal ve a, New Khamrang, main road ni si ah khuan connection pek an la ni lova, khu khu kan Minister bul ah pawh vawikhat chu ka sawi tawh a, min lo chhinchhiah sak sela. An tam lo bawk a, new connection (an lo ngaithla thapin ka ring a) pek theih ni se; New Khamrang bik khu connection min pek theih chuan a lawmawm ngawt ang. Tin, Saiphai Zau electrification hi NABARD atanga buaipui mek a ni a, hei pawh hi a hun taka tihlawhtlin a nih theihna turin min lo hriatpui ula. Bawktlang leh Sihhmui 132 kV line te pawh hi hna thawh mek a ni a, tihpuitlin a nih theihnan hei pawh hi kan Minister khan min lo nawrpui turin ka ngen duh bawk a ni.

Demand No. 40 - Commerce & Industries Department hi ram changkang apiangah hian sumdawng ho awm khawmna enkawltu a ni. Car changkang te, bike changkang te a tamna hmun reng reng chu, sumdawanna hmunpui a ni. Sorkar hnathawkte chu an hlawh mila khawsa tur an ni tih kha kan hriat tawh angin, ka han sawikai tel duh a. Chuvangin, he department hi tangkai tak leh a nihna tur anga hman chhoha, heng Luangmual te, Zuangtui te, Chite tih vel te pawh hi a mamawh tute tak tak, thawk tur sumdawngte tana pek ngei a nih theihna turin he House ah hian vawithum ka sawina a ni tawhin ka hria a. Chuvangin, Minister in min lo chhinchhiah sak sela, hmang tangkai lo tur leh lei chhawng, inzuar chhawng te neih tur ni lovin, khu khu a mamawh tak taktu ten an neih theihna turin siam fel theih niin ka hria a. Tin, he department hnuai atanga ram hmasawna leh tangkaina tura chairman hrang hrang an rawtna hmun - KVI te, ZIDCO te, ZOHANCO te, MAMCO te, MIFCO te hi kan Minister zahawm tak ten an department hnuai a awm a nih avangin, hei hi kan ram tana chenpakawm, tangkaia hman theihna turin ke an enpui a thain ka ring a ni.

Pu Speaker, *National Handloom Development Programme* kha nichinah an rawn sawi tawh a; hemi kaltlanga ka han sawi belh leh duh chu, India ramah hi chuan agriculture hi a lian ber mai a, a dawt ah chuan handloom hi a ni deuh mai a. Chuvangin nikumah pawh kan sorkar hmasa khan SEDP kaltlangin chhungkaw 468 lai kha tanpuina an pe a ni. Tichuan, hei kan market hi sumdawng tam tak, dawr nghak tuten an nghakhlel tawh khawp mai a. Chuvangin, market sak hi enpui a tul a. hmanni pawh khan news ah ka hmuh, kan Minister zahawm tak khan a tlawh tawh a, New Market building sak mek leh Zokhawthar SASCI atanga building sak mek te, border trade lam te, hetiang te pawh

hi uluk lehzuala enpui a ngai hle a ni. Department-in chak zawka hma a lak theihna tur chuan staff an indaih lo hle tih kha ka sawikai tel ve duh hrim hrim a ni.

Kan Minister zahawm tak Prof. Lalnilawma chan, Demand No. 25 - PHE Department hi mihring a thaw thei tawh zawng zawngte kan mamawh enkawltu a ni mai a, tui lam enkawltu an ni a. Department hotute hi an thawk tha khawp mai a, an sincere a. Kan bial chhungah pawh engkim mai relationship tha takin kan tiho a. Hei, ram mamawh angin JJM atangin tui connection 780 pek tawh a ni a, zawh fel tawh khaw 621 a ni a, zawh loh leh tihfel loh tam tak a la awm bawk a. Hei hi department changtuin khawngaihlo chhinchhiah sela, hemi bak mamawh pawh hi, a tel lova kan dam thei lohna a nih avangin, uluk lehzuala vil turin ka chah bawk a ni.

Kan vannei hle mai a; kan bial chhung - Zanlawn te, Serkhan ah te pawh solar pump min siamsak mek a, hei pawh hi a zawh thuai theihna turin min lo ngaihven sak turin ka ngen duh bawk a ni. Lungdai bik hi min lo chhinchhiah sak bawk sela, DG set, current awm loh pawha tui pump theihna tur hi min lo ngaihtuah sak turin ka ngen duh bawk a ni.

Demand No. 32 - Horticulture Department hi ei leh bara kan mamawh tak mai, thei leh thlai, thing leh mau te thlirin kan Minister pawh Taiwan ah te a zuk kal kha. He Department hi a pawimawh khawp mai a, keini thingtlang bial tan pheih chuan kan mamawh khawp mai a. Thlai tharchhuah te thiarna turin link road laih mekah te hian sum tam zawk daha laih chhonzawm a nih theihna turin min lo chhinchhiah sak sela. Tin, kan farmers te'n an mamawh em em mai tui khuahna tur te, individual water tank tur te; tin, tui pipe te kan mamawh hle mai a, bial tinte hian; a bik in thingtlang bialah; chu chu min lo chhinchhiah sak se. Tin, thlai chi tam zawka sem a nih theihna turin min hma min lo ka sak bawk sela a tha awm e.

A tawp berah chuan, Demand No. 38 - Rural Development hi thingtlang bialte chuan 'kan department' kan ti mai a, kan mamawh hi a tam khawp mai a, he department ah hian kan inngat a. Keini bial, Thingdawl-ah BDO kan nei a, a fel khawp mai a, hmasawna tam tak kan hmu a ni tih kha kan sawi lang tel duh a. Hei material component atangte hian thatakin kan thawk a, hmasawna tam tak kan hmu a ni. Tin, thingtlang mite kan inngahna ber mai, *Ni 100 inhlawhna* te hi tha takin a kalpui a, a lawmawm kan ti hle a ni. Ka ngaihpawimawh em em mai chu - Rural Development hnuai kan department hotute ka kawm thin a; Central-ah meeting tura an kal thinah hian buaithlak deuh mai chu, kan department changtu khan lo chhinchhiah sela ka tih chu - RD hi Rural a ni a; Rural ni chiah si lo, Urban nen member kan inkawp nasa viau a ni awm a, Central pawh khuan min hria niin ka hria. Chuvangin, urban leh rural hi chiangkuan takin he kalphung tharah hi chuan, 'ni chu ni, nilo chu ni lo' tia kalpui ngam chi a ni em? Kan tawrh hret dawn pawhin, 'i tuar ngam ang u' tih hi ka rilruah a lang deuh a. Chuvang chuan, rural kan nih chuan, rural angin awm mai ila, urban kan

nih chuan, urban a awm mai hi a tha tih ka sawi tel duh bawk a ni. Chuvangin, urban leh rural kha a nih angin kal thei se.

A tawp bera ka sawi duh chu, kan Minister zahawm tak tak pathumte chan department 9 demand-te kan sawiho a, lawmawm ka ti hle mai a. Hei hi kan Leader hovin, kan Minister changtu pathumte nen, department hotute zawng zawng leh mipuite'n kan mawhphurhna theuh tha takin, mahni ta angin, hmangaih tak leh rinawmna nen, dikna nen enkawl ila kan siamtha mai ang, tih hi a tawpa kan sawi duh chu a ni. Heng kan Minister pathumte demand hrang hrangte hi tha ka ti a, ka pawmpui e. Ka lawm e, Pu Speaker.

HON. SPEAKER : A lawmawm e. Tunah chuan, West Tuipui Bialtu zahawm tak Pi Prova Chakma ilo sawm ang.

PI PROVA CHAKMA : Pu Speaker, ka lawm e. Hei, vawiin nilengin chawhma atang khan kan sawi a, *Year of Consolidation* puan anih takah chuan demand han sawi pawh a inthlahrunawm khawp mai a. Amaherawh chu, sawi loh theih a ni bawk si lova. Mahni bial mamawh hi kan ngah a, kan Minister zahawm tak Pu Vanlalhlana Demand No. 45 - Public Works Department atang hian ka han sawi tan ang a; kawng chhe chungchang atang hian.

Kawng tha hmu tura sawi ka ni a, tunah hian kawng tha buaipui mek a ni bawk a. Ka bial West Tuipui-ah hian kawng la inkalpawh lo khua kan la nei a, Sadailui khua a ni a. Sadailui khua hi Chawngte atanga kal hian km 8 kea kal ngai a ni a, tuilen lai hian lawngin kan kal thin a. Tin, Thanzamasora atang pawhin lawnga kal ngai a ni a. Chumi anih loh chuan Lungrang atang hian kal a ngai a, Lungrang atang pawhin ke ngatin kal a ngai a ni. Ka ngaihtuah a, kum heti zat a liam tawh a; ka hma a MLA lo ni tawhte inthlahdah vang nge, engtinngte tun thlenga inkalpawhna awm lova a lo la awm theih tih hi. Chuvangin, kan Minister zahawm takin he khuaah hian inkalpawh theihna kalkawng hi min laih sak theih chuan a lawmawm ngawt ang. Chu mai bakah, keimahniah hmannah pawh ka sawi tawh a, inkalpawhna, Nunsuri tak ngialah pawh motor a la lut lo a ni. Motor kan lakluh dawn pawhin marboat a kai a ngai a, marboat a vawikhat kai nan ₹2000/- te kan chawi thin a ni. Chutiang khawpa harsa chuan kan la khawsa a ni.

Lei dawhna tur hmannah pawh ka sawi tawh a; Khawthlang Tuipui - Tlabung lehlamah sawn khaw 18 lai kan la awm a. Chumi lei chu min dawh sak thei a nih chuan, kut-hnathawktute'n an thlaiharte man man zawkin an hralh thei ang a, economy lamah pawh hian hma kan sawn ka beisei tlat a ni. Amaherawh chu, sumdawanna tha nei tur chuan transport activity kan neih that a ngai a, activity kan neih that hma loh chu hma kan sawn thei lo a ni. Keini *hnam-hnufual* ti mai ang; (tawng mawi lo nilo sela) constituency hnufual bik kan nih avangin, keimahni avangin Mizoram pumpui pawh hi

hma kan sawn lova, zirna lamah te pawh keimahni bial avangin Mizoram pumpui hnuafual anga lang kha kan ni a. Mizoram pumpui hmasawn tur chuan keini bial lam pawh hi min ngaihsak deuh chu a ngai a ni. Budget hnuafia *Road and Bridge* ah ‘sum dah a tlem’ ka tih chhan pawh kan bial lam ka ngaihtuah vang a ni.

Demand No. 39 - Power & Electricity Department-ah hian keini kan bial hi sawi loh theih loh a ni a, Tlabung bial hi chu *red-zone*-a dah a ni a. hei hi 33 kV line-a min upgrade sak theih chuan a lawmawm ngawt ang. Amaherawh chu, fura ruah a sur hlekin kan thim zel a, current kan neih loh chuan naupangin lehkha an zir thei tawh lova. Chu chang a ni lova; khaw tam takah current kan la nei lova, kan Minister zahawm takin min lo chhinchhiah sak se ka duh a, chung khuate chu – Hmundo, Tlabung Dinthar, Gurusora, Dursuri leh Saisen te an ni a. Heng khuaah te hian electricity kan la nei loh avangin school school naupangte pawhin hma an sawn thei lova; ‘*Educationally Backward Block*’ tiin kan bial chu gazette ah pawh a lo lang tawh thin a. Chuvangin, ka bialah te khuan electricity kan neih theih dan tur kawngah hma min laksak chuan a lawmawm khawp ang.

Minister zahawm tak Prof. Lalnilawma Demand No. 25 - PHE ah pawh hian chutiang tho chu a ni a; tui connection la neilohna khua tam tak a la awm a; electricity nei lo khua apiang khan PHE tui connection kan nei lo kha a ni mai a. Hei hi ‘tunhma khan engvanga ti thei lo nge an nih’ kan tih chuan, tunhma khan heng khuate hi unauthorized village a puan an nih hlawm avangin khang facilities te kha an nei thei lova. Tun sorkarah hian, (a ni tak ka theihngihl a) khatah khan authorized-a puan an ni a, khang facilities kha an neih theih tawh a. Chuvangin, PHE connection te pawh hi nei ve tawh se a lawmawm ngawt ang.

Demand No. 38 - Rural Development ah hian, sorkar hmasa MNF sorkar laia RD Block kan han hmuh kha kan lawm em em a. Amaherawhchu, eng vak mah hna hi an la thawk thei lova, hna te pawh eng vak mah an sem hman loh avang khan RD Block hnuafiah hian tunah hian, ka hriatsual loh chuan budget heti zat hi an lo dah a. Khaw tamtakah hian community hall te hi an nei lova, campaign a kan han kal te hian community hall neih loh avangin field ah te vawi tamtak kan kalkhawm thin a ni. Tichuan, Community Hall nei lo tam tak kan bialah hian an awm a, chungte chu tan chuan min ngaihtuah sak theih chuan a lawmawm ngawt ang.

Thil pakhat ka sawi hmah chu, Pu F. Rodinglana chan Commerce & Industries Deptt. ah hian (niminah pawh ka sawi tawh a) cold storage hi kan mamawh khawp mai a, kut-hnathawktute’n an thlai tharchhuahte dahkhawmna kan mamawh takzet a. Chutianga dah thatna a awm loh avangin, kut-hnathawktute tharchhuah an thlaiharte a lo chhe hman thin a. Chuvang chuan, cold storage hi min dah sak ve theih chuan a lawmawm ngawt hle ang. Ka lawm e.

HON. SPEAKER : A lawmawm e. Aizawl South-III Bialtu, Member zahawm tak Pi Baryl Vanneihsangi ilo sawm ang.

PI BARYL VANNEIHSANGI: Pu Speaker, ka lawm e. Hei vawiinah demand sawihona hun tha tak kan nei thei hi a mimal takin ka lo nghahhlelh em em a ni a. Ka hriat sual loh chuan tukina starred Question, bial thil ka zawh bak kha chu kan phak ang tawka kan hriatte, kan lo zir ve leh kan lo chhiar ve ram pum thil kha a ni deuh zel a. Chuvang chuan, he minute 10 chhung hlu tak, tawi tak si hi chu bial chhung tana hman tangkai leh hlan ka duh a.

Tichuan, a point-ah ka lut nghal char char ang a. Demand No. 25 - PHE hi kan insawrbing deuh ang a. Hei, kan bialah hian tui harsatna kan nei tam khawp mai a. Amaherawh chu, harsatna a awm rual hian a solution hi a awm ve zel bawk a. Helaiyah hian, ‘*tumna a awm chuan kawng a awm*’ tih te pawh kha a tak ram a chang thei niin ka hria a. A problem kan hriat tawh avangin, a solution lam hi han sawi ka duh a.

Changte Lui, Sumsuih bulah sawn a awm a, sawta tang sawn pump turin term hmasa lamah pawh khan ruahmanna a awm tawh a. Amaherawhchu, sum leh pai indaihlohna avang te leh eng emaw avangin tihhlawhtlin loh zingah a tel hlauh mai a, a pawh kan ti hle a. Hei hi tun sorkarah hi chuan thar thawh theih ni sela, tihhlawhtlin ngei theih ni se kan duh tak zet zet a. A chhan chu Sumsuih atanga pump chhoh hian a khaw thenawm Thiak te, Maubuang te, Lungsai te a va chawm thei dawn a, hei hi Phase-I ah a ni a. Tichuan Phase-II ah chuan Hmuifang lamah hian a pump chhoh theih a, Hmuifang tuizem atang hian a khaw thenawm lam Chamring, Lamchhip leh Chawilung te gravity-in an pe ve leh thei dawn a ni. Chu chuan khua tena tui lama harsatna an neihte nasa takin a sukiang dawn tih a chiang reng mai a. Chuvang chuan, he Changte Lui pump hi ngen ngawl takin a hmasa berah ka’n sawi duh ni sela.

Tichuan, Sumsuih khawchhung bik sawi ka duh a, hetah hian kan Minister te’n min lo hriatpui sela; Middle School bulah khian *thir tanky* kan ti mai a, tuizem a niang chu; tui an dahkhawlna a ni a. Chu chu a upa tawh a, a chhe tawh em em mai a, hei lo hi hman tur dang an nei chuang bawk si lova. Tin, Middle School bula awm anih avang hian zirlai naupang leh zirtirtute bakah vantlang mipui, nu leh pa leh vei vakte tan hian a him lova. Hun reilote hnua chhe mai thei dinhmuna dingte pawh a nih avangin, hei hi khawngaih takin department ten min lo hriat sak sela. Han vaw thiat ngawt dawn ila, a tui dahkhawlna tur dang a awm chuang bawk si lova, tihngaihna a vang hle a. A concern department te, Minister ten khawngaih takin a rang lamin min ngaihtuhsak se kan ti a. Heng pawh hi ngel ngawl takin ka han sawi leh a ni.

Tichuan, nichinah khan ka sawi a, kan official-te hian an hrechiang khawp mai a, Maubuang hi (tawng khawlo ni suh se) ‘tui lamah hian an harsain an khawro em em mai’ tih hi official te paw’n an pha lo ang a. Chuvang chuan, Maubuang-ah hian tan kan

lak a ngai khawp mai a. An khaw bul lawkah sawn Tuirivang Lui hi pump mai tur a awm a. Tin, tui pump kan sawi hian kan rilrua lo awm chu, ‘a tui kha pump theih turin a hnar a that awk em’ tih te pawh kha a ni a. Tuna ka rawn sawi bik hi chu zir te pawh an lo zir chian tawh, proposal concept te pawh an lo siam deuh tawh te pawh anih hlawn avangin hei hi chu pump theih nia kan ngaih te a ni a. Chuvangin, vawiinniah hian a lui pump bika kha kan han uar deuh a ni a. He Tuirivang hi pump theih a nih chuan, Maubuang te chuan hniang hnar zawkin, harsatna neilovin leh khaw thenawmin an lo pe lo anih pawha buaina nei lova tui an neih theihna tur anih avangin hei pawh hi Minister leh department lam te pawhin min ngaih pawimawh sak se ka duh hle a ni.

Tichuan, Samlukhai lam hi kan sawi ang a. Samlukhai leh Sialsuk hi khaw lian tak mai an ni a, a cheng an thahnem em em a. Tui hi combine scheme-a pek an la nih avang hian tunah in a lo thang a, mi an lo pung zel a, hetah hian tui an indaihlohna, tui an harsatna a pung nasa khawp mai a. Hei hi a tih ziaawm theihna tur chuan, Samlukhai bulah hianin Tuivarung Lui pump tur a awm ve leh thung a. Tin, Sialsuk-ah hian Pawi Lui leh ‘khamhnuai infinna lui’ kan tiin ka hria a; chungte pawh chu Minister-in khawngaih takin min lo hriatsak sela, a tul angin hma min lak sak se kan duh tak zet zet a. Tui hi chu kan hria a, a lohva kan awm theihloh anih avangin kan ngaih pawimawh zingah a tel lo theilo a ni.

Tin, khaw hrang hrangah hian JJM Scheme kan bial chhungah hian kalpui a ni a. Chungah pawh chuan kan nghalhleh deuh nge ni ka hre chiah lova, a rei kan ti tawh khawp mai a. Hengah te pawh hian khawngaihin a thawktu lam ten tan han la leh deuh sela, kan mamawhna te min hriatsak sela. A hmanhmawh theiha a zawh hma theih chuan, a zovin han ti zung zung thei sela, ‘a taka chhawr kan chak tawh a ni’ tih lai kha kan sawi lang leh duh a ni.

Tin, hei, kum 2024-ah kan awm tawh a, heti chung hian tui connection neilo, mahni ina hman tur herh haw theilo tam tak hi kan la awm a. Heng te pawh hi keimahni lam, mipui lamin kan tih ve tur a awm tih chu kan hria a. Chutih rual chuan, department te nan lungrualin, tangrualin theih tawpa hma lak hi kan duh a. Tui connection hi tun sorkarah hi chuan nei vek hi ni tawh se kan duh tak zet zet a ni. Chuvang chuan, hei pawh hi a concern minister-in min lo ngaih pawimawh sak se kan duh tak zet zet a.

Demand No. 32 leh 38 hi ka’n sawi pawlh lawk mai ang a, Horticulture leh Rural Development hi. Hetah hian Lungleng-I ah khuan ‘Hliappui phaizawl’ kan tih mai ram tha deuh hi a awm a. Amaherawh chu, motor kawng hi a la tlang loh avangin km 1 leh a chanve vel laih a la ngai a; chumi hnuah chuan a lui tui hi a lak theih a. Hei hi chhungkaw 200 velin hnianghnar tak an hman theih tur leh Aizawl lamah pawh thlai thar hniang hnar zawka an rawn pek theihna tur kawng pawimawh leh lui pawimawh tak mai anih avangin, RD atangin a ni emaw, Horticulture atangin a ni emaw a theihna atanga a rang lama min tihhlawhtlin sak turin ka han dilin ka han demand a ni.

Tichuan, Demand No. 45-na hian ka ngah khawp mai a. Kan bial hi kan hriat angin Aizawl District a ni a, khaw tam takin in rawn pal tlang thin a. Han tlan thuak hi chuan, a tha thuak a; amaherawh chu, han tlan chet cheta han en chian hian, a thalo lai leh siam ngai lai hi a tam em em mai a. Hetah pheih hi chuan widening leh SMBT kan tih soiling, metalling, black-topping kan tih hi kan rawn dah a, chumi hnuah widening leh PCC flooring te kan dah hrang leh a. Amaherawh chu, ka hun ka en hian ka sawi zo vek hman dawn lovin ka hria a, a zualpui chauh kan sawi lang mai ang e. Lungtlan Tlang, Aibawk approach road pawh saw a pawimawh em em a, tin, Phulpui hi SMBT mamawh ber khua an niin ka hria a. Hengte pawh hi khawngaih takin department leh Minister ten min lo hriat sak sela, a rang lamin tun sorkar chung kum hnih khatah hian tihhlawhtlin theih ni se kan duh tak zet zet a ni.

Tin, Stall Veng - Leirekawn Road, Sateek pawh hi widening tih a ni a, SMBT han tiha chhawr naawm tak tur a ni a. Sawlai te saw kawng pawimawh lutuk a nih avangin hei pawh hi khawngaih takin a rang lama hma lak theih ni se a duhawm hle a. Tin, Muallungthu Playground approach road - ATL Road tih te pawh hi a ni a. Hei hi ka sawifiah tawh lo mai ang a, tikhan min lo chhinchhiah sak mai sela. Tin, widening and PCC flooring ah hianin approach road to Hualngohmun thlanmual, hei hi Samtlang main road atangin a ni ve thung a. Heng te pawh hi ka hriatsual loh chuan concept paper a awm tawh mai thei a. Minister hnen a thleng a nih chuan khawngaih takin a ngaih pawimawh zingah lo telh se a duhawm hle a ni.

Tin, chutiang bawkin Falkawn Community Hall - ATL Road, hei hi via. Primary School road a ni a. Tin, Chawilung - Baktawng hi a pawimawh khawp mai a, km 16 vel hi NABARD suma laih tawh a ni a. Amaherawh chu, a taka hmang tangkai tur chuan metalling te la tiha la buaipui fe kha a ngai mai a; Minister hnenah pawh hianin kan thlen tawh nghe nghein ka hria a. Hei hi khawngaih takin vawiinah hian kan demand nawn leh ang a, a pawimawh baw si a. Hei, Baktawng te chu kan hria a. Mizo kut-themthiam tak tak tena an siam chhuahte khaw hrang hrangah an rawn deliver thin a. Chung kawnga tana pawimawh chu a ni a; furah pheih chuan a zawh hleih theih thin loh a ni. Chuvangin, he kawng hi ngaih pawimawh zingah tel se kan duh hle a ni.

Tin, kan bial chhunga Lungsei hi member engzatin nge thleng tawh ka hre chiah lova. Kal a har em em a, furah pheih chuan kal hleih theih a ni lova, four-wheel lo chuan luh theih te pawh a ni lova. Chutiang chu kan dinhmun a la ni a. Hei hi tunah hian metre 60 vel hi chu kutthlak tura ruahmanna awm niin ka hria a, a bak zawng hi chu ruahmanna a awm lem lova. Hei pawh hi Minister hnen kan thlen ang a, khawngaih takin min enzui sak se kan duh tak zet zet a ni.

Tichuan, a wholesale zawngin kan sawi tawh mai ang a. Demand No. 39 - Power & Electricity hi. Hei, Saikhamakawn hi veng lian tak mai a ni a. Amaherawhchu, transformer hian a zo lo nge ni, an thim zing em em mai a. Theih tawp chuan hma

kan la thin a, a nachhawkna ang te chu reilote te kan hmu a, mahse a solution tak tak kan hmu ngai lo.

Tin, zau hrang hrangah sawn eng hi lut se kan duh tak zet zet a. Ran vulhtute'n an lo chhawr theih tur leh an eizawnaa hma an sawnpui theih tur te pawh a niin ka hria a. Chuvang chuan, khawngaih takin P&E changtu minister-in min lo ngaih pawimawh sak sela. Tin, Melriat ramchhungah pawh 132 kV line Sub-Station ang bun a ni a. Saw te pawh saw a khaw bula mite tana hman ve theih, pawh ve theih ni se chuan a tangkai dawn a. Mualkawi Zau te pawh han sawi zau a han sawi chian te pawh a chakawm khawp mai. Amaherawh chu, an mamawh kha a inan vek avangin, tikhan ka sawi zingah tel mai ta se la a tha awm e.

Aw le, eng pawh ni se, vawiinah hian kan sawi seng lova. Amaherawh chu, a taka thawh tur a tam a ni tih kha a langin ka hria a. Hei, kan demand te kan sawi tliar tliar a, a changtu Minister te phur pawh a rit viauin a lang a. Nimahsela, bial mipuite aiawh tura awm kan nih angin Minister-te tha tichak turin kan bial tan kan awm tih hi min hriatsak se la. Min kan mai lovin, a tul ang angah min rawn pawt telin, min rawn hriattir thin se la. Tiang chuan kan tangruang a. Mi pakhat tana phurrit ni lovin, kan zavaia thawh rah hi kan hmu ngei ang tih ka ring a.

Tichuan, a tawpna tak tak atan, Pu Speaker, ngenngawl takin ka'n sawi duh chu, Aizawl-ah leh Mizoram-ah tlangval eng angin nge; an that leh that loh pawh bel Chiang ve hman lovin tui pump, lui pump lam kan buaipui a ni a; thil dang zawng zawng aiin kan thlang ve tawh si a. Chuvang chuan, kawppui tur ro bawk, bial chung ro bawk nih kha chu a zialo lam deuh dawnin ka hria a. Khawngaih takin, kan Minister te pawhin thalai awmchhun tiin min han duat deuh ta se la tih kha ngenngawl takin, member dangte ngen ve theih lovin ka'n ngen ni teh se. Aw le, hun tha min pek avangin ka lawm e.

HON. SPEAKER : A lawmawm e. Minister-te khan an duat deuh ngei ang. Tunah chuan Siaha Bialtu, Member zahawm tak Dr. K. Beichhua ilo sawm ang.

DR. K. BEICHHUA : Pu Speaker, ka lawm e. Vawiinah kan minister pathumte demand, department pawimawh tak tak kan sawiho a. Pu Speaker, kan sorkar hi, 'sorkar tha' han tih tur emaw, 'sorkar chhia' han tih tur pawhin thla thum em pawh kan la kal lova. 'Chumi, khami chu an thawk tha' han tih tur a awm lova, an thawk chhia tih tur pawh a la awm chuang lova. Pathianin damna min pe ang a, kum hnih-thum ah chuan kan sawi ve teuh turah ngai ta ila. Vawiina ka sawi duh chu point te tein han sawi ta ila.

Pu Speaker, mihring nunah hian mimal kan ni emaw, chhungkua kan ni emaw, khawtlang a ni emaw, State a ni emaw Nation a ni emaw, nimin leh vawiin dinhmun hi

kan in compare thin a, vawiin leh naktuk dinhmun hi kan compare leh thin a ni. Hma kan sawn nge sawn lo tih miin min teh dan leh keimahni pawhin kan in judge dan a ni thin a ni. Chutiang chiah chuan vawiinah hian he ka Budget Estimate hi Zoram mipui hian an lo thlir ang a. A hmasa berah chuan, nikum lam leh kumina kan budget hi an compare dawn a, chutah chuan thutlukna kan siam turah ngai ta ila.

Chutiang chuan Demand No. 12 - Parliamentary Affairs Department hi ti hian han en ta ila. 2023-24-ah khan ₹106.86 lakh a ni a, 2024-25 Budget Estimate-ah ₹103.70 lakh a ni leh a; a tlemna hi ₹3.16 lakh a ni. Hei chu decrease chhia ah ngai lem lo ila, ‘a awm e’ a tih theihin ka hria a. Demand No. 42 - Transport Department en leh ta i la. 2023-24-ah hian ₹6459.98 lakh a ni ta a, 2024-25-ah a tla hniam dawrh a, ₹4473.93 lakh a ni leh ta a; a tlemna hi ₹1986.05 lakh lawih a ni. Hei hian ngaihtuahna thui tak min siamsak a, ‘Budget Estimate-ah pawh hian kan in consolidate ta nge’ tih ngaihtuahna ka nei a ni.

Chutah chuan, State danga Transport Department te ngaihtuah ta ila; an revenue earning department-ah hian an hmang deuh tlangpui a ni. Term kal taah khan PSU/PAC angin Karnataka-ah kan zuk kal a, chutah chuan an bus service atang ringawt khuan revenue 12% kha State-in an hmu a ni. Chuti a nih si chuan, keini hian vawiina kan dinhmun ngaihtuah hian, tunah chuan National Highway te pawh a tha chho dawn a. Hmannia bus service zat kan han hriat kha chu, State pakhat tan khatiang zat lek bus sorkarin a service tir kha a uiawm ka ti a. Chuvang chuan, heng kan kalkawng siam mekte hi a that chhoh chuan, bus service te hi titam ta ila, revenue te pawh hi a tam phah deuh dawn a ni. Chutih rual rual chuan, changtu Minister-in min react tura ka duh chu, ‘kum kal taah khan Transport atangin revenue engzat nge kan chhun luh’ tih leh, ‘kumin Budget Estimate-ah hian eng zat nge kan target’ tihte hi min react turin a changtu Minister kha ka request ni ta se.

Demand No. 45 - Public Works Department-ah hian, kum 2023-24 ah khan ₹133820.00 lakh a ni ta a. 2024-25-ah hian ₹ 73271.22 lakh a ni leh a; ₹60548.8 lakh lawihin tla hniam a ni. Kan va han in consolidate tak em, ka ti a ni. Member-te thusawi zawng zawngah khan kan biala kawng leh thil dang siam hliir kha a ni a; a changtu Minister tan hian a va han luhaithlak dawn tak em tih ngaihtuahna min neihtir a. Chuvang chuan, hei hi kan hotute’n formula tha tak nen an ti ngei chu a ni awm si a; engatinge heti em ema a tlak hniam aw ka ti a ni, Pu Speaker.

Tin, Demand No. 18 - Printing & Stationery ah hian, 2023-24-ah khan ₹1513.11 lakh a ni a; 2024-25 Budget Estimate-ah hian ₹1119.72 lakh a nil eh a. A hniamna hi ₹393.39 lakh a ni a, 2023-24 aiin a hniam ta daih a ni. Hei pawh hi engnge a chhan ni ang aw, ka ti a. Tin, Printing & Stationery hi kan hman tangkai thiam chuan State tan hian, austerity measures lak nan phei chuan a tangkai lutuk a ni.

Member zahawm tak Pu Ngunlianchunga a minister lai khan Printing & Stationery hi a chang a, Vety a chang bawk a, Disaster Management a chang bawk a. Vety leh Disaster Management khan Printing & Stationery kha an dawr mang tlat lo a ni. Chuvang chuan, department zawng zawng hian Printing & Stationery hi hmang tangkai ila. Tin, Printing & Stationery Department pawh hi dawr tlak leh department dang tan pawh approach tlaka kan thum that hi a pawimawh ka ti a. Chu chuan austerity measures kan laknaah hian kan tangkaipui viau dawn a ni tih hi ka hmuh dan a ni.

Pu Speaker, Demand No. 39 - Power & Electricity Department hi member tam takin kan biala kan mamawh tamtak kan rawn sawi a. Mahse, hetah pawh hian cheng tam takin a tlahniam a ni. 2023-2024-ah khan ₹90,958.73 lakhs ni a, 2024-2025-ah ₹94,351.96 lakhs ah kan tla thla leh a; a hniamna hi ₹3,393.23 lakhs daih a ni. Lakh 3000 chuanga han tlak hniam kha, ka hriatthiam tawh loh vang nge. Electric chhit man lah ‘kan tipung lovang’ tih a ni bawh si. Chutih laiin, Member zahawm tak Pu Ngunlianchunga’n, “Lunglei piaah chu kan thim reng mai, fur lai chauh pawh ni lovin; a eng hun leh a thim hun hi inzat emaw tih tur a ni” a tih ang khan....

HON. SPEAKER : Khawngaihni, House khan ‘dar 5 ah chawl ila’ a ti a, hei dar 5 chu a lo ri a; Member hi sawi laklawh khawp mai a, kan sawi zawh tir law law dawn em ni ang? (**Pu Lalrintluanga Sailo:** House Leader leh Leader of Opposition te chaw eikhama sawi turah ngai ila a tha mai lo maw?) A tha kan tih chuan, a tha e. Aw le, dar 5:30 PM target mai ang u aw. Aw le, sawi zawm rawh le.)

DR. K. BEICHHUA : Pu Speaker, Ka lawm e. Chutiang chuan kan bial lam saw current kan nei chhe em em mai a, ‘sawlamah hma min lo lak sak rawh’ tiin han ngen ve dawn ila, budget estimate-ah hian kan in consolidate ta daih mai bawh si a; ngen ngam chi pawh a ni dawn em maw ni, tih kha ka rilruah a awm a. Tichuan, electric bill hi tihpun tumna a awm em tih kha nakinah a changtu minister-in min lo react se tha ka ti a. Nakinah ‘JERC hi kan control hnuaiah awm lo a ni’ kan tih leh ka hlauh si ang a, tih te rirlu ah chuan a awm a.

Pu Speaker, Demand No. 40 - Commerce & Industries Department ah hian, 2023-2024 ah khan nuai 6869.62 a ni a, 2024-2025 budget estimate-ah nuai 6044.11 daihin a tla hniam a ni. Tichuan, a changtu minister-in min lo react se ka tih point-a chu - Tun sorkar kan kal zelna turah hian border fencing pawh a ri a ri a, hmalam pan zel turah inngai ta ila. International border-a awm kan ni a, *border haat* kan tih te, *custom hiring* kan tih te, *border trade* kan tih angte hi engzat nge Mizoram-ah hian awm? Chutiang nei thei tur chuan hmalakna kan nei em? Khawi hmunah te nge? Nakinah min lo react thei se ka lawm hle ang.

Pu Speaker, Demand No. 25 - Public Health Engineering Department pawh hi en leh ta ila, a tlakhniamna hi a tam viau tho mai a. 2023-2024 ah nuai 65174.40; 2024-2025 ah nuai 28760.16, a tlakhniamna hi nuai 36414.24 lain a tlahniam a ni.

Manganthlak khawpin Siaha tui pump khawl saw a chhe hlauh mai a. ‘Min lo siam sak rawh’ ti dawn ila, budget estimate hi ka’n en a, ka inthlahrung a. Tunah sawn tui tamin kan tam a; khawngaih takin a changtu minister khan sawlai saw engtikah nge hma min lo laksak theih ang?

Demand No. 32 - Horticulture Department pawh hi 2023-2024-ah khan nuai 13846.10 a ni a, 2024-2025 budget estimate-ah hian nuai 12,283.85-in a tlahniam a, a tlakhniamna hi nuai 1562.25 a ni; a tlahniam khawp mai. Hei hi sorkar hian engtinngge kan kalpui dawn? A bik takin Horticulture hi hand-holding policy kan neih turah hian hand-holder tura kan ngaih a ni si a, a pawimawh riau a. Hmunphiah te, aieng, sawhthing te, hmarcha te Horticulture hnuai a wem vek a ni si a, heti zata decrease hi; eng anga hmalak nge kan tum? A changtu minister-in min hrilhfiah se a pawimawh hlein ka hria.

Demand No. 38 - Rural Development Department pawh hi chuti tho; 2023-2024 ah nuai 58,759.81, 2024-2025-ah nuai 45,651.65; a tlakhniamna hi nuai 13,108.16 lai niin, 2023-2024 aini 2024-2025 hi a tlahniam a ni. Pu Speaker, RD Department hi thingtlang lamin kan nghahfak, kan inngahna ni bawk si a; department pawimawh tak keini ang rethei te te kan inngahna kan ti lo thei lova. Hetianga kan budget estimate a lo hniam ta viau mai hi, kan hotute hian eng rilruin nge hei hi an siam tih kan hrethiam tawk lo nge; a department changtu minister ngeiin min hrilhfiah se a thain ka hria a.

Pu Speaker, sum hi a tam leh a tlem chu thuhran ni se, a hman dan hi a pawimawh hle a. Tun sorkar-ah hian corruption te pawh theih tawpin kan do dawn a, chumi avanga pawisa a tlem deuh hlek pawhin, thil ropui tak tak tithei turin confidence nei takin ke kan pen te pawh an nih ka ring a. Vawiina kan demand-te hi Pu Speaker, ‘a tha; a tha lo’ tia comment pe lovin, ka pawmpui e. Pu Speaker, ka lawm e.

HON. SPEAKER : Tunah chuan Dampa Bialtu, Member zahawm tak Pu Lalrintluanga Sailo ilo sawm ang.

PU LALRINTLUANGA SAILO: Aw le. Pu Speaker, demand-a ka luh hmian thil pakhat han tarlan lawk duh, ngaih pawimawh deuh mai waviinah ka nei a. Members sawi tawh zawng zawngte la sawi hauh loh, a bik takin Chalfilh leh Kolasib MLA Constituency aiawhte tan han sawi lan ka duh a, i remtihain.

India-in democracy kan practice-ah hian Speaker leh Deputy Speaker-te hian an bial aiawh an nihna lantira demand sawina hunah sawina chance in nei ve lo hi paw ka ti hle mai a. Chuvang chuan, a bik takin waviina minister pathumte demand kan sawiah

khan, official-ten heng bial pahnihte hi kan en bik deuh a that kan ring a. Pu Speaker, i haw lutuk lo turah ka ngai a; he bial pahnih - Chalfilh leh Kolasib bialah hian demand sawi tur tam tak in neih ka ring a ni. Chu vang chuan, heng department-te hmalakna tur hrang hrang, members ten kan han sawi ang, in rilrua awm ve veka kha a bik takin lo earmark deuh hlek sela a tha awm e; chu chu ka han sawi duh a. Demand sawipuitu neih loh hi a buaithlak hlein ka hria a; chu chu Pu Speaker, i remtihain ka han sawi hmasa duh a ni.

Aw le, vawiinniah hian minister pathumte demands - department pakua kan han sawi a ni a. A hmasa bera ka han sawi duh chu, members ten an sawi vak loh, Demand No. 12 - Parliamentary Affairs hi a ni a. Budget-ah hian ₹137 lakhs (nuai 137) dah a ni a. Hei hi kan House Leader zahawm tak pawhin min lo hriatpui se ka duh a; a tamlo hlein ka hria a ni. A chhan chu, hetah hian enkawl bik, Govt. Dy. Chief Whip a awm a, hei hi constitutional body a ni a. Minister ang chiahin enkawl an ni a, pay, discretionary etc. inang thlap a ni. Kan hunlai khan kum 5 chhung ka awm a, West Bengal leh UP-ah ka zuk zin a; Cabinet-a enkawl an ni. Chuvang chuan, a hlawh pumpui pawh pek vek an ni a, staff, driver etc. te kha a ni a. Inthlan zawh khan kei pawh ka hriselna a thatloh avangin ka in checkup a, a nuai tel ka inenkawlna bill pawh min la pe thei lova. Parliamentary Affairs hi a pawimawh a. Session kan neih hian a bik takin Pu Speaker, i staff-te, Assembly ho tanpuitu atana pawimawh tak chu Parliamentary Affairs Deptt. leh Printing & Stationery-te a ni zual a ni. Midang Home etc. lam te chu thuhnan ni sela; an hah em em mai a, chuvang chuan, an enkawla hi kan hriatpui a thain ka hria a. Helaiah hian kan House Leader zahawm tak pawh a thilphal deuh ka han ngen sak a ni.

Tin, Govt. Dy. Chief Whip power & functions pawh hi kan hriatpui a thain ka hria a. Hei, sorkar lehkha pawimawh ka lo en ve thin a, ka hunlai khan ka awih miah lova, kan official-te hian 'Copy to ah hian Minister of State rual hian copy an pe tel ngei ngei tur a ni' tih hi he House zahawm takah hian ka sawi duh a. A nachang hrelo department kan nei fo mai hi a tha lo ka ti hle a ni. Chuvang chuan, an ni hi kawng engkimah kan mi pawimawh te an ni a, kan Dy. Chief Whip a ni a. He House-ah pawh hlawh chungchang kan sawi khan, Chief Whip-a chu a bika kan inruat a nih loh chuan Chief Minister-in a keng kawh tlang nghal a; chutah a hlawh leh engkima kha tih a ni a. A dawtah chuan, Dy. Govt. Chief Whip-a kha a hlawh pawh head hran ngata pek a ni tih kha kan hriat a thain ka hria.

A dawtah chuan, Demand No. 2 - Commerce & Industries chungchang hi, hei hi kan ram hnuk tak tak niin ka hria a. Border trade-ah India-Bangladesh inremnaah kan nei a; Ni 22 April, 2022 khan Bangladesh Commerce Minister, (senior Minister) Tipu Munshi nen, ani Aizawl-ah zan khat riakin a lo chho a, khulai bawrah *haat* kan neihna hmun tur te kan en a. India ram (Mizoram) piahlahmah Bangladesh chhungah pawh kan lut a. Chungah chuan a bik takin India ram atang hian border trade atana Kawrpuichhuah, a main centre bakah hian Tuipuibari, keimahni side-ah Silsury, Marpara, Nunsuri a awm

a; Bangladesh side-ah hian Zopui, Mahmuam, Lawaghar leh Nunsuri opposite-a an hman ve tur hi an la propose chiah lova.

Chutiang chuan, Pu Speaker, i remtihain, chumi Minister pahnihte kal chuan joint statement pawh an siam a; Pu Speaker, hei hi House-ah copy atan ka pe duh nghe nghe a; Minister-pahnihte joint press statement a ni a, min lo phalsak turin ka ngen a. Hei hi a pawimawh hle mai a, India chang ni lo, Bangladesh side-ah pawh an phur em em mai a. Vawiinnia kan thlathar tih pawh hi Silchar kal tlanga kan hralh ai mahin helai border haat kan neih hi kan implement hunah chuan nasa takin kan sum lakluh hi a pung dawn a ni. Tin, Pu Munshi hian Bangladesh tana pawimawh ber nia a hriat chu - lung (stone) a ni. An ni ramah khuan lung an nei ve lova; hei, kei pawh kum 12 ngawt ka zuk awm ve a. Chutah chuan kawng an siam pawhin brick an hmang a ni; an demand san ber an sawi nghal chu, *lung* a ni a.

Ka bial chhung Phuldungsei chin chhim lam zawng zawng khu lung hmun a ni a, thlawhha pawh kan la hleihei lo a ni a. Chungah chuan inkalpawhna kawng an rawn nei tha tawh em em a, ka bial khaw tawp ber Silsury bulah Khawthlang Tuipui a luang a, a piah chiah Bangladesh-ah khuan two-lane road blacktopping tha takin kawng a tlang a. Kum 2021-a in la awm miah lohnaah khuan tunah in 77 sumdawng an lo awm tawh a, black-topping a lo thleng vek tawh a. Keini lama khu, kan House Leader hian min lo hriatpui se ka duh lai a awm a, min ngaihpawimawh ka duh khawp mai. Pukzing - Silsuri (via Hnahva) khu km 18 lek a ni a, kan awm chhung zawng khan tunhma atangin PMGSY-ah kan ti thin a. Amaherawhchu, khulaiah khuan harstana kan nei a, forest clearance a awm hlei thei lova. Amaherawhchu, Central hmalaknain border fencing road a kal a, a grade chu tha chiah lo mahse, heavy tak tak, motor ke 12-14 nei thlengin a lut thla a. A grade khu tlema tih danglamin, petrol pump-te pawh an dah vek a khulai company khuan. Kan harsatna ber chu, khami inkalpawhna km 18 kha a ni mai a; hei hi vawin budget demand kan sawiah hian a pawimawh ema ka sawi lang duh a. Helai hi kuthnathawktute tan pawimawh tak a ni.

Tin, Pu Speaker, kan members tam tak khan powerloom kha an ngai pawimawh hle mai a. Amaherawhchu, i huatthu anih loh chuan, handloom hi kalpui tho siin industry-ah hian powerloom kan kalpui a hun tawhin ka hria, tunlai technology sang zelah hian. Hei, vawiinnia Zothuam, members tam zawkina kan hakte pawh, kan House Leader thlengin powerloom kan ha tlat a ni. Handloom ringawt hi chu a khawih vel a lo hrehawm a, hei hi demand a sang si a; a production hi Mizoram siam a ni lova. Vai hovin kan technology kha an la a, to tak takin kan lo lei leh tho anih chuan, Industry lam hian powerloom kan en a thain ka hria a. Chu chu kan Commerce & Industries Minister khan min lo hriatpui se ka duh a.

Demand No. 3 - Rural development hi Pu Speaker, ka sawi duh bawk a. Tun maiah khan Google-ah ka han en a, kan RD Block neihte hi kan tihpun a hun tawh em le, ka ti

a. Northeast state-ah hian a nei tlem ber kan ni a; Assam hian 290 an nei a, Meghalaya hian 47, Manipur-in 33, Nagaland-in 74, Tripura-in 58, Arunachal-in 40; chutiingin keini aia state te Sikkim pawhin 40 ngawt a nei a ni. Kein hian 28 vel kan nei a, hei hi tuna kan inenkawl dan kalphungah chuan RD Block through-a development tam tak hi Central atanga lo kalte a nih avangin, kan RD Minister thar pawh hi mithiam a ni a, Pu Speaker, min lo hrethiam lawk ula. Ka han ngen duh a, ‘hmalak dan a awm em’ tih te ka sawi duh a.

Tin, PMKSY hi Deptt. of Land Resources, Ministry of Rural Development, Govt. of India-ina a funding a ni a. Hetah hian guidelines fel tak kan nei a, *Guidelines for New Generation Watershed Development Project*, hetah hian tuna kan kalphungah hian tlemin a enkawltu lo lamah party workers kan induhsak lek lek em aw, tih zawhna ka nei a. Watershed Committee hi a thlana thlan ngat, VC pawhin a thut chuang lova, Watershed Committee-ina an thlan leader a awm a, chumi kaltlang chuan heng hi pek thin a ni. Helai hi kan Minister zahawm tak khan min han pui se ka duh deuh a ni.

Demand No. 25 - Public Health hi ka sawi duh a. Ka bial khaw 33-ah hian JJM hi official kaltlangin kan introduce vek a. Amaherawhchu, Pu Speaker, tihsual kan neih chu - JJM scheme Pukzing Vengthar leh Hruiduk-ah hian tih sual a lo awm a. PWD kawng thlang zawng zawngin tunah khuan a tui an herh haw vek tawh a kawng chhakin an hmu thei lova. Chu chu inthlan hma khan NABARD atanga project siam turin EE te kan inhrilh a; chu chu min lo hriatsak sela ka duh khawp mai. Kawng chhak in an la ve thei lo a ni.

Tin, Demand No. 39 - Power & Electricity hi member dangte sawi ang khan, kan bial pawh kan hausa khawp mai a. Hetah hian 132 kV leh 11 kV hi West Phaileng hetah Bairabi atanga pawh a ni a. Hei hi Environment Forest hovin riverine reserved area a nih avangin min khing kha a ni a. Amaherawhchu, High Court-ah kan hneh tawh a, hei hi chak taka hma la turin kan Minister zahawm tak hi ka ngen duh a. Heta line kala hi Mizoram a line thui ber a ni a, km 182 ngawta thui a ni a, border fencing road nen a pe vek a. Hei hi NEEPCO power-grid lam official-te pawh ka ko thin a; an sawi dan chuan krismas hmaa commission hman kan beisei. Amaherawh chu, khami buaina avang khan kan thei ta lova, chak taka hma la turin min han tanpui leh se ka duh a ni.

Tin, Demand No. 42 - Transport hi Ministry hmasa khan nasa takin hna a thawk a. A bikin, ka bial chhungah Inland Waterway kan introduce a ni a, crore ₹2.4 ngawtin Khawthlang Tuipui-ah tender pawh koh mek a ni a. Hei hi kan Minister in-charge khan khawngaihmin min lo en zuisak sela; a changtu tur pawh thlan a ni chho dawnin ka hria a. Hei hi Tlabung inkalpawhna kawng a ni a. Chutianga hna kan la thawh hma pawh chuan vawiinniah hian ka bial leh Tlabung hi tui tlem lai ber pawhin lehlengin lawngin an kal thei a ni. Chutiang khawp chu a ni a. Chuvang chuan, hma min laksak se ka duh

khawp mai. (**Hon. Speaker:** Minute 3-in a pel ta a.) Pu Speaker, ka zo tep e. Bial 3 aiawh khan ka ding tlat mai a, min hriatthiam ka han duh deuh a ni.

Pu Speaker, Demand No. 45 - Public Works hi sawi duh ka nei a. Nichina ka sawi ang khan, kan bial chhungah hian motor la luh lohna khawthum ngawt a la awm a. Hei hi kan Minister khan min lo chhinchhiah sak sela, SASCI atanga kan han thawh Zopui hi Sailo Lal thuthmun a ni a, motor lem pawh an la lei lovin ka hria, an khua ah khuan. Chuti khawp chu a ni a. 'Lianbuang' kan tih khu BADP leh ka fund te hmanga kan han tih nawk nawk a ni a. Chutiang zelin, Silsuri khu ka biala khaw lian ber dawttu a ni a, voters 3000 dawn awmna a ni a; border fencing road vanga thleng mai mai a ni a. Hei hi min ngaih pawimawhsak se ka duh a ni.

Pu Speaker, lawmna deuh ka nei a; kan hun bul Covid avanga harsatna kan tawh chung pawhin kan CM hmasa khan ka ngenna min ngaih pawimawh sak a, Rawpuichhip-Buarpu km 77.27 vawiinniah hian crore ₹75.83 e-tender mek a ni tih ka hria a, ka lawm khawp mai. (**Hon. Speaker:** Minute 5) Pu Speaker, khawngaihin. Mamit bialtu zahawm tak Pu Zira sawi ang khan, BRO hi kan hman tangkai a pawimawhin ka hria. Kan bial chhungah kawng an nei chhe hle a, a practical-in ka hmu a. Tut - Phaileng, hetah Rajiv nagar thlengin Ministry hmasa khan an Chief Engineer Brig. General pawh vawi hnih-thum koin a office-ah pawh ka kal a, Central-ah Defence Minister pawh ka zuk hmuh phah ve a. A tira kan ngenna chu min chhang tha lo khawp mai a; 'insurgency a awm tawh loh avangin fund kan nei thei lo' an ti a. Amaherawh chu, kan han nawr kan han nawr a, a tawpah chuan crore ₹16 min sanction a, vawiinniah t ha takin kawng an siam a ni. Chutiang deuh chuan, kan bial chhunga Silsuri kawng ka sawi te pawh hi an ni BRO ho nen kan indawr a. Amaherawh chu, kan indawr laklawh laiin Ministry a tawp ta a; hemi chhonzawm zel hi thil harsa ni lo turah ka ngai a. (Pu Speaker, ka tawp tep e.)

Demand No. 8 - Horticulture chungchang hi kan sawi a, dragon-fruits pawh kan introduce nasa em em mai a. A bik takin, kan Minister leh MLA-te pawh ka request duh chu - kei hi ka zin veivah hian Thingdawl-a dragon-fruits hmunah khuan chawlh ka ching a, official-te pawh an lawm khawp mai thin a; kan enpui deuh a thain ka hria. Kan han chawlh mai khan an hmalakna a hlim pahin ka hria a. Hei hi kan ram tan thil tha tak a ni a, kan production pawh tha tak a ni bawk a ni.

A tawp bera ka sawi duh chu, Demand No. 39, nichina ka sawi piah lamah khan vawiinniah hian kan House Leader-in Finance Minister a nihna anga Speech-a a telh lawmawm ka tih em em chu, crore ₹20.13, transformer hman mek hluihlawn tlak tawhte thlakna tur atana helaiah budget-a a rawn tarlang hi lawthu ka sawi nawn duh a. Kan bialah khuan transformer thlak ngai tam tak a awm a, hei hi min lo enzui pui te pawh ka duh a ni. Member zahawm tak Aizawl South-III Bialtunu khan mal deuh bik leh, eng emaw kha a hlau deuhin ka hria a. Lo hlau suh se; a thlamuanna turin Aizawl West-III

Bialtu, zawnglai kha kan la nei a. Chuvang chuan, House Leader hi Mizo tawng a thiam bawk a, a ni kaltlang te pawh khan a inzawn hmuh theih mai lawm ni le; khawro deuh hlek bika a inngai kha ka han thlamuan a nih chu, Pu Speaker.

Aw le, Pu Speaker, Minister pathumte demand tha tak maite hi, ka support e. Ka lawm e.

HON. SPEAKER : A lawmawm e. Aw le, tunah chuan Lawngtlai ‘E’ Bialtu, Member zahawm tak Dr. Lorrain Lalpekliaana ilo sawm ang.

DR. LORRAIN LALPEKLIANA CHINZAH: Pu Speaker, ka lawm e. Vawiinniah Hon. Minister pathumte’n demand an neihte sawi theihna hun tha min pek avangin, a hmasain a lawmawm ka ti a, i chungah lawmthu ka sawi a. Dar 5:30 recess tih kha a ni a, minute 3 chiah a awm tawh a, a inthlahrunawm hle mai a; a rang thei ang berin sawi ka han tum ang e.

...(interruption)....

PU LALRINTLUANGA SAILO: Pu Speaker, khawngaihini; sawi hmaih ka nei a. Kan BJP member-in BJP pen a sem a. Kan practice danin, kan RD Minister khan tun ang huna budget sawi hi chuan silpaulin kha min sem thin a; member-te kum dangah khan rangva te nen khan. Kha kha hun hmasaa kan lo practice dan kha a ni tih kha ka han sawi a nih chu.

DR. LORRAIN LALPEKLIANA CHINZAH: A hmasa berah chuan, Minister Pu Vanlalhlana Demand No. 12 atangin ka han sawi tan ang e.

Construction of playground pavillion hi kan bial chhunga Lungtian-ah te, Sangau leh Bualpui ‘NG’ te, Lawngtlai ‘W’ lama Tuichawngtlang te, Ngunlinga Khua leh T. Dumzau-ah te hmalak mek a ni a, hei hi SASCI hnuaia kal kha a ni a. Tin, NEC leh NABARD funded project eng emaw zat hmalak mek a awm a. Hengte hi a hun taka zawh a nih theihna turin khawngaih takin kan Minister-in hma min lakpui se a thain ka hria a.

Tin, Multimodal project division - *Kaladan Multimodal Transit Transport Project* (KMTTP) under State Accelerated Broad Development Project, North-East Phase-A kha completion report leh application of extension of time hi July, 2023 khan Ministry of Road Transport & Highways hnenah thehluh a ni a. Amaherawhchu, vawiinni thlengin completion report leh extension of time approval hmuh a la ni lova. Tin, he project hi August, 2010-ah sanction a ni a, kum 2011 leh 2019 chhung khan mi 202 hnenah compensation pek a ni a. Vawiinah hian High Court-in *genuine land owner* a tih mi 138 lai mai compensation la hmu lo an awm a, paw ka ti tak zet a.

Ram neitute'n compensation hi a hma thei ang bera an hmuh nan khawngaih takin kan Minister hi hma min lakpui turin ka ngen duh a. Tin, kan CM zahawm tak pawh hemi ah hi chuanin khawngaihtakin helaia compensation hmu tur hi bial mite Lawngtlai West leh Lawngtlai East lampang te an nih avangin, khawngaihtakin kan CM zahawm tak pawhin hma, a theih ang angin min laksak se ka duh bawk a ni. Tin, kan thingtlang khuate, a bikin inkalpawhna a thalo em em a, Sangau - Thaltlang te, Lungtian - Vartekkai te, Siachangkawn – Vawmbuk te, Vawmbuk – Archhuang te leh Vawmbuk - Tialdawnglung te hi tun dinhmun ah chuan bial chhunga inkal pawhna tha lo a ni a. Helai hmunah hian resurfacing leh black-topping an mamawh em em a, chung te pawh chu.... (**Hon. Speaker:** Khawngaihin; 5:30 PM chu a ri a, sawi zawh tir law law ang aw; member a ding laklawh e. Aw le, chhunzawm rawh le.) Pu Speaker, ka lawm e. Hengah te hianin khawngaih taka a hma thei ang a hma min laksak turin ka han ngen a.

Tin, NHIDCL hnuai hnathawh mek - widening of NH 54 Hrangchalkawn – Lawngtlai te, Lawngtlai - Zero Point te hi a pawimawh hle mai a, hna pawh nasa takin a kal mek a. Hengte pawh hi a hun taka zawh a nih theihna turin khawngaihtaka hma min laksak turin ka ngen bawk a. Tin, Tuipui Ferry leh Maurawpkai-ah sawn bridge zawh theih ni se ka ti hle mai a; campaign lai pawh khan kan CM-in Maurawpkai-a kawng tih that leh leidawh te pawh kha a sawiin ka hria a. Hei hi khawngaihtakin kan Minister hi hma min lakpui turin ka ngen a.

Tin, Phalhrang - South Lungpher saw, Lawngtlai West Bialtu khan a sawi tawh a, sawlai saw km 17 bawr vel a ni a, a pawimawh hle mai a. Lawngtlai atanga Lungpher pawh theihna a ni a. Tin, Mara District pawh a paltlang a, tunah hian feh kawng atana hman a ni a, amaherawhchu, thalah chuan motor fourwheel - heng gypsy te, bolero te hi chu a kal thei mai a, amaherawh chu furah a kal thei lova. Helai hi khawngaih taka min ngaih pawimawh saka, grade tha zawk, widening leh black-topping te pawh min tihsak turin vawiin ni ah hian kan Minister ka ngen duh bawk a ni.

Tin, Demand No. 42 ah khan han lut ta ila. Hei, Lawngtlai District ah, a bik takin West leh East ah pawh nise, a constituency ang zawng pawhin, MST service hi a awm lova; tunah chuan bus pawh hi kan nei lo a ni. Thingtlang khua kan bialah tam tak a awm a, tin, miretheite te te awm khawmna, khawsak hona a ni a. Chuvangchuan, Lawngtlai - Sangau te, Lawngtlai – Chawngte te, Vaseikai te, hengah te hian MST service te hi min dahsak ve thei ta se a lawmawm hle ang. Tin, border area-ah khaw tam zawk te an awm an a, hengah te pawh hian MVI thuthmunte pawh min han siamsak ve thei se a lawmawm hle ang a.

Tin, Demand No. 39 hi han sawi ta ila; Minister Pu F. Rodinglana demand a ni a. Hei Lawngtlai hi kan sawi tawh a, Lawngtlai West lam leh Siaha lam bialtute pawhin an sawi a; Chhim lama kan electricity dinhmun hi a tha lo em em a, thalah pawh ni se, ni 3 te kan thim chang hi a awm a. Hei hi a chhan chu, repair leh maintenance avanga

tianga thim thin kha kan ni a. Helai hi han elaborate deuh hlek ka duh a. A hmasa berah chuan, incoming line improvement hi kan mamawh a, power kan lakluhna 132 kV Line, 3 kV a charge hi 1995 vela vuah a ni a, hnathawh a nih lai hian vibration temper vuah a nih loh avangin conductor te'n an tuar a, hrui a chat fo thin a ni. Tin, jumpering clamp, 'PG clamp an tih mai thin hi a hlui tawh a, maintenance hna thawk turin staff indaih lohna a lo nasa bawk nen, helai ah hian harsatna kan tawk a. Tin, vibration temper vuah te, jungle clearance te leh jumpering repair hnate hi remchan dan anga shut down laia thawh thin ni mahse, a line conductor hrim hrim hi a hlui tawh bakah, nasa tak a tuar tawh avangin harsatna kan tawk a. Tin, nakin lawkah 132 kV-a charge tur a nih avangin, thlak a hun tawh hle a ni. Conductor thlakna tur estimate hi siam tawh niin, power system development fund hi submit a ni tawh a, khawngaihtakin kan Minister-in hei hi a hlawhtlin theih nan hma min lakpui se tih ka ngen a.

Tin, incoming line neih belh hi kan mamawh hle mai a, a chungga tarlan incoming line hian power division pahnih Lawngtlai leh Siaha a chawm a, eng emaw vanga line fault a awm a nih chuan Lawngtlai division pahnih chawm hi kan pum thim thin a ni. Tunah hian SASCI funded 132 kV sub-station Chawnhu ah sak mek a nih ang hian Hnahthial atanga power draw tur hian Siaha hian 132 kV Sub-Station nei ta se, 132 kV Lawngtlai to Siaha hi estimate awm sa 10% GBS Central *vet* tawh a awm bawk a. Hetiang hi a nih chuan, chhimlam pawhin power lak luahna source kan nei ve ang a, line pakhat a chhiat pawhin hei hian min chawm thei dawn a ni. Hei hian khaw chhiat apianga current awm lo pawh a tih reh ngei ka beisei a, hemi hlawhtling thei tur hian kan Minister pawh ka han ngen bawk a ni.

Tin, distribution in system improvement kan mamawh a. Lawngtlai Division hnuaiyah hian Sub-Division pahnih - Lawngtlai Sub-Division leh Bungtlang South Power Sub-Division a awm a. A belhkhawm hian consumer... (Pu Speaker, tlemin hun min pek belh la.) 11,609 an awm a ni. Hemi avang hian indaih lohna a nasa hle a ni. Tin, staff-ah pawh indaihlohna nasa tak kan nei a, heng avang hian a lo chhiat chan pawhin duh angin siam zung zung theih a lo ni lova; staff-ah te pawh hian indaih zawka kan awm theihna turin kan Minister hian hma min lakpui se. Tin, kan electric hrui hi a hlui tawh hrim hrim a. Tin, ban pakhat kawng helamah a awm a, ban pakhat kawng lehlamah a awm a, mipui te tan pawh a hlauhawm a, hrui thar pawh hi kan mamawh hle a ni.

Tin, Rural Development Department ah hian thil pakhat ka ngaihpawimawh em em sawi ka duh a. DRDO Lawngtlai District report kan dawn danin, tun kum 2024 hian insak tanpuina beneficiaries 2084 atanga 1501 ten 1st Instalment an dawng tawh a, tunah hian mi 583 laiin 1st Instalment an la dawng lo a ni. Chuvang chuan, kan sorkar kalphung-thar, mipui-sawrkar hian kan rawngbawl sak mipuite hre reng chungin rinawm tak leh tha taka PMAY-G scheme kan kalpui hi kan tih makmawh a ni a, kan Minister hmalakna in PMAY-G Scheme a beneficiary ten a hun taka an dawn tur an dawn hi ka beiseiin ka ngen a ni. Pu Speaker, ka zo tep; khawngaihin.

PHE Department chungchang ah hian, Greater Lawngtlai Water Supply Scheme hi tun dinhmunah chuan electric motor set 1 leh diesel engine 1 a awm a, tunah hian kan voltage hi duh anga kan dawn loh avangin tui hi nikhatah darkar 11 vel bak a pump theih loh a. Amaherawh chu, Power & Electricity Department hmalaknain 132 kV Sub-Station siam mek hi hun reilote ah commission a nih chuan voltage tha kan nei dawn a, tui pawh hi darkar tam zawk a pump theih dawn a. Chutah chuan hemi hi khawl pakhat ringawt hi chu, a lo chhiat khan a buaithlak thin dawn a; chuvang chuan, *stand by* atan Lawngtlai PHE Division ah hian electric motor pump pakhat min dah belh sak turin ka ngen a. Tin, hnathawktute indaihlohna nasa tak a awm a. MR tuisem te hi a hma chuan MR anga lak an ni a, wawiinah chuan PE (Provisional Employee) anga lak an nih avangin duh duha lak theih a nih tawh lova, chuvangin, harsatna tam tak kan nei a. Hemiah hian kan Minister hi khawngaih taka hma min laksak turin ka ngen bawk a.

Aw le, Pu Speaker ka zo tep e. Lawngtlai khawpui thang zelah hianin Thingkah khua, Thingkah IR Battalion Headquarters leh Mampui te chawm tel ve a nih avangin indaih lohna a nasa a. Tin, PHE Department chuan hei hi hriain estimate crore ₹119 siamin funding zawn mek a nih thu te department atangin hriattir kan ni a. Hemi kawngah hian hma min lakpui turin leh, a hlawhtlinna kan hmuh ngei theihna turin kan Minister ka ngen bawk a. Tin, Sangau Water Supply Scheme hi duh angin a lian lova, Sangau khua hi a chawm zo lo hle mai a. Hengah pawh hian a chawm zo thei tur khawl lian zawk te pawh min dahsak turin ka ngen a. Tin, Sangau-II ah hian, functional house-tap connection scheme hnuaiah hian in 80 vel tui connection hmu tura tih kha a ni a, amaherawh chu, wawiinni thleng hian hmuh a nih loh avangin, kan Minister hian khawngaihtakin min ngaihtuah sak turin a hma lamin ka ngen a ni.

Aw le, Pu Speaker, wawiinnia kan Minister pathumte demand hi tha ka ti a, ka thlawp a ni e. Ka lawm e.

HON. SPEAKER : Aw le, ti khan dar 5:30 a pel tawh a, member-te sawi lo kan la awm nual a. Kan Leader te, kan Opposition Leader te pawhin an la sawi dawn a. Engpawhnise, kan hriselnate a inchen lova, kan chawl ang a. Darkar khat emaw, kan chawl ang a, tichuan, dar 6:40 PM-ah kan kal khawm leh dawn nia.

(Recess)

6:40 PM

HON. SPEAKER : Aw le; discussion kan chhonzawm ang a; sawi turin, Aizawl West-1 Bialtu zahawm tak Pu TBC Lalvenchhunga ilo sawm ang.

PU TBC LALVENCHHUNGA : Pu Speaker, ka lawm e. Wawiinnia demand kan sawi hote a ngaihnawmin, i vei lama thute pawhin pawmtlak tak niin an hria a, hei

hi a lawmawmna niin ka hria a. Deptt. thenkhatah te nikum lam aia han tlemna han sawite kha awm bawk mah sela, han chip neuh neuha a chhung han keu khan hnathawhna tur chu a lang tam zawk tih a hriat reng mai a. Kumin Budget ah hian ZPM Party-ina ‘*sustainable development*’ a tih tak mai kha a inkhung nasa hlein ka hria a. *Year of consolidation* ah pawh hian heng kan hmabak nia langte vawiin nia demand kan sawi ho zingah hian a inphum tel nasa hle a, chung kan hmalakna turte chu kan Minister te hnen atang hian kan la ngaithla chho turah ngai ta ila.

Vawiinnia ‘works department’ tia kan hriat ho thinte kha a bikin chhawp chhuah a ni a. Heng deptt-te zingah hian thil danglam deuh mai nia ka hmuh chu, PWD ah khan works, kum danga kan lo hmuh thin ‘transfer from other departments’ tih kha a nil quit thla vek mai a, kha kha kumin budget-a thil danglam tak leh ngaihtuah zui ngai tak niin ka hria a. A chhan chu, works department nilo works department a awm mang tawh lo tih mai tur a ni a. Department tinin anmahni hmasawna tur an thawhna tur ang chia mamawh tawh ang engineering line te kan kawl fir fer tawh avangin, kan Engineer tam zawk kan hnuh khawmnaah hian anmahni department chanpual piah lamah an kuta sorkar hmalakna te pakhat mah a han awm lova, hei hian kawh dan chi hnih a neiin ka hria a. Chawhma lama kan ngaihtlak tawh ang khan P&E Deptt. pawh electric-a civil side lam kan Engineer-te an awm awl thute pawh kha kan han hre zauh a. Khatiang chiah khan PWD-ah pawh hian a electrical side lam te fahrah enkawla enkawl an nih thu te pawh kan ngaithla chamchi bawk a. Heng kan department enkawl hi administrative forums agenda-ah khan lian hle turah ka han beisei a.

A hmasa bera ka sawi duh chu - Demand No. 12, 42 leh 45 atang khan, Demand No. 42 - Transport Deptt. bikah khan nikum January thla khan central policy zulzuuin ‘*Scrapping Policy*’ kan tih hmang khan vehicles eng emaw zat kan han *scrapped* kha a ni a. Khatah khan nuai 700 lai mai Supplementary Demand-ah pawh khan kan han hmu let ni khan a lang a, a lawmawm tihna chin ka nei a.

PWD bik, Demand No. 45 ah khan kan demand te, nichina ka sawi tawh ang khan ‘department dang atangin transfer a awm lo’ kan tih rualin, kum danga kan hmuh loh *works* leh *roads and bridges* ah khan capital tunhma aia tam kan han hmu a. Khami baka danglam bika chu, ‘PMGSY-3’ kan tihah khan crore 300 chuang kan han hmu leh a. Khatah khan kum dang ang lo tak bawkin State-matching share pawh a hmunah dah sa thlap a ni a.

Khatah khan thil pakhat mipuite’na kan hriat ngai nia ka hriata chu, PMGSY-ah hian a contractor-te lama tanga bill release muan a nih thu kan ngaithla thin a. A concerned Department lam atangin contractor-te thawh muan thu kan hre thin bawk a. Ka hriat soal loh chuan tun dinhmunah pawh hian crore 200 chuang a concerned department te hian neih sa reng niin, PMGSY-2 pawh zawh loh tam tak kan la nei mek a. Hei hi administration-a tan kan lak a ngaihna niin a lang a.

Han sawi zel takah chuan, mahni bial chhung, keini bial hi khawpui leh thingtlang inchawhpawlh kan ni kan tih kha. ‘Aizawl khawpui kawtchhuah’ ti ila, kan airport rawn panna lam Aizawl West-I biala awm kan ni a. Hengah hian kan harsatna tam tak te, kan Minister hmalaknain sorkar hun chhung rei loteah pawh kan kawng chhe zual laite min thawm that sakin, mipui mamawh zual, khung lai Luangmual-a Gan Sabra kawng te boulder nena phah reng te pawh tunah chuan PCC zawh a lo ni ta a. Khatiang khan Phunchawng-ah te sikul panna chhe lutuk, works-a awm sa lo te pawh min han siam remsak thei a, lawmawm ka ti a.

Chutah chuan pakhat kan belh ka duh chu – ‘Chawlhmun Urban’ kan tih PHC atang khuan Rangvamual-a kawng tlang thla sorkar hmasain a lo sial tlang tawh a awm a. Khu khu tun kumthar works-a roads a tana crore 20 chuang kan han nei belh, kum dang aia tamna atang hian kan Minister hian siam thatsak theih ngei ka beisei a.

A dawt lehah chuan, Pu F. Rodingliana chanpual, Demand No, 18, 39 leh 40 te hna kha han thual zuai zuai ka duh a.

A hmasa berah chuan P&E bikah khan, kan power purchase hi nikum hmasaah khan a tak taka kan hman hi crore 605.38 a ni a. Nikumah khan crore 450 revised niin, kuminah crore 450 dah a lo ni ta a. Heti mek laia zawhna awm thei ta chu – Actual turin kuminah hian kan la dah lo fo nge ni a, solar plant kan neihna Tlungvel leh Vankal solar plant 20 MW leh 2 MW te hian kan state resources ah hian kan power purchase-na rate hi a rawn tihnam ve ta em ni, tih kha zawhna awm thei tak a ni a. A chhan chu crore 7 chuang lai mai kuminah hian roof top solar atan budget-ah khan dah a han ni bawk a.

Hemi piah lamah chuan ka bial chhungah bawk ka lut ve leh duh a demand han sawi hona te a ni bawk a. Kan bial chhung khu, kan sawi ang khan Aizawl khawpui chhung ni si khuan khung Ainawn-ah te a chuanhnuaiho thlanmual road hnuai lamah te upa enkawlina khunglai inah te tar chawmna kawmthlang lamahte electric ban la thlen reng reng lohna bialte kan ni a. Chutiang bawkin Chawlhmun-ah te, hengte pawh hi min ngaih pawimawhsak dawn ni te pawhin ka lo hria a, Minister hnenah lawmthu ka han sawi lawk bawk a. Kuminah hian subsidy-ah erawh hi chu kum dang aiin a letin a zuang ta dawrh mai a, hei erawh hi chuan ngaihtuahna a ti thui hle in ka hria, vaibelchhe 211 zet mai power subsidy-ah kal tura ruahman a han ni a.

Printing & Stationery bik hi chu ngaihtuahna thui tak awm tawh a ni a, kan neih sa te enin leh kuminah pawh vanneih thlak takin kan ti dawn nge ni kum kal mekah hian book printing atan anni kutah hian nuai 315 lai mai dah a han ni a, kum kal thar lo awm turah erawh hi chuan dah zui a ni ta lova, zirlaite Education Department chan ni lo mahse ngaihtuahna a ti kal thui hle mai a, kum kal mekah khan September/October ah pawh zirlaiten zirlaibu an hmu hleithei lova, hemi inpuahchahna tur atana sorkarin hmalakna a neihte hriat pawh a chakawm hlein ka hria a.

Tin, pawimawh em em he Department bikah hian mahni nun thapa midang tana inhlante hlawh tlem te te neia muster roll kan tihho te, tuna Provisional Employee tam zawk vawiina Electric Department-ah hian 949 ngawt mai chu ban lawn chi kan tihte repair-tute an awm mek a ni. Heng mite tana hamthatna hi ngaihtuahna ti thui tur tak leh ngaihtuah zui ngai niin ka hria a, mahni nun thapin hnathawhna line of duty-ah boral tate pawh kan nei fo thin, amaherawhchu sorkar hnathawk nghet lo leh englo nei lo an nih avang hian an tan ngaihtuahna kan sen a ngai hle in ka hre bawk a.

A dawt lehah chuan Demand No. 40 Commerce & Industries-ah khan Sustainable Investment Policy 2020-2024 kan hmu a, Mizoram Industrial Policy 2012 kha kan en chuan kumin kum kal mekah pawh hian MSME te tana incentive subsidy nuai 42 chuang pek chhuah a la ni a, kha kha Mizoram Industrial Policy 2012 dung zui la kal zel leh Draft Policy 2021 sustainable khami industrial policy-a tel la tel ve zelah khan a awm a, hengte pawh hi bana kaih policy nen khan a inhne rem chho dawnin a lang a.

Pakhat chiah Pu Speaker, ka pel lo turah ngai ang minute 1 ka la neiin ka hria a, chu chu ngaihtuahna thui deuh chu he Department bikah hian sum hi industries lama hmasawn kan tum lai mek leh he lama hand holding-a kan neih nual lai hian general allocation-ah hian vaibelchhe 97 atangin 68-ah a tla thla a, kuminah 60 ah a tlahniam leh ta a Commerce & Industries Department hi, amaherawhchu bana kaih policy leh intervention scheme dangte nen tangkai tak tur a ni tih erawh chu a lang a. Heta kan Budget a lang ta lo chu border trade kan tih khawchhak tlang dung Champhai leh a chhehvelah te mi sang tam takin eizawnaa an hmang mek a, vawiina harsatna kan tawh tam tak zawkte address tur lam hawi zawng a lang lo niin ka hria a, hei hi nakinah kan Minister khan specific takin min rawn address theiin ka han beisei bawk a.

A tawp berna atan chuan, Prof. Lalnilawma Demand No. 25, 32, 38 - Public Health Engineering, Horticulture leh Rural Development te hi a tawi thei ang berin rawn thual leh ka han tum ang a. Horticulture Department-ah hian kum dang ang lova kan hmuh tak nikumah khan kan sawi lang tawh a Capital Expenditure atan economic services-ah Agriculture leh Horticulture ah hian nuai khat chiah dah a ni tih kha Revised Estimate ah pawh nuai khat chiah a la ni a. Kuminah chuan Agriculture-ah nuai 7000 chuang dah a ni a, Horticulture-ah pawh nuai 127 chuang dah a han ni hi thil thar, thil lawmawm, kut hnathawktute tana lang niin a hriat bawk a.

Hemi dawt lehah chuan Rural Development Department hi a bu chung thu ka sawi tel hman tawh lo ang a. Heta ka ngaih pawimawh deuh pakhat chu RD hnuaiah hian training institute pakhat kan nei a SIRD, State Institute of Rural Development hi. SIRD-ah hian extension nen chuan nuai 414.78 lai mai dah a ni leh a. Hemi hi kan policy kal zel nena kaihkawpin Administrative Training Institute tuna PAR hnuaia amite nen pawh hian amalgamate dan emaw hmun khata chhun luh dan awm thei se la, ATI ah hian PAR hnuaiah hian nuai 414 chuang bawk dah a ni leh a, nuai 800 chuang training

purpose atana kan hman hi tangkai zawk leh awmze nei zawka kan huikhawm theih ka beisei a, chu chu mipui hmaah ka han tarlang leh duh a.

A tawp ber atan chuan Pu Speaker, khawngaih takin PHE Department hi sawi tawh ang khan central lama kan line department te nen a inzawm lohna tam tak awm thin mahse kumina ngaihtuahnaa lang ta chu cost of pumping hi a sang chho ta dawrh dawrh khawp mai a, kan tui services-ah hian vaibelchhe 50 chuang zet mai cost of pumping ah, JJM te a han tawp vei dawn ruai nen PHE ah hian tanlakna capital works tam tak lo awm thin tawh leh hmalakna kan hmuh mek a ni a, beiseina pawh a sang hle a. Heta ka han sawi duh chu Aizawl West-I bial Aizawl kawtchhuah intite hian a bikin zoram lui lian Tlawng lui kama chengte a bikin Sairang Sihhmui Sairang Dintharah te khuan tui nu bak in tur duhthal kan la hmu hleithei lova. Chu chu kan sorkar hmalakna kal zelah AMRUT hnuaiyah hian kan nei ve thei thuai turah pawh ngai ila, chutih mek lai erawh chuan he hmalakna a kal mek lai hian water supply scheme-ah hian awlsam zawk leh power failure-a awm pawha mipuite'na tui thianghlim kan in tur kan neih theihna turin, Tan lui leh Dialdawk-a infinna lai khumi Reiek leh Chungtlang inrina-ah khan Dialdawk lui Tan luiin a zuk finna lai atanga tui lakna an lo hmanah khuan gravity-in khulai Sairang ruam amite khuan tui tha takin an hmu thei a, hemi kawngah hian kan Minister hian khawngaih takin min lo notice sakin hei hi min rawn react-sak se la ka duh bawka. Hun ka pel a, a pawh pawh ka ti hle mai a, pelh loh hram ka han tum a.

Pu Speaker, vawiina kan demand sawi hrang hrangte Demand Nos. - 12, 42, 45, 18, 39, 40, 25, 32 & 38-te hi mipui tan inhnemhnanna khawp leh Mizoram mipuiten kawng thar he year of consolidation a ni chung chung pawha daihzai zawk leh semzai taka an rawn sem hi a lawmawm ka tiin, he House-ah hian pass-puia pawmpui turin la sawi leh turte pawh ka rawn ngen bawka ni e. Ka lawm e.

HON. SPEAKER : A lawmawm e, tunah chuan Hachhek Bialtu, Member zahawm tak Pu Robert Romawia Royte ilo sawm ang.

PU ROBERT ROMAWIA ROYTE: Pu Speaker, ka lawm e. Kan member zahawm tak takte anglo takin, a demand no. vel kha ka rawn sawi tawh lo mai ang a. A chhan chu a department a tam avangin a demand no. vel han sawi khan hun a duh rei dawn riauin ka hria a. Khami sawilo khan kan hre thiam vek turah ngai ila.

Pu Speaker, a hmasa bera ka sawi duh chu, RD Department chungchangah he House zahawm takah hian lawmthu sawi ngaiin ka hria a. Sorkar sum harsatna tinreng karah sorkar hmasa hun laiin Kawrtethawveng hmunah ka bialah RD Department-in BDO office a hawng thar a, building pawh an sa thar a, quarters thlengin sak zawh a ni a. Khatih hun laia RD minister zahawm takin a hawng a, kei pawhin ka tawiawm a. A lawmawm em a, lawm thu ka sawi duh a. Kan hriat angin RD block hi chu central hawlh raih mai a ni a, khawthlang tih hmasawn nana kan nei thar hi ka lawm hle a. Sorkar thar

pawhin tha takin a enkawl zui niin ka hria a, tunah pawh hian hun a la rei lo na-a sorkar thar pawhin phur taka enkawlin a thuam ngaite pawh thuam zelin a enkawl a. Staff la kimlo hret la awm erawh chu tunah hian kan dil belh nghal ni se. Hemi chungchang ka sawi ruala ka sawi tel duh chu, Kawrtethawveng-a BDO office khu khua atang khuan a va hla deuh a, chuvang chuan, powerline hian a va thleng lova; engkim peih tawh, building nalh tak leh tha tak te an ni a. ICT lam atang pawhin thuam thain, kan strengthen-a, khatiang a ni chung khan power a la thleng lova. Hei kan power Minister zahawm tak pawh, a demand sawi ni a ni bawk a; Kawrtethawveng-a BDO office-ah power supply a thlen thuai theih nan ka rawtin ka dil bawk a ni. RD chungchangah hian sawitur tam tak a awm a, hun hmasa leh tun thleng pawhin kan officer-te, kan sorkar-hnathawkte an fakawm hlein ka hria a. India ram leh north east-ah pawh record siamna tam tak pawh an nei a.

Pahnihna atana ka sawi duh chu, Commerce & Industry chungchang a ni a. Commerce & Industry Department hnuaiah hian *Industrial Investment Policy* ni ta in ka hria, Pu TBC Lalvenchhunga pawh khan a rawn sawi ri a; helai hi a pawimawh dawn hle mai a. Sorkar hmasain bul a lo tan a, theihtawp a lo chhuah tawh hi he sorkar thar hian an rawn chhunzawm a. Industrial policy kan nei tho a, mahse a kim tawh lova; khalai kha a ranglama rawn ti puitling turin kan Minister zahawm tak pawh ka ngenna ni sela.

Pu Speaker, *Sports* pawh industry-ah kan puang a; a hmam *Music* pawh industry-a puan tawh a ni a; *Tourism* pawh industry-a puan a lo ni a; chumi zarah chuan hamthatna tam tak kan project pawhin a dawn phahin, awlsamna tam tak kan policy avang khan a nei a. Hengte hi industrial policy thar turah hian rawn take-care ngei se, tih kha ka rawt duh bawk a.

Tin, Pu Speaker, ka bial lam hi sawi zel a ngai a, han chet hlek hi chuan khawthlang lam a ni nghal ruih zel mai a, kan rilru leh ngaihtuahna pawh. Kanhmun khua khu kan hre vekin ka ring a, Assam leh Tripura inrina junction khaw pawimawh tak a ni a. A ral lehlah ah Damchera, bazar hmun khaw nghet tak a awm a, a thlang lawk Assam lamah bazar hmun a awm a, Kanhmun-ah bazar hmun kan nei a, khawthlang bazar pui ber a ni a. Khulai khu kan hun ve lai khan Commerce & Industry Minister-te nena sawihovin PMJVK atang khan Kanhmun market building sak tumin kan han ti ve a, mahse kan ti tlang zo ta lova. Hei hi tuna Commerce & Industry Minister zahawm tak hian Kanhmun, Mizoram khawthlang lama khaw pawimawh takah khuan market building min sak sak sela, chu chu investment hlawk tak pawh a nih ka ring a. SASCI atangte hian tih awm tak ani pawhin ka hria a ni.

Horticulture Department chungchang hi tawite ka sawi duh a. Kuhva hi ka hriat theih chinah chuan Horticulture Department hnuaiah a awm a. Tun hnai mai, October thla vel kha nge ni aw, Kawrthah leh Zamuang-ah te kuhva *tam* vangin harsatna kan nei a, a department neitu, Land Resource, Soil & Water Conservation Department te ka zawt a,

kuhva *tam* emaw, thlai lama expert an lo nei hauh lo mai a. Hei hi kan sorkar laia thlakthleng pawh a ni mai thei a, kan mawng ka'n hlim a nih pawhin, hlim tha ah ngai ila. Horticulture department-ah hian kuhva hi a awm a ngai a ni. Chu chu ka theih ang angin North East state-te vawiin chhun chawlh lai khan ka phone a; ka phone theih chinah chuan, kuhva hi Horticulture Department-ah vek an dah a, Mizoram-ah pawh tunhma kha chuan Horticulture Department ah a awm thin ni pawhin ka hria a. Tunah hian horticulture department-ah hian awm leh ta sela, expert engkim an awm a, a inhme pawhin ka hria a. A import chungchangah te, a engkimah Horticulture Department mithiam awm khawmna ah hian, kuhva hi kan sorkar thar hian dah leh teh se, tiin ka rawt duh a ni.

Tin, a dawt leha chuan, Power & Electricity Department chungchang hi tawitein kan sawi duh a. Linesmen indaihlohna hi thingtlang lamah hian a lo nasa khawp mai a. Term hmasa khan khawpui laili lai, kan bialah te kan lo hre pha lem lova; bial te kan thlak a, kan mamawh pawh hi a lo danglam khawp mai a; Hachhek Bial leh Aizawl East-II mamawh hi chu a lo inang lo khawp mai. Linesmen hi volunteer deuh te, YMA te emawin an tiha, an chhawra, an han tih nawk nawk hi a awm a, mahse, thiam thil ngai a lo ni a. Er. R. Rohmingliana, Thorang Bialtu zahawm tak khan a sawi thiam khawpin ka hria a – ‘intawk lo tur a intawk chuan, a hnaih ber khawl kha a chhe mai a,’ a tih khan min tiveng hawk a. Chuvang chuan, mithiamte pawh a lo ngai a, mithiam han tih lemah Linesmen ah khan engineer emaw, BE emaw kher kha ngai pawhin a lang lova, mahse train chawp leh train theih tamtak an awm a, thawk mawlh mawlh pawh an awm a; an mahni kan rawih dan phung hi hi rationalise, tihdanglam a ngaiin ka hria a.

Tin, Mamit Bialtu zahawmtak Er. H. Lalzirliana khan, Bairabi-West Phaileng via Mamit 132 kV line commission tan a tul zia a rawn sawi kha ka rawn support nawn leh a. A chhan chu, ka bial lam, Mamit atanga Tuidam - Zawlnuam line ah harsatna kan tawh thin khu kha khan a rawn sukianng ve tlat dawn mai a. Engkim hna zawh tawh si, eng emaw Forest vang nge; kalphung thar sawrkar kan ni bawk a, sawrkar hmasaina kan tih mai loh te pawh kha in ti mai thei zel turah te pawh ngai ila, hei hi ka rawn thlen ve duh a.

Tin, thil serious tak nia ka ngaih ka zirchian hman siloh chu, subsidy chungchang kan budget ah te pawh a rawn lang a. Power Department-a *subsidy* hi engtiang zawngin nge kan kalpui dawn, tih hi ngaihtuahnaah a awm a. ‘Power tariff kan tipung lo ang, kum nga chhung, term khat chhung’ tih niin ka hria a, a subsidy zawng khan kan insen leh teuh si chuan, engnge danglamna; *thlam bang chhaklam sahthlaka a thlanglam pin* nen khan a inang reng em? Kan Power Minister zahawm tak khan helai “*subsidy* tih hi engtin nge kalpui an tuma, helaia power man an tih to loh rawn substitute nan khan subsidy hi an rawn hmang mai dawn a ni thei em?” tih lai kha ka hrethiam chiah lo deuh a.

Tin, Pu Speaker, PHE Department ah hian hmasawna a thleng nasa khawp mai a. ‘Tui intur a hera herchhuah; tui intlak in tinah’ tih kha a takin a la function vek lo mai thei a; mahse, hun hmasa lamah tih a ni a, tunah pawh chhunzawm zel niin ka hria a, kan PHE Minister zahawm takin phur takin sawrkar hmasa hmalakna te a chhunzawm niin ka hria a. ‘Minister nachang hre deuh hi chuan sawrkar hmasa hi sawi chhelovin, an thiltih tha hi an chhunzawm mai thin a ni’ tih te pawh hi ka hriat ve chinah kan sawi mai mai duh a. Chuvang chuan, kan PHE Minister pawh kan fak duh a. Helaiiah hian kan House Member-pui Er. H. Ginzalala te pawh hi, (a hming sawi a pawi ti lo ang chu maw; ‘pawi i ti em’ ka ti a, ‘pawi ti lo’ a ti a.) heng velah hian a thawh hlawk vein ka hria a, ka ral hriat danin; chungte chu ka’n sawi duh ve bawka a ni.

Tichuan, Pu Speaker, a pawimawh berte zinga mi, PWD ah hian Budget Estimate ah ₹7,32,71,00,000 kuminah kan han pass dawn chu a nih hmel a. Tin, Supplementary Demand for Grants ah nuai ₹7833.44 kan pass tel bawka a. ‘Supplementary Demand te chu budget hlui thil a lawm’ ti kan awm mai thei a, a ni vek lo nasa khawp mai a. Supplementary Demand cheng nuai 70,000 leh tihah hian la hman loh, Mizoram-a sum kan kawl tawh si a tam khawp mai a; nuai 14,000/- vel chu kan PWD Minister zahawm tak hian kumtharah supplementary demand engzah nge a thawhchhuah dawn kan hre lova; thawhchhuah sa, neih sa hi cheng nuai 14000/- pawh a tling tawh lo mai thei a; (capital chauh a nia ka sawi) *Capital* head-a Supplementary Demand hi PWD hian crore 708.33 an nei a, a then hi chu hman tawh a ni ang tih ka ring a; hman loh tam tak pawh a awm ka ring a. Hengte nena hma la tura position tha taka PWD Minister a awm hi ka lawmpui a. Tin, PWD Department pawh Supplementary Demand tam tak an thawk chhuak hi lawmawm hlein ka hria; *central transfer* hi tamtak hi niin ka hria a, hetiang ang hi department dangte hi ni zel se chuan, kan budget pass bakah hian Supplementary Demand tamtak kan neih belh ang a, chu chuan kan Revised Estimate te a tipung ang a, kan ramah hian nawmsakna leh, kan lo thlir ve thin hmasawna te pawh hi kan neih theih ka ring a ni.

Tin, *State Monitoring Committee* tih hi kan House Leader kan CM leh he sawrkar fakawmna niin ka hre ve a, department leh department ringawt in monitor hi a tawka tawh lo ni te pawhin a lang a. Chuvang chuan, State Monitoring Committee an rawn duang chhuak hi a lawmawm hlein ka hria. Party tin an han tel te, pawl pawimawh te an han tel a, transparent taka kalpui tumna an nei pawh hi a lawmawmin ka hria a. He thil ka hriat tirha ka rilrua rawn lang nghal chu, he State Monitoring Committee hian Contractor-te hnathawh an thawh that leh that loh te an en rual hian, ‘department hian a hun taka bill an pe em; department hian bill batsak an nei em; bill ba chung chung te hian a hun taka zawh tir talh te hi kan lo tum em’ tih hi a pawimawhin ka hria a. Chuvang chuan, Contractor-te leh a ruaitu department-te an pawimawh a, tichuan he committee hian *win-win* situation, contractor leh employer te ah a siam theih ka ring a, balance takin hna thar a kal theih ka ring a ni.

Tin, vawiin hi sawina hun remchang niin ka hria a, PWD - schedule of rate chungchang hi sawilan a pawimawhin ka hria a. *Schedule of rates* hi building bikah chuan 2013 ah a chhuak a, 2019 a chhuak leh a, a chhang khat khawp mai a. CPW ah chuan SOR thar a chhuah chiah loh pawhin cost index hmang tein an in adjust zung zung a. Khatiang awm si lo khan Mizoram-ah *Schedule of rates* hi chhangkhat takin a awm a. Hei hi a pawimawh hle mai si a, engkim kan project zawng zawng ‘*base of measurement*’ kha a ni bawk si a, DPR inngahna pawh kha a ni vek a. Khata tanga chhutchhuah kha a nih vek a vangin, *schedule of rate* hi hun mil tawka anga tihchhuah emaw, revised ngai a nih leh nih loh, a khat tawka sang deuha han tih thut leh mai ang hi ni lo deuh hian a tih chi em?

Tin, a pawimawh ber ka sawi tum zawk tak chu - Taxation Department te, Finance Department te nen hian SOR siam ho hi a tha lawm ni, ka ti a. Tin, CPW SOR te pawh hi a awm tho a, hengte nen hian inrawn a chi em, tih te kha kan sawi duh bawk a ni. Tin, PWD Minister zahawm tak ka zawh duh chu - SASCI ah khan kan House Leader zahawm tak pawhin ‘work order awm chin chu a contractor ten ngampa takin thawk rawh se’ a ti a, work order awm chin hi, Finance Department-ina administrative approval a pek chin kha PWD chuan dan pangngaiin, dan zawm thlapin work order an pe a, kha kha arawn chhuak kim leh si lo ang a, ‘53% chin hi lo thawk rawh u’ tiin sorkar a tang hian verbal deuhin instruction hi a awm deuh a ni lo maw, tih hi he House ah hian kan sawi chian a ngaiin ka hria a. Kan *work order* lai kha contractor chuan a tanchhan tur kha a ni ve si a; eng emaw thua sawm a nih chuan, ziakin in hrih hriat ni se la a va tha awm em, tih te kha ka sawi duh bawk a ni.

Aw le, a tawpna atan chuan, he department 9 demand-te hi ka support a, thatak a kan Minister ten, kan House Leader kan CM kaihhraina hnuaiia heng budget hmanga hmasawna an thawh theihnan duhsakna ka hlan a. Tin, budget han pharh hi, kei pawhin ka pharh hmasak ber khan nuam ka ti khawp a, kan thiante pawh a vawikhatna a tan, an vawikhat pharhna a ni ve hlawm a, a then chu. Heng tena budget an han pharh ta hi ka lawmpui ngawih ngawih a, ‘*All the best*’ ka ti a ni. Ka lawm e.

HON. SPEAKER : Kan Opposition Leader khan sawi duh a nei em?

PU LALCHHANDAMA RALTE, OPP. LEADER: Pu Speaker, ka lawm e. Vawiinah kan Minister pathumte demand, department 9 kan han sawiho thei hi a lawmawm ka ti khawp mai a. Tin, kan sawihona boruak hrim hrim pawh a nuam a, mimal inbeihna te, tin hun kal tawh han sawi a ngaihthlak nuam lo thil awm lo, hmalam beiseina thil tha kan duh tawna te, rawtna (suggestion) kan neih te kan han in share te kha ropui ka ti a, “he House hi a mawi hle a ni” tih kha thuhmaah kan sawi duh a.

Demand No. 45 - Public Works Department hi, kan hriat danin PWD hi kan ramah major department, kan ram hmel tilangtu pawimawh tak a ni a. A chang chuan mipuite

pawhin anmahni ah beiseina kan neih san viau lai leh, a chang chuan kalkawngte a tha lova, eng emaw kan beisei ang a nih loh laia an lakah mipuite kan han phunchiar changte pawh a awm thin a. Chuvang chuan, a department-a thawktute an inpekna a that rual rualin, sorkar pawh hian priority a pek lehzual a thain ka hria a. A chhan chu kan inkalpawhna kawng hi kan chak lakna te, ei leh bar lakna te a nih avangin, kawng hi kan ngai pawimawh em em a. A bik takin kan economic road - inter-state road hi kan ngaihpawimawh hle ka duh a.

Hei, NHIDCL hian heng kan kalkawng pawimawhte hi an la a, a tha lo khawp mai a. Central lam an ni a, helai ah hian a concerned minister leh a department te pawh hian han sawi thin bawk mahse, an luhlul fo thinin ka hria a. Kan House Leader, kan Chief Minister pawh hi, a chang pheii chuan a intervene a tulin ka hria a. A bik takin kan kawngpui Silchar kawng te pawh hi a tha lo em em a, a siamna hun, thal hun kan neih rei tawh loh lain, helai Buichali bawr vel te pawh kan PWD Minister te pawhin an zuk thli a; an bei fat fat a, load rit tak tak phur motor ten anrawn rap a. Kan chaw-kawngpui te a nih si a vangin, heng kawng hi PWD control chiah ni lo mahse, an ni hi a enkawl hnaivai an ni a. Chutiang chiahin, inter-State kawng dang kan neih Kanmun (Tripura) side a ni emaw, Manipur side - Ngopa tlangdunga kawng te pawh kan ngaihpawimawh zuala, district inkalpawhna kawngpui (main road) ho zawng zawngte pawh hi ngaihpawimawh hmasaka kan neih hi kan ram tan a pawimawhin ka hria a.

Chutihrial chuan, Inter-State inkalpawhna kawng hi kan zawn belh leha remchang kan siam tul ka tih avangin leh keimah ngei pawhin hmanni ah House-a ka sawi tawh ang khan, Zoram kawtchhuah kawngpui pawimawh tak hi hmar tlangdungah sawn a awm thei a ni. New Vervek -Bagha lam kawng saw lai turin ruahmanna engkim a kal a, a kawng pawh 'National Highway 306-A' tia phuah a ni tawh a. Saipum, Saiphai, Tuirial thleng a lo kal tawh a, ka bial chung Tuirial leh New Vervek inkar hi la khawih chiah loh, survey kal mek a ni a.

Tuna kawngpui kan neih lai pawh tunah hian MORTH (Ministry of Road Transport and Highway) atangin existing road cheithatna tur Mauchar - Tuirial kawng te, New Vervek - Zohmun kawng te pawh a siamna tur sum minrawn pe tawh kha a ni a, ministry hmasa hun hnuhnung lamah khan; tunah hian an la tan lo deuh a. He kawngpui tur hi laih a nih hma pawh hian vawiinnia sumdawng tam takte leh khilai tlangdunga awmte tan chuan kan kawngpui hman tangkai a nih avangin, ngaihpawimawh ni thei se thain ka hria a.

Kan Union Minister, Road Transport and Highway, Pu Nitin Gadkari khan Seling bul Zero Point atang hian nikum khan National Highway-150, Seling atanga Manipur lam, Tuivai luiah kal pheii, Manipur kal tur siam nana crore 1,500 pek a nih tur thu arawn puang tawh a. Chutiang chuan kawng survey an bei mup mup a. Heng survey hna an thawha hi kan sorkar pawh hian kan en uluk a tul a. Hun hmasa lamah khan New Vervek - Tuivai km 9, km 10 dawn lai chei tawh loha kha, ministry kal ta khan kawngpui, lui

thlengin kan siam tawh a, Manipur lam atangin lui thlengin a rawn siam tawh bawk a, chumi inkalpawhna tur leilawn dawh mai kha a ni a. Bailey Bridge dawh turin vawihnih tender chhuah a ni a, amaherawhchu, Covid avangin chhangtu an awm mumal lova. Union Minister-in kawngpui lian atan a rawn puan takah khan, khilai khi Bailey Bridge mai ni lo, Concrete Bridge siam ni law law se tih a nih tak avang khan tun hunah hian a kal hlei thei lo a ni.

Hmanniah kan CM nen pawh kan sawi dun tawh a. Khilayah khian kan thenawm ram nen raltlan chungchanga harsatna kan neihna ni mahse, thil tam zawkah inunauna, inkalpawhna tur kawngpui pawimawh a nih avangin Bailey bridge siam kha hun hmasaah khan kan ruahman a. Champhai bula Tuipui Lei hlui thiahna leh Mat Lei hlui thiahna te kha han lak khawma hman tura kan tih laiin, sorkar kan han inthlak a, tunah hian hmun dangah an phur ni tein ka hria a. Khilai kawngpui khi 'kan ngaipawimawh khawp mai' tih kha kan PWD Minister khan min hriat sak sela. Hei hi hnam inpumkhatna a nih piahlamah, inter-state connectivity road hnai zawk kan neih theihna tur a nih avangin, kha kha ka'n sawi duh bawk a ni.

Tin, kan kawngpui thenkhat heng NHIDCL te, BRO ten an enkawl hi, a chang chuan Mizoram Sorkar hnuai an nih loh avangin harsatna a awm fo a. Chuvang chuan, kan ramah sum leh paia hlawkna anmahni tan pawh a nih avangin, a leilung-fa, ram neitu hian hemi kawngah hian nasa lehzuala ngaihtuahna kan sen a tul a ni.

Demand No. 42 - Transport Department hi, department tangkai tak a ni a, amaherawhchu, wawiinniah hian thawktu sanction post-ah a zahve deuhthaw fill up loh a awm a. Chutih rual chuan, revenue pawh hi an la tha viau a; kuminah pawh hian nuai 5000 vel ka hmuh theih beisei a ni a. Tin, kan budget kan Chief Minister-in a han pharhah khan, State Own Tax Revenue kha 21% vela tihsan a lo ni a. Khatah khan a lalut tam ber tur Transport Department hi a ang viau leh nghal a. Hetah hian Transport Minister min chhan atan ka duh chu 'tax tihsan tumna a awm em?' tih kha min han chhang tel se.

Tin, Transport Department bikah hian thahnemngaihna lai awm chu, motor registration kan tih dawn hian 'garage neih ngei a ngai' tih certificate kan phut thin a. Mahse, motor kawng sira inhung tam em em mai hi ennawn a thain ka hria a. Kan kawngpui a thang lova, motor a tam si a, helayah hian Home lam te nen ti hovin, Traffic Management Committee te, ruahmanna ang khan neih ho ni se. Motor vehicle kha an enkawl lam anih avangin, kawng sira park ho hi uluk leh zuala han check leh a tha em? Chutiang anih loh chuan, emergency thilah te zana kang-mei fahranah pawh motor lian han chetna a awm hleih theih lo hi a tha a, hengah hian hma lak vat ni se.

Tin, mihring kan tam zel a, lirthei a pung zel a, kan kawng a lian si lova. Family ang pawh hian motor neih theih chin hi bituk a hun tawh em aw; family khatin motor a neih

theih zat hi bituk ta ila. Chhungkuain mamawhna a neih tam chuan, sorkar bituk chin bakah chuan tax tam zawk chawi ni sela, sorkar tan pawh resource kan mobilise-na a ni dawn a; chutiang zawng chuan hawi tan te pawh a thain ka hria a ni. Anih loh chuan, motor pun chakna chhan pakhat chu, chhung thenkhatah hian motor kan mamawh chin bak neih te pawh hi a awm tan lek lek em? Heng te pawh hi resource kan mobilise-na kawngah kan traffic kal zel atan hian a pawimawha ka hriat avangin ka'n sawi duh bawka.

Tin, Public Transport enkawlina hnuai ah tho hian ropeway te pawh sawirik a ni a, Durtlang atanga Chaltlang te, Bazar leh Zemabawka te pawh. Hengte hi thawk khat lai thu leh hla avang khan a pamhmai hlen ta nge; Ropeway te pawh hi keini tlangramah te hi chuan, hmun tam takah an hman tangkai ang hian, tih chhonzawm tumna a awm em; Project kal lai emaw, DPR thar siam kan nei em, tih te kha kan zawt duh bawka.

Tin, Inland Water-way chungchangah kan ministry kal ta ah khan kan Minister TJ Lalnuntluanga khan a tuipui khawp mai a, Tlawng leh Khawthlang Tuipui te kha nasa takin buaipuiin, sum sanction tam tak awm tawh kha a ni a. Hei hi kan economic road-ah pawh pawimawh a nih avangin, helaia kan hmalakna kal mekah thil thar sawi theih a awm em; hei hi ngaih pawimawh thar a va tha em, tih te kha kan sawi duh a.

Tin, Transport Department hian revenue an earn piah lamah anmahni an pawimawh em avang hian MVI wing te, Enforcement wing te tichakna tur hian kan Finance Minister te pawh hian thilphal se thain ka hria a. Tuna district piah lamah hian, thingtlangah te pawh hian mobile thei tho se la; thingtlangah te hian motor register mumal loh te, license nei lova motor khalh te a tam lutuk a; public safety ngaihtuah a ngaih avangin, helaiah hian tlemin attention kan pek zual a va tha em.

Demand No. 12 - Parliamentary Affairs hi keini legislator-te kan che vel min enkawltu ber a ni a. A bik takin Parliament-ah te pawh kan Parliamentary Affairs Minister te hian eng emaw issue lian deuh, Government bill pawimawh leh nghawng a awm dawn hian, *All Party Meeting* te pawh an host fo thin a. Kan ramah hian tlemin kan PAD Minister te an inthlahrung thin a, kan inpawh zawk theihna turin session lai te, session dawnah te issue a awm hian kan PAD Minister hote hian han meeting ila; he House-ah hian ram tana hlawk zawka kan sawiho tur te in epa han intih vak vak awm theiah te pawh hian, sawihona tha hi neih fo a tulin ka hria a ni.

Demand No. 18 - Printing & Stationery Department hi, ministry kal taah khan ka enkawl a ni a. Langsar lo hle mah se, a kila lung tangkai, kan session lai te hian tlaivar deuh thaka engkim lo khawih tu an ni a. Thawktu hi sanctioned post zahve deuh chauh kan nei tawh a, an ni pawh hi duhsak an ngai hle a. Tin, Dan in engkim mai a enkawlina hnuai ah sorkar department hnuai atanga print tur ang zawng zawngte an kuta awm a ni a, stationery thil pawh anmahni atanga lak tura tihna order khauh tak kha a awm thin a.

Tun sorkarah hian (kan Minister-in min chhan a theih chuan) department-te hian an dawr tha em? Suspense-ah tun sorkarin duhsak takin ₹100,00,000 a pek belh hi ka lawmpui hle a. Khang kha he sorkar hian revenue tam zawk a hmuh theihna tur atana thil tangkai a nih dawn avangin, hei hi hman tangkai a tul ka ti hle mai.

Demand No. 39 - Power & Electricity hi; khawvel a changkang zelah kan mamawhna a sang tial tial a. Ka rilrua lian em em chu, he kan State-ah pawh sorkar kum 50 dawn kan kal tawh a, power project lian tham inngahfakna tur pakhat pawh kan la nei lova. Kan neih chhun chu, 'mini-hydel project' tih te a la ni a. Vawiinah hian he sorkar, kalphung-thar sorkar hian ruahmanna kan neih chhin te pawh kan hria a. Khawi khawi emaw kan han zir tawhah hian megawatt 330-400 tal pe thei tur, kan ram lo kal zelah pawh, kum 20-30 thleng pawh a kan la rin theih tur project lian pakhat tal hi buaipui a tul ka ti a. Chumi a nih loh pawhin, megawatt 10-20 tih te pawh a tha tho maithei. Amaherawhchu, mini-hydel project-ah kan kal rei tawh a; solar pawh a tha tho e. Amaherawhchu, major deuha beihpui kan thlak hi a tul. Chu chu kal zelna tur, he House-a kan thut chhan hi thang leh thar lo kal zel turte hian nakinah min dem lohna turin helam hawi zawng hian na taka kalna tur pakhat tal hi ngaihtuah a thain ka hria a ni.

Hmun tha tak tak, kan House Leader pawhin a sawi tawh a hmanni khan, chung kan han en tawh atanga economically-a viable deuh tur hi chu bawh deuh hak mai hi a tha a. Kan State sum atang emaw external aided project, khawi lai fund emaw atang pawhin tih dan a awm turah ka ngai a. A tul a nih chuan he miah hian loan tam zawk lak ngai pawh ni se, ram revenue tur tha, ram tana ro tling a nih dawn chuan, hman deuh pawh a tul mang e, ka ti a ni.

Thingtlang lamah hian thawktu indaihlohna kan nei lian viau mai a. Thingtlang lam bialtu ka ni a; kan bial angah te pawh Linesman hi kan indaih lo khawp mai. Linesman pakhatin khaw 3-4 dawn te an enkawl a. Tin, chutiang tur pawh an awm loh avangin, khawtlanga kan VC ten electric thiam ve deuh, license pawh nei lote mamawhna avangin an chhawr a. Keimah ngei pawhin ka MLA fund atangin Linesman ka chhawr a ni a. Chutiang chuan harsatna kan neih avangin, heng kawngah hian kan Finance Department hian Electric Department hi, MR a awm chiah loh pawhin eng emaw remchang, special scheme te siamsaka, thingtlanga thawk tur Linesman tam zawk kan neih theihna tur hi ngaihtuah tul ka ti khawp mai. (**Hon. Speaker:** Minute 15 a ni ta e.) Pu Speaker, Leader of Opposition chu min han hriatthiam thin kha maw.

Tunah hian kan bial lama electric line khi a hlui lutuk tawh a, ruah a sur deuh chuan kan thim reng mai a ni. Saitual atangin pek pheik kan ni a, Zuangtui atangin Saitual-ah a kal a, Saitual atangin a rawn let a. A powerline kal dan hrim hrim pawh hi 'engnge tha zawk; engnge remchang zawk' tih te. Kan Power Minister ka zawh duh chu, keini khu Tuirial tuikhuah bul kan ni a. Kan ram tam tak a chim a, kan eizawna tam tak Tuirial

tuikhuah khuan a tichhia a, ka bial hi; mi tam takin nunna an chan a, an tla hlum fo leh nghal a. Khimi power generate sa te pawh khi kan Power Sub-Station remchang, Darlawn te emaw Sakawrdai-ah te pawh khian min pek chhuah dan a awm em le; a kual em em a? Hetah kan pe a, Aizawl lamah a rawn lut a, Saitual-ah min hel kual a; chutiang chuan power hi min pe leh ringawt thin a. Kan ram kan pe a, kan eizawna hmun tha a hmang a; khing te khi a bik takin min ngaihtuhsak thei em?

Tin, ka ngaihtuahnaa thil pakhat awm chu, kan sorkar thar hian power tariff tisang lo turin a insawi fo thin a; mipui tana an ngaihtuahna a that rualin, thil dangah, tax te pawh in tisang tho a. Kei chu ka ngaihtuahnaah chuan - khawvel hmasawna a kal zel a, sum hlutna pawh a tam zel a. Vote kan duh lutuk avang hian power tariff tihsan loh te pawh hi ngaihtuah a ngai a, sum hlutna san dan azir hian mipui hian eng kan hmuh that chuan a man pek hi kan hreh ka ring lo a ni; Vawi khata jump sang vak lova tihsan hret hretin; chuti lo chuan kan expenditure a sang si a. JERC-in rate a rawn siam ang a, chumi ang chuan lei a ngai a, Sorkar-a tax kan pek sa tho kha a kal liam ham ham ang a, public chan tur, Capital Investment tur, expenditure tur kha a titla leh vek a. A tuartu chu, (indirect-in) mipui tho kan ni. Mipuiin eng kan hmuh that chuan a man pek san hret hret hi kan hreh ka ring lova. Heng kawngah pawh hian kan House Leader te'n in lo sawi tawh a nih pawhin, in thu a ni a. Amaherawhchu, rei loteah resource mobilise nan mipui sawr fu leh kan tum tho mai thei a ni.

Pu Speaker, a hnunng ber a tan Demand No. 25 - Public Health Engineering hi; tui kan mamawhna a lian viau a, kan tuihna a kang telh telh si a, kan zavaiin he House chhunga awmte leh kohhran a ni emaw, NGO zawng zawng emaw te kan tanrual a ngai khawp mai. Tui kan enkawlna kawngah te pawh dan hrang hrang kan pass a, enforce kawngah te pawh chak leh zual a tan a tul hlein ka hria. A bik takin urbanization a lo lian zel a, Aizawl khawpui bikah pawh hian Greater Aizawl Water Supply Scheme Phase-III kan hman tur University lama kan hman tur khu engtikah nge a function theih ang? Tawitlang-a tui kan lak kha engtikah nge a lo thlen theih dawn; sorkar hmasa in a kalpui mup mup a kha kan commission thei tep em? Khawpui chhungah tui hnianghnar neih zawkna tur leh khawpui hnaivai Sihphir te, Tanhril te, Falkawn lam te pawh a niang chu, heng tui beisei a lo thlir rengte, connection line tam tak thleng tawh tam takte hi engtikah nge kan tih theih ang? JJM scheme an tawp tep a, hemi ah hian keini ang thingtlang bial tam tak la zawh loh awm te pawh hi en ran a thain ka hria.

Demand No. 32 - Horticulture Department hi tawitein. Mizoram kan ei leh bar engkimah Horticulture Department hmasawna en hian achievement nei tha deuh ber an ni a em aw, ka ti ni. Department lian puia kan hriat loh hi major department tak takah kan neih a tulin ka hria a. Horticulture avanga vawiina kan ram intotelhna Mizo Nationalism than lenna tur atan ei leh barah kan intodelh ta hle mai a, chuvang chuan horticulture hi an fakawm ka ti a. Balhla te, Thing-fanghma te, Tomato te, Lakhuihthei, Dragon fruit te sorkar hmasaah khan lang lo liamah chuan kan tihthatna tak chu,

horticulture hi a ni. Mizoram-ah thlai thar hi a lo tam ta em em a, hei hi ti tam zel ila, thlai tam tak khawvel hmun danga mi tha zawk min lakluh sak a, min chah luh sak a, an fakawm ka ti a; anni hi duhsak hret hret thain ka hria a.

Tin, hemi hnuaiyah hian thlai thar awmze nei zawka hralhna tur leh a process dan tur te tha zawk kan ngaihtuah a tul hlein ka hria a ni. Sawhthing process-na tur chungchang pawh kan House Leader-in a sawi thin a, hemi hnuaiyah hian kan nei thei dawn em, tih kha ka zawt duh bawk a ni.

Demand No. 38 - Rural Development Department hi keini ho kan inngahna a ni a. Tukin a kan ngaihthlak tawh ang khan, Legislature party-a kan Dy. Leader sawi ang khan, RD Block siam belh hi kan inthlahrung lutuk a, tihbelh hi thain ka hria. Development kal rual nan pawh keini bialah te hian RD Block thar kan mamawh khawp mai a. HPC leh Mizoram sorkar inremna avanga sorkar te zawk nei kan ni a, enkawl bik ngai area te pawh kan ni. Rurban kan han beisei ve a; keini ho hi kan vanduai khawp mai a, BADP hruah bawk si loh Special Development Scheme awm bawk si lo, wawiin kan kalphung pangngai ringawt han dawn hi chu; churang chuan, hengte hi kan mamawh hle a ni.

Pu Speaker, department pakhat sawi hmaih palh ka nei a, ka let leh lawk ang a. Demand No. 40 - Commerce & Industries Department hi a pawimawh ka ti a. *Year of consolidation*- kan puang a, kan House leader hnena rawtna leh zawhna ka neih duh chu – Govt. Undertaking Corporations-te hi thawk khat lai khan mipuiah debate pawh a tam em em a. Heng - MIFCO, ZOHANDCO, ZIDCO, MAMCO te a then kha chu a thi lek lek tawh a, kan han khai nung thar leh a. Anni ho hi sorkar hian chawm nunna turin leh, eng assignment lian tham deuh emaw kan pek te hi, eng ti turin nge kan beisei hlawm? Political appointment em chu ni turah ka ngai lova, hnathawh tir kan tum ni turah kan ngai a; Engnge an thawh hlawm dawn? A then hi chu amalgamate-a tangkai zawka pek theih a awm ang em? Resource mobilization atan *Entirnan*: Dragon fruits te pawh hi nakinah chuan buaipui tham kan nei dawn a, Chhingchhip-a juice concentrator te pawh hman tangkai chhunzawm a ngai lo maw? Khatiang zawng khan sorkar hian ngaihtuahna a hmang em? Hand-holding hnuai atang hian hun hmasaa kan tih thin khawl-subsidize - mistiri tana bungrua kan pek te, puantui khawl kan pek ang te kha, kan pe leh thei dawn em? Commerce anih anga kan state thenawmte leh international kan subject ni chiah lo Myanmar leh Bangladesh nena kan trade point tuna kan nghahhlel em em te tihchak kawngah hian kan Commerce Minister hian (kan subject ni lo mahse) Union Ministry-ah na zawka nawra, Kawrpuichhuah a ni emaw, Zorinpui a ni emaw, Zokhawthar trade point te pawh nasa zawka nawr a nih loh chuan. Sorkarin nasa takin hma in la a, thlai thar tam zawk kan ching a, kan thar chhuak tam dawn a; Silchar kaltlang ringawta Bagha bawr control bak kan pelh leh theih loh chuan, reilote ah sorkar hi a vaw let dawn a ni. Bangladesh ah emaw, Myanmar-ah emaw kan thawn

theihna tur kalkawng hi chak zawka kan tih chuan kan kut-hnathawktu tan hian malsawmna a nih dawn a. Chuvangin, hei hi ka ngai pawimawh hle a ni, Pu Speaker.

A tawp tlang kawmna atan - kan Minister pathumte demand hi vawiinah sawi pawh phurawm kan ti a, sorkar thar hnuaiiah hma an lak chhohna turah department allocation an neih ang te awmze nei tak, thlenna tur dik taka an thlenpuia hma an lak theihna turin, duhsakna nen pass pui turin kan thlawp a ni e. Ka lawm e.

HON. SPEAKER : A lawmawm e. Tunah kan House Leader-in sawi duh a nei te sawi turin ilo sawm ang.

PU LALDUHOMA, CHIEF MINISTER: Pu Speaker, kan Minister-te inbuatsaihna a tha thawkhatin ka hria. Chuvang chuan, memberte'n an sawi tam ber kha anmahniin an rawn sawifiah ang a, chumi nena indip dal lo tur chuan kei chuan tlema zawng chauh rawn sawi ka tum a ni.

Hei, SASCI chungchang vawi eng emaw zat tun tum Session-ah hian kan sawi tawh hnuah, vawiinah hian Pu Speaker, i veilama mite khan an la rawn sawi deuh zel a, an rilru a kap viau anih ka ring a. Kan sawi ta rau rau a nih chuan, a chinchhuak deuh hlekin han sawi ka duh a.

Inthlan dawn khan kan Chief Minister kal ta khan, “Congress leh ZPM te chu puk chawpin an campaign dawn a; keini erawh chu MLA heti zat kan nei a, an fund chuti zat a awm a; chubakah bial tinah SASCI hi crore 2 te, crore 3 te, crore 5 te; a thenah chuan crore 10 thlengin kan pe dawn a, an nei dawn bawk a. SEDP tharah chuan chhungkaw khat ₹50,000/- theuha cover kan tum bawk a. Tunhmaa NLUP chilhli tla zawih zawiha an thlir ang khan tunah chuan min thlir ve ta thung a ni. Hei hi kan advantage a ni” a ti a. Kha kha SASCI awmzia chu a ni; a party ren-rawn khawp mai a, party fund ang deuh khan kan inhrilh kha a ni a.

Keini kan han sorkar khan, ‘work order lo la chhuak tawh leh hna lo tan tawh kha chu, tumah i tibuai lovang’ kan ti a; tha takin thawk se kan duh a ni; an thawh chin kha chu kan pe dawn a, an thawh hman loh tur kha chu UC thehluh tur a awm dawn lova, pawisa kir a awm ang tih hi kan hlau a, kan ui lawk a ni. Dik chiah chuan, heng contractor-te hi kan han mawhpuhna a, a hming an tum chauh a ni; a thawk tak tak tute chu party worker an ni thin a. Chung chuan hna an thawk tha lo thin a ni.

Concrete example ka han sawi ang a – Shillong ah Patient Lodge Sorkarin a sa a, contractor hmingin a sa a ni. A hming chu sawi lo ila; party worker pakhatin a thawk a, a tithei thlawt lova, a tihtheih chhun pawh a chhe lutuk a. A foundation zawng zawng kha kan vuak thiah tir leh vek a, a vuak thiah nan pawh cheng tam tak a kal a. A contractor tak taka kha a hmunah ka zuk tlawh a, “tlawmngaiin thawk hram rawh”, tiin

kan ngen a; “ka chawi belh ÷euh dawn asin” a ti a, a hreh ngawih ngawih a ni. Mahse NEC fund-a tih a ni a, NEC hotute pawh a hmunah an lo kal ve a; 10%-a tihpun theih dan kha an lo nei hlauh mai a, chutiang chuan, “kan lo ngaihtuah ang e” an ti a. Tichuan, ani khan a sa ÷an leh ta a. A contractor tak taka khan mawh a phur lova, a hnathawk tak taktu party worker ho kha SASCI phena awmte hi an ni a. Heng ho hian hna an thawh ÷at chuan a lawmawm khawp ang a. An thawh ÷at loh erawh chuan, tihngaihna a awm tawh lo a ni.

Tin, ‘kan sum a tlem ta’ tih kha kan ngaithla a; nimin lamah kan sawi tawh a. A tlem chung chung khan kan sum puk turte, kan bat turte a crore tela kan reduce chung khan, kan development-a kan kaltir tur kan plan outlay chu a pung daih zawk a. Pawisa tlem zawk hmangin plan outlay titam thei kan ni hi, kan vawi khat budget pharhna a ni nachungin kan inchhuanna a ni ve tho a ni.

Tin, kan PSU te hi Congress Sorkar khan, “phur rit an ni e” tiin, a ÷hen an lo titawp tawh a. MNF Sorkar khan, Congress-in a tihtawp tawh kha an lo tinung ve leh thung a. Tichuan, sawlai kan Millenium Centre te pawh saw ka rilruah a awm a, sorkar hmasain a laihtir a, sorkar lo awm lehin a chhilltir leh a; khatiang vel kan ni ÷hin kha a ÷ha lo khawp mai a. Kan PSU, Congress Sorkar-ina, “kan zo tawh lo; hei chu ti tawp ang” an tih kha, tun sorkar kalta khan a rawn tinung leh a, chu chu kan chhawm ta a ni. ‘Kan tinung leh’ an tih hi, a nung tak tak chuang lova. Amaherawhchu, an awm miau avangin, anmahni enkawltu tur Chairman te kan pe a. Tin, kan Chairman te pawh a hautak lo thei ang berin motor kan pe a, hlauh pawh tlemte kan pe a ni; an rank & status te pawh kan dahsan sak lova, chutiang chuan inren thei ang berin kan kalpui mek a ni. Han ÷hiah ringawt thu kha a awm si lova, ‘kan chhawm nung zo ang em’ tiin kan han en chho ve dawn a ni a. ÷hiah leh te pawh, a ÷hen te chu a ÷ul maithei a, chu chu hun lo kal turin hril sela.

Tin, chung zingah chuan ZIDCO hi a pawimawh ber a. ZIDCO hi tunah hian Mizoram sorkarin guarantee kan pek te zinga mi a ni a. Chu chuan leiba an rul thei lova, “Sorkarin kan rullh sak ang che u; in guarantor-ah kan lo ÷ang ang” an lo tilaklawh tawh si a. Kan Sorkar kal ta khan a intiam angin a rullhsak leh thei bawk si lova. Tichuan, kan buai ta a; tunah hian an sum pukna financial institution te nen khan, “in mi ngaihtiam theih ang berin mi ngaithiam ula, a tlem thei ang berin mi siamsak teh u”, tiin inremna siam a ni a, tiang chuan leiba lo tling khawm kha han rullh hram hram kan tum a. ZIDCO hi chu tihnun leh kan tum a, (hming mal te pawh han sawi ta lawng lawng ila) Mizo zinga kan bank service kan neih senior ber Pu Ch.K-a tlawmngai turin kan chah chhuak a; senior a ni tawh a, a hlauh pawh a tam tawh hle a ni. Chu chu deputation-in kan la chhuak a, “chu chuan han enkawl teh se; a ni ho hi chuan kan tinung leh thei ang; nakinah kan bank ang te pawhin, financial institution ang te pawhin, kan Development Bank siam tur atan khan rin theih dan a kawng a awm dawnin a lang a. Ani ho hian theihtawp han chhuah teh se” kan ti a; tiang chuan ruahmanna kan siam mek a ni.

Tin, hand-holding-ah hian, “eng engemaw han sem chi ang kha in tizui dawn em?” tih kha a ni a. Tih zui zel kan tum; kan miten eizawna tura an mamawh ang a nih kha chuan, a phute chauh hnenah bul tanna pek kan tum e.

Nimin lamah khan, ‘pawisa in dah tlem’ an ti a; a tul chuan kan dah belh mai ang, kan mamawh dan azirin. Ka sawi duh loh ka han sawi law law ang a.

Prime Minister hian, “concept note rawn siam rawh, hand holding atan” min ti a, “Rawn theh lut la, kan inhmuh leh hunah kan sawi dun dawn nia” a ti a, ka theh lut tawh a. Chumi hnuah chuan kan la inhmuh leh lova; chuta sawi tura kan dah chu a ni a. *A rana rana lo* a nih avangin, kan hlawhtling dawn nge, dawn lo ka hre lova. Amaherawh chu, kan thlen chin ka han share ve che u a ni, kan House memberte hi. Heta tan hian a bik liau liau - special package min pek theih chuan, pawisa kan ngah viau dawn a ni.

Pu Speaker, vawiinah hian kan kawng chhiat thu te, kan thim zin thu te kan sawi a; chu chu tuna kan dinhmun a ni. Thla thum chhungin kan kawng kan titha thut thei bik lo; thlathum chhung hian eng reng turin kan siam thei bik lo. Motor kawng sira an lo park tir zawng zawng pawh zankhat thilthuah kan hnawt bo thei bik lo a ni. *Magic Government* kan ni bik lova, mi-tinglo te te awmkhawm kan ni a. Kan Opposition Leader ngei pawh ama chan thin department ngeiah vacancy a zatve vel a nei tih kha amah khan a sawi a. Kha kha thla thum chhungin kan hnawhkhat thei bik lo a ni, Pu Speaker.

PU LALCHHANDAMA RALTE, OPP. LEADER: Pu Speaker, *Point of clarification* -Nimin khan budget general discussion-ah khan ka sawi tawh a. Keini sorkar kha vanduaithlak takin Covid-in min tihbuai avangin, kumkhat chiah kha budget pangngai kan pass hman a ni. ‘in vannei khawp mai, budget pangngai in kal tan tawh’ a kan ti a. Kan tih tur tam tak kha kan ti thei lova, chu chu a ni a. Kawngte, engte pawh kan tih duh tam tak kha kan ti thei lo tih Mizoram-in a hria; khawvelin a hria. Chuvang chuan, khati zawnga han insawi kha chu; House Leader kha fiamthu a thawhah i han ngaihsak teh ang.

PU LALDUHOMA, HON. CHIEF MINISTER: Aw le. Covid avanga kan dawn zat lampang kha chu sawi ve tawh lo mai ang aw. Kan power kawng a kual zawnga kal te kha Covid vang emaw ni dawn le aw! Khang te kha kan tikual lo thut thei bik tawh lo tunah chuan. Kha leh chen sorkar hmasain a lo tikual tawh a, ‘Saitual atangin chuti, khati’ tih kha, keiniin thla thum chhungin a kawng dang kha kan sial hman thut bik lo a ni; ‘heng hi kan rochun thil a ni’ tih kha ka han sawi mai a ni e. Kum khat vel hnuah erawh chuan a theih ang anga improvement hmel hmuh kan tum tlang ang chu.

Ropeway chungchang a buai zia leh, thubuai thleng a awm thu te kan hria a. Kan Tourist circuit ang chi zawng zawng pawh min call back sak vek a, tihngaihna a awm lova.

PAC ang te pawhin, term hmasaah pawh kan buaipui a; kan rinawm loh avangin pawisa tam tak kan chan a ni kan ram hian; a pawh hle mai. Chuvang chuan, khang kha chu tunah hian tinung maithei dinhmunah kan ding lova. Amaherawh chu, thil tharin, Planning Department atang hian ropeway project erawh chu pakhat tunah hian kalpui mek kan nei a, chu chu Vantawng Khawhthla-ah sawn a ni. A viewing gallery atanga a khawhthlakna inkarah sawn ropeway siam kan tum a, a khawhthlakna kotlang atanga Tuirihiau inkarah sawn lawng MLA fund-in ka pe tawh baw a. Buangpui Branch YMA saw Mizoram-ah chuan source nei tha ber an nih ka ring; a chuan man nitin ₹1000/- tel dawn te an lalut reng a ni. Sawlai saw hmun pawimawh niin ka hria a, chutah erawh chuan tih kan tum mek a ni.

Tin, ‘kuhva hi Horticulture-ah awm se’ tih kan member zahawm tak Pu Robert-a rawtna kha, enzuitlak niin ka hria a. Tin, a *tam* hri te a lo awm a; ‘kuhva hi a *tam* ngai lova, ching uar rawh u’ kan lo inti ve thin a, a lo tam ve thei tho mai a lo ni a. Hei hi han kap tur chuan drone a ngai a ni; chunglam atanga phuh thlak a ngai a. Khang kha kan afford ang em kan hre lova. Hei hi chu theih tawpa kan kuhva tam tur hi chu kan mithiamte nen dan tuma kan beih ho a ngai dawn a ni. Kuhva hi hetia a hringa hralh ringawt lovin, a semi-process ang tal hian nakum leh atang chuan thawn chhuah theih turin, ‘hma kan la mek’ tih kha ka sawi duh baw a.

Tin, PHE-ah, abik takin JJM-ah kan titha em em a, India ramah 2-na kan niin ka hria a, hmanni lawkah khan lawmmman te pawh kan dawngin ka hria. Kha kha keini thawh a ni lova, kan sorkar hmasa thawh rah a ni. A bik takin kan Dy. CM Pu Tawnluia a fakawm ka ti em em a. Helai House-a zawhna kan zawh reng reng khan, a kum a upat tawh leh a hrisel lohna te ngaihtuahin, a vai khan enlovin min chhang thei vek a ni. ‘Chulai hmun, khalai hmun’ a ti thei vek a, a mita a hmuh vek a ni awm mang e, tih turin; wawinah hian a hming kan lam lo thei lova, a thawh rah kan seng a ni a, a lawmawm khawp mai.

Tin, powerloom chungchang hi; India ramah hian handloom hi eizawna pe chhuak hnem ber a ni a, Mahatma Gandhi’n hmui inchhawpa, mahni intodelh tuma hmui a kaih lai atang leh, foreign goods an halral chum chum atanga rawn intan chho kha a ni a; tunah hian employment pe chhuak hnem ber a ni a. India ramah mechanize an tum hian, India ram labour tamnaah hian association - trade union ten nasa takin an oppose thin a, a chhan chu, mi tam tak eizawna a replace dawn vang a ni; kha kha keini pawhin kan ngaituah tel chin a awm a. Mihring tlem, labour tlemna kan ni chungin, powerloom lama kan kal vak hian kan mite, handloom-a eizawng mekte eizawna hre lovin kan chhuah thei a ni. Chuvang chuan, helai chu fimkhur taka kalpui a thain ka ring a. ‘Burma loom’ an tih hi an duh berin ka hria a, hei India ramah hian handloom district pariat thlan chhuahah ka bial khi kan lang phak a ni. Chutah pawh Thenzawl khi a ni leh zual a. Chuvang chuan, tun hnaiah pawh eng eng emaw hmasawna tam tak kan nei hman tawh a, an niin an duh ber chu Burma-loom kha a ni a, ‘Burma-loom’ tih kha a hming

thar vuahin, 'Zo-loom' an ti a. Zo-loom hi chu kan duh khawp mai a, hei hi uar chhoh pawh a tha awm e.

Tin, RD Block tihpun kha kan opposition leader leh kan Dampa Bialtu member zahawmtak khan an rawn sawi a, a zain ka thlawp hmiah a ni, hei hi chu; hman atangin ka sawi ve tawh thin a ni a. District tharte kan hawng a, 'heng ai hian kan mipuite'n block an mamawh zawk' hi ka ti thin a. Tunah hian 40 awm thei sela RD Block hi, 'MLA bial tinah hian pakhat awm sela, chu chu kan thatpui ngawt ang' tih hi ka mimal rin dan a ni a, hei hi chu kan sum leh pai dinhmuna zira la ngaihtuah chhoh zel turah ngai ta ila.

Tin, Manipur panna kawng hi kan opposition leader hian a ngai pawimawh a, sawi te pawh kan sawi dun tawh a; hei hi nakin ah kan PWD Minister in fiah zawkin a rawn chhan theih ka ring a. Kan sorkar tirh atang khan keini pawhin kan ngai pawimawh a, kan lo sawi kan lo sawi tawh a, eng chen nge hma an lo lak tawh chu nakin ah a hnen atangin kan ngaihtuah turah ngai ila.

Tin, Dampa Bialtuin a ngaih pawimawh border trade Silsuri kha, keini pawhin kan ngai pawimawh a, ka zuk tlawh nghe nghe a. Bangladesh-in kawng tha takin an rawn sial a, tourist center ah te an rawn hmang a, a mawi em em tawh mai a, a khua te khu. Keini lam kawng kha a chhe lutuk a. Silsuri kan kal tumin, public meeting kan lak zawh khan, 'Haw mai rawh u, a sur chuan in tang dawn a nia' min ti a, kan zan haw ve a ni, zan tlai deuh ah khan. Chuvang chuan, khu khu kan ngai pawimawh chhan chu - khu border trade khu a lo tlang chuan Bangladesh atang khuan engkim tlawm zawkin kan hmu dawn a, Silchar kawng pawh lo ping sela, khu khu political pawha kan huai vena tur pawh a ni a. Chuvang chuan, kan ngai pawimawh em em a, he kawng atan hian crore ₹109 kan dah tawh nghe nghe a ni. He hna hi kan ti tan dawn a ni. Manipur panna nen, hemi pahnih hi ngaih pawimawh zualah kan neih a ni.

Tin, power subsidy chungchang kha - Stamp duty kan la a, 'chhiah tihsan a tha lo' an ti si; 'power subsidy i la lo ang' kan ti a; 'chhiah lak hi a tha' an ti leh bawk si a. Pu Speaker, engtin nge maw kan tih dawn aw? *Zawhte thinglawn pawh thlak tum ang* deuh hi kan ni a. (*interruption*)

PU LALCHHANDAMA RALTE, OPP. LEADER: Pu Speaker, kan House Leader hian fiamthu a rawn thawh reng mai a. Stamp duty tihsan pawh kha tha kan tih thu kan sawi vek a; 'a jump sang lutuk ang; 1% atanga 3% ai chuan, 2% ah ti ang aw' kan tih kha, House record pawh a awm a ni. Keini hian chhiah tihpun hi kan object lo hrim hrim; kan ram mamawh a ni tih kan hria. Kha lai kha min sawi sak zawk teh a...

PU LALDUHOMA, HON. CHIEF MINISTER: Englo a ni a; power tariff hi mipuite hian kan ba ngai lova, kan sorkar erawh chuan a ba ziah a. A hunah a pek theih

chuan, kan bill aia tlem hi pek a ni a, min ngaidam thei a; chu chu ‘rebate’ an ti a ni. A hunah kan pek loh chuan a hremna *surcharge* kan pe a, kum khatah crore tam tak, a bill piahah hian a hremna hi kan pe tel reng a ni; sorkar hmasa hunah khan. ‘*Mipuiin an ba si lova, engati nge sorkarin kan bat ziah*’ tih kha keini zawhna chu a ni a. Chuvangin, keini chuan *rebate* hmu tur hian a hunah bill pek kan tum a (*interruption*)

PU ROBERT ROMAWIA ROYTE: Pu Speaker, *Point of Clarification* – khawngaihin; kan House Leader zahawm tak hian min hrilhfiahna remchang a niin ka ring a - “Mipuiin kan ba lova, sorkar lam hian an lo ba leh si a; chuvang chuan, a pungte nen kan rul teuh teuh a ngai” tih kha a ri fo a. Mipuiina power man kan pek hian kan power leina hi a pha em ni? A pha lo a ni zawk lo maw?

PU LALDUHOMA, HON. CHIEF MINISTER: Aw le. Mipuiina kan pekna hi subsidized rate-in sorkarin a pe a. Sorkarin pek tur a nei a, mipuiin pek tur an nei bawk a ni. Mipuiin an tih tur an ti a, an pe a, sorkarin a pe ve thin lo a ni. Mipui pek sa pawh kha a kawl a, pe ta mai lovin, a pung nen a hnu ah crore tam takin a rul leh thin kha, hei hi chu ‘*pa-rem hrelo thawmhaw a ni*’ kan ti a ni. Chuvang chuan, ‘rul mai ila, a pung hremna hi pe lo ila, tichuan kan zangkhai zawk ang’ tih kha sorkar tharin kalpui kan tum dan a ni a. Chuvang chuan, ‘mipui hian a bill ngai hi pe rawh se; i tipung rih lovang’ kan ti a ni. JERC hian tih pun a rawn rawt leh ngei dawn a, kan sawiho leh dawn a ni. Chumi rate-pung a phak lohna, a inkar chu sorkarin subsidy-in kan hnawhkhat dawn a ni. Chu chu power subsidy awm dan chu a ni. Tariff a hniam chuan, ‘sorkarin subsidy kan pe tam dawn’ tihna a kawng nghal a ni; sawifah hran pawh a ngai lo.

Kan sorkar hmasa khan power bill mipuite pek tur rate hi a rawn recommend sang thei em em a, JERC in a recommend aia sang daih hi an rawn recommend ziah a ni. Chu chu ZPM in kan duh lova. Tichuan, mipuia an puang a, a sawisel duhina an sawisel hun an hawng a, hearing an nei bawk thin a. Chutah chuan kan party aiawhin kan member zahawm tak Pu Muanpuia hi kan kal tir thin a ni. Tum khat phe chu MNF sorkar ina mipui chawi tir a tum kha a sang lutuk a, JERC ina a rawn rawt aia sang daih kha a ni a. Chu chu kan aiawha va kalte khan an hnial avangin, a aia hniam daihah mipuiin electric bill kan pek theih pha ta a ni. Chutiang chu a nih avangin, keini chuan, “A.. awl tir phawt teh ang; a rate hi chu tipung lo phawt teh ang; a punna hi chu awl hrh ang; a tul chuan hei hi chu kan hnawhkhat mai dawn nia, subsidy-in” kan ti a ni.

Tin, vawiinah hian Pu Speaker, lawmthu sawi ka duh a. Hei, *Austerity measure* kan han ti a, *Year of consolidation* te kan han ti a, chutah chuan kan zavaiin hma kan hruai a ni. Vawiinah hian i dinglama mite leh i veilama mite, kan zavaiin hma kan hruai a. Sorkar hmasa lama kan dawn thinte kan titem a, helama thute pawhin kan titem a, sawlama thute pawhin an tih tlem a, kan vaiin kan titem a. Tichuan, keini MLA hoina kan lo dawn thin kan dawn tawh loh tur term khat chhunga a tlemna hi crore 12.86 in kan titem ta a ni. Chuvang chuan, kan ram harsatna hre chianga kan zavaia pen ngam

kan nihna hi a ropui ka ti a. Kan member zawng zawngte in zavaiin lawmthu ka hrilh che u a ni.

Tin, ruling leh opposition hi thliar the chiam kan tum ve lova. Chuvang chuan, ‘sawrkar lehkha copy pawh MLA-te pek vek tur’ kan tih kha, kan depts. ten an zawm turah ka ngai a. Inelna thianghlim MLA zawng hian nei ila kan duh a, ‘mahni bial tuin nge vil tha’ tih kha; hmasawna kawngah opposition bial a nih avanga hrek bik pawh kan tum lova. Kan ngaihthlak tak ang khan... (A lo chhuak leh ta a ni maw..) Pu Rohmingliana hi eng emaw han sawi dawn hian a lo chhuak leh thin a. A bial fanpui turin min sawm a, ‘thil eng emaw function awmze nei deuh i neih te chuan kan fang dun dawn nia’ ka ti a. Hei, Dampa Bialtu pawh hian ‘tidun ang’ a ti a, ‘Aw le’ ka ti mai a. In bial te pawh kan fang dun ang; kan inenhrang dawn lo. Tin, in bial chhung theuha kawng a ni emaw, school a ni emaw, hall a ni emaw, field a ni emaw eng pawh, kan MLA tena an ngaih pawimawh, tih atan an duh hi ka hnenah ziakin rawn theh lut vek se ka duh a. Kha kha ‘kan lo tih sak ang’ tiin ka tiam thei lova; amah erawh chu, lo hriat sak ka duh; tih theihna remchang a awma inzawt buai lova, eng eng emaw a theih ang chin chin kan lo intuan hlawm theihna tur khan, kan member zawng zawngte hian in bial chhunga in mamawh zualpui min rawn pe ve hrim hrim u la. Kan tih theih chu a tam kher loving; amaherawh chu, readymade-a kan lo neih sa kha a tangkai ka ring a ni.

Tin, a bikin Session lai phei chuan inhmuh a awlsam a, recess room-a kan lunch break hian Pu Speaker, meeting ka la nei ziah a, awl hi ka la nei chuang lova. Amaherawh chu, a rengin lunch break chhung zawng khan kan meeting chuang lova. Hei hi inhmuhna remchang a ni a, a bik takin kan opposition member lamte kha, lunch break-ah te pawh hian ka room ah lo leng ula, in bial chungchangte kan sawi dun ang a; tichuan, inpawh takin he hun hi hman tangkai kan tum dawn nia.

Tichuan, heng kan Minister pathumte demand hi lungruat takin pass ka han ngenpui a ni e.

HON. SPEAKER : A lawmawm e. Sawihona chu kan duh tawk tawng ang a, tikhan. Tunah chuan, Minister zahawm tak Pu Vanlalhlana, kan sawihona te wind up -a, sawifiah ngai a tihte rawn sawi sawi fiahin, a demand te House-ah pass rawn dil nghal turin ilo sawm ang u.

PU VANLALHLANA, HON. MINISTER: Pu Speaker, ka lawm e. Ka demand te House hmaah ka rawn pharh a, ka rawn move tawh a. Vawiinah hian discussion kan nei tha hlein ka hria a, a lawmawm ka ti a. Vawiinah hian member sawitute zawng zawng chungah lawmthu ka sawi tha ve leh duh a.

He House-ah hian Pathian leh mipuite khawngaihna zarah vawithumna atan kan lo awm ve leh ta a, i veilamah hlir hian ka la thu a; ruling party-a kan han awm chhunah lah

khan hetah Opposition Leader bulah hian ka thu bawk si a; ruling party ka nih loh khan, heti lamah tho khan ka thu a; heti lam hi ka vawikhat thutna a ni a, ngaihtuahna pawh hi a la in adjust fel lova; kan thiam ve chho mai turah te pawh ngai ila.

Vawiina ka demand sawinaah hian thinlung leh tih takzetin ka lawm a, a bikin kan opposition unaute chungah ka lawm a. Tawngkam chhia leh ngaihthlak hrehawm ang pakhat mah a awm lova, a concluding sentence, Leader of Opposition in a han sawi phei kha chu hriatreng tlak a niin ka hria a; ka lawm khawp mai. Hun te a kal ta deuh viau a, chuvangin hmanhmawh deuhin kan sawi zung zung ang a. Khati lama ka thut lai khan Minister ten tui ti tak maia an wind up darkar khat te, darkar hnih te kha, a ning pawl hi ka nih ka ring a. Chumi hre ran chuan, keini tawngkam thiam bawk silo kha chu tawitea tih ka han tum dawn a ni.

A hmasa berah chuan, ‘Parliamentary Affairs Department’ tih kha member vawiina sawi zingah khan Leader of Opposition leh Pu Lalrintluanga Sailo chiah khan an rawn mention a, midang kha chuan a pawimawh zia kan la hre tawk lo a ni maithei a. Keipawhin ka hre chuang lova, ka nih takah hian ka hre chawp ve mai phei chu a ni a.

Allocation of Business-a a lan dan hian - 1. *Summoning and Prorogation of Legislative Assembly* - Assembly koh leh tih tawp kha PAD purview a ni. Tichuan, Sl. No. 17 (a hnukung ber) ah hian – *Matters relating to Legislative Assembly* tih a ni leh a, a huam zau a. Engpawh mai assembly concern zawng zawng kha chu PAD purview a ni a, a karah khan point chi hrang tam tak a awm ta a – *Welfare of ex-legislators and their families* - Ex-MLA te an nupuite leh an chhungte an fate welfare te ngaihtuah tur a lo ni ta a. Tin, *Salaries and Allowances of Pension and standing MLA/Ministers*, khatiang zawng zawngte a lo ni leh ta a. Sorkar leh Assembly inkarah hian link kan ni PAD hi. Chuvangin, a pawimawh zia kan hre lo a nih pawhin kan hre tawhin ka ring, ti kha chuan.

A dawt lehah chuan, Demand No. 42 – Transport Department hi, Ni 20, 1988 khan Supply & Transport Department atangin a indang a, hemi hma hian ‘Supply & Transport Department’ tiin hriat a ni a, District Council hunlai leh British hunlai ang thleng pawh khan Bung Bangla enkawltu tur ang te kha PWD hi an ni chho a ni. Wing lian tak pahnih - MST leh MV wing tea then a ni a. Tunah hian Transport Department hnuaiah hian Director a awm a, Jt. Director a awm a. District Transport Authority hi district hrang hrang pakuaah kan nei a, tunah hian a dang pathum din turin kan inbuatsaih leh mek a ni. Transport Department hi Mizoram-ah revenue collection tha tak mai, Mizoram tana revenue thawh hlawk tak mai a ni a. Financial year kal mekah hian sorkarin target atan crore ₹5,000/- min tuk a, kumin February thleng khan crore ₹41,63.1793/- kan chhung lut tawh a, kan target hi kan khum ngei kan inbeisei a ni. Tin, sorkar kumtharah phei hi chuan crore ₹6,000/- target atan min siam sak a, chu pawh chu tih hlawhtlin ngei kan tum chho dawn a ni. Tin, kan sum luhna hnar min hriatpui tura

kan han duh chu, Chaltlang a MST complex ah khianin petrol pump thar kan nei a, tah chuan petrol leh diesel quality tha zawk kha kan pek theih kan inbeisei a ni.

Tin, Mizoram kawng a tlo lohna chhan ber pakhat chu, motor overload vang niin kan hria a, kawngte a lo tlo zawk nan Mizoram sorkar phalnain Transport Department chuan hmun 4 - Vairengte, Phunchawng, Kanhmun leh Champhai ah te PP Mode - weighbridge dah turin hma lak mek a ni a, Vairengte ah bun fel a ni tawh a, tunah hian tha takin a function chho mek a ni.

Inland Water Transport Wing chungchangah hian, June Ni 19, 2029 khan Inland Water Transport subject hi PWD atangin Transport Department-ah allocate a ni a. Inland Water Transport Wing hma lakna - Development of Inland Water Transport Project in River Khawthlang Tuipui; hemi hmang hian Inland Water Transport hian Mizoram-ah Tlawng hi National waterways-ah minrawn puan sak a ni. Sairang atang Gharmura thleng khuan, Ministry of Transport & Waterways chuan Khawthlang Tuipui chu Tuichawng chhuah thlenga lawnga kal theih tura siam min phal sak a. A project hi km 23-a thui niin, a total project chu lakh ₹2,294 a ni. Tunah first place thawk turin sanction tih fel mek a ni. Ministry hian Chhimtuipui Lui atan Hydrolytical Survey Techno-Economic Preservative Study Tuipui D atanga Lawngmasu thleng neih min phalsak a, chu chu survey zawh fel a ni tawh a, a report hi Ministry-ah submit a ni tawh nghe nghe a ni.

Motor Vehicle Wing bikah District Transport Office hi district pakua-ah kan nei mek a. Heng wing hian an thawh ber chu, Motor Vehicle Act leh Rules enforce a ni. Transport Department wing hnuai hian revenue lalut hnem ber wing a ni a, he wing hnuai hmalakna hrang hrangte chu - One day carrying chungchang te, Monitoring Centre setup chungchang te, Automated Inspection & Certification Centre setup chungchang te, District Transport Office thar hawn chungchang te; staff indai lohna avangin district thar pathum – Saitual, Khawzawl leh Hnahthial-ah te DTO office kan hawng thei lova. Tunah hian sorkarin DTO staff tur mi eng emaw zat lak min phalsak a, staff kan lak fel ve leh District Transport Office thar hi kan hawng dawn a ni.

Pathumna-ah chuan, State Transport Authority kan nei a, State Transport Authority hi Transport Department tana revenue laluttu pawimawh tak a ni a. Public leh Private Sector te tana permit pechhuaktu niin MV Act leh Rules-in thunei hna a pek hrang hrang lek kawhin hnapiu berah a neih a. Tun kum kal lai meka hma lakna hrang hrangte chu

1. Passenger phur chi lirthei man ennawn tura hma lak mek a ni a. Tun atang rei lote ah lirthei chuan man rate thar a chhuak ang a, kan hman nghal ka beisei. He rate thar hi lirthei neitute tana tha tawh leh, lirthei hmangtute tana phurrit ni lo tura duan a ni.

2. Passenger phur lirthei zingah sorkar rate ai toa STA in a hriat te chu, sorkar dan dinglai angin hrem thin an ni.
3. Passenger phur chi lirthei chuan man sorkarin a bitukte dik taka hman a nih theih nan Auto-rickshaw leh lirthei dangah fair meter vuah tura hma lak a ni a.
4. India ram khawpui danga an hman thin online cab-booking system pawh Mizoram-ah Taxi leh two-wheeler taxi te hmang ve tura hma lak mek a ni.
5. Tin, sorkar thar chuan lirthei permit pekchhuah chungchangah kalphung tharin a kalpui dawn a, tunhma lama mipui leh kawng awmdan ngaihtuah lem lova permit a pekchhuah thin kha kan ti ve dawn lova, mipui mamawh dan a zirin ngun taka zirchian hnuah chauh STA chuan permit a pe chhuak dawn a ni.

Mizoram State Transport Wing thawh ber chu - MST Bus 26 leh lirthei dang Crane-Recovery Van leh Tanker te enkawl a ni a. He Wing hi transport department hnuaiyah chuan wing lian ber niin, sorkar revenue eng emaw zat la luttu a ni. Tunah hian Bus 26 neiin, hengah te hian kan tlan mek a – Aizawl to Lunglei, Aizawl to Marpara, Aizawl to Mualpui, Aizawl to Phuldungsei, Aizawl to Saipum, Aizawl to Mimbung, Aizawl to Rajivnagar. Hei bakah hian Lunglei Town-ah MST Bus pahnih a tlan mek a ni. Tin, MST Bus chuan man hi a tlawm em em a; chu chang ni lovin, concession a la pe a, cancer veite, pianphunga rual banlote, rilru lama harsatna neite tan leh hmeichhia kum 60 tling tan 100% concession pek a ni a, mipa kum 65 tling chin tan 50% concession pek a ni.

Heng bakah hian Transport Department in a khawih lar tak chu - Railway Out Agency hi a ni. India ram khawi hmunah pawh kal dawn ila, Railway Out Agency atang hian ticket leh reservation engkim kan tihsak thei a ni.

Tin, nichina an sawi ang khan, Ropeway hi Transport Department mawhphurhna lak turin Allocation of Business lamah a chuang a. Tin, Leader of Opposition-in a sawi ang khan, kan staff sanctioned post hi 684 a ni a, tunah hian existing staff hi 386 niin, hna ruak hi 295 kan nei a. Pensiona chhuak leh boral an awm pheuh pheuh reng avangin kan staff strength hi a tlem tial tial a, hna ruak hnawkhah zung zung a chakawm khawp mai. Kha kha department-in a tlangpuia kan hna thawh dan leh kan hma lakna ni ta se.

Member zahawm tak takte'n in sawi hi tawi te tein react han tum ila. Pu T. Lalhlipuaia zawhna, Lunglei - Aizawl MST bus chungchang kha; Mizoram sorkar chuan Lunglei khawpui hi a duhsak hle a, tunah hian Mizoram district headquarter zawng zawngah Lunglei-ah chauh MST bus a tlan tir a, district headquarter dangah chuan a tlantir lova. Bus hi 26 kan nei a, tun dinhmunah kan dinhmun a that vak loh avangin, hmun danga service tir thei kan ni lo. Lunglei mipuite harsatna hriain tunah hian town-bus pahnih kan service tir mek a ni.

Tin, Lunglei-ah Enforcement Staff tamzawk dah chungchangah chuan, Mizoram pumah enforcement staff-te kan tlachham em em mai a; MVI post 20-ah 10 a ruak a. Enforcement Sub-Inspector post 48-ah 28 a ruak bawk a. Hetiang a nih avang hian, tun dinhmunah hi chuan Enforcement Staff te han dahbelh ngaihna a awm lo a ni, riha na.

Tin, Smart Card chungchangah harsatna chungchang kha; tunah hian Smart Card hi M. Tech Innovation ah outsource a ni a, anni hi kuminah an hun a tawp dawn a; kum lelah chuan BDO Office tinah Smart Card print theih dan tur ngaihtuahin hmalak a ni dawn a ni. Lunglei BDO chungchang kha tun dinhmunah chuan MCS in an luah mek a, indaihlohna avangin hna dangte nena kawp a thin a. BDO-in a khawih thin hi a buai phah deuh nia hriat a nih avangin, DP&AR hnenah a tul anga bawhzui turin dah a ni.

Tin, Pu RM Chakma ngenna – ‘Chawngte leh khawpui lian deuh deuhah a duh duh tan Auto-Rickshaw permit pek ni se’ tih kha, passenger phur chi lirtheite hi State Transport Authority pekchhuah tur a ni a; dan leh dun ngaihtuah tur mumal tak a awm a. Permit thar pekchhuah chungchangah hian a mipuite mamawh dan enin STA chuan a ngaihtuah dawn a ni. Tin, Pu Ginzalala khan MST Bus outsource chungchang a rawn tarlang a. Mizoram Sawrkarin a din, Administrative Reform Committee chuan MST Bus te hi tihntem hret hreta, tihhniam hret a ti a. MST bus za chuang nei thin khan tunah 26 chauh kan lo nei ta a, bus thar leina pawisa a awm bawk si lova. Chuvangin, chawhrualin mipui mamawhna hmun tinah STA in mimal hnenah permit a pechhuak zel a ni.

Tin, A tawp berah chuan, Pu Lalchhandama Ralte zawhna – ‘Vehicle Tax tihsan tumna a awqm em’ tih kha, tun dinhmunah vehicle tax tihsan tumna a awm lo. Tin, garage nei leh neilo chungchangah chuan, garage nei tura ngaih vek kan ni a; amaherawh chu, neilo an lo awm a nih chuan, Transport Department in a hriatpui lova, certificate tel lo chuan register a ni ngai lova, lirthei garage neilote chu check te pawh a tha ang a. Eng pawh nise, khang kha department te nena tangruala tih theih tur ang chi a la ni ang chu. Kha kha Transport Department chungchang chu ni ta se.

PWD chungchang kha han sawi leh ta ila. Mizoram PWD hi Engineer-in-Chief in a ho a; Engineer-in-Chief hnuaiyah hian Chief Engineer 4 an awm a; Chief Engineer bakah hian Chief Architech a awm bawk a; Chief Engineer hnuaiyah hian Working Circle 9, Working Division 30 leh Sub-Division 78 an awm a. PWD Organisation hnuaiyah hian staff 620 leh non-technical staff 1460 an awm a; a vaiin 2083 kan awm a ni. Technical Staff ah Engineer-in-Chief - 1, Chief Engineer - 4, Chief Architech - 1, Superintendent Engineer - 16, Superintendent Architech - 2, Excecutive Engineer – 66 leh Architech - 2, an vaiin 169 an awm mek a ni.

PWD in a tih ber chu - insak leh in saksa enkawl te, kawng siam leh kawng siamsa enkawl te a ni. Tunah hian kawng km 7015-a thui a enkawl mek a, chu chu 34 km. per 100 Sq. 100 km a ni a, a density chu. National Level ah chuan, per Sq. km ah km 142X68

a ni a. Kan ram hi India level ngaihtuahin kawngah hian kan la pachhe em em a ni tih kha a hriat a ni. Kan kawngte hi National Highway te, State Highway te, Major District Road te, Other District Road te, Village Road te, City Road te, Satelite-town Road te a ni a, Lei 134 a enkawl mek bawk a. Tichuan, building a enkawl mek hi - Residential building - 2976, chenna-in (Quarters type) hi - 2006, non-Residential building hi 970 a enkawl mek bawk a ni.

Hetianga hmasawmna hnuk siam tur hian kawng te laia, in te sa tur hian PWD chuan Ministry leh Funding Agency hrang hrangte nen thawhpui a nei a, kan sawi lar em em - SASCI (Special Assistance to State Capital Investment) project hnuaiah hian hna chi hrang hrang 104 thawh mek a ni.

Tin, Central Road and Infrastructure Fund hnuaiah hian kawng km 4,66.75 leh Bridge 2 te thawh mek a ni a, Ministry of DoNER hnuaiah hian kawng km 4,41.10 leh building 21 thawh mek a ni bawk a. Ministry of DoNER hnuaiah hian Bamboo link road 2, crore 100 man thawh mek a ni a, Aizawl by-Pass - Western Site (Sihhmui - Muallungthu) pawh sanction fel a ni tawh a. NABARD hnuaiah hian kawng 15 - km 210, bridge 8 leh building 7 thawh mek a ni bawk. Tun hnaiah kawng 2 leh Bridge 2 chu chu 2023-24 ah hmuh belh leh a ni a, tender mek a ni.

PMGSY hnuaiah hian hna kal lai mek hi 42 a awm a. PMGSY-III ah kawng 17 sanction hmuh a ni a, contract, package 26 turin tender tihchhuah a ni a. Hei hi fund min petu Ministry of Rural Road Development chuan kawng pakhatat contract pakhat zel turin re-tender a lo tihchhuah pawh tender leh nghal a ni. Mizo ten contract lian kan la aim vak lo tih hriain, hetianga Central-in package fel tak an rawn siama hi hetilayah Mizo thalaite thawh theih tawh tura kan siam ve theihnan tiin kan lo split a; amaherawh chu, Central-in cancel turin min rawn ti nghal a. Anmahni rawn tih ang khan tender kan chhuah leh ang a, a hmaa tender kan lo chhuah tawh pawh kan cancel dawn a nih chu.

Ministry of Road Transport & Highway hnuaiah kawng km 3, 137 thawh mek a ni a, National Highway 108 bik hi 96% thawh zawh tawh a ni a; contract terminate a nih avangin balance hi tender tura hmalak mek a ni. Airport kawnga Tlawng Bridge, R. Bridge pawh 78% thawh zawh tawh niin, erection tih mek a ni a, April thla chhunga zo hman tura ruahman a ni. Khumi Tlawng Bridge khu tuna kan han hriat chin Bailey Bridge bulah khuan dawh mek a ni a, hei hi England Technology hmang a ni a, North-East ah pheh chuan a awmchhun a ni dawn a ni.

.... (*interruption*)

PU LALRINTLUANGA SAILO: Pu Speaker, a sawi lai mek khan; nichinah ka sawi hman ta lova. Helai Aizawl Reiek Kai Bridge khu kum riat vel thawh a ni tawh a, vawiiinni thlengin an la complete lova. Kan Minister hian hun remchangah min ensak thei ang em? Hemi Tlawng Bridge, Aizawl to Reiek Kai khu Ministry hmasa, hmasa

leha tan kha a ni a, vawiin thlengin an la zo thei lova. A hmun ah SE te, EE te hruaiin kan en kan en thin a, a contractor khu a luhlul khawp mai a. Kan Minister hian a bik takin min enpui thei ang em, a hmunah te? tiin ka'n request a ni.

PU VANLALHLANA, HON. MINISTER: Aw thei e, kan en dawn nia.

Ministry of Road Transport & Highway hnuaiiah hian Mamit - Bairabi leh Seling - Tuivai double lane road turin survey mek a ni a. Chu chu kan rawtna leh tuna proposal kan neih mek - Bridge over to Tuipui on Lawngtlai - Saiha via Tuipuferry Road pawh DPR siam a ni tawh a, Ministry of DoNER hnuaiiah kawng 4 nos., crore 250 man pawh DPR siam mek a ni. PMGSY-III, second phase a tana sanction tur bridge, DPR 7 nos. chu NIC Silchar ah design proof set turin thawn mek a ni. Ministry of Road Transport & Highway hnuaiiah NRIDCL Highway Construction Development Limited ten double lane road hi an thawk mek a - Seling - Champhai, Zemabawk - Seling, Lawngtlai - Tuipang, Lunglei - Tlabung, Tuivai - Ngopa te an ni. Khang kha department-in hma kan lak dan a ni a, kan membrete'n discussion-a in sawi kha tlem tlem han react kan tum leh ang e.

Pu Ramthanmawia khan PMGSY kawng chungchang a sawia kha –

- i) East Tuipui - Khuangleng, Khuangleng - Bungzung te hi Contractor Lalthanthuami maintain mek a ni a, 2026 thleng PMGSY maintenance hnuaiiah la enkawl tur a ni.
- ii) Khuangleng - Vangchhia hi contractor F. Lalnghakliana maintain mek a ni a, 2027 thlenga enkawl tur a ni.
- iii) Zawlsei - Khuangthing hi PMGSY maintenance BLT-ah a awm tawh lova, hei hi State Fund a tanga enkawl a ngai tawh dawn a, fund awmdan a zirin.
- iv) Mualkawi - Hruaikawn hi FC chauh a ni tawh a, PMGSY-I scheme a zawh tawh a nih avangin, PMGSY-IV scheme hnuaiiah pavement propose tum a ni.
- v) Phullen - Leisenzo hi BLT hnuaiiah a awm tawh lova, state-maintenance fund atanga enkawl chhonzawm tur a ni a, RFP fund allocate dana zira enkawl a ni ang.

Pu Lalhlimpua, MLA zahawm tak zawhna thenkhatte kha hetiang hi a chhanna a ni -

- i) Lunglei - Buarpui Road hi km 66 a ni a, PMGSY-III hnuaiiah FBR technology sanction-a hmuh a ni a, tender mek a ni.
- ii) Aizawl - Thenzawl - Lunglei Road maintain chhonzawm nan SASCI-II, 2024-25 ah tel tum a ni.
- iii) Venglai - Sazaikawn hi maintenance fund hmanga repair tura tih a ni a, 2024-25 chhunga ngaihpawimawh a ni ang.

Lt. Col. Lalhmingthanga rawn point thenkhatte, Tuipui - Chhungte kawng hi Azawl - Champhai kawng zawh hnuah NHIDCL lam te one-time improvement surfacing ti tura hriattir a ni ang. Tuipui - National Highway-VI, 2 pm hi PWD kawng a nih leh nih loh kan lo enfiah ang e.

Pu RM Chakma point-te hetiang hian tarlang leh ila – Kan inkalpawhna kawngte a that zawk theih nan PWD chuan Bridge bika DPR consultant a ruai a, a tahtawlin sanction peka, bridge te pawh dawh tum a ni. Bridge ngaite PMGSY-IV project leh scheme awm thei apiang atanga sanction lak tum a ni e.

Pu Ginzalala, MLA zahawm tak zawhna kha - Champhai leh Khawzawl District bakah Mizoram pumpui kawng km 6287 enkawl nan MRSB hnuaiah crore ₹40, 2024-25 chhunga tan dah a ni a. Amaherawh chu, MoRTH norms angin kawng km 6287 enkawl nan crore 280 vel a ngai a, kan state a pachhiat deuh avangin crore 40 chiah kum 2024-25 hian ruahman theih a ni e. He pawisa hian uluk tak leh tha takin kawng km 6287 enkawl tum a ni. A hun taka pothole repairing te, blacktopping te, crack repairing te ti turin a thawktu engineer te pawh an inzir nasa a. Hei hi nasa taka maintenance, sum renchem nan a tangkai bawk a. Sapin, ‘*A stitch in time saves nine*’ an lo tih thin ang kha a ni e.

Pu Lalramliana Papuaia, MLA point kha - Chawngte kawng hi World Bank project hnuaia new technology solution hmanga World Bank mithiam ten an rawn anga thawh a ni a. Heng laiah hian lung tha a van avangin, ANT technology hi hman a ni. Khawi lai emawa fuh tawk lo leh chhe hma deuh lo awm palh khan kan kawng a tihreawm a, lei nghet lo leh leimin ten kawng chhuat a tichhe nual a ni. Over all-in, kawng chhe lai hi tun dinhmunah 10-15 niin kan enginner ten an chhut a ni. Heng kan kawng laih chhiate repair nan leh permanent repair ti turin contractor Malsawmsangzela hnenah lakh ₹261 lakh man maintenance pek a ni a. Hei bakah hian, a main contractor *performance security* atangin lakh ₹135 kawng repair-nana hman turin ruahman mek a ni.

ATL Road model road-a siam hi PWD duhthusam a ni a, tunah hian State Highway-ah No.1 ni mek a ni a, Aizawl leh Lunglei inkalpawhna hnai ber leh tha ber a ni bawk a ni.

Tin, Pu VL Zaithanzama point - Aizawl DC Office chungchang kha hetiang hi a ni – SACCI ah 2023-24 khan crore 20 dah a ni a. He pawisa hi K-Deposit ah vawi-3 dah a. DC office 17.12.2021-a a kana, a sak that leh dan tur ruahman a nih khan, Buannel - Geo Solution te propose dan chuan, tuna tlang bawk khi rawt hniama, a floor hnih parking-a daha, tuna a hlui awmna level ah hian in hlui anga sak that leh an rawt a. Chu chu DC hmasa hova enho a ni tawh a. Hemi zul-zui hian PWD chuan drawing siam thain, tlang rawta, parking floor pahnih daha, a in hlui awmnaah khan original anga in te deuh sak an rawt a, drawing pawh siam a ni a. District Court building hlui nena a

inkarah hian office building tur pawh dahin, hemi ang hian estimate a siam a; a amount chu crore 49.71 a ni a. Hetih lai hian INTAC lam an rawn che a, DC office hlui anga sak thar leh turin rawtna an rawn siam a. Chief Minister hnenah comment tura thawn a ni a, chuta tang chuan a chin hriat a ni ta rih lo a ni.

Kha kha Pu Speaker, ka tih theih tawk ni teh se. Member ten an thusawi kha heti hian point ka ziak a, tlemin ka confuse deuh hlek a. A tul leh, ziak te pawhin kan la inchhang mai ang chu. (**Pu Lalmuanpuia Punte:** Pu Speaker, khawngaih takin - Minister khan Tuivai Lei Manipur kha min react ve thei em?)

Pu Speaker, Leader of Opposition sawi kha a ni bawk ti raw? a inang a. Leader of Opposition khan khilala lei, Manipur nena kan inkalpawhna tur kha a sawi a. A hmanhmawh thlak a, kan MLA zahawm tak Pu Muanpuia pawh a hmahmawh em em a; kan unaute harsatna tawk an awm a. 'Fur a thleng dawn; kan inpawh zung zung theih loh chuan..' tiin a sawi a. Tichuan, 'officer-te pawh a tul ang angin lo bia la, hma lo la rawh' ka ti a. Tichuan, hma a la a; bridge hmanraw hlui kha hmun hrang hrang atanga phur khawmin, tunah hian bridge chu fur laia kaltlang theih turin buaitsaih mek a ni a. Eng eng emaw han lei ngai pheuh-pheuh a awm dawn a. 'Fur hma chuan dawh zawm ngei tum a ni' tih kha kha ni ta mai selangin.

PU LALRINSANGA RALTE: Pu Speaker, ka zawhna kha min han chhan sak hram se - Rengtekawn to Bawktlang, New Builum internal road kha SASCI atang khan nuai 25 vel sorkar hmasaah khan dah a niin ka hria a; inthlan hma deuh pawh khan department lam chuan tlem tlem an thual tawh a. Kha kha 'khawih chhunzawm leh tumna a awm em' tih kha ka hre duh a; a department lam khawih tur a ni a.

Tin, North Hlimen - Saipum kawng khu a chhe khawp mai a, khung lai atan khuan SASCI atangin pawisa department lam khawih tur bawkin dah niin ka hre bawk a. Kha kha engtikah nge an khawih chhunzawm theih dawn? Tin, North Hlimen - Builum Lui, Hmar tlangdung ho tana a vang-tan zawnga an district capital dawr theihna tur kawng laih tlang tawh kha PWD-in an kawng turin kan ngen a, min enpui tawh a. Khang te kha min ngaih pawimawh sak thei ang em?

PU VANLALHLANA, HON. MINISTER: Pu Speaker, ngaipawi mawh e. Tuna i kawng sawi zawng zawng kha SASCI a thawh tura ruahman deuh a ni a. Chuvangin, SASCI te a lo kal leh anih chuanin chungah chuanin kan thawk thei ang chu.

Tichuan, Pu Speaker, heng ka Demand te hi House zahawm tak hian min pass-pui turin ka rawn ngen e –

<i>Demand No.</i>	<i>Purpose</i>	<i>Amount (in ₹)</i>
12	Parliamentary Affairs	1,03,70,000.00
42	Transports	44,73,93,000.00
45	Public Works	7,32,71,22,000.00
TOTAL		7,78,48,85,000.00

Ka lawm e.

HON. SPEAKER : A lawmawm e. Tunah chuan Pu Vanlalhlana, Minister zahawm takin heng a Demand-te –

<i>Demand No.</i>	<i>Purpose</i>	<i>Amount (in ₹)</i>
12	Parliamentary Affairs	1,03,70,000.00
42	Transports	44,73,93,000.00
45	Public Works	7,32,71,22,000.00
TOTAL		7,78,48,85,000.00

House-ah pass a rawn dil a. Remti apiangin, ‘remti’ ti rawh u le. (**Memberte:** Remti) Remti lo kan awm chuan, ‘remti lo’ ti ula. (*Member remti lo an awm lova*).

A lawmawm e. Minister zahawm tak Pu Vanlalhlana Demand chu House-in lungual takin a passed ta a ni. (**Pu Vanlalhlana, Minister:** Pu Speaker, ka lawm e.)

Tunah chuan Minister zahawm tak Pu F. Rodingliana, a demand kan sawihona te windup turin leh, sawifiah ngaite rawn sawifiahin, House-a pass rawn dil nghal turin ilo sawm ang u.

PU F. RODINGLIANA, HON. MINISTER: Pu Speaker, ka lawm e. Demand-te kan han lay tawh a. House-a vawi khat kan han din ve na a ni a; pulpit atanga din ang deuh a ni a, a zamawm rum rumin ka hria a. Nimin lamah te, “naktuk lamah duh tawkin i sawi dawn a, ding ve suh” an ti a; rilruah thil eng eng emaw a lang a. Ka department chungchanga thahnemngai taka min han sawipuitu kan memberte chungah, a hmasain lawmthu ka sawi duh a.

Pu Speaker, Demand-a kan luh hmain, thu-kamkeuna tlem han sawi ve ka duh a. Politics-a la inhmang ngai lo te helai, ram rorelna in sangah kan han thu ve a. Kan senior, politics-a lo inhmang tha tak tak tawhte Zoram mipuiin an lo chibai liam tawh hnuah, politics-a tawn-hriat la neilo hnualsuatna nei miah lova Zoram mipuiin helai in sanga thu tura min han ruat ve hi, a lawmawm ka ti a. Chutih rual chuan, ‘mawhphurhna sang tak kan nei a ni’ tih te rilruah a lo awm a. Kan ram kalsiam siam tha tura he in

sanga lo thut ve hian hmun hrang hrang atanga thurawnte kan han dawn hian, chul ram rita han kal mai hi Zoram-mipui hian rem min tihpui lo niin ka hria a.

Pu Speaker, kan budget te kan han en a, kan han thlir ho a. Kan sawi tak ang khan, kal hmasate kalna kawnga kan kal ve ngawt khan kalphung-thar lang lo tura thiante leh min duhsaktute thurawn kan han hmuh hian, kan kalkawngah kan lo petek deuh a nih pawhin min lo tawngtaipuia, dem leh deu mai lova min lo dipui turin ka'n sawm duh che u a.

Pu Speaker, kan vannei hlein ka in hria a. '*Kan opposition lam*' han tih te pawh hi uihawm khawpin ka hria a; tun tumah hi chuan min guide thain thil tam takah min finchuahin a. Hengah te pawh hian, '*Opposition*' tih hming aimah hian, '*Kaihruaitu*' tih te pawh hi a awm mah mah zawkin ka hria a ni.

Nichinah khan kan member-pui Serlui Bialtu, Pu RS-a khan min han cho deuh a, hun tlemteah thil tam dauh sawi turin kan inbuatsaih a. Mipui hriatthiam zawngin kan lo sawi kim hman lova. 'State Day of Prayer' kan han nei zo a. A hnuah helaiyah kan han ding leh a, kan sawi tum ang te kan sawi zo hman lova. He ZPM kalphung thar hi chu Pathian-a innghat, chunglama pur chaw thin kan nih avang hian kan project te, kan policy reng reng te pawh hi Pathian kalpuina leh Pathian awmpuinaa dipuitu kan ni a. Lammualah theihtawp chhuahin kan tawngtai a, mittui nen Pathian hmaa kan kun khan, 'he khawvel miteah kan project a hlawhtlinna tur hi kan innghat lova, chung lamah kan innghat a ni' tih kha Pu RS-a pawh khan lo hria se ka duh a ni. Kan inngahna chu, 'chunglam a ni' tih kha min hriatsak se a thain ka hria a.

Pu Speaker, Demand No. 18 - Printing & Stationery-ah han lut ta ila. Printing & Stationery Department hi ... Tui a awm thei em aw? Dang te pawh a ro rum rum mai a. (**Hon. Speaker:** W&W te khan han tihsak teh u.) Printing & Stationery hi department lian tak anga lang lo, mahse pawimawh deuh si a ni a. Sorkar revenue tuaktu tangkai tak niin, department hrang hrang pawimawh ang zawng zawng buaipuitu a ni.

Pu Speaker, Printing & Stationery Department enkawl nana thil pawimawh tak mai ka tarlan duh chu - *Guidelines of Excavation of Printing Works in the Mizoram Government, 2018* a sawi angin, Mizoram sorkar hnuaiya publication zawng zawng hi Printing & Stationery Department kaltlang lo chuan tih tur a ni lova. Dan awmsa angin sorkar thil pawimawhte P&S kaltlang lo chuan mahni duh ang anga lo print ngawt chi a ni lova. Mizoram Government Press hi Printing lam kaihnhawih reng reng thawk tura beisei a ni a, hemi atan hian tun dinhmunah Mizoram-a printing press nei changtlung berte zinga ngaih a ni. Tunkum zirlaibute pawh hi department-in a theih chen chen kan chhuin, theihtawpa hmalak a ni a, heta tang pawh hian revenue eng emaw zat hmuh beisei a ni a. Pu Speaker, tun sorkar tharah hian P&S hian stationery item-te a tam thei ang ber department-te mamawh man tlawm zawka phuhruk te kan tum a, department-te pawhin sorkar Dan dinglai angin min lo dawr hram hram turin kan

inngen nawn leh a ni. Hemi chungchanga kan member-pui ten in rawn tih pawh kha kan chhang nual a; in la khawp kham lo a nih chuan, a thuziak te pawhin inpe ta ila a that ka ring, Pu Speaker.

Demand No. 39 - Power & Electricity kha kan tuipei hlein ka hria a, a lawmawm ka ti a. Ka department chante mi 24-in kan sawi a, ka ngaihtuahna chu – ‘SASCI te kha hetiang lamah te hian lo hmang ta se, kan sawi zawng zawngte kha chu eng emaw chen sawi ngai lo tur’ tih te ka rilru ah lo lang a. Kawng hrang hrangin hma kan la a, Pu Speaker, ka Demand No. 39 - Power & Electricity Department hi kan ngai pawimawh tlangin ka hria a. Kan Bible-ah pawh hian, ‘*Eng lo awm rawh se*’ tih te chu a lang hma khawp mai a; electric pawh hi kum 1962 khan diesel generator 75 kV hmangin siam chhuah a lo ni a, P&E Department hi kum 1983 khan PWD atanga indangin tunah hian kum 41 hmel a lo hmuh takah chuan, tun sorkar tharah hian mahnia ding thei turin hmalakna kalpui mek a ni a.

Mizoram hian power siam chhuah theihna tur potential kan ngah em em a, tunah hian megawatt 3000 chuang kan lui atang hian siam chhuah theihna tur kan nei a, chuti chung chuan tunah hian megawatt 38.55 chiah kan la thar chhuak a. Kumin ah hian kan mamawh san lai ber, hmanni khan min hrilhtute khan min lo hrilh sual deuh hlek a, kan staff-ten Ni 28.1.2024 dar 6:15 PM khan, “power kan mamawh zat chu megawatt 163.10 a ni” an ti kha, ‘160’ ka lo ti a, tlemin ka lo sawi sual deuh a. Hemi hun lai tak hian state chung atanga kan thar chhuah (Tuirial pawh telin) megawatt 54.55 a ni a, hei hi ngaihtuahna a ti thui khawp mai. Solar hi chhunah chauh a hman avangin hetah hian kan han telh loh a ni.

Tin, State pawn atanga kan lak hi a tam hle mai a. Pu Speaker, tun dinhmunah pawn lam atanga kan chawkluh a tam zia en hian, thlamuang taka awm thei turah kan inngai lova. A pawimawh em em chu - power-a kan intodelh nan, a bikin potential kan neih hydel-ah insawrbingin tunah hian lui thlan bik kan nei a, chung atang te chuan chak takin hma kan lain, department hrang hrangte pawh kan dawr a. Hei hi kan ram in ro kan neihte, kan lui luang ral mai mai turte tangkai zawka kan hman theihna tura ruahmanna kal a ni a. Amaherawhchu, kan tum angin CWC te leh department hrang hrangte a kal zung zung thei lova, tun kum te hi chuan hmalak kan tum hman a. Hei bakah hian sorlar hi tun aia tam zawk intodelh tura hmalak a ni a, hei hi, sorlar hi chu ram a awm a nih chuan intodelh tura hmalak zung zung theih a ni a.

Hetih rual hian, *peak-hour* a kan hman theih dan tur battery system te, pump storage system te pawh tunah hian a zir bing tur department-ah te pawh inruatin state dangah te pawh hmalak mek a ni a.

Pu Speaker, Mizoram puma mipuiten electric tha taka kan chhit theihna tur atana eng pekna tura khawl leh hmanrua kan enkawl lian zualte chu - Hydrel station 15, 38. 55

mW thar thei te' Solar Station 6,22.35 mW te; heng bakah hian a pawimawh bera kan han sawi, transmission line 132 kV & 66 V hi km 1128.6 kan enkawl mek a. Nichina kan ngaihthlak tak ang khan, hengte hi a rei tawh hlawm khawp mai a. A insulation-te leh a cable thenkhatte pawh hi thlak a ngai a, chu chu kan Sorkar sum ina a daih ang zel leh Central fund atang tea theihtawpa pawh luh tum a ni a. Distribution line 33 kV to 11 LT kan enkawl te pawh hi a thui khawp mai a, km 10,867. 23 a ni a. Hei hi kan mamawhna a sang zelin, tunah hianin Central lamah te pawh kan han dil a, kan State sum harsatzia kan hria a. Chuvang chuan, member zahawm tak takte'n in rawn sawi phuhrukna tur atan tunah hian project vaibelchhe tel a inmung mek a. Chu chu tawngtaina nen kan innghahna a ni.

Tin, distribution transformer kan han sawi tak hi kan vei tlangin ka hria a. Tunah hian 2385 Mizoram pumah a awm mek a. Heng zinga 68% vel hi chu kum 20 hmalam atanga lo *run* tawh a ni a, a life-span hi kum 20 a ni a. Chuvang chuan, a lifetime a tawp tawh avangin, chhiat rup theihna, 'kan Sorkar a lo inrin lawk theihna tur' tiin hma kan han la a. Helai hi Pu Speaker, ka'n sawi zau deuh hlek duh a. Kan House Leader hian DoNER atangin crore 20 transformer leina tur kan hmu dawn niin min rawn hrilh a, kan lawm khawp mai a. Amaherawh chu, budget kan siam tawh hnuah khan kha pawisa kha tourism related-ah lo chuan a lo hman theih loh a. Chuvang chuan, transformer kan lei tum angte pawh hi kan lei tam thei lova. Tuna kan mamawh zual phuhrukna tur atan hian he Sorkar thar hian lakh 700 a dah a. Hei hi kan hotute leh kan department te pawhin, 'hei hi Sorkar kan din tawha vawi khata transformer kan lei hnem ber tur a la ni' tih kan hria a, kan lawm khawp mai. Hei hi Sorkar achievement ropui takah pawh kan ngai a ni.

Transformer man hi a tlawm lo khawp mai a, 500 kVA hi ₹21,80,402/- vel a ni a, hei hian a fitting charge te a keng tel a, a thenah hianin. Tin, 200 kVA hi ₹11,85,906/- a ni a, 100 kVA hi ₹40,5604.75/- man a ni a. Hengte hi kan mamawh zualte a ni a, a bikin Aizawl khawpui chungah hianin heng mamawhna hi a sang em em mai a. Pu Speaker, mipuite pawh hi kan inennawn ve deuh a ngaiin ka hria. Load kan chhiar laiin a tlem thei ang berin kan in report a, khami mil khan veng tinah transformer kan lo set a. Amaherawhchu, kan han hmang tak tak a, kan in report let te kan lo hmang ta si a, chu chu kan transformer-in a zo lova; hei hi tuna kan buaina tam ber pakhat chu a ni a. Kan engineer-te pawhina an lo chhut tel loh, tuna kan han ngaihtuah thar leh chu - Veng khata mobile kan charge-na te ringawt pawh hi a lo tam em em mai a, fast-charging te phei hi chu a watt a lo sang khawp mai a, 65 te, 82 te a lo ni a; kha kha veng khat hian a rualin kan lo charge vek mai a. Heng te pawh hi tunah chuan, khami mil khanin transformer te pawh hi vuahbelh kan tum a ni, tih House hi ka han hrilh duh a.

Pu Speaker, kan ramina kan buaipui, *transmission loss* chungchang leh *AT-loss* kan ti mai a; hengte hi India ramah kan sang-filawr angin a lang a. Chumi tihrehna tur atan chuan tunah hian RDSS Scheme atangin Aizawl-ah pawh hrui-dum kan han ti a, he

ABC cable hi kan kaih mek a. Hengte a nih hunah chuan, a hrui a chah avanga power loss te, a hrui tet avanga a thleng tha lo te pawh hi eng emaw chen a ziaawm turah kan ngai a. Hengte pawh hi tunah hianin hmalak turin ruahmanna project te kan han siam a. Chungte pawh chu hmannia Delhi kan kal te pawh khan tih mai theih turin ruahmanna kan han siam a. Amaherawh chu, eng eng emaw harsat awm neuh neuh te a lo awm a.

Tin, kan policy atan pawha kan dah, kan member te pawhin kan vei em em - Smart meter chungchang hi tlem han sawilan ka duh a. Smart meter hi, sawi ang khan state tam takin an hmang tawh a, a tangkai em em mai a, keini pawh hian tih ve kan tum a. Tuna kan mamawh zualpui distribution box te, line thlak chungchang te leh tuna kan current man dik lo, kan bill dik lo tih zawng zawngte hi he pre-paid smart meter hian a chhawk turah kan ngai a. Henga kan thawktu tam tak, kan meter reader tam takte pawh hi hmun dangah kan suan phei kan inbeisei a ni. Tunah hian, Pu Speaker, he *transmission loss* tiziaawm tur hian 2X10 mVA 33, 11 kV Sub-Station Chite-ah kan bun mek a. Heng bakah hian 132,133 kV line upgradation hi Mizoram hmun 5-ah kalpui a ni a. Hengte hi kan peih fel hnuah chuan, tuna bial hrang hrangin harsatna in rawn thehluhte pawh hi a ziaawm turah kan ngai a.

Tunah hian, Pu Speaker, ngaihrawlh theih deuh subsidy chungchang kha han sawifiah ka duh a. Kan sorkar hian rooftop-solar hi tam zawk tunah hian pechhuak turin ruahmanna kan siam a, heta tan hian subsidy-in crore ₹4 lai kan dah a. Hei hi tlem ka han sawi zau duh a.

Central hian 60% MNRE-in min rawn tum sak dawn a, mipuia 20% chauhin an khulh tawh dawn a ni. Central in 60% a rawn tum ang a, state-in 20% kan tum bawng ang a, chutah chuan 4000 kilowatt chuang tharchhuah kan tum a. Chuta tana sorkarin he rooftop-solar atana pawisa a sen hi crore ₹4 angin lang mahse, JERC rate-a kan han chhut hian kum khatah ₹30,20,89,630/- chuang kan hmu let dawn a ni, he rooftop solar atang hian. Hei hi a aia la that theihna chu, tuna kan rate hi ₹7.2/- vel a ni a, khatianga chhut phei kha chuan hei aiin a la sang thei a ni.

Pu Speaker, kan sorkar kal hmasate khan office chungah solar plate tam tak kan lo dah a, hei hi tunah kan han zirchiang a, kan department-in; uluk taka kan zir hnuah Council of Ministers-ah kan thlen a; Council of Ministers chuan P&E Department kutah a rawn dah ta a. Hemia power grid a kan thlun luhna tur atan hian crore 3 tun sorkar hian min pe a, kan lawm khawp mai a. Chuta tana power kan hralh leh theih tur chu 1300 kW a ni a, Chuta tana sorkarin sum a hmuh let tur chu lakh 104 vel nia beisei a ni. Heng te pawh hi sorkarin tangkai loa kan lo hman hi, 'tangkai taka hman kan tum a ni' tih kha Pu Speaker, ka han sawi nawn leh duh a.

Solar bikah hian hmalakna tunah hian a kal nual a; a bikin Thenzawl-ah sawn 10 mW hmalakna, tun kuma zawh tura beisei a ni a. Sumsuih-ah te, Vanlaiphai-ah te 20 mW, 5

mW te leh Keifang-ah 10 mW te, heng hi chak taka hmalak tum a ni a. Private Entrepreneur tam zawkte henga an rawn luh theihna tur atan hian solar policy pawh hi tunah hian ennawn mek a ni a. Kan policy atang lo hi chuan heng hmalakna te hi a kal chak tak tak thei lova. Chuvang chuan, solar policy hi Pu Speaker, ennawn mek a ni.

Power tariff chungchang hi sawi a tam a; a tir, he sorkar kan chelh hma atanga kan campaign lai atanga kan au-hla kha a ni a. Kum 2022 leh 2023 khan power leina atana kan sum sen zawng zawng chu crore ₹535.39 a ni a. Hemi kum vek hian revenue atanga kan hmuh chu crore ₹661.45 a ni. 2022-2023 chhunga mipui hnen atanga kan khawn chhuah atangin crore 120 chuangin sorkar a hlawk a ni, tih kha Pu Speaker, waviin hian House hi ka han hrilh duh a.

Pu Speaker, kan sorkar hmasate khan thahnemngai takin company hrang hrang nen agreement - MoU te an lo ziahpui a. Amaherawhchu, uluk takin kan han en a; kan MoU ziah te kha kan ram tan a him lo nia kan hriat avangin, tunah hian company 9 hnen atangin agreement kha kan cancel tawh a. Chuta tana power siamchhuah tura beisei chu, 2392 Megawatt lai mai a ni a. Heng te pawh hi tangkai zawka hmang thei tur leh, kan ram source of income atana a hman theihna turin company te pawh kan han dawr a. Amaherawh chu, kan company dawrte hian Tuirial ang deuha hma min lakpui tura min dawr deuh zel avangin, hei hi sorkar chuan a dang tha zawk beiseiin kan la nghak mek a ni, tih Pu Speaker.

Pu Speaker, kar hmasa mai khan agreement te kan han ennawn a. Tuivai leh hemi Tuirini bikah hi chuan Central lam pawhin min rawn phurpui a; hei, kan hotute pawh naktuk te leh a tuk leh lamah an liam thla ang a. Tuirini hi sorkar hmasa ina an lo tih tawh loh kha tunah hian thu thar sorkar atangin vawihnih kan dawng tawh a, chung te chu beiseina nen a kan thlir a ni a, a tak alo thlen kan nghakhlel hle mai a, hun reilo te chhungin tuikhuah a hmalak kan tum a ni. Tin, Pu Speaker, DPR kan zawh chuan Tlawng leh Tuichang te phei hi chu kan State sumin a theih ang anga hmalak kan tum a, hengte pawh hi sorkarin hma a han lak dawn chuan paper work hrang hrangte tih a lo ngai a, chu chu keimahni department mai nilo, CWC te, Central lamah te hmalak a ngaih vangin kan tum angin kan tichak zung zung thei lova. Power siam hi kan engineer lam ten uluk takin an han chhut a, chuti lutukin a la huphurh awm lo ni te pawhin kan han hria a. A chhan chu, kum khatah pawisa a hman teuh theih loh a, a intah-tawla hman tur a nih avangin, keimahni ta liau liau Serlui B anga khuah tum hi kan nei nual a ni, tih House hi ka han hrilh nawn leh duh a.

Pu Speaker, khami chungchanga memberte zawhna kha tuna ka speech khan ka chhang nualin ka hria a; kan lo chhinchhiah vek a. Mi 24-in in rawn zawt a, khangah te pawh khan a fel lo deuh leh eng emaw deuh a awm a nih chuan chianguang zawka ziaka han inpek te pawh a thain ka hria a; kan member-te duhthu kan sam lo ang tih kan ring a.

Chuvang chuan, duhthusam zawka in zawhnate kan chhan theihna turin, a tul a nih chuan ziakin kan la inpe turah kan han ngai a ni. Chu chu ka chhan theih tawh nise.

PU LALRINTLUANGA SAILO: Pu Speaker, khawngaihin - nichina ka rawn sawi kha Minister zahawm tak khan min rawn react tura ka duh ka han tarlana kha; 132 kV leh 11 kV, West Phaileng leh Marpara kha a chanchin eng nge ni? Khalaia riverine reserve kha High Court ah forest lam kha hneh an ni tawh chuan, a hna khu a kal theih zel ang em?

PU F. RODINGLIANA, HON. MINISTER: Hei hi kan House Leader pawh hian a ngai pawimawh khawp mai a. Tin, Minister te nen pawh kan sawi dun tawh a, hetiang chiah hian Hnahthial ah pawh buaina a awm a, sum awm siin hna kan thawk thei lo a ni. A thuin a fel a, amaherawhchu paper work a la fel lova. Khulai km 1½ vel khu hna kan thawk thei lova, ‘drone in kan lo ti mai ang e’ ti te pawhin, tawngka chuan kan lo ti a. Amaherawh chu, drone a tih pawh an phal lova. Ni e, forest hi a khirh ang reng khawp mai a; a bulah lo tin 10 hmun vel an vat a, kawng bula thing 20-30 kih kha an phal lova, chu chuan khulai khaw 60 vel khu a tibuai a. Tih dan kawng chu kan zawng a, a minister te, a department te pawh kan han ko khawm a. Helai hi kan la ti thiam chiah lova, ‘theih tawp chu kan chhuah a ni’ tih kha kan memberte ka han hrilh a ni e.

Tin Demand No. 40 - Commerce & Industries hi Pu Speaker, memberte pawh khan kan ngaihven a, hemi hnuaiiah hian thil tam tak a awm a. Kan ramah hian industry lian tham han sawi tur a la awm lova, chutih rual chuan industry tenau chu kan din ve nual tawh a, heng industry kan din atang hian kan thalaite leh mi tam takin hna a sang tel, a sing tel te pawh an hmu ve tawh a, helai hi ka han sawi zau deuh ang a.

Covid lai khan, a hming hruaitu kan nih angin, ‘han in report ula’ an ti a, industry hrang hrangin kan hnathawkte, a sing chuang industry neitute’n hna kan han pekte, khatiang khan agriculture base industry hi kan policy mila kalpui kan tum a. Heta tan hian theih tawp kan chhuah a, kan budget atang te, holding-policy atang te pawhin hma kan la a. Chunga tan chuan central te pawh kan dawr a, kan policy te nena inher-rem turin kan policy te pawh tunah hian kan ennawn leh mek a. He policy ennawnnaah hian thil tam tak inkaihnhawih a awm ve a, chungte pawh chu deptt. dang nen inrawna zir tlan a ni a. Tin, chu bakah chuan, planning lam hian investment policy an rawn tichhuak a, chungte nena inhne rema, hand-holding policy te nena kal ruala, bana kaiha industry din duh te tana awlsamna turin he policy te pawh hi kan han ennawn leh a.

Pu Speaker, C&I Deptt. kan enkawl hnu pawh hian thalai mi-engemaw zat hmasawn thei lo tam tak an awm a. Chutih rual chuan, industry lo din tawh te, ram neih loh avanga expand theilo mi tamtak an awm a. Tunah hian industry ram hmun hrang hrangah kan nei a, a bikin Aizawl-a kan neih - Zuangtui te, Leite te, Luangmual teah khuan, a ziakah a khat thup si, a taka zu kalin a thawl em em a. Hengte pawh hi, ‘ka ram’ ti ringawt lo

hian, vawiinniah hian a ram neitute he House kaltlanga kan ngen duh chu – ‘ka ram’ tia mahni area pawh hre mumal lo mitam tak an awm a. Tunah hian kumtin a sang telin lehkhathiam an lo chhuak a, hengho hi sorkar-hna ah kan inthun vek seng dawn lo; chungho tena sawrkar-hna ni lo, mahni thiam hmanga eizawna ngialnghet tak an din theihna tur atana ram pek hi sorkar hian kan tum a ni.

Chumi tur atan chuan vawiin nia, ‘ka ram’ ti tute pawh hi kan ennawn leh ang a. VC pass nei thenkhatte, an kum enin leh computer hmanga nalh taka rawn chhute pawh hi an awm a ni. Chuvang chuan, helaiah hian thil felhlel deuh awm ni te pawhin kan hria a. Hei, ka bulah hian Revenue Minister pawh a awm a, anni te nen pawh hian, ‘VC pass hian engchen nge thil a tihtheih’ tih te pawh kan zir mek a, an nite nen pawh hian inhne rema ruahmanna siamin he kan thalaite tana hmalak hi kan tum a.

Pu Speaker, MES Cell hi tunlai ah chuan kan buaipui khawp mai a, he MES cell ah hian kan mamawh tam tak a awm a, chu chu mizo-tawnga ziak turin MES Cell ah hian central atang pawh hian tanpuina crore eng emaw zat kan hmu tawh a. MES Cell hi Industry Deptt, hnuaiah kan din dawn a, chu chuan kan thalaite leh thingtlang lama industry din duhte theih tawpa puih kan tum a. Mahni mobile-ah mahni tawngin kan lo chhiar tawh ang a. Chutah chuan, ‘hemi line hi ka duh’ an lo ti ang a, chutah chuan puitu tur central-in mi 20 min rawn rawih sak dawn a, chung ho chuan an kalna line tur atan, bank loan a ni emaw tih ngai te leh a policy-in a ken tel tam tak kha an tihpui dawn a. Tunah hian hei hi ruahmanna kalpui a ni a, sorkar approval kan neih fel chuan hun reiloteah hawn hman kan inbeisei a ni.

Pu Speaker, border-fencing chung chang hi kan han sawi hlawm a. Ni e, Myanmar (Burma) chungchangah hian ngaihtuahna kan seng a, a biak turte kan han bia a. Biak tur mumal hi an awm lova, tunah rih chuan. Tin, a department ang pawhin ngaihtuahna kan han siam a; khilam pang khi chu kan han ngaihthah ta ringawt mai a. ‘Bangladesh lamah hian hawi ila; sawhthing chungchangah te, aieng hralhna chungchangah te’ tiin ambassador te nen pawh kan inbe tawh a. Tun Chapchar Kut khan lo kal a tum a, kan sawm ta lo niin ka hria a. Khatah khan a hmuna va kala, enho te pawh kan ti a.

Tin, lei dawh tur chungchang an rawn sawi pawh kha Bangladesh lamin NOC an lo la pe ve lova. Chungte pawh chu min chah a, “in CM hovin Ministry of Home Affairs ah min sawi pui ula, hma chak takin kan la dawn nia” tiin. Kan tan chuan hei hi a tha khawp mai a. Hnaite, Bangladesh-ah man tlawmtein thil kan hralh thei dawn a. Nichinah khan kan member thenkhatte khan in rawn sawi a, an policy a tha angreng khawp mai a. “Lung kan hralh a nih chuan, an mahni atanga eng emaw tal la ve turin agreement kan siam ang” an ti a. Hmunphiah te pawh an lei a nih chuan, an plastic chair emaw, eng emaw tal kha kan lak ve zel a ngai a ni Pu Speaker. Khatiang khan an mahni ah policy mumal tak an lo nei a. Chuvang chuan, duh duha han tih theih ngawt pawh a ni lova. Tunah hian an Ambassador min hrih dan chuan, “Meghalaya atang khuan nitin hian

lung truck trip 300-400 kan la a, heta tanga min rawn pek theih chuan, a hnai zawk bawk a, kan duh zawk ngawt ang; helai vel hi kan mamawhna lam” an ti a; heng te pawh hi ngaihtuahna ti thui tak mai a ni a.

Pu Speaker, Mizote hi inzir kan ngaiin ka hria a. Tunah hian kan industry-ah thil kan han siam chhuak ve nek nek a, vai siam tha zawka ngaihna hi kan la nei tlat a ni; hei hi chu, a mizo tak pawha kan tantlan a ngaiin ka hria a. Tunah hian kan thil siam hi a chhe bik tawh lova, raw material kan lakna hi a inang vek a, kan khawl company te pawh a inang vek a. Chuvang chuan, kan mizo siam ngeite pawh hi hei policy kan neiha, ‘parda leh office material-ah te kan hmang dawn’ kan ti a, chutah chuan keimahni industry atanga kan tharchhuah hi, keimahni leh keimahni kan inngaihsana kan in lei loh chuan, kan industry-te an riltam mai dawn a. Kan thianpa pakhatin a ti a, “lunglu leh rangkachak hlir pawh siam chhuak ila, tun anga hralhna a harsat chuan, kan rethei tho ang” a ti a; kha kha tuna kan ram dinhmun a ni a. Chuvang chuan, helaiah hian zoram-mipuute pawh kan harhchhuaha, mahni siam, mahni ta ngei kan hman theihna turin tan kan lak te pawh a tulin ka hria a ni.

Tin, Geology & Mining hi demand hnuaiyah hian a awm a. He department hi kum 2010 khan directorate-puitlinga hlankai a niin, department pawimawh tak a lo ni ta a. In kan sak dawn reng rengin anni tel lovin tunah chuan Aizawl khawpui chhungah phei chuan hmalak theih a ni ta lova. He department hi sorkar tan sum chhungtu tha ve tak mai a ni a, tha lehzuala sorkara sum an rawn chhun theihna tur chuan staff indaihlohna bawk kha a ni leh a, Pu Speaker. Chungte chu vawiinah hian kan ngaihtuah nawn a ngaiin ka hria a.

Tin, ‘*staff indaihlohna*’ tihah kian, ‘Power & Electricity ah hian hei hi a zualkai bik em aw’ tiin member ten an sawi a, kha kha a dik thawkhatin ka hria a. Pu Speaker, (ka han let leh lawk ang a) khalaiah khan outsourcing-in feeder hnih kan kalpui a, Suangpuilawn leh Phuaibuang a ni a. Suangpuilawn-ah hian khaw nga a ni a, chuta tan chuan kum khatah hian ₹5,76,400 kan hlawh ve tawh a ni, outsourcing kan neih avangin. Sorkar-hnathawkte inlak a harsa tawh a, hetiang lam kawng hi kan hawi a tul hlein ka hria a. Tuna project kan neihsa pathumte hi tunah hian kan outsource bawk a, chungte chu - Teirei, Kau-Tlabung leh Maicham-II te an ni a, hengte pawh hi thawktute kan indaihloh avangin outsourced a ni a. Hetiang zawng hian tun sorkar hi chuan kalpui a tum nasa a, khatiang bawk khan industry lamah te pawh central chakna hmangin leh anmahni MSME te nena tang kawpin, hand-holding policy te, kan ram thalaite leh kan rama eizawng duh, mahni huan atanga thlai thar han process duhte tan leh, sawhthing te pawh nakinah chuan a bak deuh hlek te pawh kan la thar ang a, district tin mai bakah constituency tinah te khatiang process-na turte pawh kha hand-holding policy, he demand hnuaiyah hian hmalak tum a ni a; chungte chu vawiina kan han tarlan theih te chu a ni a.

Kan memberte zawhna thenkhat pawh kha kan chhang nghal te pawhin kan hria a. A la kim lo deuh a nih chuan, Pu Speaker, han inzawh nawn te pawh a theih tho turah kan ngai a, a ziakin kan chhinchhiah vek a. Chumi kan khawp kham lo a nih pawhin, department te nen kan zir ang a, a chhanna kan inpe thei turah kan ngai e.

PU LALRINTLUANGA SAILO: Pu Speaker, khawngaihin - Luangmual Industrial Growth Center hi 1999-2000 chho a din kha a ni a. Dan anga pass nei zawng zawngte hi pass, khatih laia valid nia ngaih kha sorkar khan compensation pawh a pe a, a ram chin pawh concrete-a hung a ni. Amaherawh chu, khumi area chhungah khuan mimal ram, vawiinah hian phuahchawpa, awm ngheh tuma hma la mek an tam em em mai a. A hung pawn atanga km 1 aia hla mahah khuan huan ka nei a, ka kal ngun khawp mai a; Hei hi engtin nge sorkarin hma lak a tum? Tun hma atangin Zuangtui ah te pawh Industrial Growth Centre kan nei tawh thin a. Mimal kan ngam lo fo mai lai hi, khalai kha kan minister thar hian khauh zawkin hma lak tum dan a nei em? ‘Mimal ram’ tih kha han sawi zau ta ila.

Pu Speaker, a zawnin term li ngawt VC ka ni a, chuang chuan, ka hrechiang thawkhat a. Tuna ‘VC pass’ an tih khu 1974 te a ni a, 1974-ah chuan ngawpui a ni a, VC-in a issue lo hrim hrim a, minute hluih pawh. Heng hi kan ram tan thil tangkai tak a ni a, sorkar hmasain hma a lo lak a ni a. Mimalin building an sa a, an intinghet chho lai khu sorkarin a hriatpui em? engtia hmalak nge a tum?

HON. SPEAKER : Minister khan a chhan theih chuan chhang sela, a chhan theih loh chuan nakinah nisela.

PU F. RODINGLIANA, HON. MINISTER: Pu Speaker, Revenue Department nen kan tangkawp ang a, department lam sawi dan chuan hma kan la ang. A hmawr kan bawk dawna, a chunglam atangin, ‘lo ngawi deuh ru’ tih kan dawng zel a; chu chu an buaina bul a ni a. Keini chu, kan mite an awm vak lova, kan huai mai thei. Chuwang chuan, theih tawpa hma lak kan tum a. Nichina ka sawi ang khan, Industry din duh tak takte tan khulai khu kan hauh dawn a, a chung lam atangin kan tang ve dawn lo; department hmalakna ang kha kan kalpui mai dawn a ni.

PU ROBERT ROMAWIA ROYTE: Pu Speaker, khawngaihin, *Point of clarification* - BDO office a taka function tura engkim peih vek tawh, powerline a luh loh avanga Forest Quarter leh forest hmuna la awm naw naw ringawt khu; thildang a inpeih vek tawh si a. Kan Power Minister zahawm tak hian he House-ah hian assurance pein, tun thal chhung hian power min pe mai thei lawm ni? *Zeuh* ti sela, a tak a chang thei mai sia; chu chu ka ngen e.)

HON. SPEAKER : Khawngaihin - *Zawhbelhna* hun a ni lova, kan bial te te kha kan tih dawn chuan, member tin hian sawi tur kan nei theuh mai dawn a.

Chuvangin, inhrethiam ila. Hei Budget Discussion a ni a; minister a ding tawh a. Minister kha ngaithla tluan hram hram ang u. Kan ngaih pawimawh tak tak chu nakinah a ziak pawhin a tihtheih turah ngai ang (**Pu Lalduhoma Chief Minister:** Pu Speaker, tawi tei in..). Aw le, House leader ilo sawm ang.

PU LALDUHOMA, HON. CHIEF MINISTER: Pu Speaker, khulai IGT hmun khu, kei pawh ka chakai-meichher chhitna hmun thin a ni a, ka hrechiang ve khawp mai a. Mi-engemaw zat an awm ve tawh a, school te an mamawh a, Anganwadi pawh an run ve tawh a ni, anmahni sumin. Nakinah chuan Biak-in te an la mamawh dawn a, industrial area ah khan; civil mi an awm ve dawn a; a kal zelah chuan, Local Council pek a tul hun te pawh a awm thei a ni. Chuvang chuan, khulai khu ngun taka ngaihtuah a ngai a. ‘Eng pass nge an neih’ tih te pawh zirchian deuh a la ngai dawn a. Industrial Area pawh lo ni sela, civil mi an awm ve dawn a, NGO te pawh an ding chho ve zel a, YMA branch te pawh a ding vek tawh a ni. Chutiang chu anih avangin, ngunthluk deuh hleka ngaihtuah a ngai a.

A ngaih pawimawh awm zawk chu - Industry din tura pass nei si, an ram awmna lai pawh chiang lo, kut-thlak si lo ho khu a hnawk zawk a ni. Khung khu erawh chu, sorkarin chak deuh hlek zawka a enfiaha, grace period pawh pekin, chumi hun chhunga kut an thlak lo a nih chuan, mamawh ngawih ngawih ram nei lote hnena pek dan sorkarin a la ngaihtuah zawk tur a nih hmel khawp mai.

PU F. RODINGLIANA, HON. MINISTER: Pu Speaker, heng ka Demand-te hi khawngaih takin he House zahawm tak hian min pass pui turin ka ngen e –

<i>Demand No.</i>	<i>Purpose</i>	<i>Amount (in ₹)</i>
18	Printing & Stationery	13,19,72,000.00
39	Power & Electricity	9,43,51,96,000.00
40	Commerce & Industries	60,44,11,000.00
TOTAL		10,17,15,79,000.00

HON. SPEAKER : Minister zahawm tak Pu F. Rodingliana khan heng, a demand-te:

<i>Demand No.</i>	<i>Purpose</i>	<i>Amount (in ₹)</i>
18	Printing & Stationery	13,19,72,000.00
39	Power & Electricity	9,43,51,96,000.00
40	Commerce & Industries	60,44,11,000.00
TOTAL		10,17,15,79,000.00

House-ah pass a rawn dil ta a; remti apiangin, ‘*remti*’ ti rawh u le. (**Member:** Remti).
Rem tilo kan awm chuan, ‘*remti lo*’ ti ula. (*Remti lo an awm lova.*)

A lawmawm e. Minister zahawm tak Pu F. Rodingliana Demand chu House-in lungrual takin a pass ta a ni. (**Pu F. Rodingliana, Minister:** Pu Speaker, ka lawm e.)

Tunah chuan, Minister zahawm tak Prof. Lalnilawma, a department chante kan sawihona windup turin kan sawm ve leh ang a. Sawifiah ngai a tihte rawn sawifiahin, a demand te House-ah pass rawn dil nghal turin ilo sawm ang u.

PROF. LALNILAWMA, HON. MINISTER: Pu Speaker, ka lawm e. Hei, mut hun dawn tawhah kan han ding ve tan dawn chauh a ni a, hun hman rei a inthlahrunawm khawp mai, Pu Speaker, Amaherawhchu, ka windup speech hi pheh 11 vel kan han duang a, hei zawng zawng hi chhiar chhuak ta ila darkar khat vel chu a ni dawn a, Member zahawm tak tak tena an rawn sawi kha han react ve te a ngai baw si a. Amaherawhchu, a tawi thei ang berin tih ka tum ang a.

Tichuan hei, demand move-tu han nih hian disadvantage a awm deuhin ka hria a, mahni bial tan sawi theih baw si loh, midang bial tana ngaihthlak char char kha a ni mai si a. Amaherawhchu, tuna kan present zawng zawng hi ka bial - Tawi-mipuute tan pawh khan a tel a ni tih kha ka bial-mipuute’n min lo hriat sak ula, a tha ang e. In chungah ka lawm zel a ni.

Tichuan, kan senior member, Pu C. Ngunlianchnunga khan Tukinah, “Minister a rawn nia a hmel kan hmuh hian, khawchhak hmel a lang” a ti deuh a. Media ah pawh, ‘filmstar pakhat hi i va ang ve maw le’ hi an rawn ti deuh ziah mai a; ka ang a niang nge, Pu Speaker. (**Hon. Speaker:** ‘*An ngah chu hmeltha*’ an tia ni lawm ni? A hmeltha a ni ang e.) Nia, chuti lai te chu; a lawmawm zawkah ngai ang, filmstar an neih te chu le.

Tichuan, tukina *Zawhna* ka chhanna kha, han tihfuh loh deuh pakhat ka neiin ka hria a, Pu Speaker. Dr. Beichhua rawn zawhna - kan mau neih sate hman tangkai a ni em? tih kha, ‘hman tangkaina a awm ka hre lo’ ka tih kha, ka ingngaihtuah a, ‘ka tisual a nih hi’ ka ti a. Chu chu, hman tangkaina a awm a, *Entirnan*: furniture ah te a, handicraft ah te, chutiang chuan kan hmang tangkai a. Amaherawh chu, ‘kan department chuan a hman tangkai lehzualna tur kan ngaihtuah zel dawn’ tih kha ka insawifiahna ni ta se.

Chutih rualin, a zawhna pakhat tho ah khan, ‘ka Chiang lo’ ka tih, hmundanga thawnchhuah kha; hetah hian Horticulture Department hian *Bamboo Cultivation & Development* lamah hma a la a, mau thawnchhuah a enkawl tel chiah lova. Hei hi chu department dangte nena sawi hova ngaihtuah ngai tur chi a ni ang. Horticulture Department atang chuan mau thawnchhuah chungchangah hian, “khapna a awm kan hre lo” tih kha ka rawn chhanna ni se, a tha ang e.

Tichuan, member zahawm tak tak tena an rawn sawi kha, a chhanna tawi te tea inpek kan han tum ang a, kan han react ang a.

Pu T. Lalhlimpua, Lunglei West Bialtu zawhna kha heti zawng hian han chhang ta ila - Lunglei ah tui connection khar tawp a ni lova, kan tuilak Greater Water Supply Scheme, mihring 66,000 tana design chu tunah 79,000 lai kan lo nih tak avangin, kan tui pump chhuah hi kan khamkhawp ta lova. Chuvangin, tui connection nei sa tan neih belh phalsak an ni ta lova. ‘Chhungkaw thar, In thar emaw tan chuan pek belh theih reng a ni’ tih kha min lo hriatsak se a tha ang e.

Member zahawm tak Pu RM Chakma zawhna - JJM hnuaiiah Chawngte solar pump chungchang kha, March, 2024 hmaa zawh hman tum a ni a. ‘Test-pumping kan nei thei em’ tih kha - nei thei maithei; a pumpui erawh chu April, 2024-a zawh kan inbeisei. Hei hi a mah han awm se tha tur a nia; a lo ngaithla tho turah ngai ila. Tui hi Chawngte ‘L’ ah chuan kar-khatah vawithum, (hei hi department lam atanga kan han finfiah a ni a) Chawngte ‘P’ ah chuan kar-khatah vawi 2; tin, Chawngte ‘C’ ah hian thla-khatah vawi 1 kan sem thei a. ‘*Thla-hnih chhunga vawikhat sem*’ tih kha chu, ‘a ni chiah lo e’ tih kha kan han react-na ni se.

Pu Papuaia zawhna kha – Thangpui JJM solar pumping hna hi thawh zawh tawh a ni a, hemi hnu hian trial pump neih a ni a; a pump set hi impeller a lo chian loh a vangin contractor-in pump thar a bun leh dawn mek a. March thla chhung hian hlawhtling taka commission theih beisei a ni, tih kha min lo hriatsak se a tha ang e.

Kan member zahawm tak Pu C. Ngunlianchunga rawn sawi ka react-na chu hei hi a ni - Combined Rulkual-Saikah-Vanhne-Paithar Water Supply Scheme (solar pumping) hi kum 2019 khan hman tan a ni a, khaw 4 laiin an rin avangin, *thal-va-ek-char* ah solar pump hi an khamkhawp lo khawp mai. Tunah an tuilakna thlang lawkah chuan tui a la awm nangin, ‘an khaw 4 kham phahna a ni lo’ tih department-in kan hriatpui a.

Chutihruah chuan, Rulkual khaw bulah solar pump tur tui tha deuh an neih thu an khawtlang hruiatute’n an rawn sawi a, hei hi tun thalah enfiah tura ruahman a ni a. Hemi lui hi a pump theih chuan, tuna an solar pump rin nen he tlangdung khaw 4 harsatna hi a zia turah kan ngai (**Pu C. Ngunlianchunga:** Km 1 leka hla ah a awm a, min ensak law law se a va tha dawn ve; R. Vanhne khaw hnuaiiah lawk) Hemi rual hian a tih theihin ka ring.

Member zahawm tak Pu Clement-a zawhna kha - Ruantlang Water Supply Scheme (solar pumping) hi tunhnai lawkah NABARD funding turin administrative approval hmuh a ni a, ‘hma lak tan thuai theih tura ngaih a ni’ tih lai kha, i bial mipuite kha lo hrilh chhawng la an lawm khawpin ka ring. Nula Baryli hi chhan loh mai chi em maw

ni; a mah a awm si lova, a rawn zawt tam ang reng si a. Pu Speaker, a chhanna hi kan lo pe chhawng mai ang, ziakin kan pe thei reng baw e.

Member zahawm tak Pi Prova-i zawhna kha - Tlabung Sub-Division hnuaiiah heng khuate hi *un-authorized village* an nih a vangin kan ti a, JJM central-a a list kan thehluh lai khan, unauthorised village an nih a vang khan, an tel lo a ni. Tunah *authorized village* an lo nih takah chuan, JJM a tawp hnu ah pawh hmalak dan tur te chu ngaihtuah la ngai tur chu a ni, heng khaw 7-te hi; chu chu min lo hriat sak la.

Tichuan, Siaha tui pump chungchang a Bialtu-in a a rawn zawh kha - Hmanni Lunglei ah E-in-C te nen kan zin pheii a, keini Aizawl lama kan rawn haw hnu khan, ani Siaha lamah a tlang a, khami hunah chiah chiah khan a khawl a lo chhia a ni. ‘A chhiatna rawn keng ni lovin, a chhia a va hmu a ni’ tih lai te kha. Hei hi Ni 7.2.2024-a thil thleng a ni a, enfiah nghal niin, phone pawhin kan inbe reng a, thlalak te a rawn thawn a. “E! file-a kal hman a ni tawh lo; he hi thil hmanhmawh thlak a ni a, emergency in action lak nghal a ngai a nih hi” kan ti a, kan CM te pawh kan rawn tawh lo; ‘kan mipuite an mangang dawn si a’ kan ti a, kan ti pawp a ni, Pu Speaker. Tichuan, ni 9.2.2024 ah hmanraw mamawh ABB Pune a tangin chah nghal a ni a, a khawl siam nan hian ni 45; a lo thlen chhoh nan ni 15; a vaiin ni 60 vel tal a ngai dawn a ni. Chuvang chuan, tlem chu min lo la nghah hret a ngai, Pu Speaker.

Tichuan, Sangau-a chhungkaw 80-te hnenah tui connection pek loh chungchang, a bialtuin a rawn sawi ang khan - JJM, DPR siam laiin an la awm lova, heng chhungkua te hi; Raltlan niah kan ngai deuh a. Chungte a nih avang chuan, ‘permanent connection pek theih an la ni rih lo’ tih kha ka react-na ni se.

Hei PHE budget a tlem chungchang reaction te hi ka nei tho a. Amaherawh chu, Pu TBC-a khan a rawn chhang nual tawh thovin ka hria a. Tawite chu han chhiar hrim hrim chu a chakawm tho mai, Pu Speaker.

Nikum 2023 (kum kal mek a nih chu) JJM hnathawh vanglai a ni a, state-matching share hi JJM sum atan dah niin, tunah hian JJM hna hi zawh deuh duak a ni a. Chuvangin, JJM 2024-25 atan hian sum mamawh a lo tlem ta a. Hetih lai hian tui pump-na tur sum budget ah chuan nikum lam aiin a pung zawk a ni. Chuvang chuan, khati lamah chuan a tha turah ngai ila. PHE budget hi sum mamawh pum pui atanga chhut chuan, ‘nikum aiin kan chhe hran lo e’ tih kha kan react-na ni ta se.

Tin, Dampa Bialtu Pu Lalrintluanga Sailo rawn sawi kha ti hian han react dawn ta ila. - Pukzing Vengthar, Vengchhak lampang hi gravity-in a thleng thei lova, hei hi ‘rang takin kan lo enfiah ang e’ tiha kha. (**Pu Lalrintluanga Sailo:** Pu Speaker, Hruiduk nen khan a ni.) Pu Speaker, a hnuaiiah hian Hruiduk, ka la rawn chhiar dawn a. Hruiduk hi JJM hnuaiiah thawh zawh tawh a ni a. Amaherawhchu, tui lakna hnarah hmunphiah

hmun siam a nih avangin, tui hna a tlahniam a, tunah hian 20 LPCD vel chauh a ni a. Hmunphiah huan an lo siam pawh chu eizawna a nih rualin, a pawh khawp mai. (**Pu Lalrintluanga Sailo:** Pu Speaker, hmunphiah hmun siam vang a ni lo; an tui lakna kha a thalo zawk an lak vang a ni. A hmunah ngei ka kal e.) La enho a ngai nih chu, Pu Speaker, i bialah te pawh kan rawn kal ang chu le.

Aizawl West-III Bialtu Pu VL Zaithanzama khan – “Sihhmui atanga Aizawl Greater Water Scheme (Phase-III) pump chhuah turah hian khawl lam pang zawng zawng chu peih fel a ni tawh a. Amaherawhchu, a hnathawktu tur manpower lampang an la indaih lova” a rawn tih kha a ni a. Hei hi DP&AR lamah pawh thlen a ni tawh a, “beiseina sang tak kan nei a ni” tih kha ka react theih ni se a tha ang e, Pu Speaker.

Tichuan, Horticulture leh RD lampang hi tlem a la awm a, kan ti thuak thuak ang e. Horticulture lampang kha a hlawmin ka rawn khaikhawm tawh mai ang, Pu Speaker.

Cold-storage te kha kan sawi a. Ni e, cold-storage kha mamawhna a sang khawp mai. Theih tawpin kan han ti ang a, kan scheme, hemi post harvest management hnuai hian a awm ve thei a, chutah chuan hma kan la chho ang a. Amaherawhchu, kan sawi zawng zawng kha ‘kan rawn ti thei vek ang’ tihna a ni chuang lova, sum awmdan a zirin hma kan rawn la ang a. Chutih rualin Serlui Bialtu Pu Lalrinsanga Ralte rawn rawtna - *convergence*, ‘MLA fund leh heta scheme-a sum awm convergence’ a rawn kha, ‘hein hi uar chho ila a tha awm mang e’ ka ti a. Ka bialah pawh solar cold-storage tihna tur kha MLA fund leh kan scheme atangin tihkawp ka tum a ni.

Khatianga kan tih theuh theih chuan, solar cold-storage pakhat kan leina khan pahnih-pathum te a lo daih ang a. Lehkha hi ka dawng hnem khawp a, Pu Speaker – “chutah chuan; chumi laihna tur bial chhungah..” tih te; an MLA fund kha an rawn sawi tel miah lo a ni. Khati anih chuan, “in bialtute’n MLA fund nuai 150 an nei a lawm le; hengte pawh hi lo dil ve thin teh u” ka ti thin a. Khatia kan in-share tawn kha a ngai; ‘a daih zai thei zawk a ni’ tih lai kha; MLA fund hi hum talh i tum lo ang u. Hetia a hman tangkaina tur atan; ‘khawtlang ro atan chuan i ui lovang u’ tih kha Member-te ka request ni se, Pu Speaker.

Tichuan, link road pawh hi, lehkha kan dawng hnem khawp mai. Hei hi horticulture scheme hnuai atanga tih tur nge, Agriculture atangin? Nge, RD *Ni-100 inhlawhna* kan neih te atang zawk? tih te pawh hi, la en hova, hma lak ho chu a ngai khawp mai. Chu chu ka react-na ni se.

Dragon fruits chungchanga ‘MNF an nih loh avanga paih leh’ tih kha chu, tun sorkarah hi chuan awm lo turah ngai ang. Pu Speaker, keini chuan bialah pawh horti-scheme hnuai hian tuizem siamna tur a awm a. “In thlan reng rengin, a tuihna nei leh a hman tangkai tur tak tak kha thlang rawh u; a party mi leh sa kha no.1 ah kan dah tur a ni lo.

Amaherawhchu, an dinhmun a inang a nih chuan, kan party mi leh sa te chu kan duhsak tur a ni dawn lawm ni” ka ti a; kha kha chu a awm ve thei a ni. Amaherawhchu, kan thliar lo; a thawk thei tak tak tur leh hma la tur tak tak, a hmanh tangkai tur kha chu kan telh vek; ka bialah khian fiah ngamin kan nei. Kha kha min lo hriatsak u la a tha ang e, Pu Speaker.

Tichuan, link road kan zo tawh bawh a, budget chungchang kha tawi tein. Horti-ah pawh khan tuna tel ta lo, kum kal meka tel (kumhlui) ti mai ang, budget-a tel kha ‘NABARD Collection Centre’ kan ti a. Chu chu lakh ₹736.35 te kha a collection centre kan sak zawh tawh chuan, a dang kha kan mamawh belh lo ni lovin, kan nei deuh tawh turah kan ngai a. Kan duh tawh deuh rihah ngai ta i la, khang kha a tel ta lo a ni; tin, SEDP-a ₹54,00,000 kha a tel tawh lo bawh a. ‘Khang vanga budget tlahniam a ni’ tih lai te kha ka han highlight leh zawh ni se. Tichuan, Rurban kha 15th March, 2023 khan a tawp tawh a. Chuvang chuan, a thar te an lo siam leh a nih loh chuan, kha kha kan nei tawh dawn lo.

Tichuan, Communiy Hall kha mamawhna a sang khawp mai a. Tun hmaa Rural Department hnuaiia ka thawh ve thin lai khan ‘Social Education’ tih scheme kha a awm a, chumi Social Education hnuaiiah chuan Community Hall kha kan sa teuh thei a ni. Tunah hian khami scheme kha a awm tawh si lova; chutah chuan Community Hall kan mamawhna a sang si a, kan scheme-ah a leng ang em tih te pawh kan department officer-te nen pawh la thliar hoa, a remchan dan te pawh la zawn a ngai ang a.

Tichuan, a demand lamah kal tawh ang aw, Pu Speaker. Demand No. 25- Public Health Engineering, hmasawwnna kan sawi apianga ngaihpaawimawh berte zinga pakhat chu - *Tui intur thianghlim leh hnianghnar* taka kan neih theih hi a ni. Chu chu, PHE Department tum ber leh kan hmalakna pui ber a ni. Hetah hian State level-ah Secretariat kan nei a, E-in-C Office kan nei a; chutah chuan, CE - 4 an awm a; Headquarters - 2 (Zone 1 leh Zone 2) bakah Director (PMU) te kan nei a; SE Circle - 5; Division - 16; Sub-Division - 35 kan nei a; chungte hmanh chuan Mizoram pum hi kan enkawl a ni.

PHE hmalaknaah chuan JJM hi tun March, 2024-a tawp tur a ni kan tih kha. Thingtlang khua awm zawng zawng chhungkua 1,33,0060-ah tui connection pek tawh a ni a. Thingtlang khua 778-ah khan, 554 kha zawh fel tawh a ni a, khua 174 hi la bak a ni; amaherawhchu, ‘pipe connection chu a lut vek tawh’ tih kha hmanni khan kan House Leader, CM ni bawkin a tweet nghe nghe a nih kha. Kan PHE Department kha, ‘*Congratulations*’ a rawn ti a, a rawn tweet a ni. 100% connection chu kan pe tawh a ni, tih lai kha min lo hriatsak ula.

Tichuan, House-ah problem kan han sawiho liam liam ta a, action kan la nghal a ni. Inkoh hman a ni tawh si lova. Kan E-in-C in online-in Field Officer-te virtual meeting a neihpui a, chutah chuan an progress report te an han pe liam liam hlawm a. Chutah

chuan, a then March thla-a zawh kan inbeisei laiin, March thla chhunga zawh theih loh tur hi kan nei ta nual mai; chu chu member-te pawhin min lo hriat sak ula, theih tawp chhuahin kan bawhzui reng a ni. House member-te'n kan han sawi atang hian, 'kan contractor-te pawh hi a nawr ve a ni' tih min lo hriat sak ula. Tichuan, NESIDS hnuaiiah hian project pathum - crore 176.79 man thawh mek a ni a, chung zinga pakhat chu 'Alternate Gravity Water Supply Scheme of Aizawl' kan tih, hmanna ka chhanna, 'Tawi Tlang atanga tui kan lak' ka tih kha, Tawi a lo ni lova; a zawhna kha 'Tawi' tih a nih avangin, 'Tawi' ti khan ka chhang ve bawk a; tih dikna an rawn thawn a. 'Tawi Tlang' ni lovin, 'Hualtu Dil' tih zawk tur a ni. Hualtu khaw mipuite hnenah pawh ngaihdam ka dil ni se; Hualtu Dil (Tuikhuah) a ni e.

Tichuan, 92.50% kan zo tawh a ni. Tunah hian a pipe-in Muallungthu a thleng tawh a, pipe-fitting ah tui kha Tuirini thleng a haw tawh a, heta pump tur an test loh chuan a puak leh ang tih a hlauhawm a, mumal deuh a test a ngai a, Tuirini chu gravity khan a thleng tawh a ni. 'NESIDS-a lakh ₹55 leh tlem' tia kan sawi lana kha, nimirah kan House Leader, Finance Minister ni bawk khan a rawn puang a, NESIDS ni lovin, SASCI atangin kan nei ta zawk dawn a ni; a lawmawm khawp mai. NESIDS kha tlem a rei dawn deuh avangin, SASCI ah hian min ngaihpawimawh sak deuh a ni, tih kha member-te'n min lo hriat sak ula, Lunglei mipui pawh an lawm turah ngai ang.

AMRUT project hi UD&PA sum atanga kan thawh a ni a, project 20 - crore ₹145 man hu kan thawk a, NABARD hnuaiiah project 6 - crore ₹41 hu kan thawk bawk a ni. SASCI (Special Assistant to States for Capital) expenditure hnuaiiah project 2 -crore ₹12 man kan thawk bawk a, NABARD RIDF-19 hnuaiiah project 4 – lakh ₹2550.91 pawh hi administrative approval kan hmu tawh a, hma kan la chho mek a ni. Household tui connection bikah hian harsatna kan nei a - Miin tui connection a rawn dil a, chutah chuan a rawn deposit hnuah pipe kan chah leh thin a, chumi hnuah chauh connection kan tih sak thei thin a ni. Chu chuan harsatna min siam leh thin a, chu chu hei hi a ni - *Mizoram Right to Public Service Act, 2015* ni chuti zata tihfel tura kan tih kha kan pha lo thin a ni. A chhan chu, an rawn deposit hnuah chauh pipe lei a ngaih thin avangin; duhthusamah chuan khang pipe leikhawlna - *Stock Suspend* head hnuaiiah hian dah tur awm thei se chuan, heng harsatna hi kan sutkian theih a rinawm a, chu chu House hian min hriatpui se a that ka ring a, SASCI Part-IV, Milestone 3 - *User Charges Reform* hnuaiiah hian tui bill pek leh tui bill lak lama a ti tha state-te tan lawmman incentive hi crore ₹75 hmuh theih a ni a, chutah chuan PHE Department pawh theihtawp kan chhuah a, connection tam thei ang ber nei turin hma kan la a. Kan target crore 75 chu incentive atan Department of Expenditure, Ministry of Finance-in 15th February khan sanction min rawn pe a ni.

Kan House Leader (kan CM ni bawk) kha sorkar hmasaa kan Minister leh kan Department official-te thawh hlawkna chungah khan lawmthu sawi tho mahse, PHE Minister ka nihna angin ka'n sawi ve leh hrim hrim ang a. Pu Speaker, khata tanga sum

kan hmuh thenkhat kha heta tan hian hman ka tum a, kan committee tawh a. Tui leak thina hi kan sawi tam a; WhatsApp atang pawhin, ‘tui leak hi tihtlem dan a awm lo maw’ tih te kan dawng hnem a. Water Audit te pawh hi kan la kalpui dawn a, Pu Speaker – ‘Kan pump chhoh zat engzat nge; khata tanga kan sem kha engzat nge; engzat nge distribution loss awm’ tihah te water audit kalpui kan tum a ni.

Hmanniah WhatsApp-ah message min rawn thawn a, tui a leak char char mai a ni. “E! Hetiang anih chuan..”, ka ti a, E-in-C ka hrilh nghal a, an lo bawhzuia nghal a; a tukan report an rawn pe a - mimal tui pipe tuiek tawh a lo chhia niin! Tui supply chhung zawng kha chu a luang par par mai a ni; khatiang kha a awm nual a. Tichuan kan rilruah chuan, “E! hetiang anih chuan, monitor dan ngaihtuah a ngai a nih hi; Apps te duangin, a hmuna hmu apiang khan (mipui tu pawh ni rawh se) thla a la ang a, a rawn click ang a, job-taking system a awm ang a, kha khan hetah Apps-ah a rawn thawn vat ang a; kha kha kan hmuh chuan a bialtu hnenah khan action la chat chat turin tih kan tum a ni. Chutiang chuan hmachhawp a awm a ni, Pu Speaker.

Tichuan, *Swachh Bharat Mission* hi chu sawi tam lo mai ang; a rei dawn tlat. ‘Khua 284-a composed pit kan nei’ tih te hi ka ziak nual a, amaherawhchu, a tam dawn tlat, Pu Speaker.

Tichuan, *a-public health* lai hi tawitein han sawi leh lawk ka duh. ‘*Thingtlangah tui litre 55 mi pakhatin ni khatah a dawng tur*’ kan tih lai khan, tui kha thianghlim lo ta se, tih kha kan hlauthawng leh ta a ni. Chumi vil tur chuan, *Water Quality Monitoring & Surveillance* programme kan nei leh a. Chutah chuan Sub-Division Laboratory 18 kan nei a, District Laboratory district 8-ah a awm bawk a, hengte khaikhawm tur hian State Referral Institute a awm bawk a. Khang te hman tanga kai khan, kan tui intur hi ‘a thianghlim nge, a thianghlim lo’ tih sample te lain nitin kan test ziah a ni. Chutianga eng emaw lo thianghlim lo palh a awm chuan, a tihthianghlim dan ngaihtuahin action kan la nghal a ni.

Tichuan, revenue kan collect chungchangah PHE Deptt-a kum kal meka kan target chu lakh ₹7,200 a ni a, chutah chuan January, 2024 thlenga kan target collect zat chu, lakh ₹6,528.255 a ni. March thla a han tawp meuh chuan kan target khumin, lakh ₹7,800 kan thlen kan inbeisei a ni, Pu Speaker.

Tichuan, a PHE bikah chuan (a khaikhawm deuh nan) chona nasa tak, lian tak, issue lian tak kan nei a. Hetah hian ka’n chhiar ang e - Tuna kan issue lian ber nia kan hriat chu, *tuihna tlem tial tial* hi a ni a, kan Leader of Opposition pawh khan a rawn tarlang a ni. *Entirnan*: Tuna JJM kan kalpui mekna hmun thenkhatah bultan tirha survey neih laia tuihna tha tawka kan ngaih kha, kum hnih emaw kum thum emaw a lo liam a, tuihna a tlem tial tial a, “khamkhawp pump tur a awm lo” tih report kan dawng. Hei hi a tir tanga a tuihna tlem hrim hrim kha chu thu dang ni rawh se, tuihna tha reng si, kum

hnih-thum hnua tuihna a tlem avanga pump tur dukhawp loh hi a awm nual tawh a ni. Hetah hian engtin nge hma kan lak ang? Hetiang a nih chuan tuihna humhalh kawngah tan kan lak zual sauh sauh a ngai hle tih a lang. Tuihna humhalh kawngah department-in theihtawp chhuaha hmalak kan tum a. Pu Speaker, i remtihain - He House kaltlang hian tuihna humhalh kawngah thawkho turin department hrang hrang leh Zoram-mipuite pawh telin, kan sawm nghal a ni.

Tichuan, Demand 32 - Horticulture Department hi, ei leh bara kan intodelh theihna tura hmalatu department pawimawh tak pakhat a ni a. State level-ah Secretariat leh Directorate awmin, district 11-ah Horticulture office kan nei a, 2021 khan, ‘Rural Development area-ah tih ni se’ tiin thuchhuah siam a ni a. Amaherawhchu, pakua chiah kan fill up thei a ni. Chungah chuan manpower mamawhna te pawh a sang hle a. Amaherawhchu, state sum dinhmunin a zir loh chuan hetia kan kal hi a ngai a ni.

Tichuan, Horticulture hnuaiah hian hlawm lian deuh deuh - *Mission for Integrated Development of Horticulture* (MIDH) hnuaiah hian a lian ber chu kan kalpui a; tin, *National Bamboo Mission* kan nei bawk a. Tichuan, ‘*Per Drop, More Crop*’ tih a ni a, tuikhuah turte kan siam a, irrigation pipe leh sprinkler te hmangin hma kan lakpui a ni.

Tichuan, MIDH hnuaiah hian season nei kan thlai chin, ‘seasonal crop’ kan tih te, tuna kan sorkar pawh hian thlai thlan bik a neih - sawhthing, aieng leh hmarcha te kan kalpui a ni. Thlaichin ngawr ngawr bakah kut-hnathawktute mamawh - training pek te, field visit te, exhibition leh fair te buatsaih a ni a. Heng bakah hian *Protected Cultivation* - greenhouse hmanga thlaichin kan kalpui bawk a. A hlawhtling zual Serchhip Dsistrict-ah phei chuan thalai tam takin heng greenhouse te hmang hian eizawna an nei a ni.

Tichuan, hmasawna tlem han tarlan leh ka duh a. Pu Speaker, zikhlum hi thlasik chauha chin theih tura kan lo ngaih thin kha, tunah chuan a chi tha zawk hmangin furah pawh kan ching thei ta. Zikhlum chingtute’n kumkhatah vawihnih te an thar thei tawh a; awl lai pawh awm mang lovin, mahni eizawna lamah an bur ngar ngar mai tawh a; hei hi thu lawmawm a ni.

Tichuan, thlai thar tur chuan, a inngahna ber *thlaichi-tha* a pawimawh a, chungah chuan thlaichi tha kan ngaipawimawh a; thlaichi-ah pawh hmasawna kan hmu zel a. Chutiang bawkin, tuna thlai kan thlan – aieng, sawhthing etc. te pawh hi; sawhthing hi a *raw*-a kan hralh chuan, a man kan tel tlem a; process-in emaw, a oil te emaw pawh siakhhuak thei ta ila kan hlawk zawkin ka ring a. Tunah hian a *raw*-in hralh mah ila, khati lam hawi zawnga kan kal a ngai a ni. A oil atan eng sawhthing nge tha ber tih te; Mizoram-ah hian thing-laidum te, thing-pui te, thing-ria te kan nei; a eng hi nge a oil atan tha ber tih te; damdawi siamtu company ram danga mite nen in link dawn pawh ni ila, eng sawhthing hi nge an duh ber tih te pawh zirchian a ngai a, kan chin uar bik turte pawh kan thlan a ngai a ni.

Chutilaiin, aieng (spice) te pawh, hetia kan ei aieng pangngai atan chuan eng pawh a pawl lo mai thei. Chuti lain pharmaceutical leh medicinal atana kan hmang dawn a nih chuan, a *curcumin level* sang te pawh kan thlan a ngai a ni. Chutiang chuan - hei hi chu heti lamah chuan a curcumin a sang duh bik; heti lamah chuan aieng pangngai bik' tia kan thliar fela, mumal deuha kalpui a ngai ang a. Chu chu he kalphung-tharah hian deparment-in heti zawngin hma lak kan tum a ni.

National Bamboo Mission te kan sawi tawh a. *Per Drop, More Crop* - tui far hlutzia kha kan inzirtir tur a ni.

Horticulture Deptt. Hmathlir ka han ziaak duah a, mahse chhiar vek lo ila. *Thlaichi-tha* neih hi hna pawimawh berah kan nei dawn a, kan hmalakna reng rengah *result-oriented* in kan kalpui ang; hei hi a pawimawh. Nakinah RD scheme te pawh kan sawi ang a, result-oriented *Entirnan*: Thlai ina a hman tangkai tur tuikhuah te, tuizem te kan han siam ang a. Rampa-lailengah tuizem te kan din a, kha khan khawia thlai nge a va pek ang; khawi atangin nge tui a lakluh ang; khang kha a in link tur a ni; result a awm tur a ni. Tui dah khawl chuan, a tul hunah thlai a chawm tha ngei ngei tur a ni tih hi kan kalpui tum dan a ni. Market thlir chungin kan thlaichin turte kan thlang ang.

Kha kha Horticulture Deptt chungchanga ka han sawi theih ni se.

Pu Speaker, Rural Development bika hi sawi zau a chakawm hle mai a; minute 33 a kal tawh a. Rural Development Department thil tum ber chu - *Thingtlang khua leh a chhunga chengte hmasawna tur ngaihtuaha hmalak pui* hi a ni. A awmzia takah chuan, kawng hrang hranga thingtlang mite dinhmun chawikan *Entirnan*: Ei leh bar zawn kawngah te, in leh lo din kawngah te, inkalpawhna kawng tha an neih theihna tura hma lakpui te a huam tel vek a ni. Tichuan RD pawh hian Secretariat leh Directorate kan nei a, district 11-ah District Rural Development office kan nei a. RD block 28 kan nei a, hetah hian Mamit Bialtu Pu Zira khan, "Mamit District, kan constituency-ah chuan block pakhat mah a awm lo" a ti a. Ni e, Hachhek Bial kan ngam lo niin kan hmu deuh a. Hachhek biala Kawrtethawveng-ah inthlan dawnah khan kan han hawng leh kha ni a. A awmsa, a bial chhungah Zawlnuam Block a awm a, Hachhek-ah an nei leh a, amaherawhchu Mamit bialah a awm lova. Mamawhna a tam; kan CM (kan House Leader) pawhin a rawn react tawh kha; duhthusamah chuan, 'block 40 vel hi nei ila' tih kha a ni ta a ni. Amaherawhchu, keimah tak pawh hi ka inthlahrung, Pu Speaker; han nawr chiam dawn ila, DP&AR leh Finance lamin, 'kan tlin lo' an tih chuan, chu zawng chu a ni mai. Chuvang chuan, Saitual pawh khi - Saitual hi District Headquarters ni si, Phullen a block office an han dawr ziah khi, thil kalphung chu a ni chiah lovin ka hria. Chuvangin block office kan nei dawn a nih chuan, Saitual-ah kan nei hmasa ber dawn lawm ni, Pu Speaker? Amaherawhchu, tunah rih chuan kan inthlahrung deuh a, chuti lai te chu kan mamawhna ka'n sawi ve a nih chu.

Tichuan RD Department hian UN - *Sustainable Development Goal* milin kal kan tum deuh a ni; tunah hian kan kalpui mekna pawh a awm tho a. He UN - Sustainable Development Goal hi, a hnuai a awm ram hrang hrangte'n hma an lakna tur, hemi goal hi 'chumi hunah chuan kan hlen tur a ni' tia theihtawp chhuaha hma kan lak tur a ni a. Tunah hian RD Department pawhin UN - Sustainable Development Goal khaw hrang hrangah, 'thermatic village development' an ti a; '*helamah chuan heng khua hi hma la bik rawh se*' tih kha kan nei a. Chungah chuan -

- (a) *Women Friendly Village* - Hmeichhiate tana khaw awmna nuam ber atana kan thlan chu Leng a ni. Hei hi East Lungdar Block-ah a ni a.
- (b) *Child Friendly Village* - Naupangte tana khaw nuam ber, a ni tur a ni a. Khati zawnga thlir khan Sawleng thlan a ni. Hei hi Darlawn RD Block ah a awm a.
- (c) *Healthy Village* - Khaw hrisel, hriselna lama hma lakpui turin village hi kan thlang leh a, chutah chuan, Lungdai hi kan thlang a ni; Pu Dawngtea bial a ni nghe nghe a.
- (d) *Clean and Green village* - Fai bawk, hring nuam bawk atan Sailam hi thlan a ni a, hei hi Aibawk Block a ni.
- (e) *Village with Good Governance* - Village inenkawlna, inrelbawlna tha bikah chuan Lengpui thlan a ni a, hei hi Tlangnuam RD Block ah a awm; 'teh daih a' in ti mai thei a, mahse, chu chu a awm a ni.
- (f) *Water Sufficient Village* - Tui hnianghnar bik awmna tura hi Maubuang thlan a ni.
- (g) *Poverty Free and Enhanced Livelihood* - Retheihna free em em hi chu a theih lohin ka hria a; amaherawhchu, kha kha kan tum a ni. Retheihna um boa, eizawna te pawh, kha kha kan tum a ni. Hei hi Aibawk Block a mi tho a ni.

Heng khuaa hmalaknate hi documentary film a siam a ni a, SIRD & Panchayati Raj, Mizoram official youtube channel ah entheih a ni a. '*Kalphung-thar nen RD*' tih hi, kan aupui kan aupui a, a takin kan tan dawn a lawm kan ti a, rilrua lang pakhat a ni a, Kalphung thar nen RD hi kalpui kan tum. RD scheme te hi tangkai zawk leh hlawk zawka kalpui kan tum a ni.

Kan hmalakna reng reng hi 'target nei leh *result oriented* a ni tur a ni' kan ti a ni. Chutah chuan *Entirnan: Sustainable Development Goal No. 1 - No Poverty* (retheihna umbo) a ni ta a ni. Hei phei hi chu NITI Aayog pawhin a ngaih pawimawh ber zinga mi, '*Core of the Core*' ati hial a ni. RD scheme hmangin retheihna umbo hi kan target lian ber leh pawimawh ber tur a ni. Tichuan, SDG No. 5 - *Gender Equality*; SDG No. 8 - *Decent Work and Economic Growth*; SDG No. 10 - *Reduce in Equality* tih a ni a. Intluktlanna hi thingtlangah pawh RD hian kan target tur a ni. Thingtlang mipui ten RD Department hlawk zawka an chhawr tangkai theih nan priority hetia sem sawma, inhlawhna tura sem sawm ringawt hi a tha kan ti lova, priority neiin nakinah pawh hna kan siam chho dawn a ni.

Hmalak tura ruahmanna kan siam ang. Thingtlang khaw 874-ah *Ni-100 Inhlawhna* hi kan pelut ziah a; chutah chuan, ‘kan thingtlang mipuite engtin nge kan chawikan’ tih hi zawhna lian tak a ni. Kum khata kan hman zat, nakinah kan la rawn tarlang ang a, chuta tang chuan kan hisap thei mai ang. A dik tak chuan, khang hmang khan kan eizawanna hian hma a sawn tawh tur a ni. Pu Speaker, tuna kan *Ni-100 Inhlawhna* hian kan moral a tichhe hial em aw, ka ti deuh a ni. Thawh loh hlawh hi kan la em; hei hi reform kan ngai. Tuna he House-a demand kan sawiho hi lo thlir te chuan min lo hriat sak rawh u. Pu Speaker, nangmah kaltlangin - *Thawh loh hlawh hi kan la reng dawn em ni?* Kan hrethiam tho; ni khat minimum wages kan siam hi ₹249/- a ni; a ni tha chu a ni chiah lo. Amaherawh chu, kan state sorkarina tlin tawh leh central sawrkar remtihain, ni-khatah ₹249/- hlawh turin kan fix a ni. Nilenga thawk turin kan inbeisei chuang lo ang a, ‘₹249/- man tal kha chu kan thawk tur a ni lawm ni’ tih hi ka rilruah a awm a ni.

Chuvang chuan, kan RD official te nen pawh kan sawi tawh a, hei hi chu kan reform a ngai. I thawh loh hlawh kha i account ah a lo lut a; VC ten an cut duh chuan, duh zat zat an cut ang chu; i hlawh a ni lo a lawm. Kalphung-thar ah chuan hei hi her danglam kan tum a. Amaherawh chu, ‘thil khirh tak a ni dawn’ tih chu kan hre sa. Chuvangin, mahni bial theuhah pawh khan Ka MLA-puite khan min lo support char char se ka duh; hei hi kan tan tlan a ngai. Opposition emaw, Ruling emaw sawi a ngai lo, hetah hian; kan tantlan a ngai. Chuvang chuan, impact nei tha tur leh rah tha chhuah turin *oriented-* a hnathawh kan tum. Tichuan, kan scheme-te hlawk zawka kan chhawr tangkai theih nan, a tam thei ang ber convergence-a kalpui kan tum; inhnetauna kalpui kan tum. Chutiang tur chuan tunah pawh hian kan department-in Convergence Guideline kan duang mek a, kan peih tep tawh a ni. MNREGS leh schemes dangte convergence hmanga hmalakna lang tham hmuh kan duh avangin, *Model Project for Sustainable Development* kal pui kan tum. Kan *Ni-100 Inhlawhna* hmangin blockin khawtina project tur kha an rawn siam ang a, screening-ah a kal ang a, Minister te chairman-na hnuaiah kan thlang ang a, kan approve dawn. Chutah chuan a khaw thlan bik block pakhat kha kumin atan kan thlang ang a, an development tur kha kan vur bik ang. Khatianga khan khaw tinah a tul dana zirin kan insawn zel ang; chutianga target kan neih loh chuan Pu Speaker, kan kal darh lutuk a, vawiin kan thleng a nih hi.

Khawvel a changkang a mihring kan pung zel a; chutih rualin ramngaw a chereu a, tuihna a lo kiam ve zel bawk a. Nichina kan sawi kha - ramngawte tuihna siam kawngah pawh uar zawka hma lak kan tum. Ministry of Rural Development pawhin *Natural Resource Management* works lam priority pe turin min duh avangin, MGNREGS leh scheme dang hmangin tuihna tihpun kan tum a; hei pawh hi humhalha, nasa zawka hmalak kan tum. Hemi atan hian Labour budget leh Annual work plan kum thara tan siam turin Project Director te leh BDO te hriattirna kan pe vek tawh a ni.

Tichuan, MGNREGS achievement hi a tam angreng a, chhiar vek tawh lo mai ang; minute 43 ka hmang ta a. Kumina kan labour projection atanga kan target chu ni 75 vel

a ni a, tunah hian kan achievement hi district 7 ah ni 98 kan achieve a, district 1 ah ni 87, district 1 ah ni 85, district 2 ah ni 81 kan nei a; tun thla a tawp anga, minrawn pek belh chuan, ni 100 te pawh tihtlin kan tum a. Amaherawhchu, ni 100 ngei ngei inhlawh kha kan tan a tha ber em, tih lai pawh hi inhnial tham a ni, Pu Speaker. Ni 100 inhlawh lova kan awm thei a nih chuan, a tha zawk ve phian thei tho a. A chhan chu, kan state chu tlemin kan changkang zawk tawh a ni a tih theih a. Amaherawhchu, ni 100 complete kan duh avang khan, tikhan kan dil belh a nia. Tichuan, sum hmuh zawng zawng hi kumin kal mekah crore 506.42 a ni a, hei hi scheme 1 atang chauha kan hmuh a ni; a tam tawkhawp mai, Pu Speaker. Chu tak chu a ni a, engnge kan Ni-100 inhlawhna hian a rahchhuah, tih lai leh, kan sum hmuh zat nen hian a inmil tur a ni dawn lawm ni, tih laite hi ka'n han sawi zau duh chu a ni.

PMAY-Grammin hnuaiiah in pakhat sak tanpuinan 1.3 lakh pek a ni a, bial hrang hrang atangte pawh khan kan han dawng a; in sak la tan lote pawh an awm an ti a, a buaithlak khawp mai. Central atangin Minister of State pakhat inthlan hma daih khan arawn kal a, chutah chuan Minister khan 3rd instalment dawng tawhte, 2nd installment dawng tawhte khang dawng tawhte kha pe lovin, '1st installment te kha beneficiaries cover tam turin an ti e' an ti a, sorkar hmasaah khan; kha kha kan lo aw mai pawh kha a pawiangreng ka ti a Pu Speaker. A chhan chu, nichina kan sawi tho – 1st installment a dawng a, in a sa tan a, 2nd installment a dawng har lutuk a, kum 2-3 ruahin a nan chuan a mawih chhia a; engtingge kan tih ang? Hmanni review meeting kan neihnaah chuan Pu Speaker, thutlukna kan siam a, 'tunah chuan, heta installment kha, a zo hmasa tur kha kan pe tur a ni' kan ti a. A tahtawla kan pek vat vat loh chuan, nakinah a inchhek khawlang a, kan buai tho tho dawn a ni. Tunah hian 2018-2019 atang daih tawh khan pending a awm a ni. Chu chu kan chinfel vat loh chuan kan State achievement hi a chhe dawn; hei pawh hi kan enchian a ngai.

Tichuan, PMKSY water-shed component hi lei luangral turte, tuihna siam turte leh terrace siamna turte a nia. Hemi hnuaiiah hi chuan party worker-te pawh an inhlawhna tur pawh a awm ve thei tho a lawm. Dampa Bialtu-in 'a vaiinrawn chuh bik lo ula' a tih kha, a vaiin kan chuh bik lovang; water-shed committee te nen pawh kan insem ve ang chu maw le. A project neih zat hi ka sawi lo mai ang a.

Hemi RD hnuaiiah hian *National Rural Livelihood Mission* hi kan nei bawka, Pu Speaker, chutah chuan MzSRLM - Mizoram State Rural Livelihood Mission a awm a, hei hi kum 2023 April Ni 22 khan bul tan a ni a. Hma a lakna chu - *farm-related* a nih chuan, farm-a thlai chinte, ranvullhte a leng vek a. *Non-farm*-ah chuan - sumdawwna, chu chu Self-help Group nuho tana hmalakpui a ni; a tawi zawngin. Hmanni lawkah pawh MzSRLM hnuaiiah hian MKSP - *Value chain* hnuaiiah Ropuiliani - *Women Farmer Producer Company Limited* din a ni a, chumi hnuaiiah chuan share-holder nuho 912 a inziaklut tawh a ni. Anni ho hnuaiiah hian Sawhthing metric tonne 18 leh Mizohmarcha metric tonne 10 an leikhawm tawh a, phailama hralh turin February ni 29, 2024

khan Ch. Saprawnga truck terminal-ah kan zuk vai liam a ni; hei hi han tarlan loh atan chuan a uiawm em a.

Hemi hnuaiah hian *Start-Up Entrepreneurship* te a awm a, mimal tan loan nuai 1/- leh group tan nuai ₹5/- thlenga loan lak theihna te a awm a. Tichuan, DDU GKY hnuai bikah hian thingtlang mite skill training pekna scheme te a awm a; khang te kha miin eizawna an hmuh mai bakah an chungte pawh chawm thei tur khawpa eizawna skill an neih theihna tura pek a ni a.

BADP hi han sawi leh lawk ila. A tawp dawn a, a pawi viau mai a; scheme tharah hian a huam zau deuh zawk dawn ni pawhin a lang a. Hei hi tunah hian BADP-a hna approve sa 33 a awm a ni. Chumi thawhna tur chu kan Ministry chuan a rawn approve tawh a, finance lam atangin tih dan tur – *instalment-wise* a kan tih chuan kan tlai leh vek dawn si a; *one time-wise*-a rawn tih chuan, anmahni dan kalh a ni si a, chu chu an in be mek a ni. BADP hna identify sa nuai 674, approve sa kal mek a awm a. *Vibrant Village* programme hi an rawn ti turah kan ngai a, eng angin nge kan kalpui dawn, tih kan hre lova, kan nghak mek a ni.

Pu Speaker, a tawp lamah chuan, *State Institute of Rural Development & Panchayati Raj* hi Pu TBC-a khan a rawn sawi tawh a. An hna ber chu - Training & Research leh Evaluation Studies-te tih a ni. Hetah hian kum li vel ka awm ve tawh a, a bul tantu-ah pawh ka awm ve nghe nghe a. Chutah chuan *good practice* pakhat kan nei a, han tarlan loh atan chuan ka ui deuh a, Pu Speaker - Vehicle outsourcing sawrkarin min phalsak angin, kan RD Directorate atangin outsourcing - kan lirthei kum 8 chin a hlui tawhte kha lilamin kan ti rural a, chumi replace nan chuan a thar lei tawh lovin, outsource-in mimal ta kan hire a ni. Directorate lamin an rawn chhut a - motor pakhat kum 8 chhunga a motor maintenance leh driver hlawh, department-ina a driver hlawh kan pek atang hian, kum 8 chhungin nuai ₹47,19,273/- kan save thei a ni. A awmzia chu, nuai ₹58,999/- hi kum khatah motor pakhat kan save thei a ni. Chutiang a nih chuan, heng RD Department ina bul kan tan pawh hi department dang pawh hian ti vek ta ila, sawrkar inrenchenna kawngah hian a tangkai ang a, motor maintenance pawh kan buaipui a ngai tawh lo; a neitute'n an maintain ang a, a driver pawh an rawn intum ang a, khati khan sawrkar sum tamtak kan safe vek a ni.

Tichuan , a tawp bera tan chuan Pu Speaker, vawiina Demand sawi thei tura ka awm hi ka lawm a. Tukin leh nimin atang khan ka department chana officials te kan Secretary te, kan E-in-C te, kan Directors te, a thlamuan thlak hlein ka hria a. Hei hi naktuk Assembly House-a duty kan in-detail dan chu a ni - “Directorate-ah chungte chu; E-in-C office-ah chungte chu; Secretariat-ah chungte chu” tiin, an han indetail thlap thlap a. Kha detailment lehkha ka hmuh khan, ‘a va thlamuan thlak em’ ka ti a ni. Hetianga thawhhona tha hi han sawiloh atan chuan ka ui a, kan Department Officer te chungah ka lawm hle a ni.

Tichuan kan Demand lamah lut tawh ila, Pu Speaker heng ka Demand-te hi he House zahawm tak hian min pass-pui turin kan rawn ngen e -

<i>Demand No.</i>	<i>Purpose</i>	<i>Amount (in ₹)</i>
25	Public Health Engineering	2,87,60,16,000.00
32	Horticulture	1,22,83,85,000.00
38	Rural Development	4,56,51,65,000.00
TOTAL		8,66,95,66,000.00

HON. SPEAKER : Aw le, tunah chuan Minister zahawm tak Prof. Lalnilawma'n heng a demand-te -

<i>Demand No.</i>	<i>Purpose</i>	<i>Amount (in ₹)</i>
25	Public Health Engineering	2,87,60,16,000.00
32	Horticulture	1,22,83,85,000.00
38	Rural Development	4,56,51,65,000.00
TOTAL		8,66,95,66,000.00

House ah pass a rawn dil ta a. Remti a piangin, 'remti' ti rawh ule. (**Memberte: Remti.**) Aw le; remti lo kan awm chuan, 'remti lo' ti ula, (*Remti lo an awm lova*) A lawmawm e.

Awle, Minister zahawm tak Prof. Lalnilawma demand chu House-in lungrual takin a passed ta a ni. (**Prof Lalnilawma, Minister:** Pu Speaker, ka lawm e.)

Hei, waviin chu ka lo ngaihtuah vang vang a; 'thuawihna' tih hi ka rilru ah a awm a. Kan senior hotu thenkhatte, tawngkam khat pawh sawi lovin zing dar 10:30 a tangin; hei tunah dar 10:10 PM a ni tawh a, tunah an thu ngar ngar mai a ni a; 'thuawihna leh zawldawhna ngah a va ngai dawn em' tih te ka lo ngaihtuah mai mai a. Tin, zingah khan 'engtia rei nge member te hun kan inpek ang' kan ti a, 'minute 10' kan ti a, kan duhthlannain; minute 10 hmanh mi-pakhat chiah memberte zingah khan an awm a, chu chu, Pi Prova Chakma a ni a, midang zawng kha chuan kan bawhchhe vek a ni. Pi Prova-i thuawihna a lawmawm e.

Kan Leader leh kan Opposition Leader kha dahtha ta ila, kan zinga sawi rei ber chu, Dampa Bialtu Pu Lalrintluanga Sailo kha a ni a. Niminah khan, *hun hmanh tangkai ber-ah* kan puang a, a rawn hmanh-puk deuh em maw ni dawn ni.

Aw le, discussion zau leh zalen tak kan nei a, kan sawichhuah dan erawh a inang lo deuh a. Thenkhatin department hawi lam te, rampum hmasawna leh rawtna te; a thenin kan bial mamawhah hun kan hmanh hnem a; kan bial mamawha hun hmanh zo ta te pawh kha kan awm a; a tha vekah ngai ila. Kan Dy. Speaker nena kan bial chungchang

kan sawi ve theilo erawh hi chu, a khawhar thlak deuhhlekk a. Amaherawhchu, kan mamberte'n nangni aiin hun kan hmang rei zawk; kan bial mamawhte sawihnem zawkah min lo ngaihsak ula, a thain kan ring a. Kan bialte pawh khan, kan sawi ve loh avang khan, kan bial tan engmah kan ti dawn lo a ni bik lo a nia. Tin, kha, kan sawi vak kha a rem ve lem lova, kan bial chhunga BDO office te pawh kha min sawn sak lek lek chu a ni a, kha. (*Memberte an nui tlang a...*)

Engpawh nise, a tha vekah ngai ila. Department te kha eng eng emaw chu rilruah a awm a, han react vak kha a remchang lova, amaherawhchu, PWD lai kha han khak hlek duh lai ka nei a. Sawitu zawng zawng khan kawng tha vei hlei theih loh; 'maintenance kha kan ngaipawimawh hle mai' tih kha ka lo khaikhawm dan a ni a.

Tin, 'kawngpui awmna tawh phawtah chuan drain mumal a awm tur a ni' tih te; kan PWD te pawh han tang deuh sela; Mizoram Road Fund Board te pawh han herh nung sela; IRC atanga sum dawn thleng ringawt lo deuhah han hmang ta sela; toll-gate te siamin fines leh penalties atang te pawh khan han ti deuh sela; Minister fel tak kaihhraina hnuaiiah *repair and rehabilitation of roads* te hi chu, thui tak chu kan intodelh theih a rinawm a. Engpawh nise, kan hotute, kan department theuhte, kan hmabak a ko chho hle dawnin a lang a.

Tin, thil pakhat, han react loh theih lova ka ngaih chu - kan Engineer-te kha dem ang lek leka sawi kha a awmin ka hria a; khang kawng kawit kual, tun hma hun rei tawh tak atanga kawng an lo zawnte kha a kual-kawit thin em a, hei hi 'ngil zawka re-survey dan te, re-align dan te a awm lo maw' tih te a ni deuh mah mahin ka hria a. Engineer te dem lam emaw, a dukhawp loh lam niin a lang lova, ka lo hriat danin. Chuvangin, 'Engineer-te dem thu khalaiah khan ka hre lem lo a ni' tih kha kan sawi ri tel duh a.

Tin, kan Minister zahawm tak Pu Vanlalhlana khan ruling lama thut a khawr thu te kha a sawi a. Chutiang zelin budget te han pass ila, 'Pu Chairman' tih culture hi chu kan kal pel ve mai turah ngai ila, hma sawn chho zel turah inngai ang.

Vawiina kan business chu kan zo ta a. Naktuk March 2024, (Ningani) chawhma dar 10:30 ah kan thukhawm leh dawn nia.

Sitting is adjourned. (10:14 PM)